

**IOH. FRID.
HORNI
POLITICORUM
PARS...**

Johann Friederich Horn



BIBLIOTECA NAZ.

XXVI

A

25

NAPOLI

87. 41.

XXVI

A

25

BIBLIOTECA NAZ.
Vittorio Emanuele III

XXVI

A

25

NAPOLI





JOH. FRID. HORNI
POLITICORUM
Pars Architectonica
De
CIVITATE.

TRAJECTI AD RHENUM,
Typis Wilhelmi Klerck. A° 1664.



MAXIMO PRINCIPUM,
FRIDERICO III.

DANIAR. ET NORVAGIAR.

MONARCHÆ,

PIO, AUGUSTO, MAGNANIMO,

FELICITEM



Et publicæ compagem, &
genuinam regnorum figu-
ram; tum illud maximè
divini potentatus specimen

ac imitamentum, Majestatem, natalibus suis atque efficacius sacrosanctam ubique, & verè augustam, delineatam præsentì opusculo, devotissima pietate, offero Tibi, & consecro, AUGUSTISSIME FRIDERICE. MONARCHÆ. MAXIMO. DOCTISSIMOQUE. AC. SAPIENTISSIMO. REGUM. Quos titulos ubi exilis, & sublimi materiæ imparis scriptionis conscius animus cogitat, ob ingens ausum perfunditur horrore: placido tamen illo, qui venerantium esse solet, quando sacra formido præsentis Numinis modestam religionem facientibus subjecit. Reputanti sanè, quàm licet, magnitudinem tuam, DOMINE, & muneris divinitatem: à Deo, cujus persona venis æstimandus, secundus sedes: Regis, cui solutissima omnia sunt, pulcherrimum instar. Quoties in posterum illibatam, & suis auspiciis unicè valentem potestatem circumspicient ac requirent aliqui: Te, nullis exceptionibus, nullo precario jure parendi, imperantem, ostentabit regia doctrina. gratulabunda, tum sibi
de

de præclaro exemplo, quod veri & illi-
mitati Monarchæ nomen, nec imagi-
nariam ideam, nec sævam tyrannidem
finit esse; tum felici reipublicę, cujus
salutem, intempestiva subditorum in-
tercessione non impediendam, actuosi
imperii libertas maturat. Tanti Nu-
minis pulvinari aliquid non magnum
apponere, proximum audaciæ videri
queat. Accedit huic fastigio æqualis,
sapientię immensa profunditas, omnis
divini humanique juris intelligentiâ
circumfusa; tot pragmaticis doctrinis
firmata penitissimè, & graviori illâ
civilium experimentorum eruditione
suffulta. Cujus instructu non tantum
eleganter complecteris omnes im-
peratorias artes, regendi morosum il-
lud animal, hominem; & verissimo
itinere, per apertum ac promptum
justitiæ campum, procedendi ad ea
consilia, quæ sine obliquis supple-
mentis, sine injuria, civitatem habere
docent, solidamque ac propriam utili-
tatem publico spondent: sed intror-
sum pergis, Te, ac imperium tuum ca-
pis; quid sit Monarcham esse, intelli-
gis;

gis ; penitum ac reconditum omnium
regiorum actuum fontem, Majesta-
tem, nosti : ejus ortum, ingenium &
vigorem, paucissimis suis possessori-
bus intellecta nomina, callentissimè
affecutus. Anceps ideò magis quidem,
ac dubia causâ mea est : verendumque
valdè habeo, ne in tam abstrusa re
compertus erroris, temeritatis fiam
manifestus. Sed non idem indignum
est regali sceptro, quod fastigio hujus
fortunæ inferius est. Ipsa tenuitas, quò
à fastu longius abest, plenior emere-
tur gratiam. Lallantium puellorum
inconditos & infantes hymnos, pro-
pitia aure suscipit, & in deliciis haber
Deus. Simplicitas nempe, vel rudior,
divinitati gratissima est. Illa quoque
celebrata omnibus humanitas, qua Au-
ctoris Tui bonitatem æmularis stre-
nuè, non hic sistet, Clementissime
Rex, ubi hominis peregrini & exte-
ri hilarum confidentemque accessum,
interpretari habet ad publicum testi-
monium piissimi Tui principatus.
Adhæc quæ fiduciam promovet &
attollit, sublimitas argumenti est : vel
gra-

gratiam conciliatura, vel veniam. Satis se Tibi, Maxime Heros, commendabit hæc meditatio, si deprehendes, Principum causam, & in hac publicæ tranquillitatis, agi. Non aliena est à regiâ benignitate, quæcunque regnatricem potestatem memorat commendatio. In qua si labi continget, communi forte excusabimur. Admonuit omnes suæ humilitatis grande hoc cœli depositum, ut quantum est ubique doctissimorum, & Majestatis reverentium hominum, qui hanc partem civilis sapientiæ attigerunt, dormitaverint aliquando; & nemo sit, qui non deprehendatur aliquid humani passus. Absolvat me denique una propositi rectitudo: cui pulchrè constare existimabitur ratio, ubi intelligent lectores, me non subterfugisse judicium Principis optimi; & scientissimi simul jurium suorum. Documento id erit; non me, in præcipitia asserta impulsam ambitione, aliquid dedisse regiis auribus. Nam nec opus habet sceptrum Tuum liberrium vanis blandimentis: & providentissimus animus deprehenderet

compositam personam, & sanctissimi
mores detestarentur. Una Veritas est,
in bonum commune eruptura, quæ me
stimulavit, ut sacra summi imperii reli-
giosa mente cognoscerem, cognita pu-
blicè panderem, & quorumcunque sub-
ditorum animis inculcarem cum reve-
rentiâ: simul pestilentissimum aucto-
rum genus, monarchomachos, Maje-
stati, quieti civili, Deo denique ipsi ini-
micum & infensum, tanquam professos
humani generis hostes, arguerem, con-
vincerem, damnarem. Videbor sum-
mam destinationis meæ consequutus,
ubi probaveris, ad indulgentiam Tuam
pertinere hunc conatum. Miscet suas
preces Politica, maximè indiga regii
favoris & auctoritatis: ut coërceatur il-
la ab inferis oriunda secta, & prævaleat,
ac frequens fiat rectior sententia. Fa-
cile poteris exorari, Pientissime Prin-
ceps: eoque majorem animi tui fidu-
ciam habeo, quò arctiori complexu lit-
teræ, præsertim civiles, à Te foveantur.
præcipua nempe sollicitudinis regiæ
pars, nec minus foecunda inclutarum
laudum seges, Majestatis intelligentis-
simos

sumos efficere cives, & alios populos
Tuorum exemplo : id verò opus est,
& pulchritudine sua ac utilitate conve-
niens seculo ; æternitate famæ ac glo-
riæ, Tua magnitudine dignum. Sumet
animos ac vires indignè habità à torto-
ribus suis Politica, & Te regalium stu-
diorum Assertore ac Vindice, in pristi-
nam dignitatem collocata, exferet la-
certos : ac ubi generosa ingenia, quæ,
tanquam instrumenta imperiorum, ma-
gnis usibus præparantur, bonis opinio-
nibus, & vero Monarchiæ sensu imbu-
ta, occupaverit salutariter ; felici con-
tagio in populum mox propagata latif-
simè & diffusa, Tuo beneficio, trium-
phabit. Quam clementiam grato ac
prolixo munere, Tui agnitione, pensa-
bit. Nolint potestatem suam publicè
agnosci, eamque potius libertatis po-
pularis involucris obnubant, qui inani-
bus simulachris & spectris illudunt
gentibus, quibus vivendi arbitria eripu-
erunt. Legitimi imperii notitia, firmissi-
mum coagulū civitatis est : arctius con-
tinens multitudinem, quàm ubi in ter-
rorem composita omnia sunt ; ubi impe-

rantes & subditi metuunt invicem , & metuuntur. Non tot horrenda regicidia, tot seditionum turbamenta, aut defectionum perjuria , nostrum & superiora secula infamassent: modò ex Majestatis amplitudine , obsequii sui nexum voluissent metiri, qui in parendi sortem nati erant ; aut, ut pensi haberent, olim fuisset edocti. Pluribus meticulosis machinamentis, & sumtuosis artibus carebunt regna, quando parendi necessitatē civium conscientia assequetur. Fretus imperii sui tutelā, quam vix hodiè præstat innocentia, Princeps , inermis etiam , credet securè caput suis. Qui de Majestatis vi certiores , prisca illa solemnia vota, quibus Imperatori domum securam, senatum fidelem , populum probum & quietum, precabantur, ignominia sibi ducent , tanquam suspectantia fidem, cujus integritatē supplicationibus expetendam censebant: remittentes pudendam nuncupationem hominibus nequam , quorum perfidia eas meliorum preces excitavit ; ipsi ultrò pii , decora contentione certabunt , quis Majestati obsequentior se probare

cu-

cupiat. Hinc reverentia, & amor, & promptus atque alacer in omnia obsequia, & tantum de imperantis salute, cui omnium felicitatem inniti novit, sollicitus animus, tranquillitatem communem firmabit; & blando irritamento plenior provocabit indulgentiam Principis: qui, sponte memor sui muneris, multiplici, & paterno affectu enitetur, ne sui paratiores sint beneficia promereri, quam ipse conferre. Tum multitudine solum à familiâ lenissimi patris, nihil conjunctissima necessitudine distabit Respublica. Dabis nobis, optime Princeps, divino munere, beatissimam hanc civitatem: impetrandam Tua pietate, quam profanis non contigit adipisci. Interea Tuorum precibus conjungunt suas etiam dissiati populi, quibus incomparabilis bonitas piissimi Principis cordi & admirationi est. Commendantes Deo Serenissimam Conjugem, & omnem illam Heroum Propaginem, sincera pro incolumitate Tua suscipiunt vota: ac Tibi, religionis & fidei tutori, eruditarum artium asylo; civium amori, delitioque humani
ge-

generis, vitam prolixam, domum felicem, lætos regiarum cogitationum eventus, florentem rempublicam, imperium gloriosum, & quantum ubique magnis regibus in votis esse solet ac debet, quod omne, super ingentes plurimasque virtutes, præcipua sanctitate consequi mereris, ab eodem Tuo Auctore se impetraturos, confidunt animosè. Annuat bonorum pietati, & Te Sanctissime Heros, servet Deus!

MAJESTATI TUÆ

dicatissimus

JOH. FRID. HORN.

Brigâ-Silesius.

Benevole Lector,



I intentioni mea diffiderem ipse, eamque tibi suspectam fore arbitrarer, obliquis delinimentis propitiandus esses: nunc quia corruptione nulla opus est, tribunal tuum rectis oculis subibo, postquam de candore tuo, & libertate censendi, mihi satis est prospectum. Ipsam quidem suscepti laboris operam ultrò absolves: ut ut interdicto videatur indigere ingens multitudo libellorum, quos Politicas appellant. Nam si non alio argumento vincerem, morem scripturientium allegarem: qui cum publicus sit hodie, à te facile impetrarem, ut culpam meam, seculum diceres. Propior autem ratio, non una exscribendi libido, quæ vulgo regnat, me tuebitur. Notissimum est, Systematum, Compendiorum, Institutionum, Doctrinarum civilium, quæ prostant, iniri numerum vix posse: sed istud simul latet neminem, his iisdem copiis discientium delectum conturbari, & pauca admodum esse; quæ normæ suæ tractandæ respondeant; conscripta eo ordine, eaque accuratione, quam rei-

*reipublica natura postulat. Qui hac studia
seriò coluisti, ipse experimentum capisti,
scio, quàm impeditissimum iter sit ingresso
hanc sylvam. Ita consilia, jura privata,
singularia instituta patriæ civitatis, indi-
gestè compacta, frequenter se ingerunt
nomine Politica, ut misturam inveneris
tetriorem eâ, quæ Poëtarum chaos confu-
dit. Aliqui ex his præclaris doctoribus, ad-
eo peregrinantur, & hospites sunt, ut suæ
professionis argumentum ignorent. Alii
infesto regibus animo accesserunt, eaque
sub Politica, & civilis doctrinæ titulis
promulgarunt, quæ civitates ordinatas
in turbas, seditiones, ruinas precipitare
consueverunt. In propatulo sunt ejusmodi
damnandæ opiniones, & moderata cen-
senda foret horum ducum imperita mali-
tia, si veneno suo pauciores, qui his litteris
animum applicuerunt, infecisset. In cæ-
teris quoque rectioribus, aliquando stabi-
les rationes, continuum integri operis or-
dinem, semper mecum desiderabis, Erudi-
te Lector. Ut enim de universi operis, quo
civitas temperanda regendaque est, conti-
nentiâ dicam nihil; quam vix unus, aut
alter Systematum scriptor suis numeris de-
li-*

lineavit: paucissimos nominabis, qui partem illam principem, quæ Objectum explicat, ad leges nativæ methodi tradiderit. Quod hætenus tolerabile videatur. Sed ubi Majestatis veram originem, vim, ac perpetuum jurium contextum declarare debebant, altum silentium esse, minimè ignoras. Non inficiabor, peculiaria scripta summorum hominum exstare, quæ pleraque jura Majestatica singulatim docuerunt: libellos autem methodicos, qui exactam tractationem contineant, non adeò multos habebis; qui autem continua serie fontem, & jurium derivationem, cui tutò queamus fidere, exhibeant, fortcan nondum videris. Ego certe deprehendens ejusmodi lacunas, hiulcâ traditione auctorum haud potui acquiescere: sed pertinaci commentatione indaganda mihi decernebam, quæ animum tandem tranquillarent, & concinnam dispositionem promoverent. Id si molirer, non pœnitendam conjiciebam operam futuram; sed multa simul innovanda, & in plurimis, ab antiquis recedendum fore, prævidebam. Non me præteribat, invisum esse Novitatis vocabulum: & ipse vanitatis coarguebam homines, qui ostentandi
in-

ingenii, & aucupanda gloriola causa, in-
audita monstra procidunt; damnabam
vero ut maledicos, qui hoc unice agunt, ut
reprehendendo veteres; materiam fama
quarant. Neque nunc aliter censeo. Illam
vero servilem superstitionem, quae omnia
veterum dicta, tanquam oracula adorat,
& in eorum tutelam, tanquam pro aris &
focis pugnat, omnitempore horruì: &
in presenti conatu me remorari passus non
sum. Caca & inconsulta veneratio est,
quae in veritatis indaganda opere aliorum
inventam miratur adeo, ut insulse credat, u-
niversa ex tripode dicta. Homines fuerunt,
quibus solemne est, errore aliquo duci.
Damnarent ipsi, qui tantopere coluntur,
præposteram reverentiam, & fœdum ser-
viendi genus, & ad suum exemplum re-
vocarent. Contradicit subinde Platoni
Aristoteles, ut aliquibus amulatio, invidia,
& agritudo animi in suspicionem veniat:
ego autem nihil pravi aut maligni subisse
puto; sed planè pro philosopho egisse Stagi-
ritam, quoties à meritisimo præceptore di-
vertit. ingenuè quippe professus erat, se
veritatis causa vel propria asserta deletu-
rum. Et animosa illa censura, qua priores
tra-

tractaverat, & tendit satis, quo jure uti,
qua libertate à cordatis legi & examina-
ri, non detrectaret. Ita quidem generosi
animi, qui illa ætate, aut Romanorum tem-
pore, civiles litteras sectabantur, incede-
bant, ut nomen viri ubique honori, nun-
quam offendiculo esset. Postquam insolen-
tiam ac fastum Græciæ, Italiæque, victrix
barbaries castigavit; & hæc iterum feli-
cibus Germanorum armis pulsa, studiaque
elegantiora reducta sunt: in Aristotelis
scripta inciderunt homines mediocres, qui
ingenio & acrimoniâ philosophi perculsi,
nihil quicquam secius positum occurrere,
falsò sibi persuaferunt. Hi crudeli imperio
homines ingenuos, quos discipulos nacti e-
rant, coëgerunt, ingenti veritatis damno,
in verba auctoris jurare. Prorsus affir-
mandum est, virum capacissima indolis, &
industriæ simul actuosissima, observasse in
descriptione rerum publicarum plurà nota-
tu digna, & datura imperantibus saluta-
ria consilia: sed istud simul edisseram in-
trepide, universi operis politici structuram
mancam esse ac mutilam; materiam juris
ac legum ferè intactam mansisse, si gene-
ralissimos discursus excipiam; quin ea ve-
stigia

stigia superare, quæ sanæ rationi adversantur. qualia de abortu licitè procurando, de exponendo partu monstroso, de legitimo bello in barbaros, ex causâ naturalis servitutis, & pleraque similia. In constituenda civitate quàm aptè cohæreant dogmata ejus, interpretum altercationes docent. Præcipuum momentum in Majestatis doctrina ponendum erat: cui videtur iniquior, dum absolutum regnum, invidioso ubique dictorio, barbaricam tyrannidem appellat. Unde non immerito Commentatori suo doctissimo observatus est perplexè loquens, quoties de imperio sermonem instituit: ne ab altera parte Alexandrum, ab altera suos Græcos offenderet, aut irritaret. Hæc talia animadvertens, Aristotelem unicam regulam civilis sapientiæ non existimabo, & aliunde supplendum potius censebo, quicquid in veterum scriptis ad summam Politicæ deest. Candidè fateor, me ex Græcia, aut florente Roma, doctrinam de imperio civili haud petiturum. quod scriptores, dulcedine libertatis popularis inebriati, sinisteritatem judicii manifestè prodant, quando ad definiendam regum potestatem ventum est. Periculosa illa
tali-

talium auctoritas, cui in præjudicium politica prudentia innisi sunt, quotquot religioni duxerunt, ab antiquorum sententiis vel latum ungvem decedere, ita occupavit terrarum orbem, ut erectis ingeniis anceps sit & difficile, unam alteramve sententiam emendare. Illustris Bodinus, cum discerpta Majestatis fictum & monstrosum factum, mistam rempublicam, ex ditione civili relegaret, quot latratibus, quot incurribus ab alieni erroris mancipiis impetitus fuit? hostis nimirum humani generis judicatus, in quem agmine facto tendendum sit, quod sacrosanctam philosophi dictaturam minus obsequiose esset veneratus. Sed fremat impotentia vulgi: liberiora capita nunquam absterrebit à concinnandis studiis. Æternis dubiis torqueri, intolerabile est, ad solidiora aspiranti: & istis non medebitur, nisi removeas incompta, componas confusa, veriora adjicias, præstruas firmiora. Murmurent plebeje anime: sua sufficientia & tranquillitas, & doctiorum consensus solabitur animum, pro communi bono audentem. His & aliis, cum viderem jura Majestatis, quæ disjecta, scopis dissolutis similiora passim jacebant, non posse concinnari, multo minus integrum corpus po-

politicum in suum orbem, & naturalem situm reponi, sine multiplici conversione; obfirmavi animum: & salva veterum & recentiorum fama atque auctoritate, illa asserui, quæ singulas potestates imperatorias derivarent ex uno capite; cetera vero omnia civilia exunciata in unam consonantiam ordinarent. appositis ubique solidissimis firmamentis rationum; sine quibus in publicum prodire erubuissem. Ita interim à recepta vulgo methodo & opinione recessi, ne alicui insultarem; sed potius haberem, simplicibus verbis & innoxiiis, mea proposuisse. Hoc temperamento sincerè servato, commendabis moderatum ab usitatis, sed minus rectis, secessum: & spero, me tibi, tam facili negotio, ipsius commutationis rudiores formam, & inaequalem exponendi mensuram excusaturum. Utrique nimirum probabilis sua defensio supererit. Quamvis enim civilem materiam splendidus ornatus maximè deceat; & grande illud majestatis argumentum dignum characterem cupiat: attamen oratori de tanto axioma verba facienti, æterna lex erit, magnificâ dictione aures implere; in ordinando compendio dogmatico, ad usum tyronum politica, nunquam

quā fuerim sollicitus de elegantia loquelæ.
Incedant figurarum phaleris, & speciosa
lingva lenocinentur turpitudini suæ, qui
verba dare instituunt, qui plebi persua-
dere conantur, quod ipsi haud probant.
Veritas, etiam nuda, placet. Egregiæ
& validi sensus, etiamsi barbaro prolati
ore fuerint, afficiunt abundè doctrinalibus
rebus intentum lectorem. Civitas nimirum
præ manu est, non Grammatica. Compen-
dium autem exhibeo, non universæ Poli-
tica; sed principis saltem partis, quam
Architectonicam voco: propter expositio-
nem objecti civilis, cujus præcipuum mem-
brum, Imperium majestaticum, basin sub-
sternit operi politico, & instar fundamen-
ti est integræ Administratoriæ Prudentiæ.
Quam in Proæmialibus, ubi distribuenda
erat Politica, saltem nominavi; præsentì
tractationi non confundendam. Nisi quod
uno, aut altero loco, brevis digressio for-
manda erat in forum Juris Gentium: quæ
paucissimis peracta, cum indicio peregri-
næ operæ, ne quis transitum in aliena jure
culparet. Caterum instituti memor, bre-
vitati sedulam operam navavi; id summa
contentione agens, ut juri majestatis de-
ductio-

testatis. Interim præcipua capita munienda
erant, contra vim etiam apertam: unde
prolixior disputatio, & plurimum, quæ obji-
ciebantur, plenius examen. In quibus si
difformis illi adstrictæ tractatio appareat,
inequalitas tribuenda erit diversæ qualita-
ti summorum principiorum, & sponte nascentium
sequelarum. Illis tota moles instruitur:
illis subvertendis imminent adversarii: con-
tra quos & firmari & muniri debent. Incre-
dibile dictu est, quantis malis affecerit plu-
rimas gentes ignorata causa Majestatis.
Non tuta fuit Germania, Galliaque ante,
quam solemnibus comitiis sanciretur, Deum
esse solam causam Majestatis: qui aliter
doceret, castigandum deportatione. Maje-
statis realis monstrum plurimis civitatibus
crudelissimas clades intulit. Tam perni-
ciosis erroribus toto corpore incumbendum,
& valida manu in ipsa vitalia figendum
premendumque ferrum est; non retrahen-
dum à vulnere, donec nulla palpitantis ne-
quitiae signa, fidem fecerint extinctæ. Hic
labor, cum uno ictu haud expediatur, Ma-
jestatis munimenta quandam desidera-
bant amplitudinem. Non censenda igitur
est nimis prolixa dissertatio, quæ sa-
luti regnorum prolixè cavet. Unum re-
stat

ductionem ex uno fonte & capite, concisa, qua possem, dilucidatione absolverem. In imperii civilis, & ejus partium efficacia demonstranda, potentissimam vim, quousque ascendere possit, respexi. verbi gratia, imperium in personam eò validum deprehendi, ut caput subditum præsenti periculo obijci, corpus tradi, vita eripi possit. Dominium in res privatas ad occupationem usque valere, animadverti. Non quasi promiscue in hac extrema juste semper tendat Majestas; sed quod reliquis circumstantiis, talia urgentibus, jure suo tanta moliri queat. Illas particulares factorum figuras, quibus attemperanda est imperii usurpatio, omisi: propterea, quod prolixiores sint, & justis commentariis debeantur. In plurimis æquitas boni Principis potens est, quæ rigorem imperii paterne moderatur: sed nec illius mentionem feci. quod partem faciat officii rectorii, cujus doctrinam Consultatoria Prudentia sibi vendicat; & videam, occasionem errandi fuisse nonnullis, qui crediderunt imperite, valorem imperii, ultra clementia officium & benignitatem protensum, injuriosum esse. Satus igitur erat, peregrina non attendere, valitura, legentium vitio, in detrimentum vera potestatis

stat monendum. Quoties dissentientes examina-
mini, illos etiam adduxi, qui in ple-
risque recti sunt, & magnam operam
studio civili contulerunt: quales Arnisaus,
Barclajus, Grotius. non ut insultarem cla-
rissimis viris: sed ne simplices, horum
auctoritate in ceteris commodè usi, in præ-
cipitia ducerentur. Ejusmodi loca obiter
notavi, ne tyrones, protecturi se tali sen-
tentiâ, nudatum obvertant monarchoma-
chis latus. Liberè hîc versatus sum; quod
nunquam ad injuriam pertinere censui,
ingenuam ostensionem alicujusnavi: modò
livor, & reprehendendi libido absit. Fidelem
admonitionem à te quoque, Erudite Lector,
quantis possum precibus expeto: maximo-
pere rogans, digneris benevolè suggerere,
quæ transformanda in hoc opusculo judi-
ces. Ego, quam nunc invito, actis publicè
gratiis, humanitatem tuam collaudabo.
Hac benevoli judicii tui æquitate ad elabo-
randa, quæ huic operi coherent, me excita-
bis. Tibi interea incolumitatem precor, &
laboribus, quos reipublicæ impendis, faustis-
simos successus.

IOHANNIS FRIDERICI HORNII,
 D E
 CIVITATE,
 P R O O E M I A L I A,
 De
 Constitutione Politicæ.

C A P U T I.
 D E
 Vocabulo Politicæ, & Politici.

1. *Habituum tractatio duplex.*
2. *Politica Derivatio, & Homonymia.*
3. *Synonymon Latinum.*
4. *Politicum, & Politicus.*



Civitatum indolem explicaturi in sequentibus, præparatoria quædam in antecessum habemus declaranda, de Civilis Doctrinæ essentiâ. Ne illotis manibus in ipsam rem descendamus ante, quam naturam ejus fuerimus contemplati: tum ut futura Tractatio suis partibus legitimè absolvatur. Ita enim creditum hæcenus ab Eruditis est, quamlibet concinnam habituum Traditionem, duobus membris absolvi, *Doctrinâ Proæmiali*, quâ *Extraessentialem* vocant; & *Essentiali*. Hæc
 A peni-

2 PROÆM. DE CONSTITUT. POLITICÆ
penitam exponendæ rei essentiam delineat;
nec citra dispendium, aut detruncationem in-
tegræ doctrinæ, omitti potest: *illa*, quod ad
primariam contemplationem hæud requira-
tur, neglecta, mutilam quidem non relinquit
objecti sui declarationem; cæterum diluci-
dandæ facilitandæque disciplinæ cum pluri-
mum conferat, sine incommodo discantis vix
insuper habebitur. Quamobrem, quum in
morem communiter receptum, & institutum
minimè damnandum abierit ista ratio, ut
principi tractationi præmittatur ipsius Habi-
tus compendiosa delineatio: non deerimus
consuetudini: sed *Definitionem* Politicæ ac
Divisionem, quæ futuram substantiam essen-
tialis operis præclare juvat, in limine intuen-
das proponemus, postquam de nomine Politi-
cæ nonnulla erimus præfati.

II. *Politicam* Græcum vocabulum esse,
ἀπὸ τῆς πόλεως, à *Civitate*, circa quam oc-
cupatur, habens originationē, notius est, quam
ut dici debeat. Quare ut in hâc derivatione
multis immoremur, & ostendamus per amba-
ges, quomodo id cum aliis habitibus, qui ab
Objectis nomen ac titulum consecuti sunt,
commune habeat, parum attinet. Multipli-
cem vero hujus vocis significatum vulgò an-
notant, qui *Moralem Philosophiam* ab ARISTO-
TELE vocari *Politicam* contendunt. lib. I. *Ni-*
com. c. I. ubi doctrinam de moribus *πολιτικὴν*
appellare dicitur: quod *primo Magn. Moralium*
repetit, *partem Politicæ* istam statuens. Aper-
tius lib. 1. *Rhetoricorum c. II.* *πολιτικὴν* nomi-
nat

nat. Sive adstruamus hanc sententiam, sive refutemus; nihil quidem refert magnopere: vix puto tamen citatis locis Homonymiam latere: quod *principio Nicomachicorum*, non *Ethica*, sed *ea*, ad quam hæc ordinatur, vocetur Politica; in fronte quoque *Magnorum Moralium*, expresse τὸν ἦθος, sive *Morem*, & doctrinam de moribus, *partem Politicæ*, non *Politicam* vocet. quod quomodo accipiendum sit, infra dicemus. In Rhetoricis quidem, *Traditionem de Moribus*, *Politicam* appellat: sed tum non *substantivè*, pro habitu Politicæ sumendum est nomen; verum *adjectivè*, ut civile quid inferat, ad civitatem quocunq; modò spectans. Rationē hanc habet interpretatio, quod in eādē lineā similis conditionis habetur Rhetorica; quam Politicæ personam subire, ibidem Philosophus testatur: non aliam ob causam, quā quod administrationi civili mirè conducat. Qui ad Homonymiam referunt distinctionem, quā Politica sumitur *Systematicè*, vel *habitualmente*, minus eruditè sentiunt. Nemo ex universā antiquitate adeò proprietatis vocum negligens fuit, qui *Politica* nomine designaverit librum. Hesternum inventum est, quod aliqui minus accurati, aut palam absurdi auctores, nobilissimas quasque scientiarum in volumina compegerunt; & habituum naturas, proprium humanæ mentis bonum, non sine prolixa confusione, Typographi litteris, & compactoris ligaturâ miserè circumscripserūt. Quare, cum apud Græcos, à quibus Politicæ nomen accepimus, inveniatur nusquam ea lo-

quen-

4 PROœM. DE CONSTITUT. POLITICÆ

quendi formula, quæ vocabulum, intellectui debitum, chartis adsignet librarii: opus non est, ut errorem paucorum hominum, evolutione homonymiæ vel excusemus, vel confirmemus. Illud in confesso est, strictius capi Politicæ vocem à Philosopho lib. vi. *Ethicorum*, cap. viii. quando dividitur civilis prudentiæ ambitus, in *partem Architectonicam*, seu *Nomotheticā*, & *legislatoriam*, quæ universam Remp. certis juribus ordinat atque constituit; & *partem illam prudentiæ*, circa singula versantis, quæ *commune ac generale nomen retinet*, ut ad modum totius audiat *Politica*. Quæ omnem administrationem civilem denotari, manifestum est ex sequentibus, ubi eandem subdividit in *Dicasticen* & *Buleuticen*, *Judiciariam* & *Senatoriam*: quarum prior Judiciorum formam disponit; altera consilia & deliberationes, de Republica feliciter administranda. Causam adjecit illam in principio capitis; quod actionem civilem soli videantur expedire Judices & Consiliarii. Quapropter *Rempublicam administrare hos tantummodo dicunt: soli enim agunt isti, tanquam artifices*. Quæ ratio, cum in prudentia Senatoriâ, seu Consultatoriâ, in primis obtineat: partem hanc per excellentiam quandam totius titulû non præter rem honestabis, & merito vocabis Politicam.

III. Æquipollens nomen, quo Civilis hæc Prudentia nominetur, & exprimatur unâ Græcæ vocis decor ac vigor, apud Romanos non invenio. credo defuisse congruum vocabulum

lum, quod dignitatem ac sublimitatem rei satis exæquaret. In cujus interim locum substituemus Politicæ vocem: quæ usu & doctorum consuetudine, civitatem Romanam adeptæ est. FABIVS tamen QVINCTILIANVS, l. II. Inst. Or. c. xvi. p. m. 127. *Civilitatem* dixit. *Plerique credunt eum in hac esse opinione; (de Platone loquitur) ut Rhetoricen non artem, sed peritiam quandam gratiæ ac voluptatis existimet, & alio loco Civilitatis parviculæ simulachrum, & quartam partem adulationis, quod duas partes civilitatis corpori assignat &c.* quam appellationem pag. 129. repetit. Satis concinnè excogitatum id est; verum ab usu non approbatum. Vidi, qui varios titulos librorum congererent, eosdemque pro *Synonymis* Politicæ venditarent. Quando nimirum Auctores scripta sua diversimodè insigniunt; & alius de *Republica*; de *doctrinâ civili* alius format titulum: hic *Sphæram civitatis*; ille tractatum de *Regno*; iste aliud schema fronti præfigit: creditum est, *Synonyma* Politicæ adesse, cum Satura & farrago inscriptionum esset collecta.

I V. Agnatum vocabulum *Politici* est, quod non eadem notione usurpatum Scriptoribus legitur. ARISTOTELES brutis animantibus id epitheton adscripsit, duplici quidem significatione. alibi enim *laboris ejusdem communio-* nem; alibi *congregationem* indigitat. Sic *Histor. ani. L. I. c. I.* Civiles appello animantes, quæ labori communicant eidem, quod non omnibus gregalibus competit. *Civilis generis est homo, apis, vespa, formica, grus.* Quæ animantes ob-

6 PROœM. DE CONSTITUT. POLITICÆ
congregationem alibi id nomen sustinent : quo
sensu homo quoque *animal Politicum* vocatur
I. Pol. cap. II. *hominem esse civile animal ma-*
gis, quàm quavis apem, aut aliud congregabile
animal, manifestum est. Et subest hîc deno-
minationis causa : nam à congregata multi-
tudine *πόλις* quoque dicitur, in quâ homines
πολιῶσιν, versantur. Ad præsens institutū ma-
gis accommodatum est dicendi genus, quô
Politicum nominamus, *omne civile*, ad civi-
tatem quacunque ratione referendum. ita *Ius*
Politicum, quod civile nobis est, Naturali op-
ponitur. Strictiori significato ARISTOTELES
I. Pol. c. I. *Politicum* appellat *civem Reipubli-*
cæ liberæ, vel democraticæ. quando secundum
rationes scientiæ hujus partim regit, partim regi-
tur, Politicum dicunt. Quod ipsum inde oritur,
quod species popularis Reipublicæ *Politia* voca-
tur. Neque hæc acceptio Latinis incognita est,
qui *incivilia, plusquam civilia* dicunt, quoties
designant machinamenta, quæ libertati Rei-
publicæ popularis fraudi sunt : & contra *civi-*
lem animum, de studioso popularitatis, aut
clementiæ, quæ pristinam libertatis faciem
permittit civibus, ponunt. Hac notâ *civilem*
animum Cæsari SÆTONIUS concedit, cap.
LXXV. & TACITUS de Germanico I. An. XXXIII.
n. 4. *Nam juveni civile ingenium, mira comi-*
tas, & diversa à Tiberii sermone, vultu, adro-
gantibus & obscuris. Item II. An. 81. n. 3.
Displicere regnantibus civilia filiorum in-
genia. Sic Nervam EUTROPIUS civilissimum
Principem appellat. Nimis quoque arcta est
usurpa-

usurpatio *Politici*, quando in Imperio Germanico Status dividuntur in *Politicos*, seu seculares, & *Ecclesiasticos*. Ingens vero abusus augusti nominis est, quoties desperatissimæ malitiæ homines, qui honestatem, fidem, religionem, Deum, juxta æstimant, tam sublimi titulo indignissimè vulgò insigniuntur. GRAMONDI, Historiæ Gallicanæ lib. v. p. 313. ista sunt: *Hæc sectarii, hæc Catholici, quos à contemptu religionis dixere Politicos*. Et iterum pag. 322. *At, ut Politica gens, sectarii, ne primi bellum denunciassent videantur, dissimulanda contumacia, nova Regi delegatione illudunt*. Eodem libro, p. 289. *Imminere casum hesitanti, nec fidem datam, nec religionem spectandam, is momentis, quæ saluti decretoria sunt*. Hæc *Politici*, pessimum genus hominum, quibus plerumque Deus & religio pro nihilo sunt. Quos suis coloribus depingit celeberrimus BOECLERUS, in com. ad Nep. p. m. 58. *Hi sunt hodie, qui se Politicos vocant, homines sine bonâ mente, & ad exemplum Callicratis apud Nostrum, sine ullâ religione ac fide, callidi interim & ad fraudem acuti: nihil illis nefas, quod questum; nihil infame, quod commoditatem aliquam promittit: cælum, jura, leges, fœdera, divina, humanaque omnia, nec sancta, nisi ex usu; nec timenda, nisi per simulachrum*. Contra ea parricidia, incestus, injuriæ, cades, inter artes & speciosa nomina, & sacra tuendi status jactantur. His propudiis regiæ scientiæ meritò detrahitur à cordatis viris larva, ne sub e-mentito nomine imponant simplicioribus, &

8 PROœM. DE CONSTITUT. POLITICÆ
in odium atque invidiam genuinæ Politicæ
studium adducant. Vix Græcorum beneficio
nomen hoc tenemus: & ideo tuendum illud
magis est. quo amisso, non habebimus aliud,
ad exprimendam regendæ civitatis artem.

C A P U T II.

D E

Genere Politices.

I. *Politica est Prudentia.*

II. *Non est Systema; nec Doctrina, aut Disci-
plina; non Ars.*

III. *Non Scientia; nec Pars Philos. Practicæ.*

IV. *An Sapiencia.*



Os missis omnibus ambiguis
sensibus, Politicum verum ap-
pellamus & consummatum, qui
præditus est illâ civitatem tuen-
di ac conservandi prudentiâ,
quam genuinam Politicam vocamus. Hujus
naturam propiùs nunc intuebimur. Num
definiri possit Politica, disquirant illi, qui in
hoc argumento non reperiunt, quod seriò quæ-
rant. Nos sine hæsitatione eandem sic descri-
bimus: POLITICA EST PRUDENTIA CIVITA-
TEM REGENDI. *Prudentiam* esse Politicam,
definitio *prudentiæ* docet. Inter activos e-
nim referendus omnino habitus noster est: &
cum in *actione*, quam propriissimâ notione
Praxin

Praxin dicimus, versetur; non poterit non Prudentiæ nomen mereri. Est enim *habitus intellectualis practicus, cum recta ratione actibus*. Adhæc Prudentiæ indoles latius patet, & Morali, Domesticæque adscribitur. ARISTOTELES illud quoque discrimen notavit; *Politicam* publica; *Prudentiam* etiam privata curare. Postquam enim in VIII. cap. lib. VI. *Nicomachicorum* asseruerat; *Politicam* & *Prudentiam* unum eandemque habitum esse, quoad generalem scilicet naturam Prudentiæ, quæ in Politicâ, tanquam specie conspicitur: subiungit statim; *essentiam*, contractam scilicet ad speciem civilem, non esse eandem. Est autem & *Politica* & *Prudentia* idem quidem habitus, *essentia* verò non eadem ipsis. Eamque differentiam pluribus illustrat. *Ac videtur, qui ea, quæ circa ipsum sunt, novit, & in ipsis versatur prudens esse: Politici verò negotiosi, seu variis intenti actionibus sunt.*

II. Vulgus Politicorum miserè affligit Politicam, quidvis potius aliud, quàm verum genus adducens. Alii, *Systema* nominant habitus nostri genus. Quærunt nimirum rei intellectualis, & omnis materiæ expertis, naturam in libro, in chartis: infelices, & omnino imprudentes futuri, si litterarum, aut typographiæ beneficium non esset inventum. Per *Systema* enim collectionem Præceptorum, in chartam consignatorum, intelligunt. Quasi vero Pragmaticus vir prudentis titulum non mereatur, nisi ex præceptis notitiam hauserit? Litteræ signa sunt rerum, res ipsæ non sunt.

Et fuerit Politica oportet ante, quàm litteris consignaretur: nisi enim exstiteret, quomodo scripta fuisset. Quale igitur genus tunc habuit, quum præceptorum collectio nulla esset? Sunt qui per *Doctrinam*, vel *Disciplinam* finiunt: iterum minus accurate. Doctrina cujuscunque habitus est, quando docetur; disciplina, quando addiscitur. Respectiva igitur hæc nomina sunt, quæ absolutam essentiam minimè explicant. Confundimus, non illustramus rei definitionem, quoties relativum genus aptamus definito, quod naturam simplicem & absolutam habet. Nec illud advertunt hujus generis auctores, doceri, discere, præsupponere existentem jam rem. nihil docemus, nihil discimus, quod non exstiterit prius in mente docentis. quippe natura cujusque rei præcedit operationes & affectiones. Est utique Politica perfectissimus habitus, quamvis nec doceatur, nec addiscatur. Accidentaria hæc munia sunt, quæ essentialem indolem Politicæ non declarant; quæ citra destructionem ejusdem abesse possunt. Verbo, doctrina, disciplina faciunt ad *comparandam* Politicam, non ad *definendam*. Non minus errant, qui *Artis* nomen huc adducunt. Est quidem habitus practicus Ars, idque cum Prudentia habet commune, quod in actione consistit: cæterum differentia specifica in utraque diversa est. Genere quippe remoto Politica cum arte convenit, cum sit habitus intellectualis practicus: sed hanc communem naturam arctat propria definitio, quæ Politicam ab Arte separat. Ars efficit opus, quod

quod post se relinquit: Prudentia nullius operis, quod sensus feriat, effectrix est. Ars mechanicorum habitum est, quæ manuales effectum producant. Prudentiæ operatio subtilior est atque sublimior, quam ut sensu deprehendi queat. Superat enim omnium sensuum sagacitatem hoc mentis lumen, & à sibi simili tantum gaudet observari. Benè faciunt, qui ad obstruendam errori ac confusione viam, distinguunt actiones intellectuales, ut alia sit *speculatio* seu Theoria, alia *actio*, alia denique *effectio*. Intellectus *speculativi*, qui abditas res & penitissimas rerum causas, sed necessarias scrutatur, propria est Theoria. Intellectus Practicus, qui *Prudentiâ* instructus est, *actionē* sibi vendicat: quem Græci *Praxin* vocant, & in morum genere ponunt. Quotiescunque verò intellectus ad *artem* se accingit, *Effectio* dicitur ea opera, quam Græci *ποιήσιν*, appellant. Quæ distincta vocabula distinctissimas res notant, & citra absurditatem nunquam confundendas.

III. Multò magis removenda hinc est *Scientia*: utpote quæ toto genere distat à Politica, cum speculativis habitibus annumeretur. Doctissimo PICCARTO non assisto, quando in *Prolegom. comment. in Politic. Aristotelis*, pag. 3. & 4. duplicem facit modum Politicam considerandi; unum *quatenus docetur*, & certis veluti præceptis inclusa est; alterum *quatenus habitus* est, per quem cognitio illa acquiritur, partim doctrinâ, partim usu in hominem introductus. Posteriori considerandi modo ad

prudentiam omnino referendam censeat: priorī
theoretici aliquid in se habere, & ad *scientiam*
 referri posse, tradit. Verūm Politica secundum
 naturam suam, quam in Definitione vestiga-
 mus, perpetuò est habitus: quare per prudenti-
 am ubique describenda. Accidentalī ille do-
 ctinæ respectus, genus, quod essentialē sem-
 per est, innovare nequit. Nec tum includit the-
 oriam Politica, quando docetur: cognitio qui-
 dem & notitia præcedit; nulla Theoria, quæ
 speculativum intellectum sequitur. Nihil tur-
 bat, quod ARISTOTELES sæpiſſimè ἐπισήμην
scientiam, de Politica pronunciet. *Principio*
Nicomachicorum de Morali Philosophia soli-
 citus, quærit, τί ἐστὶ τῶν ἐπιστημῶν, cuius
Scientiarum subordinata sit? mox respondet ad
 Politicam esse referendam. Et mox *scientiam*
Practicam apertè vocat. χρωμένης δὲ ταύτης
 ταῖς λοιπαῖς πρακτικαῖς τῶν ἐπιστημῶν.
Quod utatur Politica reliquis Practicis Scienti-
is. & Lib. vi. *Ethic.* c. vii. *si quis scientiam*
civilem. Plura loca sunt apud *Eundem*, & PLA-
 TONEM: quibus nomen Scientiæ, Politicæ ad-
 signatur. Verūm ingens discrimen est Defini-
 tionis, & reliquæ orationis. In definitione nun-
 quam licet peregrinum genus ponere; quod
 nec fecit ARISTOTELES: extra illam quodlibet
 figuratum nomen tolerabo. & ipse in sequenti-
 bus, extra definitionem, nec à Scientiæ, nec ar-
 tis, nec doctriinæ vocabulis abstinebo. In eo
 autem culpandi planè sunt Aristotelis Secta-
 tores, qui quodlibet prædicatum ab illo teme-
 rè

re positum, pro genere suscipiunt & ample-
xantur. Non admittimus alteram *Piccarti* de-
scriptionem; quod per *genus remotius* definita
Politica, sit *Pars Philosophiæ Practicæ*. Partis no-
men imperfectionem notat: quam exulare o-
portebat Architectonico habitu. Eodem jure
singularum Theoreticarum genus *partem* con-
stitues: quod nemo accuratior admiserit. Ut
taceam *Philosophiæ Practicæ Partem* nusquam in
serie prædicamentali occurrere. Nam proxi-
mum genus, ipsis fatentibus, est *Prudentia*: hu-
jus genus est *habitus intellectualis practicus*;
hujus genus, *habitus intellectualis*. Hic subji-
citur *habitus*; qui proximè surgit ex *Qualitate*.
hæc ad *Accidens* refertur. Ita nusquam inveni-
tur in hac classe, *Pars Philosophiæ Practicæ*. Ut
illud quoque præteream, *Partem*, non esse in
prædicamento, nisi reductivè: & hîc absolutè
describimus Politicam. Neutiquam igitur ad-
mittendum est, quod *Politica sit pars Specialis*
Philosophiæ Practicæ, *Ethica generalis*. Repu-
gnat enim natura Partis generalis & specialis.
In speciali omnia debent applicari, quæ in ge-
nerali tractata sunt: sed quid nobis cum libe-
ralitate, magnificentia, fortitudine, & reliquis
virtutibus, ubi de Republicâ, de Juribus Maje-
statis, de subditis agimus. Illud inauditum est,
in parte speciali diversum dari Objectum, quod
in generali nō contineatur. Civitas enim nun-
quam sub Ethices Objecto latuit. Quod tamen
necessarium erat: cum pars generalis latissimo
ambitu omnes species ejusdem Objecti conti-
neat. Pars quoque specialis semper participat de-

de prædicatis partis generalis. Politica verò in suis Essentialibus Constituentibus commodissimè tractatur, ne facta quidem mentione Ethicæ.

IV. Romanus Jctus alibi Jurisprudentiam vocat *Civilem Sapientiam*. l. 1. §. 5. *De Ex. cog.* Quicumque hoc elogium universæ Politicæ adscriberet, non me haberet adeò contradicentem. Nam si contenderet; munia Sapientiæ esse, Prima Principia complecti, & simul conclusiones ex iisdem deducere; nusquam verò alibi quàm in Politicis, Principia Consiliorum, Juris, & quæ ex imperii doctrinâ emergunt, cum derivatis inde Conclusionibus, observari: id equidem negare haud possem. Conjunctam enim tractationem Principiorum & Conclusionum, sapientiam producere; vulgò creditum est. Non unam saltem esse sapientiam, quam Philosophiam primam vocant, innuere satis videntur illi, qui habitum Principiorum partim Theoreticis, partim Practicis adsignant. Ut enim ex copulâ Principiorum Theoreticorum cum suis conclusionibus, surgit sapientia; ita Principia practica, cum suis conclusionibus producent alteram speciem. Illud quoque inficiari haud possum, Politicam in nudis consultationibus minimè consistere. Pars enim Architectonica præter communissima Principia aliquot de Imperio, illas format conclusiones, quæ necessariam & immutabilem sequelam continent, & consultationi nulli sunt obnoxie. Hoc ipsum opus licet theoreticum non sit, consultatio interim

rerim non est. Hoc autem morari possit titulum *Sapientia*, quod hætenus inter habitus Theoreticos unanimi consensu relata est: noster verò habitus Speculativus minimè est, sed Practicus manet: quum toto genere dissentiens nomen eidem imponi posse, non videretur satis congruens. Et huic tamen difficultati occurreret talis sententiæ auctor, exemplo usus Theologiæ, quæ Sapientia salutatur a plerisque, licet Praxeos in se contineat plurimum: diceretque fortean, numerum habituum ampliandum esse, ut objectis sufficiant habitus, constituendamque, vel *sapientiam practicam*, vel adinveniendum congruum vocabulum, quod illa generalia munia sapientiæ, conjunctionem scilicet Principiorum & conclusionum complectatur, & alienum esset interrim à Theoria, quam sapientia fovet. Hoc inquam argumentum subtiliter & satis speciosè differi posset ab homine, cui animus esset, his pluribus immorari: ego ista ut penitus non damno, ita hætenus à prudentia nondum dedeco, usque dum ad liquidum deductus fuerit Politicus iste habitus.

CAPUT III.

DE

Objecto Politicæ.

- I. *Objectum adequatum Politicæ Civitas.*
 - II. *Non sola multitudo; nec Respublica abstracta.*
- III. *Non*

II. *Non mores hominis, civiliter informandi.*

IV. *Modus considerandi Civitatem.*



Æc de Genere : *Differentiam* , per quam genus prudentiæ restringimus, ab Objecto sumimus CIVITATE. quo nomine non tantum *materiale Subjectum*, seu Multitudinem; nec *Rempublicam* tantum: sed *utramque*, uno complexu conjunctum, accipimus. Quicquid in Politica occurrit universâ, reduci potest ac debet ad alterutrum, *Societatem* & ejus constitutionem; aut ad *imperium* civile, quod Rempublicam introducit. Ex duobus igitur conjunctis efficitur Objectum adæquatum Politicæ. Facile autem probatu est, Civitatem esse verum & sufficiens Objectum, ex omnibus conditionibus generalibus Objecti. Repræsentat enim menti nostræ certum aliquem conceptum: ne vagentur hinc inde animus, & in diversa dilabens, fluctuet dubiâ varietate. Propria tantum & domestica objicit nobis Civitas, non quæ ad peregrinos habitus pertineant: & in necessariis, ad Politicam pertinentibus, non deficit. Nam adæquatum est, quod nec abundat alienis, nec destituitur suis. Evidentissima verò nota est, quod hoc objectum in nullâ disciplinâ aliâ, vel *principium* sit, vel *affectio*, vel *species*, vel *modus*. Et adeo proprium est Politicæ, ut nullus alius habitus objectum hoc, vel materialiter sumtum, sine modo considerandi, qui in Regimine civili consistit, tractet.

II. Hinc arbitrari citra negotium licet, ma-
lè

CAP. III. DE OBJECTO POLITICÆ. 17
lè pro Objecto venditari *Civitatem* in sensu
materiali, quatenus pro *Societate*, seu multi-
tudine sumitur. excluditur enim princeps
membrum quod in Republicâ consistit. Quod
illi quoque faciunt, qui Societates humanas
huc trahunt. inducti tali ratione: quod *in illas*
agat Politica, finem introducendo, Rempubli-
cam. legitimum verò disciplinarum practica-
rum Objectum esse, in quod operantur, cuique
finem ingenerant. Non urgebo, Societates hu-
manas vario significatu accipi; quod æquivo-
cum loquendi genus vitiat Objectum: id sal-
tem moneo, latitudinem objecti veri, socie-
tatibus humanis non includi, aut terminari.
Immutabilis proprietas Objecti est, ut sit *ade-*
quatum: ut omnia quæ ullibi occurrunt in
disciplinâ, illuc respiciant. Præter societates
simplices & compositas, tantum non omnis
cura Politicæ in *Imperio*, & huic respondente
Obsequio consumitur: quæ sub vocabulo *socie-*
tatis latere, ego nunquam affirmaverim. Re-
gula illa, *Objectum practicum esse, in quod agit*
habitus, finem tantum introducendo, quin fal-
sa sit, nullus dubito. Ita forsan hodie nullam
habebimus Politicam, aut nullum objectum
ejusdem; cum finis, qui secundum illos est *Re-*
spublica, non demum introducatur; sed Re-
spublica constituta administretur. Non est Po-
liticæ opus introducere Rempublicâ non exi-
stentem: quæ cum in primariâ specie imperi-
um majestaticum includat, nulla prudentia
constituitur. Et decepti omnino sunt promi-
scuâ usurpatione vocis *Subjecti*, quod pro Obje-
cto interdum ponitur. Societates *Subjectum* sunt
Reipu-

Reipublicæ: non *objectum* Politicæ. Quod si illud *agere*, non per introductionem finis; sed administrationem interpretemur: non tamen Societates *objectum* constituent. Quod non exhauriant, ut modò dictum, considerationem Politicam; cum administratio non tam Societatum, quam Imperii conditionem sequatur. Accipiamus generaliter axioma; *Objectum Politicæ est, in quod Politica agit: & applicabimus commodè ad Civitatem.* In hanc enim per Imperium, in *subjectum* materialis societatis introductum, constitutam, agit Politica, regendo ac conservando. Similiter rejicienda est eorum opinio, qui *Rempublicam* obtrudunt pro *objecto*. quam sententiam eadem difficultates premunt, quæ angustiam materiæ Societatibus exprobabant. Primarium quidè membrum contemplationis civilis, Respublica est: interim omnem considerationem non terminat. Sicut hominem anima imprimis constituit: corpus tamen in constitutione abesse, aut in consideratione negligi nequit. Hactenus benè *Arnisæus* Disciplinarum practicarum *subjectum* conflare *ex fine, & eo, cui finis incumbit*, censet, *principio Relectionum Politicarum* n. 5. Quod clariùs dicitur; *Objectum Politicæ esse Rempublicam & Societatem simul sumptam, unoque contextu Civitatem dictam: non solam Remp. Neutiquam tamen rejecerim solitariè sumtā rempublicam ideò; quod Respublica sive in genere. sive in specie considerata, ex partibus suis componatur & producat in ipsa disciplinâ, quod sit contra naturam*

uram Subjecti. Nam & civitas, materialiter accepta, quæ auctoribus illis Subjectum est Rerum publicarum, & per consequens totius Politicæ, ex partibus suis componitur, & surgit in ipsâ disciplinâ. Nullam mihi nominabis prudentiam, vel Sapientiam, quæ civitatem explicet atque constituat. non excluditur propterea civitas ab Objecto. Nobis utriusque conjunctio suppetat Objectum: licet civitatis materialis partes, & Reipublicæ productionem, seu Constitutionem in sequentibus declarare animus sit. Ea est natura Civitatis, ut sine causis constituentibus in genere explicari nequeat. Propterea verò Remp. negamus objectum esse; quia cognitionem civilem non iustit. Si verò Rempublicam non capias strictè pro ordine solo; sed includas simul totam multitudinem: jam non repugnabimus, quod idem nobiscum sentias, & integram civitatem intelligas.

III. Non recipiam illorum sententiam, qui putant Objectum Politicæ, *mores hominum esse, quatenus sunt civiliter instituendi.* cui proximè accedit illa opinio, quæ *hominem, quatenus civiliter instituendus est,* objicit Politicæ. Neutra veri objecti attingit, nedum exhaurit, amplitudinem. Certum est, Politicum aliquando de moribus esse sollicitum: ideò & Censores constituit, & perversis moribus pœnas sancit: verùm hoc negotium portio Prudentiæ administratoriæ; non universæ Politicæ materia est. Quanquam & illa Censoris provisio ad honestam conversationem dirigit potius

potius animum civium, quàm civiliter, (quod vocabulum nescio quas subtiles elegantias, & decoras dexteritates involvit,) instruat. Non admittuntur homines, qui Censorem habent, ad arcana illa præcepta civilium mysteriorum, quorum usum *Senatoria* tradit; fundamenta verò jacet prima pars, quæ Objectum explicat, & propterea Architectonica nobis audit. Quæ interim de morali institutione nihil novit. Quid enim de talibus Jus magistratuū creandorum, belli gerendi, monetæ, & reliqua Jura Majestatica? Partes Politicæ essentielles, nec homini instituendo, nec moribus conformandis applicari possunt. Quamvis autem primo intuitu satis rejicula hæc opinio appareat: rationibus nihilominus probare nituntur, *hominem civiliter instituendum, esse verum & adequatum Objectum*. Illud principio movent: *Quod nullum objectum ingreditur constitutionem ejus, cujus est objectum: sed extra illud est, & existit*. Hæc ratio quantum pondus sententiæ isti adjiciat, divinando non possum assequi. Nam idem de Civitate potero dicere, quod Politicæ constitutionem non intret: cum habitus diversum quid sit ab Objecto, quod tractatur. Quod si illud *ingredi constitutionem* interpretentur de explicatione, quod Objectū, non debeat explicari in ejusmodi disciplinâ: planè falluntur, & refutatione non indiget tam absonū effatum. Quorsū enim perfectio habituū, quam sollicitè quærimus, nisi ut dextrè objecta enucleentur? Deinde; *Omne dicit, Objectum toti correspondet Politicæ*: quod ipsum quo sensu intel-

liga-

ligatur proferaturq; , cum contrarium quilibet tyro deprehendat, ipsi viderint. Verū est, quod objectum adæquatum universæ Politicæ respondeat: quis verò hoc de homine, civiliter informando, sibi persuaderi passus fuerit? Quis dicet, hominis civiliter informandi jura & imperia proponi in Politicis, consilia explicari? ne mentio quidem fit in totâ Architectonicâ constitutione hominis Politicè informandi. Objectum sanè nominari debet in doctrinâ; & declarari, à quibus causis constituatur, vel quas habeat affectiones, & quales species. Hominis autem civiliter informandi nec definitio proponitur, nec causæ inquiruntur, nec affectiones demonstrantur, nec deducuntur Species. Excipiunt adhæc tertio loco; *Objectū non debere demonstrari & tractari in eâ scientia, in quâ est Objectum*. Sed hoc apertissimè falsū est partim, partim ad Politicam eximiè non pertinet, cum in aliis Theoreticis per omnia verum haud sit. Quod non debeat tractari in propria disciplinâ, nemo paulò accuratior credidit. Nesciebā quid causæ subfuerit, quod tam frigide vulgus Politicorū Objectum suum persequatur: nunc facilis conjectura est, prohibitos hoc axioma fuisse, ne in naturam ejusdem penetrarent. Frustra ZABARELLAM advocant, qui Libro *de Tribus Præcognitis* c. II. nunquam docet, *Objectum tractari non debere*. Id quidem asserit, *Objectum Scientificum non esse demonstrandum in habitu, cujus Objectum est*. Scientifici objecti necessaria conditio illa est; ut sit præsuppositum, nec demonstretur in Scientia. Ratio est, quod jam Metaphysica determinavit Scientiis

• Objecta •

Objecta, in Serie Entium Speciali. inde sumere possunt eadem habitus speculativi. Sed hoc ipsum Politicam, quæ Scientia non est, minimè tangit. præsertim cum nulla alia disciplina ejusdem Objectum determinet. De Republicâ enim, aut civitate, in Classe Specierum Entis, altum silentium. Quæ de causâ & prima Philosophia, cum superiorem non habeat, à quâ definitionem Entis petat, Objectum suum describit, & explicat ante, quam ad affectiones, & species transeat. Non igitur judicanda civilis prudentia secundum normam Scientiarum; nec illius Objectum ad reliquarum conditionem exigendum est. Ultimò dicunt; *Objectum esse radicem, à quâ omnia oriuntur, quæ in disciplinâ tractantur.* Quod citra applicationem dicitur. Quis effatum hoc accommodaverit *homini civiliter instituendo*? Num ab hoc proficiscitur integra civitas, Subjectum Reipublicæ? Num Majestas cum omnibus imperii potestatibus? num solertissima inventa tractandæ multitudinis, & abditæ consiliorum recessus? Augustiora hæc sunt, quàm quæ in tyronem Politicæ doctrinæ cadant. Decepit auctores falsus Politicæ conceptus, dum eandem tanquam *doctrinam* considerant. In hoc accidentali respectu, accidentale habet objectum, instituendum hominem: verum hoc objectum non est *Politica*, sed *Doctrina*. Quæ ipsa tandem doctrina concepta est de Republica, de civitate, quæ objectum Politicæ Prudentiæ sunt.

IV. Amplius petimus differentiam à modo
consi-

CAP. IV. DE DIVISIONE POLITICÆ. 23
considerandi, quatenus hæc prudentia circa civitatem versatur *regendam*. Quo vocabulo complectimur omnem concentum administrationis, à primo natæ Reipublicæ momento, in reliquam ætatem diffusum. Quamvis enim in nascente republicâ constitutio Sacrorum, legum, Magistratuum, videantur ad constitutionem Reipublicæ facere; reverâ tamen jam institutam sequuntur Rempublicam, cum exercitium Majestatis complectantur. Provisio illa Ecclesiastica, vel civilis, præsentem Majestatem refert. Quæ administrationis initia curatissimas cautiones flagitant, ut secuturis temporibus regimen civile procedat ex ordine. Quemadmodum enim hæc fundamenta fuerint jacta; ita comparata erit civitatis facies. Huc pertinent omnia, quæ felicem efficiunt Remp. & ab incommodis defendunt: sive Jurium beneficio id consequamur; sive Consiliorum salubri excogitatione. Quicquid dispositionem aliquam ab imperante recipere aptum est; huic considerandi modo subjungitur. Hic suis numeris perfectus absolutam facit Politicam, & consummatum præstat Politicum. Hoc quantum sit, ex divisione patebit.

C A P U T IV.

D E

Divisione Politicæ

I. *Divisiones non adequatæ.*

II. Po-

II. *Politica distribuenda in Prudentiam Architectonicam.*

III. *Et Rectoriam. sub qua Legalis,*

IV. *Et Consultatoria.*

V. *Piccartus agnoscit talem divisionem.*

VI. *Fundamentum nostræ divisionis.*



Ergimus itaque ad Distributionem Politicæ. Non hîc refutabimus prolixè vulgares errores, putantium, divisionem omnium disciplinarum practicarum atque adeo Politicæ quoque, aliter institui haud posse, quàm ut dispescantur in *finem*, & *media ad finem ducentia*. Inolevit temporis tractu hæc divisio Politicæ, quæ *Finem* nominat *Rempublicam*; *Media*, ducentia ad finem, *Imperantes* & *Subditos*; tum *Magistratus* & *Leges*. Stetit qualiter qualiter hæc opinio hucusque: sed leviter impulsæ statim corruet. Ostendemus autem infra, ubi de Methodo futuræ tractationis solliciti erimus, quod partitio hæc sonum sine mente contineat. Quare nunc non præcipimus eum laborem. Vidi Politicos, qui secabant Civilem Prudentiam in *Christianam* & *Paganam*. Quæ verò discrimina inter has Politicas ponantur, non reperi explicatum. Mirum, quod Physicam, Arithmeticam & Geometriam non faciant Paganam & Christianam. Et poterant alias species addere, Judaicam & Mahumeticam. Has quoque, ac illas, in suas sectas dispescere. Nihil conferunt religionum diversitates ad Naturam Politicæ.

Una

CAP. IV. DE DIVISIONE POLITICÆ. 25

Una est veritas Principiorum Politicorum , nec mutatur à falsâ religione infidelium. Ad idem obsequium obligatur subditus Paganus , ad quod Christianus obstrictus est. Jura , quæ necessariam moralitatem continent , Ethnicis quoque inviolabilia sunt. Consilia , quæ imprudentiam exprobrant gentilibus , non conciliabunt laudem Christianis. Illustris FRANCISCUS BACO DE VERULAMIO , lib. VIII. de Aug. Sci. c. I. Politicæ tres partes adsignat , Prudentiam *in conversando* ; Prudentiam *in negotiando* ; Prudentiam *in gubernando*. Priorres tamen vix ad essentiam Politicæ pertinent , quod homines , ab elegantia morum alienissimi , Civilis prudentiæ laudem nihilominus consecuti sint , ut Catonis exemplo notum est : *negotia* vero evidenter ad privatam vitam referantur. Commendanda est conversationis jucunditas civili viro : sed tanquam externus decor , qui gratiam circumfundat actionibus ; ~~non~~ tanquam naturale bonum , cujus absentia Politicum titulum destruat. Negotia privatæ prudentiæ sobolem esse , diffiteri vix poterit quisquam : & CICERONIS locus , de Prudentibus , in foro deambulantibus , consultis , idem apprimè docet. De Jure fuisse interrogatos , non est negandum. Responderint præterea de filiâ elocandâ , de prædio coëmendo , de contractu : privatum opus est , tractare hujusmodi , nec civilem prudentiam tangit. Habeat suam laudem notitia dextrè versandi in talibus : ad negotia publica non ascendit , quæ Gubernatio civitatis tractat , & Politica pollicetur. Funda-

mentum quoque dictæ divisionis valdè lubricum est ; petita à tribus bonis, quæ homines ex societate civili parare sibi expetunt. Nam priora duo, *Solamen contra solitudinem, adjumentum in negotiis* ; extra Rempublicam, vel in Societatibus simplicioribus, vel in materiali civitate, quæ imperium civile non complectitur, obtineri commodissimè possunt, ut Rep. nullâ opus sit. *Protectio contra injurias*, Imperii fundamentum, prolixius quidem præstatur in constituta Republica: non exulat interim in congregata multitudine Sociorum. Ut nihil dicam, Partitionem Politicæ, non ex intentione Civium; sed diverso modo considerandi Objectum desumendam esse.

II. Nos universum augustæ Politicæ ambitum in duas principes partes distribuemus, PRUDENTIAM ARCHITECTONICAM & RECTORIAM. Prudentia ARCHITECTONICA est, quæ basin reliquo operi substernit, & constitutionem civitatis docet; ejus naturam & causas explicat, imperii potestates, obsequii vincula per Rerumpublicarum species tradit. Nihil in cæteris partibus egregii præstabitur, si hæc non fuerit exactè cognita. Ex objecti enim cognitione & Legum Sanctio, & Confiliorum moderamen pendet. Quare fundamentum est partis Rectoriæ: & merito nomen *Prudentiæ fundamentalis*, seu *Architectonica* gerit. Hæc verò pars tantum sollicita est de Objecto ritè explicando. Nam ut supra vidimus, Civitatem nulla alia doctrina explanat: ipsa igitur Politica hoc negotium sibi datum sentit,

sentit, ut *Materiam*, circa quam occupata est, accuratè proponat, secundum naturalem atque domesticum ordinem, quo multitudo sociorum constituitur, & sub imperium Reipublicæ concedit. Ut in subsequenti tractatione observabimus.

III. Prudentia RECTORIA insequitur constitutam Rempublicam, & eandem administrare legitime docet. Legitime verò administratur, quoties *Iuste* & *Prudenter* regitur. Unde subdivisio nascitur Recltorix, in Prudentiam *Legalem*, & *Consultatoriam*. *Prudentia Legalis* est, quæ Rempublicam constitutam juribus instruit, ut honestatis, utilitatis ac tranquillitatis publicæ privatæque ratio sibi constet. Nec enim satis est, delineasse civitatem, & regiminis varietatem ostendisse: accedat oportet Juris administratio, non tantum in scribendis legibus; sed in omni negotio, quod vel cum subditis, vel cum exteris tractat Majestas. Non exspatiabimur hîc pluribus in Prudentiæ hujus partitionem; id obiter censemus, pro triplicis Juris naturâ, illam quoque divisionem admittere, ita ut sit vel *universalis* vel *particularis*. Universalis contineat illam notitiam, quæ considerat actiones, perpetuam moralitatem habentes; ortas ex Jure naturali, vel Gentium. *Juris naturalis* peritia intrinsecam honestatem vel turpitudinem ostendit actionis; tum Objecti sui, Juris naturalis, conditionem persequitur. Amplissima doctrina, & quæ fundamentum est omnis Nomothesiæ. Perpetuum quoque est *Juris Gentium*

effatum, & commune. Hoc à republicâ non potest submoveri: sicut nec jus naturale ab homine. Hoc enim omnes homines obligat; jus gentium omnes populos, sub republicâ degentes. quò pertinent jura societatum cum exteris, seu fœderum, bellorum, pacis, & quicquid cum gente peregrinâ transigimus. *Prudentia Particularis* consistit in juris privati enucleatione, quatenus indifferentes actiones, nec bonæ, nec malę suâ natura, determinantur à Legislatore. Hanc prudentiam quælibet civitas habet propriam.

I V. Hactenus Legalis Prudentia normam suppeditat justæ actionis: ut hanc prudenter simul & utiliter instituas, & providè verferis in omnibus, *Consultatrix pars* succedit: & agendi consilia, & emoliendi dexteritatem salutariter docet. Latissimè hæc patet, & maximam partem Politicæ implet: unde etiam per Excellentiam Totius nomen adepta est, ut POLITICA vocetur: dum omnia consilia dirigit, ut noxia declinentur; necessaria, utilia, decora commode publicum augeant. Una hæc pars instar omnium est, dum felix Reipublicæ administratio ab hac solâ dependet. Non sufficit, Justitiâ antecellere alios, pium bonumque fuisse: providens cautio requiritur, quæ procul absit à rusticitate & imperitia, quàm propè hæ à detrimento absunt. Laudamus simplicitatē; sed non incallidam: commendamus pietatem & justitiam: sed sagacitati & solertiæ conjunctam. Sine quâ bonum virum quidem habebimus; sed non bonum Politicum.

cum. Cæterum pars Consultatrix à Politicis vulgaribus plerumque negligitur ; aut quod turpius est, plane ignoratur: cum tamen & hujus tradi debuissent fundamenta, & præclara scita, quantum fieri poterat, in ordinem cogi. ne esset opus ab Historicis universam hodie petere. Ita enim accidit, ut indigestam illam consiliorum molem habeamus, cum universo operi nemo hætenus admoverit manum. Quæ enim passim de consiliis, & formando statu, libellis suis interserunt Politici, & paucissima sunt, & confuse proposita. Plures particularem tractant materiam Principatus, quem ne sic quidem exhaustiunt, generaliora tradentes. Laudandus interim JUSTI LIPSII labor est, quem in concinnandâ doctrinâ civili suscepit: in quâ pleraque firmamenta Principatus ex intimis recessibus prudentiæ derivavit. Pauciora tamen sunt Prudentiæ præcepta ibi posita, quam quæ partem aliquam faciant ingentis operis. Adjungendi ergo sunt, quæ de eodem argumento, vel de ratione status, scripserunt alii: tum qui Historicos suis commentariis illustrarunt. Ab his enim petenda est hujus Prudentiæ cognitio.

V. Hæc est divisionis nostræ explicatio, quam si eo nomine quis rejiciendam putet, quod novitia sit: is attendat, quid PICCARTUS ad mentem *Aristotelis* scripsit; & examinet *diversam Objectionem*, & non eundem considerandi modum, & benignius depromet judicium. Statuit Cl. Vir in comment. ad *Aristot. Polit. Procem.* in tres partes à Philosopho

30 PROÆM. DE CONSTITUT. POLITICÆ
distributam esse Politicam. Primam esse No-
motheticam, quæ vocatur *Architectonica*, &
Rempublicam constituit; qualis fuit prudentia
Romuli, Solonis, Moyſis, Lycurgi. Alteram
partem dici Buleuticem, *Consultatricem*, deli-
berantem de rebus pertinentibus ad dignita-
tem & incrementum Reipubl. Tertiam vocat
Dicasticem, Latine *Forensem*, vel *Judiciariam*.
Vereor tamen, ne alia mens sit Aristotelis,
quam quæ genuinæ divisioni quadret. Locus
in VI. Nicomach. c. viii. legitur. Prudentia
quæ circa civitatem *alia est Architectonica seu
princeps, Legislatoria: alia circa singula ver-
sans, commune retinet nomen & dicitur Politi-
ca.* quam iterum subdividit in Buleuticem &
Dicasticem; in Consultatoriam & judiciariam.
Alibi quoque IV. Polit. c. xiv. ad tria præcipua
momenta regimen civitatis alligat, Potesta-
tem consultandi de communibus, Magistra-
tuum imperia & Judicum potestatem. ut mi-
hi quidem persuasum sit, partes illas enume-
ratas, perfectam divisionem Politicæ neuti-
quam complecti. Principio notamus, doctri-
nam de constitutione civitatis omnino hîc o-
missam esse. Nomothetica enim prudentia,
& nominis vi, & ipso opere insequitur produ-
ctam Rempublicam, & administrationem in-
fert non minus ac Forensis, quæ in applicatio-
ne legum occupatur. Utraque idem Objectum
habet, legem. Quod legislator sancit, id exse-
quitur judex. Consultatoria non tantum circa
singula: sed universam Rempublicam versa-
tur. Imo quod Nomothetica Architectonici
habet,

habet, id ex Consultatoriæ beneficio possidet, ut utilem condant legem, & fructuosam Reipublicæ. Loco igitur Nomotheticæ ponenda *Explicatio Civitatis*: Loco Dicastices *Universi Juris notitia*. Buleutice in sua sede relicta. Interim ad nostrum institutum sufficit, PICCARTO occurrisse similem distributionem: & ab ARISTOTELE Consultatoriæ adjunctas esse Legum gnaras prudentias.

VI. Nunc verò aperiendum est fundamentum nostræ divisionis: quod ubi firmum est, perinde nobis fuerit, siue aliquis, siue nemo eandem partitionem agnoverit ante. Doctrinam de Civitate, ac Reipublicæ constitutione, omnes pro genuina parte agnoscunt, ita ut plerique hanc sola Politicam absolvi credant. Et hæcenus quidem materiam istam tractant, quod objectum Politicæ contineat. Rectissime. quum enim prudentia civitatis dicatur Politica: ipsam Civitatem ritè explicare debet. Misere recturus est civitatem, qui ignorat, quid sit civitas. Ita fundamentum omnis Politicæ prudentiæ incipit à cognitione civitatis. nos singulari nomine magnificimus, quod *Imperium* civile includit. Hoc enim & dignationem maximam circumfundit Prudentiæ Architectonicæ, & totius Reipublicæ atque Politicæ causa existit. Non enim temerè appellavimus hanc Partem *Architectonicam*: sed propter imperii explicationem, quod reliquis omnibus spiritum ac vitam largitur. Excellentissimæ sunt Rectoriæ prudentiæ partes: nihilominus altera Consiliarius & Senator;

alteram Jureconsultus possidet: *Imperium* in solum Principem, Dei vicarium, cadit. Quapropter peculiare quid habet pars Architectonica, quod explicet, Imperium. Rectoriam prudentiam nemo hætenus negavit, & sub Administrationis Titulo plerique proponunt. Inveniuntur enim Politicam distribuentes in Constitutionem & Administrationem: verum applicatio à nostrâ longissimè abit. Ad Constitutionem enim Personas tantum referunt: Administrationem, qualiquali Majestatis interpretamento absolvi credunt. Quicquid sit, illud notissimum est, Administrationem hujus loci esse. Quod clarius patebit ex infra dicendis, ubi Imperii facultates recensebimus: in illo namque ordine, primum locum occupat universalis dispectio de Reipublicæ commodis, quam *Provisionem Communem*, vel *Consilium* nomines, perinde est. Hæc cura de integra Republ. consultandi, explicari nequit sine prudentia directrice, quæ Consilia suppeditat, civile commodum adjuvantia: quibus Respublica recens constituta denuò quasi fundatur, ut diuturna & perpetua sit. Hæc docet veram status Rationem, sine vitio tyrannidis, sine malis artibus, sine omni vaframento. Sine hac Prudentiâ immanis confusio multitudinem affliget, nec subsistet Respublica. Necessaria itaque est, & distincta quoque à doctrina Imperii, cum *Consiliis* tractet. De parte *Legali*, seu *Juris prudentia*, lis & controversia nobis movebitur, quod tam indignè habeamus sublimem Facultatem, & detrudamus in seriem inferiorio-

feriorum disciplinarum Philosophicarum. Irascuntur scilicet, quod inviti trahantur in consortium Regalis administrationis. Quasi vero ULPIANUS absurditatis convictus sit, quod Jureconsultos *veram*, non *simulatam* Philosophiam tractare, affirmaverit: aut distinctio illa habituum in *Facultates & Disciplinas Philosophicas*, habuerit unquam fundamentum. Teneat in Academiis aliquando Professor Politicæ infimum locum, aut ab hoc proximum: nihil decedet dignitati Politicæ; cum aliqui nimis æquivoce Politici sint. Respiciant interim ad Consiliarios intimos, qui statum civilem moderantur, & jure meritoque suo Excellentiam nominis Politici implent. Hi *cor Principis* censeudi, ab eodem secundum tenent locum: in quorum consortium assumi, qui sani sunt, dedecoris notam non censebunt. Ceterum dissidentes relinquuntur suo arbitratui: nobis primum Jus Majestatis, Legislatio, prudentiam Juris satis commendat, & ut necessariam, Politicæ inserit. Universalem consultationem de Republica integrâ continuò insequitur Potestas Legislatoris, qui obligatorio decreto præcipiat prudenter excogitata. Nunquam verò laudabiliter exercebit Nomothesium, sine cognitione justī, & injusti. quin imò efficacia legis, à justitia Sanctionis dependet, quod infra videbimus. Quare civitas hâc parte Legali carere non potest. Sive enim promulganda lex sit civibus, de privato publico statu; opus est regulâ directrice, ne contra utilitatem impingas. Sive cum extranea gente

34 PROÆM. DE CONSTITUT. POLITICÆ
transigendum pugnandumve sit: necessaria requiritur cautio, ne vel ipse patiaris injuriam, vel alteri temerè inferas. Nunquam tot atrocissima bella infestarent passim florentissima regna, modò hæc pars Juris, quod circa statum Rerumpublicarum occupatur, vel exco-leretur attentius, vel religiosius servaretur. Nulla suscipi potest consultatio de quacunque re, nisi pariter expendas, vel in antecessum jam dispexeris, num justitiæ congruat negotium, de quo consultas. Hæc individua coherrentia, quâ Politicæ Jurisprudencia innectitur, facile probat, eam partem esse illius principalem. Quod agnovit BODINUS, jurisprudentiam faciens particulam civilis doctrinæ. Et doctissimus GYPHANIUS, com. ad L. VI. Nicom. c. VIII. p. 489. Quin laudatissimus Imperator JUSTINIANUS, in dedicatione suarum *Institutionum*, penetrantius argumentum non habuit, quo studiosæ juventuti legum eruditionem injungeret, quam si spem eidem faceret; *toto legitimo opere perfectò, posse etiam Rempublicam, in partibus ejus, illis credendam, gubernari.* Habes partem administrationis civilis, quam Politica proficitur. Ita hæc pars singulare habet Objectum, *Leges seu jura*, distinctum ab Imperio & Consilio, administrationi tamen debitum, & consecratum.

C A P U T V.

C O N S E C T A R I A

D E

Ethica, vero Politico, Politicæ Dignitate, Præceptorum comprehensione, & Auditore.

I. *Ethica non est pars principalis Politica.*

II. *Quis verus Politicus.*

III. *Num Politica certis præceptis includi queat.*

IV. *Politica omnes disciplinas humanas superat.*



Æc de Politicæ Divisione, & genuinis ejusdem partibus: ex quibus haud difficulter licet judicare, pro parte Politicæ minime habendam, quæ sub dictis non comprehenditur. De *Ethica* frequentatur Quæstio, *utrum Pars sit Politica?* & plures seriò affirmant, partem esse Principalem Politicæ. Præcipua ratio adfertur; quòd Educatio honesta pertineat ad curam Politici; quod mores civium à primâ institutione pendeant. Formari autem nequit tenera ætas sine doctrina morali. quæ cùm dicto modo civitatem juvet, Politicæ Pars necessariò dicenda erit. Advocant

Aristotelem, qui Principio Magnorum Moralium, clarissimis verbis docet, *Tractationē de Moribus esse partem Politicā*. Addito fundamento; quod nihil cadat sub actionem in Politicis, quod non moralitatem quandam contineat: omnisque accingens se ad operandum civiliter, debeat esse virtutis studiosus & honestis moribus præditus. Initium ergo esse Politicæ Doctrinam de moribus. Verum enim vero quia Ethica, nec imperium tractat, nec jura explicat, nec consilia attingit: tutò concludimus, eam non esse partem Politicæ principalem. Quando sub nomine Politicæ comprehenditur, id abusivè, aut ex subordinatione fieri, jam supradictū est. Duo, diversi specie habitus, propriè uno nomine non comprehenduntur. Non igitur audiendi sunt, qui duas distinctas disciplinas in unam confundunt. quasi Politicæ pars prior, seu communis, sit Ethica; pars verò posterior, seu specialis, sit Politica, specialiter ita dicta. Objectum diversissimum ab illis, quæ Politica explanat, tractatur in Ethica; virtus cum summo bono morali. Sine his respublica subsistit: quod à virtutibus & vitiis, abstrahat Politicus essentiam Civitatis. Administratio Reipublicæ magnum quidem adjumentum sentit, ex virtutibus Civium: interim perfectio illa virtutis, quam Ethica vel tradit, vel simulat, abesse potest à regimine. Externa enim tranquillitas sufficit, & civilis bonitas: quæ si absque vitiis sit, congruè satis promovet Legislatoris destinationem. Verissimum hîc illud est: *Virtus est, vitis caruisse*. Nam arrogantem illam

illam summi boni possessionem, ab omnibus Philosophis jactatam & decantatam, nusquam inventam, nusquam in hac humanâ imbecillitate inveniendam, sine detrimento ignorat Politica. Platonis rempublicam, & Aristotelis optimum Politix genus, in quo civis bonus non differt à viro bono, manet illa felicitas, ut socii sint omni virtute præditi. In nostris rebuspublicis honestatem præcipiet legislator, turpitudinem vetabit. qui contra faxit, severâ castigatione puniendus erit. Sive nunc honestatis amore, sive metu pœnæ, abstineant cives à flagitiis, studeant bono præcepto, nihil interest: modò ne committatur scelus, sed præceptum superioris impleatur. Hoc enim interesse putarem inter civem bonum, & virum bonum: quod hic sponte suâ, sola honestate actionis motus, in virtuosam operationem erumpat; ille metu pœnæ in officio teneatur. Finibus quoque distinguuntur interni illi habitus; quibus convenire maximopere debebant. Quod si in externis coincident, nihil mirum est: cum & intellectus speculativi perfectio vitam beatam, & in suo genere felicem reddat. Præterea partis generalis prædicata non quadrant. nam in eâ tractantur, quæ in omnibus speciebus obtinent: quod de summo bono nemo dixerit, omnibus rebuspublicis id esse commune. Per quam simile vero est, in nullo nato homine dari consummatum bonum Ethicum: quomodo ergò in Tyrannide, in Ochlocratia illud reperietur? Debebat autem reperiri, si Ethica esset pars generalis,

con-

continens quolibet species Reipublicæ. Imperfectam hætenus tradiderunt Politicam, qui partem illam generalem non simul docuerunt, & cohærentiam declararunt. Dicis, virtutes conducere imperio stabiliendo: dicam id ipsum: sed propterea doctrina de virtutibus non est pars essentialis Politicæ. Applicentur licet in civilibus, quæ tradit Ethica de Magnificencia, Fortitudine, aliis: non ideò Ethica, ex qua desumptæ sunt applicationes virtutum, est pars generalis. Eodem enim argumento & Metaphysicam partem generalem feceris Theoreticæ Philosophiæ: quod generales terminos, in aliis adhibendos, explicet. Si loca Aristotelis contemplemur; præter subordinationem nihil affirmat. Non enim moralem tantum Philosophiam: sed Rhetoricam quoque partem facit Politicæ, 1. Rhet. 2. Quando citato principio *Magn. Mor.* Partem nominat, latiori significatu utitur: intelligendo omne illud, quod ad aliud quocunque modo ordinatur. Quando ibidem ab Ethica fieri Principium Politicæ jubet: eâ notione id capiendum est, quâ Grammatica Oratoriæ principium appellaretur, dum fundamentum litterarum ponit; nihilominus ab Oratoriâ separatam naturam habens. Et tam arcta societas Politicæ cum Ethicâ nondum intercedit. Honestate præditus sit Politicus, secundum Aristotelem. Respondeo sufficere, si externâ honestate præditus sit: licet coactus, licet invitatus se abstineat à vetitis nuptiis, ab alterius fortunis; satis id est ad felicitatem civilem.

quamvis

CAP. V. DE ETHICA, VERO POLITICO, &c. 39
quamvis in ejusmodi actionibus, quæ metu
pœnæ non sunt malæ, nihil quicquam Ethicæ
virtutis lateat. Rectè igitur Ethicam subji-
cimus Politicæ, *tanquam subordinatum habi-*
tum: quales plures reginæ nostræ inserviunt,
ut *Rhetorica, Oeconomica, Imperatoria seu Bel-*
lica, de quibus Philosophus cap. 1. ad Nic. Be-
nè notat PICCARTUS in Proleg. ad Polit.
Principem inter Practicas esse Politicam, cui
serviunt tanquam heræ, ancilla, Ethica & Oe-
conomica. Ethicam dici quidem Politicam; sed
non simpliciter, verum per additionem (quæ ple-
rumque notat imperfectionem) Politicam
πρὶ τῆς ἠθικῆς.

I I. Supra posita Divisio nos arbitrari docet
præterea, quis verus Politicus nominandus
sit: instructus nimirum perfecta Reipublicæ
notitia, & consummatâ regendi prudentiâ, se-
cundum juris & utilitatis publicæ regulas. Qui
triplici illâ cognitione destituitur, amplissi-
mum Politici nomen nunquam merebitur.
Et homines illos omnium horarum, quos as-
sentatores vocât, qui ridiculis gestibus elegan-
tiam morum præ se ferunt, sine operosâ argu-
mentatione ex hoc censu ejeceris. Conversa-
tioni aptos fortean vocabis, neutiquam Poli-
ticos. Eodem numero habebis, qui exoticas
linguas didicerunt, & varias regiones perlustra-
runt, si partes illas prudentiæ simul non fue-
rint complexi. Plurimum conducere quidem
Peregrinationem civili prudentiæ, confessissi-
mum est: præsertim ut vicinorum populorum,
cum quibus nunquam non transigendum est,
cognoscas

cognoscas genium ; qui universus non tantum singulis ferè ætatibus ingentem conversiōnem patitur , sed propiori termino ex ingenio imperantium , aut qui horum consiliis præfident , variari consuevit. Hunc tamen fructum non capit pectus , nisi benè præparatum : rudis & imprudens animus , qui urbes aspicit , civitates non intuetur , errabit sine commodo peregrinationis. Plures Aristotelis tempore affectabant honorabilem istum titulum ; *Rhetores*, *Sophistæ*, aliique *Experientiam* in rebus civilibus & earū regimine allegantes. Rhetores flagrantissimè id nomen ambiebant , quasi debitum sibi , qui dicendi suavitate populum impellere , & pro arbitrio tractare docti essent. Unde Philosopho dictum 1. Rhet. c. 2. *Subit personam Politicæ Rhetoricæ*. Hæc Platoni quoque particula civilitatis , sive Politicæ credita perhibetur. Et contemplantiam tempestatē , apparebit , multa ex oratorum impulsu tunc gesta esse : quā de causā eosdem , tanquam incommodantes suo molimini , in deditionem poscebat Philippus. Interim à nomine veri ac consummati Politici tam longè aberant ; quàm longissime confusæ Græcorum multitudines à laude rectæ ac benè ordinatæ civitatis. De *Sophistis* , præter Platonem pluribus locis , id scribit Philosophus , x. Nic. c. x. *Sophistæ* , hominum genus ambitiosum , omnem sapientiam , quam nunquam didicerant , se tradituros aliis profitebantur : itaque de prudentia civitatem conservandi præcepta dabant , quum ipsi rempublicam nunquam atti-

ti-

tigissent, nec satis nossent, quid respublica esset. *Ex Sophistis verò, qui hac profitentur*, inquit Aristoteles, *longissimè perspiciuntur abesse ab eâ tradenda. omnino enim neque qualis ipsa sit, neque circa qualia versetur noverunt. non enim eandem cum Rhetorica, neque deteriorem statuissent, neque arbitrati essent facile esse leges ferre illi, qui collegisset probatas ex legibus, seligere enim licere optimas: qua si selectio non sit perspicacitatis, & judicare rectè, maximum non sit.* Legumlatoriam ergo, & administratoriam prudentiam docebant, quarum ne quidem nomina capiebant. Removet quoque dicto loco Aristoteles illos, qui *Experientiâ instructi*, rebus agendis intersunt, citra cognitionem causarum. Hos, quia consuetudine potius, quam ratione, non expensis actionum momenti, ducuntur in regimine, arcemus meritò ab *Elogio civiliter Prudentis*. Præterquam enim quod hi tales fundamentalem doctrinam de Majestate ignorant, quæ usu non addiscitur, sed animi ingeniique contentissimâ subtilitate eruitur; non possunt non destitui vera scaturigine civilis administrationis. Respondeat licet conatibus talium eventus: Fortunæ incolumitas civitatis debebitur, quæ ignavissimos stupidissimosque protegit; non auctoribus imprudentibus rerum. His de causis repellimus *Expertos tantum*, à consummati Politici nomine. Rationes Aristotelis, quæ illos arguere indignos debebant hoc nomine, sufficientes mihi non videntur. *De prudentia Civili nihil litteris consignarunt. Filios aut cognatos*
non

non docuere eandem, aut post se reliquerunt Politicos. Verùm scripturæ absentia nihil detrahit prudentiæ. Sapientissimus SOCRATES nihil scriptum reliquit. Plures solertissimi Reges, nihil de suâ prudentiâ mandarunt litteris: nec filios, aut cognatos reliquerunt tales, quales fuerunt ipsi. Sapientis patris non rarò stolidissimus filius est. Recipitur prudentia, non secundum sublimitatem tradentis, sed aptitudinem recipientis ingenii. *Jureconsultos* quoque plerique hinc excludunt. PICCARTUS sanè, in Proleg. ad Polit. Aristot. Politicorum ministros vocat: qui tertiam saltem partem, Dicasticen, hoc est, *forensem seu judiciariam* tractent: *respondeant de jure secundum leges;* sintque secundum veterum glossarum nomenclaturam, *interpretes legum.* HUBERTUS GIPHANIUS, ipse celeberrimus Jureconsultus, tum demum non arroganter sibi nomen Politici vindicatu-
ros, si non tantum libros juris, in quibus de rebus privatis potissimum agitur, sed Politicos & Historicos, cognoscerent, censet. In hac quæstione à vero ne aberremus, & J Cti, & Politici vocabulum attendendum est. J Cti nomen involant plures, qui farraginem quandam controversiarum, in foro usitatarum, sæpè miserè satis tractatarum, vel legerunt, vel edidicerunt: quarum recitatione Prætoris, aut Consulis judicantis indignationem possint utcunque non irritare. Hi postquam Juris Utriusque Doctoris titulum precibus emendicarunt, aut pecuniâ mercati sunt; universam Juris prudentiam in præcordiis suis habi-

habitare credunt. Quemadmodum verò talium inanis opinio scientiam non auget, nec veros JCTos præstat: ita ne quidem suspicio Politici hos onerare debet. Perfectus JCTus, qui immotam regulam moralitatis, in jure naturali positam, noverit à primis causis derivare, immediata conclusa ritè deducere, tum attributa & effecta legitime explicare; qui jura fœderum sancientorum, pangendæ pacis, gerendi belli, & quæ alia gentium leges definiunt, ex penetralibus intimis Reipublicæ eruere doctus sit: qui civitatis deniq; suæ leges ac consuetudines perspectas cognitasque habeat: hunc jure suo meritoque optimo, debitâ honestare appellatione Politici convenit. Nam si Jurisprudencia universa partem constituit Politicæ: illius Possessori denominatio Politici subtrahi nequit. Modò Politicum accipiamus secundum partem, non universam Prudentiam: quod ille verus, sine ullâ exceptione, Politicus sit, qui & Architectonicam sapientiam, & Rectoriam prudentiam conjunctim possidet.

III. Ambitus ille prolixissimus dubitationi dedit causam, num Politica per tot immensa & infinita negotia diffusa, certis præceptorum cancellis includi queat. Auctores vulgò confidenter affirmant. Quod *definitio certa esse debeat: definitionibus autem pleraque præcepta absolvantur. Præcepta Politicæ certum reddant: quæ certitudo hætenus desideratur, quamdiu præcepta nondum certa sunt. In præcepta digestam esse Jurisprudentiam, quæ tamen Politicam vincit amplitudine.* Affirmabimus & nos Quæstionem:

stionem: sed explicatio sincerior sit oportet. Certum quidem est, Politicum debere certum esse: superest nihilominus quæstio; num ea certitudo à præceptis sit expectanda? Definitionibus non absolvitur universum civile opus: imò per exigua pars, si integrum respicias, Definitionum est. Jurisprudencia, cum pars sit civilis operis, amplior suo toto nequit esse. Et principium egregiè petitur, si eandem certis per omnia præceptis conscribi posse dicamus. Nunquam enim tam aperta lata est lex: quin æquitati judicis multum relinquatur, aut inexpectati surgant casus, qui recentes decisiones flagitent. Affirmamus, inquam, assertum, secundum omnes partes Politicæ: modò per vocabulum, PRÆCEPTUM, non intelligamus aliquam definitionem scriptam, & in libellum Politicum redactam. Ita enim hucusque inclusa nondum est Politica, nec unquam includetur. Capimus hîc potius certum aliquod principium, certam regulam, immutabilem normam, in animo veri Politici existentem: juxta quam omnia definiet vir prudens, quæ in constitutione civitatis occurrunt; omnia determinabit, quæ juris quæstionem continent; omnia disponet in actionum multitudine, quæ consiliû postulant.

IV. Porro ex ambitu isto & continentia rerum nobilissimarum, de dignitate Politicæ nemo non judicare potest. Maximè enim Architectonica existimanda est, *Princeps & dominus*: quæ pro imperii facultate, de cæteris omnibus disponit, in quantum civitas iisdem uti debeat. Mirum igitur possit videri, quod speculativa rñ
secta-

sectatores dicam scribere de prærogativa sint ausi. Quod si omnia argumenta, quibus excellentiam quandam evincimus, coacervemus & producamus: potius militabunt pro dignitate Civilis, quam cujuscunque Theoreticarum. Triplex communiter fundamentum est, quod discernere nobilitatem alicujus disciplinæ, statuunt: *Certitudinem habitus, eminentiam objecti, & utilitatem tractationis*. Ex singulis Politicæ, præ Theoreticis, adstruetur dignitas. Non vagum est aut errabundum quod Politica tradit. certa sunt imperia atque obsequia; & ad oculum demonstrari potest, quantum sit in quacunque Rep. imperium: quod certam facit naturam civitatis, & omnium cohærentium. Perpetua est definitio civitatis, Reipublicæ, Majestatis, Specierum, & similium. Certa sunt & immutabilia Jura naturalia & gentium: merè civilia quam habent mutationem, ob rerum & actionum indifferentiam habent; & interim, postquam sancita fuerint, nemini subditorum varianda sunt. Idem de Consiliis dixeris. Difficilima quæque ordinabit vir prudens. Si aliquando non respondeat eventus, id naturam negotii civilis haud tangit: quia extrinsecum impediens accedit, & Deus propriâ manu statum regnorum versat; qui superioris agentis interventus, non magis incertitudinem probat Politicæ, ac Naturalis Philosophia incerta judicanda sit, propter miraculorum, cancellos naturales excedentem indolem. Si speculativas examines, tantâ incertitudinæ laborant, aut inexplicabili obscuritate,

46 PROEM. DE CONSTITUT. POLITICÆ
ritate, ut plerumque nihil minus sint quam
Scientiæ: quod versato in singulis, nec præpe-
dito authoritatum præjudiciis, palam est. Co-
nantur autem imprimis Metaphysicæ Princi-
patum vindicare, *quod nobilius habeat Obje-
ctum; universale nimirum, & necessarium.* Ve-
rum universalitas nullam evincit nobilitatem.
quo magis enim Res accedit ad naturam indi-
vidualē ac singularem, eo perfectior est: & ens
singularissimum, alias nobilissimum est; ex-
emplo Dei; cujus natura universaliter, sub mul-
tiplicatione, non nisi impiè & absurdissimè
concipitur. Adhęc Politica non unam Rem-
publicam considerat: sed ea explicat, quæ o-
mnibus sunt communia. Quando Monarchi-
am, aut aliam speciem civitatis declarat; non
descendit statim ad ipsa individua rerumpu-
blicarum. Necessarium objectum non conti-
nuò præstantius. Liberæ quippe hominum a-
ctiones anteponuntur necessariæ lapidis descē-
sioni, & reliquis naturæ, necessariò agentis,
operationibus. Præterea non vagum aliquid,
& in horas mutabile tradit Politica: perpetua
& necessaria est natura rerumpubl. nec nisi cum
universi interitu cessabit. Et quid nobilius im-
perio dari aut fingi potest, quod ab uno Deo
proficiscitur, & ex divino indultu in imperantes
transfunditur? Quid sublimius ergo Majesta-
te? quid sanctius juriū scitis? quid concinnius
ipso contextu reipublicæ? in quo explicando
Politicæ cura & sollicitudo insumitur. Utili-
tatem majorem percipi posse ex civili pruden-
tia, quam speculationibus nudis & otiosis,
ipsi met

ipſimet contemplatores vel inviti concedunt. Ordinationem finium , quæ præcellentiam infert, cum ad nobiliſſimum reliqua digerantur , agnoſcit ARISTOTELES , *principio Nicomachi-
corum*. Hujus tamen aſſertionis immemor , contrarium aſſerit in Magnis Moralibus, quod *Sapientia ſit excellentior, prudentiâ Politicâ; &
hanc imperare quidem, ſed ad inſtar ſervi, nomi-
ne Domini , & vice ejusdem*. Sed argumento ſervit, ne tradens Metaphyſicam, videatur in re nihili occupari. Sapientiam meliorem eſſe prudentiâ , id negabo ; donec firmioribus argumentis adſtruatur. Nam quod dicit : VI. Nic. VII. *Absurdum enim eſt , ſi quis ſcientiam ci-
vilem , aut prudentiam arbitretur eſſe optimam:
niſi optimum eorum , quæ ſunt in mundo , homo ſit*. Hoc ipſum enim extra dubium eſt , homine in hoc mundo diviniorem & præſtantiorem creaturam non haberi. Ejusmodi relationem inter Sapientiam , hoc eſt , Metaphyſicam & Politicam non dari , qualem conſtituit inter Dominum & ſervum atriensem , ſeu adminiſtratorem , qui reliquis ſervis imperat ; quilibet cordatus videt. Si prudentiam de Ethicâ , aut Privatâ circumspectiõne interpreteris, aliquid concedi poſſet : de Politicâ nihil. Et unde quaſo conſtabit de dominatu Metaphyſicæ in Politicam? quum iſta hujus ſublimitatem, in imperio poſitam , ne nomine quidem inaudiverit. Nec imperium hucusque inter munera Metaphyſicæ probabiliter poſitum eſt : quod tamen Politicæ in reliquas omnes Ariſtoteles conceſſerat. Novimus Metaphyſicam à Politicâ

ticâ

ticâ in exilium aliquando missam & relegatam esse : quæ pœna huius ab ista nunquam inflicta est. Vidi, qui deprehensâ Aristotelici asserti infirmitate, mollebant illud imperium : idque *suo modo* assererebant Metaphysicę : hoc est, concedebant *imperium non practicum & externum ; sed internum & speculativum*. Hoc est, ut rectè quis interpretabitur, phantasticum.

V. Auditorem paucis considerabimus. in gratiam Philosophi, qui 1. Nic. cap. 1. juvenem removet ab auditorio Politico. *Politica proprius ac commodus auditor non est juvenis*. Quod minus accuratè dictum puto. nisi enim Juvenilem ætatem ad percipiendam Politicam admiseris; tempus discendi destituet senes. Dicit ; *affectibus esse obnoxios & experienciâ carere, quam doctrina de actionibus postulat*. Impediunt quidem affectus animi iudicium. Sed ideò maximè docendus est juvenis, ut discat affectibus obtemperare. ut experienciâ valeat, informandus prius est, quæ sit actionum natura. quam si ipso usu magistro didicit, frustra fuerit & ineptus; qui eum postea demum præceptis superfluis obruere instituat. Et sic forsan nullam desiderabimus Politicam. Adde quod doctrina de Imperio Majestatico sine experienciâ addiscatur perfectissimè. Quibus de causis Aristotelis locum accipio de *iudice prudentiæ civilis*, ut *Auditor hic sit iudex*, qualis nequit esse juvenis, moribus & experienciâ destitutus. Ita apud Latinos quoque *Iudices* dicuntur *audire controversias* : & *Audientia* vocem judicalem esse, in foro receptam & no-

notionem, vel iudiciū notare, observavit Curia-
cius, Paratit. C. de Epis. aud. Ansam huic
interpretationi præbent antecedentia Philoso-
phi verba: quibus docuerat; de qualibet re opti-
mè arbitrari eum, qui eandem penitus cogno-
verit: in omnibus autem eruditum, simpliciter
omnia sincerè dijudicare. Statim subjicit de ju-
vene: quare ut secundum præcedentia illa ca-
piamus, vis connexionis ostendit. Ideo juve-
nem non esse legitimū iudicem rerum civi-
lium, quatenus usu & morum concinnitate est
destitutus. Iudicem verò & Discipulum, seu
Auditorem esse, planè distincta sunt: cum
hujus munus sit tantisper assentire, non ju-
dicare.

CAPUT VI.

DE

Methodo tradendi Politicam.

- I. *Methodus, de fine ad media, rejicitur.*
- II. *Planior ostenditur.*
- III. *Respondetur Auctoritati Philosophi.*



Oteramus jam rectà ad tracta-
tionem principalem Partis Ar-
chitectonicæ contendere: prius
tamen de ordine dispiciemus, ut
singulis membris immobilem
assignemus locum. Quamvis enim ad ipsam
veritatis substantiam nihil conferat, quo loco
C senten-

sententia quævis proponatur: ad concinnitatem interim, & commoditatem proponendæ disciplinæ, magnum momentum adjicit ordinis certitudo; si partes doctrinæ ritè cohæreant ad instar Objecti, quod tractatur. Non est animus prolixâ dissertatione ostendere, utrum Synthetica, an Analytica Methodus locum sibi vendicet; id certum est, doctrinam Architectonicam ab Auctoribus secundum Methodum Analyticam nec traditam esse, nec nisi confuse, tradi potuisse. Cum igitur vulgaris distributio, in Finem, & Media ad finem ducentia, multiplicem contineat difficultatem: fraudi nobis non erit, si tramitem eligamus planum, & ambagibus atque erroribus liberum. Finem constituunt Rempublicam: sed cum finis in Practicis ubique sit actio, Respublica finis non erit, quod partem Objecti absolvat; sed Reipublicæ administratio. Ne quidem *constitutio*, seu *introductio Reipublicæ*, finis est Politicæ: cum in Republicâ Monarchicâ, includat infusionem Majestatis, quæ nullâ prudentiâ, nullô ingenio humano producitur. Circa constitutam igitur versatur Rempublicam; nec demùm eandem constituit. Administratio procul dubio finis est Politicæ: de qua tractare velle antequam noveris, quid & quale sit Objectum administrandum, præposterum mihi videtur. Quanquam nec Scriptorum ullus à *Fine* inceperit; nec incipere potuerit: ipsâ naturâ habitûs tali ordini reluctante. Per ambiguum vocabulum *Mediorum*, quod nec Latinum, nec Philosophicum hic satis est, intelligunt *partes*
Constru-

Instrumenta : Partes vero totum aliquod constituentes , Media vocare , satis inconveniens est ; cum sine obscuro *mediis* nomine , clarius in se poterant intelligi.

II. Nobis fas erit , ipsam rei naturam æmulari , & à Principiis , civitatem constituentibus , ordiri. Norma cujusque habitus Objectum est : hujus indolem & ordinem ubi observat ille , nunquam errabit. Antequam administres Civitatem , civitas constituta sit oportet : ut cognoscas , ex quibus composita sit , partes examines necessum est. Partes ergò principiò contemplabimur , tanquam causas intrinsecè constituentes civitatem : mox de speciebus acturi. Cuilibet enim ordini id proprium esse debet , ut generaliora præcedant , sequantur species. Hactenus autem à plerisque species rerum publicarum ante Majestatis explicacionem , confusa serie , fuere traditæ : cum interim nesciam , quid sit Monarchia , in qua penes unum est Majestas ; quamdiu cognitam & perspectam non habuerim Majestatem. Totam ergo Prudentiam Civilem dividimus in Partem Architectonicam & Rectoriam ; hoc est , in Doctrinam de CIVITATE , & alteram , de REGIMINE , seu gubernatione civitatis , ab illâ necessario incepturi. Hæc integri dispositio num Synthetica sit , non satis liquet : id apertissime constat , Analyticam non esse . cum à Subjecto , & ejus constitutione declarandâ auspicetur ; desinat in fine , seu Administratione. Partialis vero Prudentiæ Architectonicæ ordo hunc in modum nobis disponetur ; ut habeamus expli-

cationem omnium eorum, quæ naturam civitatis componunt. sive principia, sive partes constituendi voces, Materiam & Formam. Materiam absolvit Multitudo. hanc à prima sua origine, quia composita est, arcessimus, societatibus simplicissimis, ex quarum conjunctione majores oriuntur. Forma est Respub. quæ cognitionem ferè omnem Politicæ præstat. Infert Respublica duplicem respectum, personarum civiliter Imperantium, vel parentium. Quartum conditio cum in omnibus Rebus publicis non sit eadem; descendendum statim est ad species singulas: & ostendendum, quale regimen sit in primariâ Civitate Monarchica, quale obsequium, tum quomodo Respublica libera differat à Regno; & cujus rei beneficio illa expediat, quæ à Majestate procedebant in Monarchia. Ita perspicuè atque clarissimè secundum Reipublicæ naturam trademus Politicam, nullam confusionem metuentes.

III. Non movebimur ARISTOTELIS auctoritate, qui lib. I. Nic. c. II. (aliis est IV.) viam præscribit, à *Fine ad Principia* ducentem. Præterquam enim quod liberè Philosophandum est, & indignum homine ingenuo censendum, servilem in modum alligare se opinioni aliorum, non satis certæ: adhuc de mente Aristotelis non satis constat, quid in dicto capite voluerit. Adeò ut doctissimus GYPHANUS, locum illum *difficilimum censeat, vel Apollinis, vel Sybillæ oraculo dictum*. Mihi videtur in proclivi esse illius dicti rationem eruere.

Sive

Sive enim *Principia essendi*, sive *cognoscendi* intelligas, utrumque procedet: quod illa cum his coincidunt, & essendi simul fiant cognoscendi principia. De principiis igitur dicit Aristoteles, *ad ea nos pervenire post effecta proposita*. Ubi omnino attendendum est Philosophi propositum, & quadrabit ordinis series. In capite primò, disertis verbis rudem & latam cognitionem spondet auditori, ubi sic inquit: *Ergò factis erit, si cum de rebus, & ex rebus ejusmodi verba facimus, rudem quandam veri formam adumbremus, & cum de rebus quæ plurimum eveniunt, atque ex talibus disputationem instituimus, talia quoque concludamus*. Hæc designata est Tractationis facies, quam non mutat insequentibus, sed ubique populariter persequitur. Huic rudi Traditioni commoda querenda erat methodus: commodior autem non poterat occurrere, præter illam, quæ effecta cognoscit, & post hæc in causas inquit. Vel magis, quæ à singularibus & individuis initium capit, & in generalibus concludit & acquiescit. Igitur dicit, *initium ab iis rebus, quæ nobis nota sunt, sumendum esse*. Illud certum est, quamlibet doctrinam per *notiora* institui: *notiora* sunt autem talia *nobis*, vel *per se* & *absolutè*. *Nobis nota* dicuntur res, quæ sensui nostro obviæ sunt: *per se nota*, quæ naturam habent universalem, & ordinem per habitum digestum. In confusâ cognitione illa probatur methodus, quæ proxima particularia effecta tradit, ut rudem conficiat notitiam. Inde fatentur Interpretes, in toto opere Politico Aristotelis ar-

gumenta omnia ab effectis esse petita, eumque rarissimè ad causas superiores ascendere. τὸ ὅτι eum persequi, rarius τὸ διότι. Et illa quidem via, temporibus Aristotelicis quadravit forsàn, quibus civilis doctrina minus fuit exculta: nostro ævo, ubi ad fastigium liberales disciplinæ emicarunt, ut accuratior & perfectior, ita contraria videtur congruere Methodus: quæ ex certis causis constitutionem civitatis doceat, ex certis regulis justitiam actionis definiat, ex constantibus & generalibus præceptis consilia moderetur. Facile posset declarari, principium ZABARELLÆ contra PICCOLOMINEUM usurpatum; methodum à nostra cognitione sumendam esse, non naturali ordine rerum, minime subsistere: quod universa Philosophia Theoretica tradenda sit hac resolutivâ methodo; cum individua & singularia prius cognoscamus, quam generalia & abstracta. Cæterùm de Methodo illa jam dudum cœperunt Politici dubitare: unde CASUS existimat; principia primo loco proponi, ubi civitas explicatur. Quod BESOLDUS non satis excusat, distinguens inter Methodum universalem, qua tota disciplina disponitur; & particularem, quâ partes disciplinæ ordinantur. Nam Civitas, & ejus principia respiciunt Methodum universalem.

LIBER PRIMUS,

55

DE

SOCIETATIBUS.

CAPUT I.

DE

SOCIETATE NUPTIALI.

- I. *Civitatis duæ partes.*
- II. *Societatum prima est Nuptialis.*
- III. *Nuptialis Societas quid?*
- IV. *Continetur Jure Reçtorio.*
- V. *Quantum sit imperium mariti.*
- VI. *Maritus non habet imperium à Natura.*
- VII. *Sed constitutione divinâ.*



Ræmissis ita in antecessum, quæ sternere viam commodiori tractationi videbantur, aggredimur ipsam *Doctrinam Essentialem*, quæ Objectum Politicæ exponit, CIVITATEM. Hanc universali conceptu dicimus esse *multitudinem hominum, regimine civili dispositam & ordinatam*. Sic enim opus est, ut ad integram respiciamus naturam civitatis: quam nec sine multitudine civium, nec sine regiminis ordine, Politicè concipiemus. utriusque igitur concursus necessariò postulatur. A Republicæ quidem de-

C 4

scriptio.

scriptione removebimus Multitudinem, tanquam genus: sed à Civitate non possumus illud arcere, nisi partem velimus pro toto venditare, aut Rempublicam sine hominibus, hoc est, accidens sine Subjecto fabricare. Citra negotium respondere jam possumus, quibus partibus integretur Civitas. Nam causæ intrinsicè constituentes omninò duæ sunt, Materia & Forma. Materiam suppeditat Multitudo, quæ quasi corpus civile est, ex membris & partibus suis conjunctum: Societatibus nimirum simplicibus & Compositis. Hanc Materiam intrat Civilis Forma, seu Respublica, quæ corpoream illam molem permeat, animat & vivificat, ut actiones civiles recipiat & edat. Quum autem forma hæc accidentalis, nequeat subsistere sine suo Subjecto, prius de Materiali corpore agendum est. Id obiter hîc, & futurâ tractatione notandum est, vocabula *partis*, *Materia*, *forma*, cum laxitate eximiâ capienda esse, & excusanda per *Analogiam* & *similitudinem*; quâ plerumque usurpamus hos terminos in negotiis civilibus, ut eadē per cognatas aliquo modo, & jam cognitæ res eò melius assequamur. Quare adjicimus subinde, quod multitudo sit *quasi-corpus*, *quasi-materia*, *quasi-pars*: Imperium *quasi-forma*. Nam si strictissimè his vocibus uti velimus, pleræque erant omittendæ: quod arctam applicationem haud tolerent. Quod obiter monendum videbatur: ne quis largiorem loquendi modum vituperet, & inaccurationis accuset. Huic tali si nec dum probamur, age, strictissimè loquemur, & dicemus

mus uno verbo; Civitatem absolvi duobus ,
Multitudine & Republicâ.

II. Multitudo igitur cœtus quidam est hominum; constans societatibus tam simplicibus, quam compositis. Societas (quæ est conjunctio hominum duorum pluriumve, boni alicujus consequendi gratiâ) simplex dicitur, quam duabus personis plures non ingrediuntur. Ejusmodi Societates Simples sunt tres: *Nuptialis, Paterna, & Herilis*. Societas Nuptialis est decens conjunctio maris & fœminæ, ob mutuum adjutorium, & liberorum procreationem à natura constituta, imperio maritali divinitus instructa. Simplicium Societatum primam facimus Nuptialem. Nec attendimus illis, qui herilem primo loco nominant. Quà fini allegant *Ammonium*, de Phœnicibus referentem; qui Societatem heri cum servo primam censuerunt, ac Bovis signo indigitarunt, cui propterea nomen Alpha, primum elementum litterarum, indiderunt. Ita sanè narrat *Ammonius*, apud *Plutarchum* libr. ix. Symp. c. II. *Desinente Protogene, me appellans Ammonius; Tu vero, inquit, homo Bæotus, non optularis Cadmo? quem ferunt ideò Alpha primum litterarum posuisse, quod Bos ita Phœnicum lingua dicitur, quem non secundum, aut ut Hesiodus, tertium, sed primum inter res necessarias existimant.* In quam opinionem descendere videtur *CONNANUS*, VII. com. Jur. cap. i. Ubi familiam, & quæ sunt ad usum familiæ necessaria, ante conjugium & uxorem quæri jubet: adeoque servum naturâ priorem facit uxore.

MONTECATINUS I. Pol. cap. II. text. 6. & Nuptialis & Dominicæ societatis deprehendens necessitatem, simultaneam & æquè primam utramque asseruit. Sed hîc non quærimus, quid prius secundum regulas Oeconomicas sit acquirendum: verùm quid prius naturâ sit. Æqua necessitas, non statim removet prioritatem. Priores autem nuptias esse, ostendunt alii *ex fine*: quod servus ad sustentandam familiam requiratur. Si sustentanda est, prius sit oportet. Sine uxore autem familia non est. Interim cum cælibes quoque habeant servos; videbatur firmitus ex *generandi ordine* prioritas deduci. Ut aliquis servus sit, necessum est, natum esse: hoc præsupponit nuptias, seu Matrimonium. Et si vel parenti serviret; conjunctio nihilominus patris & matris præcessisse debet.

III. *Nuptiæ* & olim *velandi ritum*, ac domiductionis solemnitates; & hodieque Sacerdotalem copulam, ac reliquas festivitates vulgò notant. Romanis enim dictæ sunt Nuptiæ à *Nubendo*, id est, *operiendo*, seu velando. de quo VARRO IV. de Ling. Lat. Hinc *Nubes*, quæ cælum operiunt. hinc *nupta*, dicitur sponsa, ejus vultus solemnî velamine tegitur: & *nuptiæ* actus velandi. Etenim consuetudo erat, ut sponsa flammeo nuberetur, five velaretur, quod Eruditis notissimum est. Nos unicè *matrimonium* ipsum intelligimus: quare vocavimus conjunctionem. *Conjunctionem* dicimus, non corporum tantum; alias raptus, stuprum violentum, adulterium, incestus, honestum nomen

men consequerentur. Nec animorum tantum; secus non differrent Nuptiæ à Sponsalibus. Quod enim Jus Romanorum hac de re pronunciat, id interpretandum est, ad effectus juris in Republicâ ista: naturam matrimonii, extra leges Romanas consideratam, non evertit, nec considerationi Politicæ præjudicat. Sed conjunctio est & corporum & animorum. Carnalem enim copulam, seu consuetudinem conjugalem, consummare Nuptias, rectè assertum est Saxonum Legibus. Nec potest aliud in doctrinâ Politicâ statui: quærimus enim initium propagationis, quod se diffundere debet in civitatis multitudinem. ista multiplicatio conjunctione animorum non obtinetur, sed corporum. *Decentem* volumus hanc conjunctionem, ne consentientes invicem vel contra jus naturale, vel divinum congregiantur. qui decor, qualis sit ex doctrinâ morali addiscitur melius. Id Politicæ quoque contemplationis est, quod filiusfamilias impetrare debeat consensum Paternum, ad nuptias contrahendas legitimè. Cujus impetrationis necessitatem continuo aperiemus in Paternâ Societate. Quæ de conjunctione *unius maris & feminae*, non plurium fœminarum, aut masculorum inter se, disputant, ad excludendam atque damnandam Polygamiam & Sodomiam, itidem Moralis est considerationis: quo refertur & illud de pluribus viris, uni uxori non rectè cohabitantibus. Ejusmodi enim plurium admissionem damnat sana ratio: quamvis Lituorum mores adeò obbrutuisse narret

Eneas Sylvius, ut matronis nobilioribus licuerit maritis adsciscere concubinos, quos matrimonii adiutores vocabant. Omnis illa cognitio, ex fontibus Juris Naturalis repetenda est. Naturam hujus societatis porro explicat *Subjectum*, seu Personæ sociatæ, *Finis*, & *caus-
sa*. Personæ sociatæ sunt Mas & foemina, seu uno verbo, *Conjuges*. Finem vocamus Sobolis procreationem. Nam, quod alii adjiciunt libidinis extinctionem: id ad contrahentem tantum spectat, tanquam privatus & merè naturalis, aut etiam secundarius finis. Præcipuus, & quem civilem non immeritò licet nominare, est propagatio Generis humani, quæ civitates multitudine hominum implet. Adeò ut hic finis alteri similiter præponderet; quem in adjutorio mutuo, bono scilicet domestico, posuimus. Evertit illum principem conjugii scopum, stolidi quorundam religio, qui in ipso matrimonio, intempestivam, & publico minimè consulturam voverunt continentiam. *Causam* hujus societatis, *Naturam* asserimus. Sive Deum, seu Naturam Naturantem, ut Philosophi loquuntur, intelligamus; sive ipsum naturalem appetitum: non errabimus. Inest hominibus ingenitus procreandi sibi simile instinctus: quem perpetuitatis amor excitat. Scilicet creata omnia, quo nobiliora sunt, eò magis perfectionem primi Entis æmulantur: Hoc quia æternum est; viventia verò fluxa atque caduca, quibus singulis intereundum est: conservationem speciei generando perpetuitati transcribunt. Scitè in hanc sententiam differit

CAP. I. DE SOCIETATE NUPTIALI. 61
differit PLATO, Dial. IV. & ARISTOTELES,
II. de gen. an. I. Lib. II. de an. c. IV. Non
excludemus interim Proæresin, seu *Electio-*
nem & Iudicium humanum. Licet enim a-
ctus merè naturalis sit; semper tamen secum
trahit concomitans morale, quod *Electionem*
præsupponit. Alias vagos concubitus, ad-
ulteria, cæterasque nefandas nuptias, nun-
quam damnare possemus: quæ recta interim
ratio proscribit & exterminat.

IV. Videamus quo jure contineatur, vel
potius, quo *imperio* regatur. Illa enim contem-
platio propria est Politici, ut imperiorum na-
turam, diversitatem, causam, in qualibet
Societate scrutetur & explicet. Omnem
societatem aliquis juris nexus copulat, pro
cujusque indole. Æquales sunt aliquando,
qui conjunguntur: ut plurimum verò dispa-
ritatem sociorum in tractatione Politicâ de-
prehendimus. Secundum hanc diversitatem,
diversa jura surgunt ac competunt. Hinc A-
RISTOTELES, VIII. Nic. XI. *In qualibet So-*
cietate videtur aliquod jus & aliqua amici-
tia esse. Secundum diversitatem, æqualita-
tis vel inæqualitatis, GROTIUS distinxit Jus
in *Rectorium & Æquatorium*. Hoc tribuit vi-
ventibus sine inæqualitate, fratribus, ci-
vibus, amicis, foederatis. Societati inæ-
quali, καὶ τῷ ὑποποχῆν Aristoteli dictæ, (qua-
lis inter patrem & liberos, dominum & ser-
vum, maritum & uxorem, regem & subdi-
tos, Deum & hominem) *jus Rectorium* ad-
signat, lib. I. de J. B. & P. c. I. §. III.
Recto-

Reſtorium juſ locum ſibi hîc facere, planè ſcio: Nec moveor, quod *Philophus* commune & æquale juſ ſtatuit V. Nic. X. *Lege juſ conſtare, in iſſque locum habere, apud quos legem eſſe communem patitur natura, dicebamus.* Hoſ autem eſſe docuimus, quibus eſt inter ipſoſ imperandi & parendi æqualitas. Itaque inter virum & uxorem magis, quàm inter Patrem & liberoſ, Dominum & ſervum, juſ eſt communitas. Hoc enim juſ eſt ad tuendam rem familiarem perti- nens, alterum Politici pars videtur. Et lib. VII. cap. XII. imperium Patris in liberoſ re- gium, in ſervoſ dominicum aut tyrannicum, in uxorem Politicum apertius nominat. *Politicum ſcilicet ſecundum interpretationem vocis, quam habet i. Polit. i. quatenus aliquiſ modo paret, modò imperat, vi populariſ æqualitatis. Viri & uxoriſ ſocietas ad Optimatum Principa- tum proximè videtur accedere. Pro dignitate e- nim vir imperat, in iſſque rebus imperat, in qui- bus virum oportet imperare: & quæ mulieri con- veniunt, eidem permittit.* Sed cum inæqualitas evidens detur, ob quam inter virum & uxorem amicitiam ponit *Philophus*, quæ in *Excellen- tiâ* quadam *eximiâ* conſiſtit cap. VIII. & vir uxori imperet, non hæc illi: æquale juſ non habebimus; ſed Reſtorium imperium viro tribuendum eſt.

V. Atque pleriq; de hoc conveniunt: quoruſ- que verò perſingat imperium mariti, nondum ſatiſ definiverunt Auctoreſ. GROTIUS hanc facultatem in rebus conjugii & familie ſiſtit: in quibus ob ſexuſ differentiam marituſ caput ſit uxoriſ.

uxoris. Quod nimis generaliter dictum mihi videtur. Præsertim quod ulteriorem potestatem de *rescindendis votis, de vendendis bonis uxoris*, ab instituto civili fortean descendere arbitratur. Aliunde quam à sexus differentiâ repetendum mox erit imperium mariti: quod in rebus conjugii ac familiæ constituentes, amplissimum tamen judicamus in conjugem. Neque saltem rescindere vota, & omnem moderari voluntatem mulieris: sed in bona quoque competere jus, propter imperium in caput, alibi prolixius nobis declarabitur. Nam circumscripta illa in rebus dotalibus viri dispositio, à Jure Civili est: quod plurimas imperii maritalis particulas imminuit. Sed distinctius videamus de Jure castigandi uxorem. Plures commendant hîc *comem quandam & humanam facilitatem, qua gubernanda sit uxor, sociâ thori, familiæ, utriusque fortune; regenda ducendaque melius pudore, quam atrocitate. Amore opus est, & benevolentie argumentis: non jurgiis, non odiis, aut tristi severitate.* Benè hæc officium conjugale explicant: nondum verò *jus maritale*. Quid enim si acriora postulentur remedia? si refractariâ contumaciâ ad lenem illum ductum recalcitret? si ejusmodi designet scelera, ad quæ connivere maritus, aut quibus aliter, quàm igne ac ferro mederi nesciat? Hîc officium illud benevolentie inefficax fuerit: & potestas requiretur coërcendi crudam malitiam, & castigandi licentiam. Nam in Principe commendamus quoque Clementiam: quæ interim maximo imperio nihil detrahit. Sunt qui
modi-

modicam concedunt castigationem, ut *verberibus coërceatur uxor*: modò id sine modo & *causâ ne fiat*. Hanc verò coërcitionem procul abesse jubent, à *jure vitæ & necis*. quod ira mariti *servare modum nesciat*: respondeatque odii magnitudo pristino amorì. Sed tentari potest, *omne imperium, quatenus in subjecto proprio est, nec precario habetur ab aliquo homine, aut à superiore non est circumscriptum, importare jus vitæ ac necis*: & idè mariti imperium hac potestate armatum esse censemus. adeoque fundamentum omnis castigationis, quæ proprio mariti jure infligitur conjugì; ac omnis maritalis imperii summam, in POTESTATE VITÆ AC NECIS reponimus. Generaliter tamen notamus, hîc considerari à nobis Societates, *quatenus nullo imperio Civili subsunt, à quo limitentur*. Deinde per Jus vitæ & necis, non intelligimus licentiam aliquam, excusantem crudelitatem parricidii: sed *legitimam facultatem capitalia scelera condignè puniendi*. Nullum quippe jus, nulla potestas, ad impia datur. Præmittimus ergo, jam considerari nobis jus maritalè, quantum in se est; à Majestate nondum restrictum & limitatum: quale est præscindendo à Republica, in qua determinatur ex arbitrio Imperantis, ita ut universum non rarò tollatur. Hoc controversiæ statu ubique observato, dicimus; causam pœnalem vir citra iram & odium exercebit: & ut omnis judex, ita quoque maritus, ejusmodi affectuum vehementiâ vacabit.

bit. Nec concessa hâc facultate protinus de quâlibet leviusculâ causâ interficiendam putabit conjugem. *Gravissima sit causâ*, quæ vim uxori inferat; quam optimus quisque Legislator in Republicâ mortis supplicio coërceret: qualis homicidii, adulterii, similis. Hæc ventiletur *decenti ordine*, prævio iudicio, sine omni turbulento affectu. Qua fini priscos assumfisse *Propinquos*, quasi assessores, leguntur. Apud TACITUM locus est II. *Annal.* *Pomponia Gracina* superstitionis externa rea, mariti iudicio permessa: isque prisco instituto propinquis coram de capite famaue conjugis, cognovit, & inson-tem nuntiavit. Ejusmodi potestatem Romanis, Germanis, Gallis, aliisque populis in usu fuisse, etiam tum, quando habuerunt magistratus, concors historia tradit. Non aliter familiarum ratio sibi constare potuit. Consideramus hîc familias extra Rempublicam, nondum præsentē Majestate, quæ crimina delinquentium inhibeat. Commiserit ergò homicidium, aut par-ricidium marita, aliove scelere se obstrinxerit: dimittendum esset impunitum nefariæ conjugis sacrum caput, & confundenda aut evertenda familia. Id ne contingeret, ex-ferenda erat Maritalis potestas, quam Regiæ hucusque comparamus. Non enim temerè Paterfamilias HOMERO *Rex* dicitur. Neque barbarum est, quod ex eodem notat ARISTOTELES I. *Pol.* II. aliquas gentes id retinuisse, ut unus paterfamilias & uxori & liberis jura prescriberet
ubi

ubi ipse pariter docet; *Omnem domum ejus, qui aetate antecedit, regno subjectam esse.* VIII. *Eth.* XII. Patriam potestatem *regnum* imitari proximè dicit: quæ patria potestas ex potestate in conjugem surgit. Clarius II. *Oecon.* I. viri mores *pro legibus* habet. conf. III. *Polit.* XIV. & quàm plura loca alia, quæ Maritum & Patremfam. *Regem* salutant. Regi verò in caput civium potestas est: quare & Marito in universam familiam. Frustraneum esset illud præceptum, quod Noacho dedit Dominus; *Quisquis sanguinem humanum effuderit, ejus sanguis effundetur per homines:* nisi hâc potestate instructus esset maritus, ut ejusmodi facinus in uxore posset debitâ modis castigare. Nec detrahit quicquam nostræ sententiæ, quod recentioribus populorum legibus aliter constitutum est: nec marito permessa facultas animadvertendi in uxorem ultimo supplicio. Id ipsum enim inficiabimur nunquam: sed secundum præmissam cautionem interpretabimur. Aliud nimirum est, disputare de Potestate Mariti in hâc, vel illâ Republicâ: aliud de jure in se, extra civitatem, considerato. Citra disputationem damus; posse Mariti jus à Majestate impediri, sicut Domini, sicut Patris. quia omnes potestates, omnia imperia Principi, modo quodam eminentissimo, adhærent: eâ facultate, ut illa & ad se trahat, & in possessoribus pristinis extinguat. Non igitur mirum, si jus vitæ ac necis marito subtrahatur: cum & patri, & domino in servum ademptum sit; castigatione modicâ relictâ. Quæ & ipsa pro imperantis arbitrio

trio negari posset, omni contentione ac controverſiâ ad judicem deferenda, ſi id ex re communi exiſtimetur futurum. Huic interim deminutioni opponerem gentes, quæ poſt Rempubli- cam conſtitutam tale jus retinuerunt: permiſſu ſcilicet Majeſtatis. quæ permiſſio cum includeret omnia ferè, quæ indoles hujus imperii complectitur; facileſcere eſt, quid ſine permiſſione imperantis, extra rempubli- cam, ſuo jure habeat maritus. Nam in Republi- câ exercebat hoc maritus, quâ maritus: quod argumento eſt, priſtinum jus confirmari, non novum dari. Si novum quid tribueretur, conferret id Majeſtas viro, non quia maritus eſt; ſed quâ magiſtratus conſtitueretur. Magiſtra- tus autem à tali imperio diſtinctam habent Ju- riſdictionem.

VI. Ut autem appareat magis veritas mari- talis poteſtatis, originem ejus ſcrutabimur. Maritalem poteſtatem à Naturâ deducit ARISTOTELES. quod ſi *Naturam*, ut loquuntur, indigita- ret, ſalva res eſſet: nunc ad naſcendi ordinem, & ſexus diſcrimen dilabitur. VII. Nic. XI I I. (aliis eſt XI.) *Viri & uxoris amicitia eadem eſt, atque ea quæ in optimatum Principatu. Ex virtute enim res tota deſcendit, & plus boni meliori tribuitur, & quod cuique aptum & accommodatum eſt. Idem porro & de jure ſentiendum. Expreſſius loquitur I. Polit. V. Statim ab ortu primo nonnulla inter ſe diſtine- runt, alia ut parerent imperio, alia ut impera- rent. Et cap. XI I. ejusdem Libri. Mas ad prin- cipatum obtinendum dignior eſt, quam femina.*
naturâ

*naturâ. & cap. xxi. Quare complura imperant naturâ, & imperio parent. Alio enim modo liber servo præest, & mas femina, & vir puero. Breviter, ea mens Aristotelis est; dignius indigniori imperat naturâ: sed foemina naturâ est imperfectior viro: quare necessario viri imperio subest. Quam sententiam sublimis GROTIUS minus accuratè admisit lib. II. de Jure Belli & Pac. cap. v. n. viii. Ex consensu jus in personas quod oritur, aut ex consociatione venit, aut ex Subjectione. Consociatio maxime naturalis in conjugio apparet: sed ob sexus differentiam imperium non est commune, sed maritus uxoris caput. Pressius insistit Philosophi vestigiis ARNICÆUS, qui maritalem potestatem aded deducit à naturâ, ut ad brutorum exempla recurrat, quæ sub masculis degunt. Tum societatis & juris conjugalis eandem originem constituit naturam. Quin Adamum, etiam ante lapsum mulieris, dominatum fuisse uxori, scribit: quod prior creatus sit. Quo trahit *Ap. Pauli dicta I Corinth. xi. 8. I Tim. ii. 13. Vir non est creatus ex muliere, sed mulier ex viro. Non permitto mulieri docere, nec dominari. Adam enim primo formatus est.* Verùm hæc imperium naturale non probant. Si virtutem ponit ARISTOTELES fundamentum imperii: non nisi temerariè illud negabit foeminino sexui. Minores dotes in foeminis sæpius quæsitæ, quàm inventas, & à naturâ datas habeas. In omnes virtutes patet humanus animus: quem si prolixiorem in virorum genere habent, tamen foemi-*

ſceminis non eripient totum, credo. Quicquid
 hominis participat naturam, virtutis æ-
 què capax eſt. Ut hoc nomine ſceminæ non
 ſubtrahas imperium. Si dignitatem in robore
 corporis quæras; ſimul aſſeras oportet, qua-
 dratum ruſticum, ob craſſum & groſſum
 corpus, regibus aliquando præferendum eſſe.
 Qualitates naturales imperium nullum con-
 ferunt. Uterque ſexuſ neceſſarius: uterque
 ſuo decore præditus eſt. Uterque ſexuſ in
 generationis opere activuſ eſt; & fictitiuſ
 imperium *Leonardi Leſſii*, ex ratione *agentiſ*
 & *patientiſ*, vel *inſtrumentuſ*, ideò evaneſcit,
 quod nuſquam generaliter receptuſ ſit. Li-
 cet igitur vel maximè Marituſ naturaliter
 præſtantior ſit in eâ combinatione, & in-
 ſtar agentiſ ſe habeat: nullam interim hac
 actione conſequeretur poteſtatem in uxorem.
 Niſi brutiſ animantibuſ eandem velimuſ ad-
 ſcribere. Diſpoſitio corporiſ, vel animi,
aptitudinem notat; non continet cauſſam
 poteſtatiſ; cum ab illâ ad hanc nulla ſeque-
 la ſuperſit. Multi prudentia civili præditi
 ſunt, qui propterea non imperant naturâ:
 ſecus impediri ejuſmodi imperium ratione
 nullâ ſaſ eſſet. naturalia enim, non niſi de-
 ſtructâ naturâ ſuâ, mutationem ſubeunt.
 ARNIſ æo hæc reponimuſ. Bruta animantia
 ab imperii, diviniſſimæ rei, participatione
 excludenda ſunt. Imperii poteſtaſ in beſtialem
 naturâ non cadit. Simulachra, & imagines ob-
 ſcure, tum ſimilia, niſi concludunt in Politi-
 ciſ. Validiora ſunt, quæ tantam rem conſiciant.

So-

Societatis & juris imperatorii hæcenus eadem origo, si causam primam utriusque attendas, Deum. Sed per naturam intelligunt, inclinationem naturalem: quæ stimulat quidem hominem ad colendam societatem; ad producendum verò imperium nimis impotens est & inefficax. Adamo ante lapsum asserere imperium, contra Sacrarum Litterarum testimonium, nolim: & fundamentum in Evæ imbecillitate, antequam peccaret etiam, reponere, citra impietatem non ausim. Ad imaginem perfectissimi Numinis conditum hominem credimus: quæ imago imbecillitatem omnem excludit. Dicta *Apostoli* de imperio in foeminas post, non ante lapsum, intelligenda: nec productum à naturâ imperium viri affirmant. de quibus alibi pluribus, quando Subiectum Majestatis interpretabimur. GROTIUS, quamvis in sexu aliquod fundamentum imperii constituat; præcipuum tamen locat in *consensu*. unde concludit dicto loco: *In homine verò, qua animans est utens ratione, ad hoc accessit fides, qua se femina mari obstringit.* Et vidi, qui civilis imperii fontem scrutatus, ad instar maritalis potestatis, eundem dicebat à *voluntariâ subjectione descendere. Universam multitudinem sponte se arbitrio imperantis permisisse, & certo pacto sub potestatem concessisse. Rem totam esse voluntatis & voluntarii pacti.* Sic uxorem, quam non habet potestatem maritalem, subjectione suâ spontaneâ marito concedere. Id universali pronuntiatione asserimus; nullum imperium, sive publicum, sive privatum, homini

in hominem competere, absque expressissimâ constitutione Dei, ejusdemque præsentissimo interventu. Uxor nec potestatem maritalem habet, nec eandem marito in se concedit. Repetenda hæc altius sunt, quam ex gentilium scriptis, quibus naturâ mulier ignobilior viro, hic præstantior; & dignus propterea, qui inferiori præsit.

VII. Ex sacris Litteris hic suppetiæ quærendæ, quarum interpretes docent, principi humani generis tum demum arbitrium in uxorem concessum solemniter, quum hæc suâ culpâ excidisset pristina eminentiâ. Nimirum primitus non erat obnoxia marito suo Eva: gaudebat equali libertate atque præstantiâ cum Adamo: exercebat idem jus in bruta, quod ille; nec suspiciebat quemquam præter Deum. Sed cum postea deficeret à Deo, & Adamo pariter existeret caussa, ut se obstringeret horribili perduellionis crimine: in pœnâ perpetrati sceleris, & pristinâ exuebatur libertate, & marito subjiciebatur, expresso Dei decreto. Hujus formula exstat Gen. III. 16. *Voluntas tua obnoxia esto marito tuo: Et hic dominabitur tibi.* Hæc sunt illa incunabula maritalis potestatis, & juris, cui uxores subjacent. Hæc sunt illa fundamenta patriæ potestatis: quod censeantur nati eodem jure, quo mater. partu non obscure conditionem ventris sequente. Quicquid igitur nunc voluntatis & voluntarii pacti in muliere occurrit, id ad contrahendum matrimonium pertinet: & consequenter interpretandum est ad assensum, & approbationem, qua

qua in secuturo certi mariti imperio foemina acquiescit.

CAPUT II.

DE

SOCIETATE PATERNA.

- I. *Omnes liberi subsunt imperio patrio.*
- II. *Quod per Generationem nudam non acquiritur.*
- III. *Consensus Patris requiritur in Nuptiis.*
- IV. *Ius vendendi, & castigandi filium.*
- V. *Potestas Patria in Bona filii.*
- VI. *Officium Paternum temperat imperium.*
- VII. *Potestas Patria in civitate restringitur.*



Societas Paterna inter Patrem & liberos, ob adjumentum & utilitatem à naturâ per generationem constituitur. Vinculum, quo hæc societas continetur, *Patriâ potestas* est: quæ ex nativâ indole imperiorum, non secus ac Maritalis, in caput Subjectorum liberorum pertingit. Hæc quanta sit mox aperietur: si causam ac fundamentum prius fuerit declaratum. Universum Imperium paternum causam habet Deum; sed intercedens quasi fundamentum est præcedens societas, in quâ mariti regno subiecta est uxor. Eandem sortem subeunt ex uxore procreati. Quod partus regulariter sequatur conditionem ventris

ventris, quod imperium concernit. cum verò mater conjugis imperio divinitus subdita sit; quicquid ex hac nascitur, idem imperium accipit & veneratur. non enim potest effectus meliorem habere conditionem illâ, quam sustinet causa. Idque perpetuum est in omni genere imperiorum. Quicquid ex ancilla & servili ventre producitur; herili paret dominatui. Quicquid à cive generatur, Majestatem Reipublice veretur. Hinc bene Jcti Romani Patriam Potestatem matrimonio & nuptiis constitui, asserunt. Non requirimus legitimationem, jure Civili excogitatam, ad hoc, ut liberi sub patris constituentur potestate. Nam extra Rempublicam, secundarium illud matrimonium, quod concubinatum vocant, eandem efficaciam habet, quoad imperium paternum, quam primarium, sive solemne conjugium sibi vendicat. Liberi ex alterutro nati, non differunt majori minorive libertate: sed succedendi ordine. Nam in ipsam concubinam, antiquissimis Patriarcharum temporibus, competiisse imperium, inde mihi constat, quod concubina ubiq; vera uxor fuerit, & uxoris nomen in Sacris litteris gerat. Licet plerisque uxor dicatur *Secundaria*; & concubinatus *conjugium secundarium*: id tamen ad naturam conjugii non est referendum; sed ad effectum aliquem extraneum, relinquenda hereditatis. in cujus aditione, ex solemni matrimonio nati præferbantur ut plurimum concubinariis liberis: quibus dona & legata relinquebantur. Addam luculentissimum exemplum Abrahami, qui in

naturalem, ut vocant, filium Ismaelem, ex concubinâ Agare editum, exseruit patriæ potestatis jura. Cujus rei documentum illud est, quod & circumciderit eundem, (id vero nisi in subditos suæ potestati non designabat) & cum protervè quibusvis, tum Saræ inprimis illuderet, & signa non tantum ederet immodesti animi, sed pessimorum scelerum speciem ostentaret, abdicaverit, & paternis ædibus ejectum miserit exulatum.

II. GROTIUS ad *generationem* hîc recurrit, quam causam imperii facit, lib. II. c. V. n. 1. de J. B. & P. *Non investantum, sed & in personas jus quoddam acquiritur, & originariè quidem ex generatione, consensu, delicto. Generatione parentibus jus acquiritur in liberos: utrique inquam parentum, patri ac matri: sed si contendant inter se imperia, præfertur patris imperium ob sexus præstantiam. Leonardus quoque LESSIUS eandem fovet opinionem, lib. II. de Just. & Jur. c. XLV. Dub. IV. n. 24. ubi primam rationem, qua imperandi potestas producitur, vocat causam ordinem. Causa enim naturaliter habet potestatem in effectum. hac ratione Deus potest imperare omni creatura rationali. quia ipse est auctor, & illa est opus & figmentum ejus. Idem suo modo competit parentibus in filios. Quod si Generatio produceret naturaliter imperium in generatum, & brutis animantibus, & stirpibus, quibus potentia & operatio generativa tribuenda est, simul assignanda foret aliqua imperii potestas, non sine absurditate. Sæcipientias; irrationalem & sensum*

suum expertem naturam capace non esse imperii, & distinguendam adeò à rationali, quæ imperium participare potest: largiar id ipsum, & nostræ sententiæ applicabo, & causam postulabo; quare homo vi generationis consequatur imperium? cum interim hanc operationem producat, non quatenus homo est & ratione præditus; sed quatenus naturâ vegetabili, quæ ex se nullum imperium dat vel capit, instructus est. In hominum genere vera non est propositio, quod causa in effectum competat imperium. Nam servus & serva partus servilis causa sunt, non tamen imperant liberis. Ita mater liberæ conditionis, non minus ac pater, causa liberorum est, in quos potestatem nullam exercet. Imo ipse maritus, sub patria potestate constitutus, imperare filiis, & exigere omne obsequiorum genus haud potest, usque dum egrediatur familiâ. Subjicitur effectus causæ, quando causa non subjicitur alii: Hinc quia solus Deus prima causa est, & nemini subiacet, plenarium obsequium flagitat. Post hunc quasi secundarium recipiunt omnes, quibus id speciali constitutione à Deo concessum est: quales extra Rempublicam Patres-familiarum, & in Republicâ Imperantes. Quamvis enim hi ex suâ naturâ imperium nullum habeant, & propterea obsequium nullum postulent: attamen, quia communicatur iisdem per quandam commissionem divinam potestas; optimo jure ab inferioribus, & sibi hac delegatione subjectis, debitam obedientiam exigunt. Quod si Deus Opt. Max. Adamo non concessisset

- imperium in uxorem: nec præstantia sexus in hanc, nec generatio in liberos contulisset aliquam potestatem: fœmina, & liberi, omni lege superioris hominis vixissent soluti. Postquam autem Evæ voluntas subiecta est Marito, omne ex illâ genitum imperio, quod mater suspicit, paret. Et huic quidem soli; non etiam materno, quod nullum est. Nam utrique parentum, patri ac matri, nolim tribuere imperium: tum quia per generationem, quæ naturales effectus producit, qualis non est imperium, minimè acquiritur: tum quia subditus duobus æqualibus imperiis nemo est. Illud quoque perpetuæ veritatis censendum, hominem, qui sub potestate alterius est, in potestate alterum non habere, nisi ex speciali concessione superioris: cuius indultu; si qua conceditur viventi sub imperio potestas; subordinata, restricta, & limitata nimis est, ne alterius actus facere possit irritos. Quamvis de potestate, matri concessa divinitus, nihil quicquam sciamus: & dictæ rationes civiles maximè obstant, ne temerè aliquam fingamus. Si quid circa liberos, servos; rem familiarem, disponit uxor: id omne arcessendum à permisso Patrisfamilias, cuius voluntatem exsequitur, precario imperio, proprio nullo, instructa. Cujus rei argumentum est, quod si aliter ordinet maritus, repugnare nequeat eidem uxor.

III. Quanta sit Potestas Patria inquiramus. Magnus GROTIUS, quia lubricum fundamentum jecerat, non poterat aliquid solidi superinstruere: quare modicam saltem facultatem conce-

concedit in liberos ; & tempus quidem imperfecti, tum maturefcentis iudicii, regimini lenissimo subjicit : ubi excessit familiam paternam, propriam constituendo, liberum planè, & sui juris proclamat filium. Verùm imperii natura diversam sententiam exigit : quare omnino censendum est, imperium paternum, ut omne aliud, includere *potestatem in CAPUT & in BONA Subjecti*. His duobus omne imperium regulariter absolvitur. Potestas in caput includit omne regimen in filium, & ejus actiones ; tum si minus obediat, pœnas. Quoad prius, dirigit pater operationes liberorum in congruum finem ; & liberi tenentur patris auctoritatem sequi. Domesticus Censor est Pater, qui mores ac voluntatem filii ordinat, ducit, refrenat. Nam potestas in caput includit jus moderandi voluntati filiali. quod dispositio de parte, propria sit illi, cui facultas in totum data est. Quo pertinet consensus parentum, in contrahendo matrimonio à liberis impetrandus : extra leges quoque civiles, non quidem jure naturali, sed vi imperii paterni, necessarius. tum ne filius, ducta uxore, invito parenti vel heredem adducat, vel invisam nûrum : tum ne filia contra voluntatem paternis sacris eripiat. Circa hanc materiam benè disputat hactenus GROTIUS lib. II. cap. v. n. x. negans *consensum parentum ad validitatem conjugii quasi naturaliter requiri*. Nam istud dandum est, jure naturali consensum parentum nuptiis filii nihil firmitatis addere, nihil etiam detrahere : cum reverentia saltem inculcetur exhi-

benda parentibus , non his tribuatur aliquod imperium. Et argumenta auctorum , præter honorem parentibus debitum , nihil concludunt. At verò propterea consensûs impetrationem ad jura Civilia tantum restringere , & extra hæc, facultatem & dominium liberis asserere , mihi non est integrum. Si à generatione deduceremus jus , seu potestatem patris , præter reverentiam nihil colligeremus ex isto principio : nunc cum Sanctione & concessione divinâ verum imperium , quale in dominatu deprehenditur , in uxorem permissum sit marito , & per hanc in liberos ; utriusque actiones determinat paterfamilias , satis stabili fundamento fretus. Hypothesis illa non admittetur ; *quod filius nuptias contrahens , sit maturæ ætatis* Et ideo Patris dispositioni , tum etiam familiæ subtrahatur. Nondum enim probatum est , liberos maturæ ætatis solvi patriæ potestatis nexu , & familiæ egredi : quod grande postulatum assertioni interim substernitur. Imperium , ut tempore non producit , ita nec à tempore finem accipiet. Filios autem non exiisse familiæ paternæ , ducta uxore , sed hanc mariti patri simul fuisse subjectam , ex sacris puto probari ; quando Thamar apud Socerum accusabatur , & ab eodem , non alterius quam patriæ potestatis vi , quam in virum Thamaris , filium suum obtinuerat , ad ignem condemnabatur. Non exit filius paternâ familiâ , licet maturæ ætatis : nisi dimissus à patre , aut accedente superiori potestate , quæ paternam ad se trahat , & certis limitibus circumscribat. Occasio lapsus ple-

plerisque fuit, quod doctrinam Imperiorum ex materia Jurium conati sint explicare, quæ alienissimam naturam sortita est.

I V. Potestas in caput luculentissime clarescit in *venditione liberorum*: dum necessitatis extremæ tempore, quò & sibi consulat pater, & prospiciat insuper filio, vendendi eundem, & multò magis oppignerandi, habet facultatem. Hanc rationem, citante GROTIUS *not. n. v. dict. cap.* observat JORNANDES, *historia Gothica*. Haud enim secus parentes faciunt, salutem suorum pignorum providentes, satius deliberant ingenuitatem perire quàm vitam, dum misericorditer alendus quis venditur, quam moritur, servatur. Quam consuetudinem apud Mexicanos idem Grotius annotat; & ab Hebræis, à quibus Phœnices, inde Thebani, acceperunt, fluxisse arbitratur. Quanquam radicalis causa hujus potestatis non à *consuetudine populorum*, quæ exercitium saltem infert; sed *imperii paterni natura*, quatenus in caput filii pertingit, est repetenda. Pertinet huc jus castigandi filium immorigerum & refractarium. Quod si enim paterno regimini liberi recalcitrent, coërcendi sunt: nisi frustraneum velis omne imperium. Cogendus igitur est crudus animus, ne transversum rapiatur; & emendandus, si jam peccaverit. Hoc rerum statu, quo judicis personam gerit Pater, summâ prudentia opus est, ne excedat pœna delictum. nam in defectu tolerabilius peccabitur à patre. quod dignitas, seu meritum pœnæ, non omnimodam necessitatem includat. Quare levioribus

erratis, severior reprehensio & admonitio suffecerit: si procedat petulantia, plagis & verberibus aperietur locus. Quod si transierint vitia in contumaciam, *paternâ successionē privari poterit degener filius*. ne commodum capiat ex bonis illius, cuius sancta praecepta malitiosè neglexit. Si neque hac ignominia & jactura moveatur, nec ad frugem redeat maleficus filius; *Abdicatio* ad paternam Jurisdictionem pertinebit: quâ carcinoma illud è familia paternâ ejiciatur. Hæc Græcis usitata, & Romanis aliquando non fuit incognita. Dicebatur *ἀποχρηστis*, quia per Præconem celebrabatur, cujus voce publicè testabatur Parens, *se ob desperatos mores, filium domo suâ indignum judicare, & jubere prorsus è conspectu suo abire*; ut formulam hanc VALERIUS MAXIMUS de Tito Manlio Torquato, tradit lib.v. c. viii. Rationem acutam & ingeniosam affert Aristotel. viii. Eth.xvi. *quod Pater debitor sit filio, & quidem perpetuus, Pater Creditor: licere autem omni jure creditori suum debitorem dimittere*. Quæ ratio subtilior, quàm verior est. Nam debitor dimissus habet beneficium & nexu debiti liberatur: filius abdicatus sentit pœnam: quæ pro lubitu nemini infligitur, nisi ubi delictum præcesserit. Erat ignominiosa missio, dum vestibus spoliatus expellebatur. Civitatem interim non amittebat, ut aliqui volunt. Nam HESYCHIUS id clarè affirmat: & CORNELIUS NEPOS, in *Themistocle*, auctor est; cum à parentibus *exheredatum*, id est, *abdicatum*, in republicâ Atheniensium ad summa pervenisse.

uisse. Ut minus congruere videatur opinio, censentium, abdicatorum receptores læsæ majestatis fuisse reos. Nihilominus ignominiosa erat missio. ut *Aristotelis* similitudo ad *emancipationem*, qua liberi ex potestate paternâ dimissi, juris sui fiunt, citra notam ullius infamiæ aut damni, mēlius quadret, quàm ad *abdicationem*. Per hanc enim imperio minus honorificè eximuntur. Nobis hujus juris fundamentum rectà petendum est à potestate in caput: quam omnis castigatio præsupponit; & proximum jus vitæ ac necis, anima omnis imperii coarguit. Cuicunque enim jus datur, ultimo supplicio afficiendi aliquem: ei quoque facultas competit, è paternis sacris ejiciendi delinquentem. Cæterum prægnantissima sit causa hujus ejectionis. Unde Athenienses, sub Republicâ scilicet viventes, non nisi causa cognita apud judices, id moliri poterant. Quod bene monet *Aristoteles* dicto loco. *Nemo fortassis, inquit, discedere velle videatur, nisi ab eo qui improbitate excellat. Nam præter amicitiam naturalem, humanum est, auxilium non aspernari.* Ubi rectè naturalem expendit amorem, non nisi atroci de causa consensurum in abdicationem. Causa sufficiens erat apud Græcos, si filius noctu foris cubuisset: si comeffaretur: si libidini incumberet; tradente LUCIANO. FABIVS QUINTILIANVS generale delictum ponit, si voluntati paternæ repugnasset. Extra rempublicam, ubi nullæ leges civiles hoc negotium determinant, delicti atrocitas à Patre æstimabitur. Exemplum habemus

in Abrahamo, Ismaëlem abdicante, accedente divinâ approbatione. Gen. xx. 12. Si capitali crimine se obstringat filius, eâ potestate armatus pater est, quæ fontem puniat. Tunc igitur se exseret jus vitæ ac necis, & liberos homicidas ultore gladio, secundum præscriptum divinæ legis, perimet. Hoc enim præcipuum momentum omnis imperii, ut nefariè impios ultimo supplicio afficiat. Majestatis vices extra Rempublicam sustinet Paterfamilias: qui suos regit, & si enormiter peccent, hoc freno coercet. Imperat enim familiæ Princeps: non consulit, non monet tantum. Apud Germanos, Romanos, & plures alias gentes, usurpatum hunc summum patriæ potestatis gradum, monumenta omnia loquuntur. Ebræis quoque in usu fuisse, inde colligo, quod Jacobus furtum Labani factum, capite fontis expiandum proclamet: nullo intuitu, siue ab uxoribus, siue liberis, siue servis id factum fuerit. Et Juda, cujus mentionem supra n. 111. fecimus, in filium habuisse jus vitæ ac necis, dicendus est: cum propter illud jus nulum apud se accusari passus sit, & ipse condemnare non dubitaverit.

V. Alterum membrum Paterni imperii fuit ex Potestate in caput, & extenditur in BONA Filii: cujus vigore illud consequitur; Patris substantiæ & facultatibus accedere; quicquid fortunarum, operâ atque industriâ filii, fuerit acquisitum. Quare nec donare posse filium, vel mortis, vel alterius rei causâ, verius est: quia dominium nullum habet. Quia enim patri in caput filii potestas est: etiam bona, quæ filii

filii studio obveniunt, isti adscribenda. Ratio est. quia accessorium sequitur naturam principalis sui. Bona verò accedunt personæ. quare lubeunt eandem conditionem, quam persona sustinet. quæ cum Patris imperio subfit, necessario bona ejusdem moderationi parebunt. Clarissimum exemplum in Romanis legibus suppeditat Arrogatio. quâ in personam sui juris comparabatur potestas, & simul dominium in adrogati bona. Unde Arrogatio constituitur modus domini acquirendi. Nullum discrimen bonorum, à filio quæditorum, facimus. nam *Castrense & quasi castrense* peculium Reipublicæ Sanctio invenit, postquam patriam potestatem etiam in reliquis circumciderat & coangustarat.

V I. Hæc capita sunt, ut omnis, sic etiam paterni imperii: quod officium, in pietate ubique consistens, moderatur, & nascendo atque nato filio benevolè prospicit. Ut enim conjuges eo fine conjunguntur, ut multiplicando generi humano operam dent; ac idè obstricti sunt; ne huic destinationi repugnent: ita postquam fœtus conceptus est, omni cura invigilare debent, ut incolumis servetur. Nulla ratione excusari potest horrendum scelus, quò in viscera sua sæviunt parentes, abortum procurantes. Impia sunt, quæ ARISTOTELES scribit VII. *Polit.* XVI. nec habeo, quo velamento sententiæ deformitatem obtegam. Eadem obligatio naturalis, quæ vetat nascentem animam interimere, vetat quoque natum infantem exponere. Sive perimendi animo abjiciatur.

tur; sive ut ab aliis misericordiam consequatur, qua parentes caruere: utrobique crimen est, nostris quoque moribus ac legibus graviter puniendum. Ideò recens nato filio prospicere tenetur parens, de alimentis, de victu, de amictu, de omnibus, quæ transigendæ vitæ sunt necessaria. Idque in illud usque tempus, donec sibi filius, si emittatur familiâ, eadem acquirere, & sibi prospicere possit. Necessitati verò consulit recta ratio; non voluptati, aut prodigalitati nepotis favet; non vires fortunæ patriæ omnino affligit aut exhaurit. Nutritioni videtur connecti *Elocatio & Dotatio: Institutioni* quoque locum dabimus, ut ad omnem virtutis decorem, & honestatis cultum, & pietatis sanctimoniam, animus tener imbuatur. Quæ officia Charitatis paternæ, ab ipsâ naturâ commendata atque præscripta, satis documentato sunt, quomodo exercenda suis juribus, superius delineata Potestas Patria. Illud quippe temperamentum adjiciunt, ne tyrannica fiat, quæ legitima erat. Neque enim propterea censenda est atrocior nostra sententia, qua jus vitæ ac necis datum esse patri, asseruimus: nam & illud mitissimus quisque regum in suos habet, nunquam ideò tyranni infami nomine notatus; & regi hætenus ubique comparatur pater. Omnis potestas à Deo est; nulla Tyrannica: exercitium malè usurpatum id nomen merebitur. Et quemadmodum Princeps injustè trucidans aliquem, homicidium admisisse, non exercuisse Jurisdictionem, intelligitur: ita pater sine causâ, quæ digna erat mortis supplicio, perimens filium, patria

patriâ potestate à parricidii crimine non liberabitur. Causa igitur subsit, morte digna, quæ provocet jus vitæ ac necis in liberos expediendum, sicut ad infligendam omnem aliam severiorem castigationem. Nullum imperium in se malum est: nullum jus, nulla plenitudo potestatis ad injusta & impia pertingit. Qui occasione Lothi, promittentis se passurum filias vitari, quærunt, num prostituere pudicitiam earum potuerit jure patriæ potestatis: lapsum & imbecillitatem viri non attendunt, nec imperii cujuscunque jura satis perspicuè tractant.

VII. Hæc omnia ut supra monuimus, dicuntur, sequestratâ contemplatione Reipublicæ. quatenus extra civitatem, & extra Majestatis limitationem, in suâ naturâ separatim consideratur auctoritas Patris. Nam in omnibus fere hodiernis rebus publ. ademptum est Jus Patribus & Maritis. Sic Jure Romano antea commemorata Abdicatio expulsa L. 6. C. de Patria Potest. *ABDICATIO, quæ Græco nomine ad alienandos liberos usurpatur, ἡ ἀποχή ποτῆρος dicebatur, Romanis legibus non comprobatur.* Ita potestas interficiendi filium, etiam noxium, restringitur; adeo ut pater filium, adulterantem novercam, interficiens, Romanis legibus punitus sit deportatione in insulam l. 5. de Parricid. ubi *Adrianus* hanc rationem adjecit: *Patria potestas in pietate debet, non atrocitate consistere.* Ita sensim ademptum hoc jus est, ut teneretur tandē pater filium castigandum offerre judici, dicturo ex patris præscripto sententiam. L. 2. de Sicar. L. 3. C. de P. P. Idem observo circa potestatem mari-

mari-

maritalem, quæ in plurimis imminuta est: adeo ut invenerint Romani Legislatores modum, quò uxor nullâ ratione subjiceretur conjugis potestati. Nam quæ *usu habebatur conjux*, in potestate parentis manebat perpetuò, modò per trinoctium usurpatum iret. secus usucapione subjiciebatur manui viri, in quam non convenerat. Quod versato in Romanis antiquitatibus, notissimum est. Nostris quoque moribus, dum sub republica, & imperio civili degimus, & maritalis, & paterna potestas, à Majestate restringitur, quæ inferiora imperia ad se trahit. Quamvis enim marito & patri imperium concesserit Deus, irrevocabile tamen nunquam fuit. Quæ num reducenda in usum ac consuetudinem fiat, hujus loci non est disputare: quamvis in elegantem sensum, sive hic, sive alibi quæstio instituat, inclinandum sit. Postquam enim Majestas judicia in republica ordinavit; quæ delicta debitis suppliciis afficiant; & parens adeò ac maritus, transgressorem filium, aut peccantem conjugem, ad tribunal trahere possit: nec ex re tranquillitatis communis, nec auctoritate Principis futurum videtur, si præter modicam domesticam animadversionem, quicquam Patrifamilias concedatur.

C A P U T III.

D E

SOCIETATE HERILL.

I. *Servitus naturalis nulla est.*II. *Li-*

CAP. III. DE SOCIETATE HERILI. 37

II. *Libertas non est naturalis facultas.*

III. *Servitus non est Iuris Gentium.*

IV. *Vnde imperium Herile; & quantum.*

V. *Quomodo imperia maritalia, paterna & dominica differant.*



Societas herilis est inter dominum & servum, consuetudine gentium introducta: ubi dominus servo utitur, tanquam instrumento, ad familiæ conservationem. Non persequemur hîc pluribus definitionem domini; aut servi, *quatenus hic sit instrumentum animatum, omninò alterius*: quod hæc talia melius ab Oecono-
momo tradantur, & nobis in materia civili negotium datum sit, imperiorum indolem scrutari. Id in præsentî paucissimis agendum erit, si prius originem societatis breviter attigerimus. De Servitutis origine non omnium una sententia est. Sunt qui *naturam* constituent causam: nec desunt, qui eidem *contrarium planè* esse hoc institutum affirmant. Priorem opinionem tuetur ARISTOTELES, cum suis interpretibus I. Polit. c. V. ubi hæc Philosophi leguntur verba: *Imperare & parere non solum ex numero rerum necessariorum sunt, verum etiam ex utili-
tate. Et statim ab ortu primo nonnulla inter se distiterunt, alia ut parerent imperio, alia ut imperarent.* Et infra describit servum naturalem hoc modo: *Natura servus est is, qui alterius esse potest: ideoque & alterius est: & qui consue rationis est particeps, quod eam sen-
tiat*

tia quidem, sed non habeat. & supra cap. II. Copulantur autem etiam natura id, quod imperat, & id, quod imperio pareat, propter salutem: nam quod mentis agitatione providere potest, imperandi ius habet natura, & dominatur natura: quod autem potest corpore imperata facere, id imperio alterius parere & servire debet naturæ. Et cap. VI. sic habet: Domini & servi conjunctio naturalis est, quia ad ipsorum salutem & conservationem facit, dum alter alteri opitulatur iis adiumentis, quæ à Naturâ habet. Dominus videlicet ingenio & solertia; servus corporis viribus & robore. Nos præter servum, quem legalem vocat Aristoteles, alium non habemus. Ut naturalia imperia, sic servitia ignoramus. Confusio ingens dominorum & servorum introducetur hac doctrinâ. Servus & Dominus, Politica vocabula sunt, Physicis & naturalibus rebus non commiscenda. universa naturalis Philosophia nihil novit de servo, aut domino. Cuique habituum sui limites & aggeres positi sunt: quos si movemus & transferimus, data opera miscemus doctrinas. Definitio servi naturalis, nisi obscuritate foret tuta, vix effugeret culpam absurditatis. Natura servus est is, qui alterius esse potest: ideoque & alterius est. Qualis quæso sequela; qui alterius esse potest, servus natura est? Ita forsan omnes homines naturâ servierunt: cum nemo satis præcavere possit adversæ fortunæ casus; & nemini à naturâ jus datum sit, ne unquam serviat. Legalis quoque servus alterius esse potest, & alterius est; ideoque natura

ra

râ servus ? quomodo distinctæ species ? *ratio-*
nem sentire, & non habere, nimis acutè dictum
 est. quam subtilitatem, nec materia popularis,
 nec simplex veritas satis capit. Ingenioso autem
 homini imperium naturale assignare, & robu-
 stum, ac minus callidum in servitutem natura-
 lem detrudere; id verò Politicam doctrinam o-
 mnem, & discrimen dominorum ac servorum
 eximiè turbat. Da mihi hominem, tam stupi-
 dum ac fatuum, ut *Seneca* joco, regnare etiam
 possit: hunc stolidum regem, summâ potestate
 fruentem, in ergastula servorum compinges.
 cui associandi omnes proceres, robusto corpo-
 re, exili ingenio decorati. Contra omnes servi
 callidi, qui dominio alterius subditi reverâ e-
 runt, si sagacitate polleant, in classem domi-
 norum evanes. Ita contraria tandem idem sub-
 jectum inhabitabunt, & dominus erit servus;
 servus in dominum evadet. Nemo tam vacuus
 est ingenio, quin sibi regendo sufficiens videat-
 ur: accedente hâc doctrinâ, illicitis etiam
 modis, injustum scilicet, dominatum alteri-
 us excutiet. Aptitudo imperandi ut imperium
 nullum producit; sic in servitutem neminem
 detrudit rudior illa & stupidior simplicitas in-
 genii. Paradoxum quidem Moralium est,
omnem vitis obrutum hominem servum esse:
 sed figuratum illum loquendi modum non
 propellunt in diversas alias disciplinas. Nimis
 intricata est prudentia politica, si vel ma-
 ximè omittamus paradoxa, ex Physicis in Po-
 liticam monstrôsè protrusa. Absint hæc à
 gravitate augustæ Doctrinæ, quæ excussa
 tenue

tenue acumen, nullam efficacem sapientiam redolent, aut virilem subtilitatem. Quod si aliquis nascatur servus, & jam in utero servilis conditionis sit, dum ex ancillâ nascitur: nondum servus naturalis erit. nam legis constitutione servus est, quicumque ex ancillâ nascitur.

II. Ex alterâ parte, *servitutem omnem contra naturam esse*, Imperator JUSTINIANUS statuit, in confirmatione Florentinianæ sententiæ, relatæ in l. 4. §. 1. *D. de statu hominum*. Quam sequitur vulgus Interpretum: ea inducti ratione, *quod libertas sit quædam naturalis facultas, cum omnes naturâ nascentur liberi*. quare cum oppositorum opposita sint prædicta; servitutem, quæ tollit libertatem, contra naturam esse concludunt. Sed omnia scrutanda prius sunt, quàm concedantur. Libertatem latissimo significatu esse naturalem facultatem, largimur, quatenus scilicet à naturâ permittitur, & *præcisâ constitutione humanâ*, servitus à naturâ non est sancita. Præcipi autem à naturâ libertatem, vetari servitutem, nemo dabit: sicut nec illud; ingenerari nato homini libertatem. Quem sensum vocabulum, *Naturalis facultas*, strictè solet inferre. Nam *qualitates Physicæ*, quæ naturam corporis insequuntur, propriissimo sensu dicuntur *naturales facultates*. Sic intellectus, voluntas, sermo, naturales facultates sunt hominis. Sed libertas eo modo naturalis non est: aliàs & servo propria esset. quod naturam hominis perfectissimè participet servus. Quare in *sensu Physico* libertas non est naturalis facultas; nec servi-

servitus contra naturam. Videamus, num *moraliter* sit naturalis facultas; quamvis loquendi formula & recens sit, & contradictionis speciem præ se ferat: torqueamus interim vocabula, & quæramus; num *libertas facultas quædam sit, jure naturali introducta: num servitus, quæ illam expellit, contra jus naturale impingat.* Vidi plures auctorum, qui hoc affirmarent. Sed citra ambages dicendum est, libertatem juris naturalis non esse. Juris naturalis objectum, honestum & turpe est. illud perpetuò jubendo determinat; circa hoc immutabiliter versatur prohibendo. Alii intermedium genus constituunt, quod vulgò reductivè annumerant Juri Naturali, & *Permissivum jus*, aut *negativum* etiam vocant; quod jus Naturale de tali re nihil disponat. in quo censu est *libertas, communiorum.* Verum hoc jus Permissivum & Negativum est *Non jus.* Indeterminata enim à Naturali Jure, voluntate hominis ordinari poterant: cum aliàs isti Juri contraria, ob ejus immutabilitatem, non possint approbari. Libertatem potius civilem facultatem nominarem, & *secundum naturam: servitatem præter naturam* introductam pronunciarem.

III. In legibus Romanis, à *Triboniano* collectis, quoties mentio fit servitutis, juri gentium eadem transcribitur: unde quoque *institutum gentium* vocatur. Verum id in aliis Romanorum legibus observamus, paucissima juris gentium esse, quæ inibi tribuuntur eidem; *acquisitiones dominiorum, contractus, alia*, quæ nihil minus, quam juris gentium sunt. illâ ac-
cura-

curatione ad hoc principium relata; quâ occupatione quæsitum dominium juri naturali assignatum. ut meritò in materiis juris gentium, vel naturalis subtilitatem desideres doctissimorum hominum. Verbo dicam; servitus Jure gentium non est sancita. nam quæ hoc jure constituentur, non nisi abrogatis Rebus publicis mutantur. Servitus autem ab Europæis Christianis abrogata est, sine læsione ullius gentis. Quoties verò juris gentium aliquod scitum invertitur, alia Respublica læditur: quod universa natura Juris gentium, in relatione, & respectu ad alium populum sita sit. quod suo tempore, propitiò Numine, ritè ostendam. Quare cum servitus nullo modo respiciat statum alterius Reipubl: juris gentium eam non esse, ego non dubito. Consuetudine gentium introductam societatem Herilem, ipsi affirmamus: id tamen, non tam de universæ servitutis causa, quam tempore, quo inolevit hæc societas, exaudiendum est. Tum potissimum introductam servitutem, cum gentes Civili regimine ordinatæ, bellum gererent, & captos hostes in servitutem deprimerent. Qui mos pluribus gentibus usitatus, errori dedit causam, à jure gentium descendere servitutem: cum saltem modum, constituendi servitutem, populi diversi invicem acceperint. Imperium interim herile nequaquam vel à consuetudine, vel jure gentium arcessam. Nam jus nullum imperium producit; sicut nec consuetudo. Et quemadmodum in præcedentibus societatis causam separavimus ab imperii

Perii causa : ita similiter & hîc arbitrandum est. ●

IV. Quod si tamen urgeas ; societatem eandem agnoscere causam , quam habet imperium Herile : quod aliter non constituatur hæc societas , quam per præsens dominium. Maritalis enim , & paterna , sine imperio bene intelliguntur ; dominica sine dominio , seu imperio in servum , nullo modo : non repugnabo multum , & causam hujus societatis , & imperii in eâ valentis , Deum nominabo. Dubitandum non est , victoriam à Deo esse. Quoties igitur hostis in manum victoris tradebatur divinitus , id consequebatur victor , ut hostem posset interimere : cum vero humanitatis interesset , ne inermem & prostratum semper occideret , cum usui esse posset ; hanc potestatem retinebat superior in caput victum. Quamvis etiam victus Majestati acquireretur , per militem vincentem : interim ut incitaretur fortitudo Civium , & præmiis suis ne careret ; hanc prædam transmisit Respublica in occupatorem : eidemque communicavit potestatem ; quam victoria beneficio à Deo in captum hostem erat consecuta. Idem dicendum , si quis segregem patrem familias aggressus , ante Rempublicam constitutam , & ab hoc fuisset superatus : victor accipiebat immediatè imperium in aggressorem ; sicut civis mediante Majestatis concessione. absque hac enim si foret , nullus servus in Civitate existeret. Ex his planissimum fit , quantum imperium sit , in
servum

servum domino concessum. Quod in bona, per servum comparata, se extendit, & in ipsum caput exsuperat, jus vitæ ac necis includens. Nam auctoritas illa in hostem prostratum, æterna fit: cum plena & internâ Justitia. Jus vitæ ac necis in captum hostem semel habuit victor, quare & illud retinet. Et ut alias Paterfamilias uxoris & filii; ita quoque servi rex est & judex. at judicandi facultas, ut propriâ auctoritate, sententiam decretoriam feras, potestatem in caput damnandi requirit. Capital verò commissum esse oportet: tum jus in servum, non impunitas sola occisionis, permixta est. Quacunque de causa levitiscula, non licebit criminale judicium exercere; nisi homicidii reus fieri dominus velit. Nam jus vitæ ac necis non infert nobis aliquam licentiam, pro lubitu interficiendi hominem: imperium enim injustum, nullibi datur. sed facultatem legitimam, in facinorosos, & ultima meritos ritè animadvertendi. Si quam impunitatem domino, malitiosè occidenti servum, concedunt populorum jura; vederint Legislatores, quomodo à fusò temerè sanguine ipsi liberentur. Postquam enim semel victo permixta vita est, non poterit eripi, nisi scelere capitali se fecerit iterum fontem.

V. Illud restare poterat dubium; *confundi imperia, dum in uxorem, filium & servum, æquali tenore jus vitæ ac necis concessimus patrifamilias, & diversissimos homines eidem potestati subjecimus.* Sed notandum, Imperium, qualecunque sit, inferre potestatem in caput: quare
nulla

nulla differentia in ipso jure, seu potestate, quaerenda; sed in Exercitio potestatis. Morum & domesticæ disciplinæ censor, omnium consensu, Paterfamilias habetur: frustra fuerit illa cura, nisi competat animadversio, quæ potestatem animadvertendi in facinorosos præsupponit. Eadem igitur conditio est omnium familiarium, quoad imperium & obsequium: nisi quod affectuum varietate, modò lenius, modo adstrictius exerceatur. Uxor, thori & utriusque fortunæ socia, plerumque fit consors familiaris administrationis, & regiminis in servos ac liberos, tanquā domesticus magistratus; & reliqua lenissimè gubernatur. Liberos indulgens patris affectus, & ingenua educatio, facile distinguit à servo: cui nullum regimen, nulla spes futuri dominii; sed operæ, sed præstationes & labores relinquuntur. Ita distant invicem, quos unum imperium regit: non secus ac in Republica sub Principe sunt uxor, liberi, subditi; diversissimè regendi. Recte SENECA III. de Benef. c. XVIII. *Si servo, quo minus in nomen meriti perveniat, necessitas obest, & patiendi ultima timor, idem istud obstabit & ei qui regem habet, & ei qui ducem, quoniam quantum sub dispari titulo, paria in illos licent.* Huc si trahas, quæ Aristoteles de civili & politico regimine in uxorem, de regio in filium, despotico, seu dominico, in servum passim habet, & singula interpreteris de exercitio imperii, tolerari eadem possent, sub tali explicatione.

CAPUT IV.

DE

SOCIETATIBUS COMPOSITIS.

I. *Familia quid.*II. *Vicus, Pagus, Civitas.*III. *Hæc non casu, eloquentia, Musica;*IV. *Nec indigentia introducta:*V. *Multò minus diffidentia:*VI. *Sed naturali consecutione & ordine.*VII. *Civitas an prior familiâ.*

Societates Simples hucusque : *Compositæ* sunt, quas plures personæ ingrediuntur, & ad minimum Tres absolvunt. Quoties enim duæ, aut tres Societates simplices concurrunt, familia, seu domus componitur. Ejusmodi igitur societates compositaæ sunt *Familia, Vicus, Pagus & Civitas*. Familia vox aliquando de *Servorum catu* effertur: & notant Eruditi, Familiam propriè accipi de Servis. Quæ significatio Jureconsultis Romanis non est incognita. videatur Rubrica, *si familia furtum fecisse dicatur*. Ita alibi *familia publica* interpretanda est de servis publicis. Ita *familia urbana*, & *rustica*, eodem sensu dicitur. hinc dicuntur familiares. SENECA in Epistolis laudat veterum humanitatem, quod omnem invidiam dominis, omnem contumeliam servis detrahentes, patris potius quàm domi-

dominos familias , se appellaverint , & servos, *familiares*. Hujus significationis originem Festus petit ab Oscis , quorum linguâ servus, *famul* dicitur. inde *familia* , quasi *famulia*. & hodieque famulum , qui nobis inservit, dicimus. Alia notione *Familia* , pro facultatibus , seu bonis, accipitur : hinc *res familiaris* , *familia eriscunda* , *familia emptor* , in Romanis Legibus. Alia iterum est acceptio Familiae pro cognatis , & diversis stirpibus ex uno genere descendantibus. Ita Festus : Familia antea in liberis hominibus dicebatur , quorum dux & Princeps generis vocabatur pater & mater familiae. Hinc *familia Corneliorum* , *Iuliorum*. & tunc à *fama* dictam putat familiam ; cum nomen alicujus gentis & generis , diuturna fama , latè in stirpes pervulgatum est. Inter Domum , & Familiam hîc nullum discrimen novimus. Licet APULEIUS distinguat , & illius membra faciat *conjugem* & liberos , hujus servos ; illius præsidem vocet *Rectorem* , hujus *Domum*. Familia enim nobis est *Societas composita* , ex duabus , aut tribus simplicibus : potissimum autem ex nuptiali & paternâ. Quod alii servum pro parte familiae essentiali agnoscunt ; liberos autem inter partes non admodum necessarias recensent : in eò vehementissimè errant. Servus enim ad constitutionem civitatis , quæ liberis capitibus componitur , nequaquam aptus est. & hodie tantum non universa Europa , servis destituta , dicenda foret carere perfectis familiis. Contra liberi essentiam familiae constituunt : quod horum multitudine , quasi

novis coloniis , multiplicentur cognationes , quæ civitatem tandem faciunt.

II. Vicus est *plurium familiarum consociatio*. Multiplicatis enim liberis , & liberorum natis , hæc prima oritur major Societas. Latinis quoque Vicus congeries est casarum , nulla munitione septarum : quas cognati , ut in viciniâ habitarent , incolebant. Numerum familiarum non definimus : cum ingens latitudo sit in talibus , quæ modo incrementum , modo decrementum admittit, Ita aliquando vici in modum urbium aucti , AMMIANO MARCELLINO dicuntur lib. XXIII. & iterum tribus , aut duabus domibus stabit. Id verò hic notamus , vicum generalius aliquanto concipiendum esse , ut non tantum denotet rusticam illam tuguriorum seriem : sed castella , & populosissimas urbes complectatur. Vicus enim generaliter nobis est , multitudo aliqua familiarum in uno loco degentium. PAGUS est *societas , ex pluribus vicis conflata*. Quamvis vulgari sensu , Vicus & Pagus Synonyma sint : latine tamen loquentibus , Pagus vicorum societatem infert , & partes plures majoresque civitatis , certis limitibus inclusas , in quas universa civitas potest distribui. Hoc est , per pagum intelligimus districtum aliquem majorem , qui notabilem partem civitatis constituat. Ita CÆSAR de Bello Gallico , lib. I. c. XII. Omnis civitas Helvetia in quatuor pagos divisa est. Hunc in modum circulos illos , Suevicum , Saxonicum , Austriacum , pagos Germanici Imperii possemus vocare. Ita in quolibet regno majores

res tractus, quos vel situs loci, & Geographi opera, vel incolarum diversitas separat, distinctos Pagos unius civitatis efficiunt. Ubi insulae plures eidem imperio parent, singulae pagum formabunt. Atque adeo in Pago concurrunt plures vici, plures urbes, quae conjunctim sumtae, id nomen sustinent. Tandem pervenimus ad CIVITATEM, *qua multitudo hominum est, in plures pagos distributa, ut securius & commodius vivatur.* ARISTOTELI quoque Civitas est *societas, ex pluribus pagis perfecta, vivendi & bene vivendi causa, duce natura constituta.* lib. I. Polit. cap. II. Ut vero per *domum*, seu *familiam*, homines, non aedificia intelligimus: ita & *de vico*, & *pago*, & *civitate* censendum est. Plures enim familiae vicum, plures vici pagum, plures pagi civitatem formant. Tractamus adeo Societates, Materiam & subjectum Reip. non ad imitationem Medicorum, qui corpus humanum contemplandum sibi proponunt, propriam Philosophiae Naturalis doctrinam: sed quia revera nostras Societates habitus nullus alius declarat. Ad pleniores enim Societates, & Civitatem usque, non ascendit Oeconomica: circa familias occupata & quiescens. Ita quidem occupata, ut finem nostrum non attendat. ad structuram enim civitatis familias non ordinat, quod hic unice attendimus. Quae tamen omnia ita exaudienda sunt, ne putemus, Civitatis naturam adeo adstrictam esse, ad illam compositionem ex minimis. Ordinariam enim viam attendimus hactenus, per quam communi ordine ex minimis in suam integritatem

tatem excrescat Civitas. Pro partibus autem essentialibus, aut integrantibus Civitatis, sine quibus hæc nunquam possit existere, aut componi, non venditabimus minores societates. Cum ad familiæ constitutionem necessariæ ubique non sint. Paternam societatem non adeò requirunt ad familiam. Servo carere posse eandem, testis est universa propemodum Europa, quæ servilia capita hodie non agnoscit. Ex pagis civitatem non immediatè surgere, colligas inde, quod antiquissimis temporibus, singulis urbibus imperitaverint reguli. Unde consequitur; plerumque ex dictis partibus formari civitatem: cæterum de essentiâ compositionis, & de necessitate exigentiæ, id haud esse. Civitatem igitur in universum *multitudine sociorum definiam*: licet nec servos, nec liberos, aliquando nec uxores in totâ multitudine deprehendam: licet nec vici, nec pagi plures, ad constitutionem concurrant. Civitas igitur sine familiis, sine simplicibus societatibus aliquando erit. Quod observamus in Reipubl. Romanæ incunabulis: ubi nec servi, nec foeminae, & adeo nec paterna societas erat. perfecta interim Respub. fuit, quæ civitatem, tanquam subjectum, præsupponit. Jam dudum sumptus in Regem Romulus, jura & leges, quibus contineretur agrestis multitudo, promulgaverat. Sacra item, & alia Majestatis axiomata exercuerat. Quæ omnia & Remp. constitutam arguunt, & subjectum Reipnb. inferunt: sine servis, sine uxoribus, sine liberis. Et alias quoque liberi, ut ad familiæ constitutionem, ita ad

ad civilem societatem minus requiruntur. Servi à Jure Civium, quod ingenuorum & liberorum hominum est, arcentur: Mulieres à comitialibus conventibus, & curis civilibus excluduntur. Si cum LIVIO quis diceret; *etatem unius hominis duraturam fuisse magnitudinem: durationem* attenderet, non *essentiam* Civitatis, quæ sine illâ considerari potest ac debet. Sicut *esse*, absque *benè esse* sæpius invenitur, & ut plurimum consideratur.

III. Ex his cognoscitur satis indoles Civitatis materialis; & ejusdem origo, quomodo sensim à tenui principio in eam amplitudinem excreseat. Juvat interim pressius insistere origini, & causas impellentes scrutari: tum in illa digredi, quæ Philosophus circa hanc materiam disputat: facientia sanè ad clariorem dilucidationem. Qui divinam hominis originem, & subsecutam multiplicationem ignorant; varias atque ridiculas comminiscuntur causas: quibus moti in familias, collegia, & civitates primi coierint. EPICURO *fortuitum concursum* placuisse, tradunt: ut viro, in reliquis fortunam & casum agnoscenti causam, etiam hîc temerarium quid adsignent. Quo interim errori fortuito non eripiuntur; qui *Eloquentiam*, aut *Musicam*, cives congregasse fingunt. Nam & illud casu factum oportuit. TULLIUS nimirum auctor est, *Eloquentiæ vim fuisse, quæ dispersos in agris colligeret, & ferarum ritu sylvis ac montibus inerrantes, componeret, & esse homines doceret.* Idem de Musica tradunt Poëtæ: *feros homines carminum dul-*

cedine eruditos concessisse in societates. Sed veritatem originum ego nunquam ab hac gente perierim; cui professionis suæ lege injunctum est, fictitia, aut similia veris comminisci. Mentuntur Poëtæ; imponunt Oratores: tum maxime, ubi suæ disciplinæ quisque asserit Principatum. Ab ejusmodi auctoribus prolata non expectant refutationem: cui seriæ cogitationes exponuntur. ipsi quippe norunt, serò tandem post constitutas respublicas, & Oratoriam, & Musicam; sed illam imprimis, excultam.

IV. *Indigentia* rerum necessariarum impellere poterat homines ad colendas societates civiles. Ipsi sanè *sufficiëntiam* perfectissimæ societatum adscripsimus: quod in hac multitudine singuli reperiant, quæ domi desiderabantur. Nec diffitear, segreges familias plures, hunc in modum compulsas, reliquis se associasse. Ut vero in universum statuam, indigentiam omnibus civitatibus dedisse ortum; à me hætenus nondum impetrare potui. Nam dispersos fuisse homines, & iterum congregatos, nunquam credidi. Frustra igitur solliciti sunt Politici de causâ congregationis, quæ nulla fuit: quam si fingamus, nihil magis accederet veritatis cognitioni. Finge tamen dispersos fuisse homines: causâ certè consociationis isto tempore non fuerit indigentia. Abundantissimi vixerunt mortalium antiquissimi. quod vastissimus orbis naturalibus desideriis satisfaceret: alias vero res, quibus luxus, aut civilis elegantia pretium fecit, simplicitas illius seculi ignoraret. colendis agris, pascendis pecoribus,

coribus, aut feris capiendis occupata. Redundabat inde, quod corpori alendo, tegendoque sufficeret. in regione scilicet pecoris, segetum, & fructuum feracissima. non expectante transmarina, quæ necessitati quotidianæ opponerentur. Seculum erat cætera horridum & incultum; sed suis contentum opibus. non appetens multi; & ideò nunquam egens alieni. Quamprimum, Rebus publicis conditis, ad amœnorem ornatum, & plures, easdemque delicatiores elegantias, secuta tempora fuere traducta: tum demum plura cœperunt desiderari, quam quæ suppeditaret cujusque familia. Etenim ab agriculturâ & pastorali vita, ad alia studia dilapsis hominibus quærendum fuit aliunde, quicquid absolvebat quotidiana indigentia: & retinentibus antiquum vitæ genus, necessaria quædam inducebant mores reliquorum politiorum, à quibus ne plane discreparent, eadem erant petenda. Sic orta commercia: quæ ut concinnius celebrari possent, non dubito, quasdam familias in conditas respublicas migrasse: omnium verò civitatum hanc primam fuisse originem, nolim affirmare. Quod multiplicatis etiam hominibus, & terris Regum auctoritate divisis, earum proventus tam abundè suffecerint, ut non adeò latè patentes campi, non cives tantum, sed numerosissimas Patriarcharum hospitum familias, quæ solæ civitatem ferè æquabant, aluerint.

V. Indigentia plures associant *Metum*, compellentem infirmiores in societatem plurium, ut tuti essent à grassatorum & latronū insidiis,

atque injuriis. Cui fundamento nonnulli universam Politicam superstruunt, qui civitatis & Majestatis originem hinc repetunt: speciosa, sed minus solidâ ratiocinatione. *Equales homines à naturâ omnes editos esse: sed ambitionem plures transversos rapere, ut hunc aequalitatis sensum exuant, & moratoribus, quibus modestia cordi est, violenti immincant; eos contumeliosis verbis laceessant, donec ad manum & ferrum veniatur. Hoc superbia ingenium cognitum esse modestioribus, & incutere diffidentiam perpetuam, quâ extrema servitutum ab inquietis expectent. Pariterque stimulos addere, cum nunquam sua salutis certi sint, ut invadant ipsi sedentem, invasionem forte meditantem. Lacescitur, naturali desiderio, quod jus vocatur, licere moris, ab occupatore inferenda, resistere, & se immunem præstare ab insultu. Hunc statum esse naturæ, seu naturalis libertatis, & perpetui belli inter homines. Cui alimenta subministrat Jus naturale, cujus efficacia quilibet jus habeat in res omnes, etiam in corpus & vitam alterius, ut pro lubitu quavis designare valeat. Rapinas in hoc statu primo naturalis licitas esse, ut & occupationes eorum, quibus diffidimus. Ceterum cum hic status diuturnus non sit, & quilibet hominum lucrum suum quarat, & incommoda rapinarum declinet, in plurium consociationem dispersos, & omnium injuriis expositos, concessisse, & uni Potestati cogenti se concedidisse: postquam remiserant singuli de quacunque arbitriū huic, ex communi pacto Imperantis. Quæ omnia non operosam postulant subtilitatem ad sui refuta-*

futationem. Æquales vixerunt homines, familiarum nimirum patres, multis seculis, sine metu fictitiæ invasionis. Ambitio, & superbia ferò affligerunt humanam ætatem: nec illarum incunabula Rebuspublicis priora crediderim; quod honor, ambitiosi bonum, propriam sedem habeat, Civitatem conditam imperio, fonte illo omnis diversitatis & distinctæ dignitatis. Ignorabatur in simplici gente politioris seculi vitium. & stimulos, tam efficaces, haud poterat relinquere in homine istud malum, cuius nec exemplum hætenus suppeditabatur, nec spes erat digni præmii consequendi. Alexandrum agat ambitio, ut negotium faceffat remotissimis populis, regnandi libidine impulsus: sed quem gustus Monarchicæ dulcedinis invitet. Insolitum, & ignotum ambitionis nomen in primos illos pastores & agricolas non cadebat. Lacescere alios maledictis & ferro, non pessimi tantum, sed stolidissimi fuisset. Qualiverò lacesitus non potuerit resistere, & hunc nequissimum inuasorẽ merito afficere supplicio. nam præter mortem non habebat, quod quæreret, aut expectaret lætro. Nec assequi adhuc dum potui, quæ satis valida causa primis temporibus impulisset nefarios. Collectos forsan ab alio fructus, & conditos, ut eriperent, vix videbatur operæ pretium: cum procul dubio vulnera, & internecionem raptor haberet metuendam. abundante interim terrâ omni vitæ instrumento, quod jam prostabat, aut quæri poterat sine culpâ, sine periculo. Vana igitur est diffidentia, gratis excogitata, quæ si iusta fuisset,

fuiſſet, nullo tamen jure, alterum occupare, ob incertum metum, fuiſſet indultum. Jus enim naturale ad rapinas, & latrocinia allegare, à blaſphemia parum abeſt. Sanctiſſimam rem, & divinæ Juſtitie ideam, auctorem facere horrendiſſimorum ſclerum, quid aliud eſt, quam Deum Opt. Max. ejuſdem culpe inſimulare. Nihil magis raptorem & latronem damnat, quàm hæc æterna lex, quæ neminem lædere, immutabili decreto ſancit: & cujuſque adeò manus, & mentem, à bonis ac corpore alterius abſtinet. Turpis fuerit inceptu Civitas, cujus hæc tam prodigioſè improba origo; & neceſſario in deformem clauſulam deſitura.

VI. Nos civitatem productam Naturæ munus vocabimus. non aliter ac ſupra familiam, & ſimplices ſocietates primas, deduximus inde. ita hanc quoque pleniorẽ multitudinem à naturâ congregatam aſſerimus. Diſperſos unquam ſeceſſiſſe in ſolitudines & ſylvas, & ad ferarum iſtar vagam degiſſe vitam, commentum eſſe, jam monuimus: cujus cauſſas ideò inquirere nihil attinet. Continebat primos parentes conjugalis amor: natos parentum tenerimus affectus. Inde familia. quæ multitudine ſobolis abundans, & quotidianis auctibus creſcens, novas colonias deducebat, donec civitati ſufficeret. Preſtabat id omne ſocietatis ingentis amor, qui conſanguineorum cohabitatione incrementum capiebat. Vidit hoc *Philophus*, qui propterea hominem animal Politicum, ſeu ſociabile appellat, ac propter naturam illam
 poli-

politicam, omnibus congregativis animantibus anteponit, & integram civitatem ideò *naturâ constare* affirmat. Hoc est, naturam hominibus indidisse impulsu & appetitum civilem, ad communem vitæ consuetudinem: qui impetus nascendi ordine, & Necessariorum conversatione confirmatur. Ut instinctum naturæ in socianda civitate adstruat ARISTOTELIS l. I. Pol. c. II. duplici argumento utitur, à *facultate loquendi* alterum, alterum à *discrimine justî & injusti* sumit. Naturam nihil frustra indidisse: cuique facultati suos fines assignatos esse. jam verò homini loquendi potentiam concessam: quæ socium postulat, cui loquaris; cui utilia & noxia sermone ostendas. Solitario quippe meditatio & contemplatio tacita sufficiebat. Sic discrimen justî & injusti, ne alteri noceamus, apertè illum alterum præsupponit, cui tam anxie cavet innatum lumen; & severè sancit, ne contubernio, aut commercio aliquo sociatum, defraudemus & circumscribamus. Dum hunc in modum præclarissima duo instrumenta, & regulas ordinandæ societatis largita homini natura est; quorum usus extra conjunctionem plurium esset nullus; jam planè scimus, eandem istam ducem esse, quæ mortales invicem sibi ac mutuò conciliet, contineat, & primâ generandi sorte commendet, atque in mansuram societatem mittat. Non est, quod audiamus societatis naturalem appetitum inficientes, eò colore, quod omnes se invicem non æquè ament; sed multo plures odiis & inimicitiiis infestent, & ideò

sibi caveant omnes, prudenti diffidentia, in ipsa etiam civitate. Nam si vel maximè odiū & diffidentia inter homines versetur; id tamen civitatis caussa fieri haud dicetur. Oderint aliqui sibi displicentes: diversitas morum, & vitæ haud laudabile genus, animos divellet. id nunquam conficietur, cohabitatione, & naturali multiplicatione civitates non cœpisse. Neque odium illud perpetuum est. nam omnes invicem, ut hostes, componere; satis violentum est, cui experientia & veritas historiæ reclamat. Quid si contrarium amorem in plurimis objiceremus? Paucissimos, qui læserunt nos, odio prosequimur: reliquis omnibus favemus, vel saltem non irascimur. quo benevolo affectu, satis late patente, haud difficulter cognationem illam naturæ probaveris. Quæ postmodum plures, postpositâ lucri cupiditate, retinet, & stimulat, ut se suaque omnia publico destinant; privatasque fortunas post incolumitatem omnium ponant. Nec fingi potest omnium tam depressus animus, qui turpis lucri sordibus optet attaminari. Verbo autem id monendum est, *causam civitatis, non esse causam Reipublicæ*. Homo, quamvis ad politicam societatem colendam feratur, non statim eadem inclinatione imperio superioris civili se subiecit; nec imperium eâdem operâ cum civitate surgit. Gaudet societate homo, & conversatione commodâ delectatur: sed imperium alterius hominis, insitâ ferociâ, indigne fert, aut detrectat. Hinc recipi posset in hunc sensum illa assertio, quæ affirmat, libertatem

tem naturalem facultatem esse. hoc est, hominem, quem natura, sibi relicta, sine servitute producit, hoc jugum, qua potest, declinare. Ideò verò quàm maximè negamus, naturâ Rempublicam constitui: quòd hanc *Imperium Majestaticum* ordinet. quod nullus appetitus, nulla inclinatio naturalis, apta est producere.

VII. De ordine Civitatis, & simpliciorum societatum, dubium injicit ARISTOTELES, ponens id paradoxum, I *Polit.* 2. *Civitas naturâ prior est familia, & unoquoque nostrum.* Rationem hanc adjicit: *Totum enim parte prius esse necessum est: nam si homo, qui totum quiddam est, intereat, neque pes, neque manus erit, nisi ex communiione nominis, non rationis.* Alias naturâ prior dicitur causa effectui, qui eam continuo circumstat & insequitur. quod videre est in solis lumine, quod simul cum sua causâ existit, licet illa naturaliter præcedat. Quod si hac notione prior esset civitas, & familias essendi naturali ordine præcederet; frustra & falsi essemus, qui supra primam, & simplicissimam societatem asseruimus nuptialem. Minores quoque societates essent effectus civitatis, non hujus partes integrantes. Sit aliquod totum prius suis partibus, vel potius, simul ex iisdem coëxistat: dabitur nihilominus, quod partes constituentes præsupponat. maximè quod ex successivis componitur, & quæ separatim quid constituunt. Fundamentum universo ædificio prius est. destructo tecto, non quidem amplius totum manet, bene

benè tamen parietes, & molis totius basis. E-
 versà civitate quidni superesse possint dispersæ
 familiæ? Restabunt separatae domus, licet ci-
 vitatis partes non sint. Alio igitur, & minus
 usitato loquendi modo, *priorem naturâ* vocavit
 civitatem; ut hanc intelligeret *perfectiōe potio-
 rem* familiâ. Nam & VIII. *Physic.* & I. *Metaphys.*
 istam formulam posuit: *Quod ortu est prius, id
 natura, id est, perfectiōe, est posterius.* Hac
 explicatione tolerabitur assertio. Nam perfe-
 ctio, & copiae abundantia indicant veram civi-
 tatem: quare de civitatis naturâ & definitione
 est sufficientia. Manet ergo *prioritas temporis*
 in familiis, *perfectiōis dignitas* in Civitate.
 ad quam constituendam familiæ, & societates
 simplices requiruntur, secundum superius allata.
 Interim nemini auctor esse cupiam, ut ambi-
 guis illis scribendi generibus, studio quæsitis, in
 materiâ satis difficili, & quæ accuratissimâ per-
 spicuitate amat tradi, utatur. quòd his, ab usu
 communi remotis phrasibus, nimium quantum
 intricatior fiat. Alia quoque ratiocinatione
 succurri potest asserenti, Civitatem naturâ prio-
 rem esse familiâ. Nimirum ad familiam con-
 stituendam ex vulgatâ, & forsan Aristotelis
 quoque opinione, requiritur servus: Servitu-
 tem autem constitutam esse *Jure gentium*,
 hoc est, *consuetudine populorum*, sub republicâ
 viventium, fatentur eruditi. Eo jure, quo ad-
 ministrata sunt bella, geri solita ab integris
 gentibus, Majestate instructis. Ita igitur obti-
 nuit, postquam civium multitudines in Rei-
 publ. formam successerant, ut constituti Re-
 ctiores

Etiores bella gererent, caperent hostes, efficerent servos, quos donabant civitati subditæ, ut capiens victor familiam sibi constitueret. Ita demum familia post civitatem. Sed ejusmodi ambagibus non opus habemus, si paradoxa omittimus.

LIBER SECUNDUS

DE

Republica Monarchica.

CAPUT I.

DE CAUSSA MAJESTATIS.

- I. *Definitio Reipublicæ.*
- II. *De vocabulo Majestatis.*
- III. *Definitio Majestatis.*
- IV. *Deum caussum esse Majestatis, probat Constitutio honorifica, & Conservatio;*
- V. *Temperamentum vicinorum Regum:*
- VI. *Pœna Tyrannorum, & Subditorum.*
- VII. *Testimonia Doctorum:*
- VIII. *Sacrarum Litterarum:*
- IX. *Politica Demonstratio.*
- X. *Deus est immediata causa Majestatis.*
- XI. *Non obstante Electione.*
- XII. *Rex vicarius Dei, paris potestatis, non habet superiorem in Civitate.*
- XIII. *Majestatis causa non sunt bella.*
- XIV. *Majestas non producitur à Natura;*
- XV. *Nec*

XV. *Nec jure Naturali, Gentium, aut civili.*

XVI. *Ex indigentia non prodit imperium.*

XVII. *Majestatem nec miles, nec populus dat.*

XVIII. *Multitudo eam non habet naturaliter.*

XIX. *Pacto non transfertur.*

XX. *Cesar, Reges creans, attribuat?*

XXI. *An mutatio Politiae, & Cessio Imperii?*



Actenus de Civitate, *materialiter considerata*, seu *Multitudine*: in *formali* consideratione altera pars constitutiva est *REPUBLICA*. Quam per *cætum* & *multitudinem* non describemus: quod sit *familiarum, rerumque inter ipsas communium, summâ potestate ac ratione moderata multitudo*. Nam *multitudo*, sive *cætus*, quem societas includit & denotat, Civitatis, materialiter acceptæ, & Reipubl. contradistinctæ, genus est. Illa dum subjecti vices sustinet, non potest accidentis sui genus esse. Perpetuum quippe est, ut subjectum, in descriptione accidentis, nunquam induat generis rationem: cum distinctissimam habeat indolem, & quæ de accidente describendo neutiquam pronuncietur. Si dicant, *ita describendam esse Remp. ut Subjectum simul complectatur*; idque in presenti *quæsitum esse, ut moderata multitudo simul materiam ac formam demonstret*: respondebo, id obtineri aliâ potuisse ratione, modò ipsa Materia, seu subjectum, loco generis non poneretur. & vel potius per *moderationem*, (quod vocabulum tamen generalius est, quam ut huc congruat) *fini-*

enda

enda erat. Et malè integrum objectum hîc describas. Minus concedenda descriptio, quâ Resp. dicitur *Corpus multorum ad agnoscendam ejusdem imperii Majestatem, iisdem legibus, omnium & singulorum utilitatis causa imbutum*. Generis enim loco verba figurata & impropria habet; quæ à definitionibus abesse debent. Angustior deinde est, quàm quæ definiti latitudinem exhauriat; cum Rempubl. corruptam non includat; & de *dominatu*, non injusto imperii genere, minimè possit prædicari. Nec enim despotica, nec tyrannica Resp. singulorum bona attendit. Breviter dicimus; *Respublica est ordo universæ civitatis, Regimine publico introductus*. *Ordinem* vocamus, qui naturam Reip. accuratè explicat: quod omnes actiones civiles ab uno principio summo dirigantur, quod ordinis est; in multitudine vero inordinatâ, mera confusio deprehendatur. Restrungimus latiore hunc terminum ordinis, & aptamus *civitati*: ut proprium quid, & ab aliis ordinibus, extra civitatem consistentibus, separatum habeamus. Ita commodè *subjectum* differentiam juvat, per quam determinetur genus accidentis. addimus *universæ civitatis*, ut particularem alicujus urbis administrationem, cum Republicâ ne confundamus, quæ per omnem ambitum subjacentis territorii expanditur. Et quum pacta cohabitantium civium, in multitudine materiali, aliquem ordinem introducere queant, qui interim Rempublicam verâ non designat; ordinis publici formalè, ac principalè causam adjecimus, regimen publicum. quò

posito

posito, continuò ponitur respectus regentis & parentis, non desiturus priusquam Respublica recesserit à corpore civili. Respublica igitur constat duabus partibus, *Regente & Parente*; quæ integrum hoc civile corpus componunt. Altera principalis pars, animæ ac spiritus vicem supplet: altera inferior, subit conditionem materiæ, quam animalis illa regiminis vis permeat, omnes infusa per artus. Excellentius quidem momentum atque discrimen civili societati ab imperantium parte accedit; quod omnis constitutio, atque distinctio Rerum publicarum, à *Regimine publico* petenda sit: æquali tamen necessitate in republicâ formandâ concurrunt parentes cives. Altera pars sublimior est; altera inferior: utraque necessaria. Nunquam obtinebimus Reipublicæ ordinem, absque alterutrâ si fuerit. Deme regentes; multitudinem habebis, & civitatem confusam, non Rempublicam: absque obtemperantibus, ne intelligi quidem possunt imperantes. Adeò necessum est, ut sit illa quasi corporea moles, quæ excipiat impetum moventis spiritus, & mentis restrictis agitationem. Utramque igitur partem in sequentibus introspiciemus.

II. Cæterum cum Respublica non habeat ejusdem naturæ Species, quæ participant æqualiter de natura generis: non possumus universalem conceptum de partibus, singulis speciebus communem, hic adducere. Quilibet enim experiendo videbit, diversissimum esse in singulis speciebus imperium, atque obsequium. Quare præmissâ brevi hâc delineatione Reipublicæ

publicæ in genere, quod regentibus & parentibus absolvatur : continuo nos vertimus ad species. Quarum duas reperimus, MONARCHIAM, seu Regnum; & REMPUBLICAM LIBERAM. MONARCHIA est Resp. in qua Rex imperat subditis. Monarchia similiter duobus absolvitur, Rege & subditis. REX est qui habet Majestatem. Hoc enim augustum illud vocabulum est, quod Imperantem, & universam regiam Rempublicam implet ac format. Non hîc vagabimur per *Criticorum* campos, aut prolixè conquiremus equipollentia vocabula. quod apud Græcos variis titulis appelletur : apud Latinos quoque *Imperium Summum*, aut *Summa Reipubl.* audiat. Nec refert etiam in ipsam vocem Majestatis inquisivisse, & ejus primas origines. Uti eruditorum nonnulli à *magnitudine*, congruentiam rei, non litterarum cognatam deductionem advertentes, dictam putent. Alii quasi *Majorem Statum*, allusionem querentes, statuunt : unde *Majoria* usitata aliquibus. Item, quod à voce *Majus*, qui derivent, inveniantur : sicut à *tempus*, *tempestas*. quæ sententia speciosam causam habet, si exempla ab simili deducta, neminem fefellissent. Veritati, & dignitati rei vehementer congruet, si asseras, originalem vocem esse, non aliunde mutuam suam originem. Sed de hoc viderint eruditi. Magis est, ut circa significationem genuinam laboremus. *Majestatis* vocabulum, quoties in auctoribus legitur, non semper eandem retinere significationem, certissimum est. In genere *omne amplum, splendidum*,

didum & magnificum, notatur hac voce. In hunc sensum eò nomine MARCUM TULLIUM usum dixeris, ubi Majestatem finit *dignitatem & amplitudinem Populi Romani*. Idem Auctor sublimitatem, & gravitatem orationis isto elogio dignatus est, de Amicitia: *Quanta illi fuit gravitas, quanta in oratione Majestas?* Communiter obtinuit, ut eâ voce *auctoritas*, & externa quædam amplitudo, quæ admirationem, aut amorem gignere consuevit, intelligatur. quodque in privato homine magnificentia, aut splendor diceretur, in publicâ personâ Principis, Majestatis titulum sortiatur. Putet aliquis figuram subesse, quæ effectum loco causæ ponit. Quo significatu usus videtur TACITUS I. *Ann. c. XLII. Non mihi uxor aut filius patre & republica cariores sunt: sed illum quidem sua Majestas, Imperium Romanum ceteri exercitus defendunt.* Et cap. XLVII. *at per filios pariter adiri (exercitus) Majestate salva, cui major è longinquo reverentia.* VALERIUS quoq; MAXIMUS idem sentit, cum ista scriberet lib. II. c. x. *in princ. Est & illa quasi privata censura, Majestas clarorum virorum, sine tribunalium fastigio, sine apparitorum ministerio, potens in sua amplitudine obtinenda.* Grato enim & jucundo intuitu animis hominum illabitur, admirationis pretexta velata: quam rectè quis dixerit longum & beatum honorem esse sine honore. id est, perpetuum magistratum, extra magistratus officium. Similiter intellectam vocem reperimus apud OVIDIUM, ubi Majestatem, tanquam Deam aliquam introducit, cjusque

ejusque ortum ingeniosissimè delineat, v. *Favor.* ita canens.

Donec HONOR, placidoque decens RE-
VERENTIA vultu,
Corpora legitimis composuere thoris.
Hinc sata MAJESTAS, qua mundum tem-
perat omnem.

Latinorum ergo illa acceptio est: quam Politicorum plurimi sequuntur, ubi de Majestate Principis præcepta sua proponunt. Neutiquam enim intellectum volunt absolutum illud imperium: sed splendorem potius, & famam, & honorificam de Principe subditorum aliorumque opinionem. Cujus vis cum maxima sit, & grande momentum ad benè gerendas res afferat: non negligendam putarunt ejus doctrinam civilium Doctores; sed inquirendum potius, qua ratione comparetur, quâ conservetur pariter. Quando Justus Lipsius suum Principem format, inter cæteras virtutes *Comitatem* quoque requirit: quam tamen eximiè attemperat, ne in contemptum abeat nimia familiaritas, sed *Majestati* simul locus sit. Hanc describit lib. II. *Civilis Doctrinae*. cap. XVI. *est reverenda quædam amplitudo, ob meritum virtutis aut rerum affinium.* Pergit: *Græcis ea Σεμνότης dicta: nobis in privato auctoritas, in Principe Majestas.* Et lib. IV. cap. IX. eandem uberrimè persequitur, iisdemque sensibus exponit. *Auctoritas est impressa subditis, sive & exteris opinio reve-*

reverens de rege ejusque statu. Constat ex admiratione & metu, cujus utriusque temperies, sive Mixtio, facit hanc virtutem. Ejus parandæ viam diligentissime ibi monstrat. Quæ descriptiones, & explicationes adjectæ, satis evincunt, eruditissimum virum *Majestatis* nomen confusè non accipere in eâ significatione, quâ alias Politici, ubi summam potestatem civilem explicant, utuntur. Quod si in præsentî argumento, quod imperium summum tractat, ALBERGATUS aliquis Majestatem, contra BODINUM, in meritorum amplitudine, & consequente inde auctoritate, reponeret; merito rejiceremus incivilem opinionem: jam ubi præmissâ vocis acceptione, auctoritatem Principis tradunt Politici, non arcebitur eosdem à permissâ Latinis usurpatione vocis Majestatis.

III. Nos hîc loci *per conceptum imperii* describimus, hunc in modum. *MAJESTAS est summa potestas in civitate ubique. Potestatem* vocamus; quia imperium & potestatem sapit, quodcunque in Majestate reperitur. Latior interim, atque prolixior est Potestatis significatio, & datur tam in civitate, quam extra civitatis constitutionem. Extra civitatem imperia dantur paterna, maritalia, quæ in suo genere summa sunt. In Civitate quoque reperiuntur potestates mediæ, magistratibus propriæ, quæ ab summâ profluunt atque dependent. ut excludantur ergo utraque imperia, determinamus Majestatem ad certam materiam, seu subjectum, *Civitatem* nimirum. Competat patri & marito aliqua summa potestas; sed in fami-

familiam , non civitatem : competat magistratibus in civitate aliqua potestas ; sed ea non est summa. Summa igitur in civitatem Potestas domesticum Majestatis nomen est. Signanter autem vocamus potestatem , non saltem in civitate , sed in civitatem. Civitas enim non tam est subiectum recipiens , quam objectum patiens , quod excipit actionem negotiosæ Majestatis. quæ ipsa extra subjectionem ponitur , cuncta sub imperium accipit , & nihil relinquit , quod sub jugum obedientiæ non redigat. Quare illud , *UBIQUE* , adjicitur , ut omnia , & universa intelligantur apposita , quæ facultati civili adhærere solent : & nihil eximatur , quod integritatem ejus concernit. Summum rerum omnium judicium à Deo accepit , ut possit de quolibet negotio civili , de qualibet actione publicâ cognoscere , & quid factum velit , quidve omissum , efficaci decreto statuere , atque determinare. Subjacent ejus arbitrio singula & omnia civitatis. Procurat divina , ordinat humana ; disponit sacra , moderatur profanis : privata ac publica suo jure complectitur. Ita diffundit se per omnia ea Potestas , & valet ubique : idque sine provocatione ad aliud tribunal , quam Majestatis summum judicium excludit. Quæ singula quanta sint , in explicatione partium clarissimè patebit. Quamquam autem continuo partes illas subjicere , & de Potestatibus , quæ summum imperium constituunt , singulatim agere poteramus ; quod natura Majestatis per definitionem generaliter cognita , commodissimè , ac plenissimè

finè tradatur in partium quarumlibet declaratione: nihilominus, cum omnium ferè Facultatum civilium robur ac firmamentum in Causa Majestatis, & communicatione divina, reconditum sit; illa verò contextum Majestatis, tanquam extraneum, & forinsecus subsistens principium, non ingrediatur: paulisper illas internas partes seponemus, donec de Efficiente Majestatis dispexerimus. Ita enim in sequentibus tractabimus explanationem Majestatis, ut consideremus ejus Causam, Jura, Modos Acquirendi & Habendi; tum Divisionem, atque Subjectum. facto initio, ut diximus, de Causâ.

III. Missis aliorum de *Causâ Majestatis* opinionibus, quas infra excussas rejiciemus; nostram sententiam, solidis fundamentis firmatam, proponemus. *Majestatis* igitur *Causam* unicam laudare DEUM, perpetuo nobis certum est: & consecrare illius originem, & ad omnipotentem referre Auctorem, obstinatum sedet, ac fixum manet. Tantæ enim dignationis est summum istud inter homines imperium, ut non nisi summam agnoscat causam. Idque tot argumenta docent, quibus facilè adsentiat verius studiosus animus. Opilio aliquis, & aratro imminens agricola, subito in regem sumtus, auctoritate & splendore à Deo circumdatus, in præsentissimis periculis servatus, nec humanâ tamen ope; cujus ingenium pacificum, aut bellicosum, pro conditione vicini, plerumque temperat Deus; tum tyrannorum excidia, & subditorum inobedientia, castigata à Tyrannis

nis; gentiles quoque homines in consensum egerunt, à Deo Imperia concedi Regibus. Christianis verò Orthodoxis religio semper fuit de hoc dubitare: cum cœlestis veritatis oracula id sine involucris, disertis & conceptis verbis asserant. Quæ omnia quanta sint, apertius paulo diducamus. Frequens illa, tantum non miraculosa constitutio regum, illustri documento fuerit; non posse concedi imperium ab alio, præterquam illo, qui tenuem & abjectum in principum virorum dignationem evehere unus potest & assolet. Quam sæpè rustici, pastores, gregarii milites, captivi, fugitivi, non sensim & per gradus; sed subito in sublime tribunal, à Divino Numine collocati sunt? Quis credat, probum illum, & ob id pauperem Abdolominum temerè accepisse regnum? Egrege enim falletur, & causæ sublimitatem non assequetur, qui squaloris illuviem, & rusticas fordes, mutatas cum regali cultu, adscribat beneficio designantium Juvenum, aut ipsius Alexandri gratiæ. de quo CURTIUS *lib. 1v. c. I.* Nec saltem opus DEI est, quoties viri boni, aliquis *David* opilio, in Israëliticum, aut *Piastus*, apum culturâ vitam tolerans, in Poloniæ regem legitur: non minus dextram Numinis deprehendimus, quoties machinamenta homines improbos, grassatores, in id fastigium videntur evehere. Sic *Timur Chan*, quem *Temerlenc*, & *Tamerlanem* vocant, obscurissimo loco, ignobili patre prognatus, infami rapinarum studio tantum notus, & ob id jam destinatus cruci; postquam evaserat supplicium,

F

impe-

imperium occupavit. Malis quidem artibus: non sine permissu tamen, concessuque divino. Plurima hæc talia in historia veteri & recenti; sacra & profanâ: quæ interventum Numinis luculenter probant. Fallor, aut proximis annis *Britannia* idem docuit, cujus incolæ perduellium furori permiserant optimum Regem, infami morte, nihil mali meritum, trucidandum: filium, heredem regni, omni spe imperii exuendum. Nec poterant extorrem principem tot prælia, cum perduellibus commissa, in regnum asserere, aut ab exilio decennali vendicare. Mox versis hostinum animis, sine cæde, sine sanguine, sine tumultu, comuni applausu recipitur, & paternis atque avitis regnis potitur. Ut constaret, restituere ejectum principem; Dei esse beneficium, non efficaciam belli & armorum. Constituto, & ex obscuro in lucem ac splendorem producto regi, tam efficacem auctoritatem circumfundit Deus, quæ in subditorum animis admirationem & venerationem gignit, concordia & tranquillitatis publicæ haud contemnendum vinculum. Simul atque purpurâ conspicui sunt Principes, augustiores omnibus apparent: & insinuant tantam venerationem suæ Majestatis multitudini, ut quilibet etiam prudentior, cui externa non temerè imponunt, sentiat, non opinionem esse vulgi, aut superstitiosum imperitorum errorem; sed actuosam ex occulto vim, quæ reverentiâ suspiciendos reges, & honore propitiandos esse, doceat. Quam frequenter solus conspectus Principis nefariorum hominum scelera cohibuit?

buit? quàm sæpissimè ejus præsentia, vel incrimis, & gravior oratio, tumultuantibus exercitibus ferrum excussit? Ut signanter admodum apud TACITUM scriptum putem; *Principem Majestate sua defendi*. Nondum à me impetrare possum, ut credam, barbaros & ferocissimos Orientis populos, suâ sponte, tam reverenter sensitse de Regibus suis, ut proni colerent Majestatem, & servili subjectione exsequerentur mandata. Visus sum mihi deprehendere in immani pectore vestigia superioris & penetrabilis potestatis, incutientis eum timorem, eam reverentiam, quâ prosequuntur, rudes etiam animæ, Dei Vicarium. Quod David prædicat, quando sibi populum suum à Deo subjici, fateatur, Psal. cXLIV. 2. His cohæret Principum incolumitas, quam sollicitâ curâ DEUS conservat, & inviolabilem præstat: ut palàm agnoscant homines, Domino suum opus cordi esse. Tuetur à maleficis sceptrum, & contra insidiarum secreta, & instantia pericula monet, protegit, & quævis nocitura repellit. Plerumque præfagientibus illa regibus ipsis, quibus divinitio imminentis mali à Deo immittitur: ut maturè prospiciant sibi, & pestem evitent. Verissimum quippe illud APOLLONII Presbyteri lib. 1. *Excid. Hieros.*

Sunt maxima cordi

*Regna Deo, donatque aliquid plus ille
Tyrannis*

Consilii, quàm privatâ sit mente repositum.

Nec abludit, quod GUNTHERUS notanter scribit de insidiis, Cæsari Friderico structis, lib.

IV. *Ligur.*

F 2

Non

*Non tamen occulti potuerunt fallere regem
Instrumenta doli : cœlestia pectora sanè
Nil transire potest.*

Quomodo solertissimâ , & planè divinâ conjecturâ cladem à se , & proceribus suis , JACOBUS , Britanniarum Rex averterit , cum parricidæ , non unâ morte interimendi , Curiam Parlamenti , cum præcipuâ parte civitatis , pulvere tormentario corrumpere laborarent , videri potest JOAN. BARCLAJUS, in *Conspiratione Anglicana*. Non ingrediar latissimum , qui se pandit , campum , ostendendo quomodo pericula , regali vertici jam admota , & omne incommodaturum huic dignitati divina Providentia declinet: id saltem breviter innuere liceat, reges abundè malos & impios, à periculis incolumes egisse sub tutelâ Majestatis. Benè Theodorus GRASWINCKEL , in dissert. de Jur. Majest c. 1. Reges etiam propalam improbos, & populorum tormenta , sanguisugas , hoc ipso nomine tutatus est Deus , quod Reges essent.

V. Non alienum est à nostro argumento , quod ad probandam divinam circa regna & reges providentiam , de *Moderamine regnorum*, & Principum temperamento, ex *Nicephoro Gregorio* observant Politici. Scilicet , quoties supremus hominum Rector civitates diversas simul consistere voluit, ejusmodi ingenia , animos , vires Principibus dispensat , qualia destinationi suæ apta sunt. *Aut enim utrique regno*, inquit *Auctor*, *magnanimos ac industrios rectores conciliat ac preponit , ut mutuo oppositu alter alterius molitiones evertat , ac inefficaces reddat ,*
æque

atque ita securitas nationibus ac locis conserve-
tur; aut utrobique praesides imponit, nec animo
acres, nec opibus validos, ut neuter adversus al-
terum aliquid movere, aut plus ultra ire, vete-
resque imperiorum limites convellere queat. Vi-
deatur omnino in hanc rem PAULUS PARUTA
in *Discurs. Polit.* ubi CAROLI V. gloriosissimi
Imperatoris virtutem, cum vicinorum, Galli
& Turci fortitudine, componit, & civiliter
examinat.

V I. Adhæc *pæna*, quæ infelicem hujus Caus-
sæ ignorantiam, aut contemptum manet, satis
nos de Auctore potest erudire. Reus est ali-
quando rex; aliquando subditus. Reges non
infrequenter perduelles evadunt, dum se acce-
pisse imperium cœlitus, arrogantissimâ impie-
tate dissimulant; idque potius suis meritis, o-
pibus, ingeniis stolidè imputant. Hi tales di-
gnum suâ culpâ supplicium subeunt, quando
gravissimo lapsu ruunt deturbati a solio, quod
ingratissimi possidebant. Non raro exuuntur
regali axioma Principes, validi opibus, &
omni copiâ muniti, à contemnendis adver-
sariis. Ut manu prestant reliqui divinam vindi-
ctam. CORNELIUS NEPOS de *Dione* hæc scri-
bit in ejus vita: *Dion, fretus non tam suis co-
pis, quam odiosus tyranni, maximo animo duabus
oneratis navibus, profectus oppugnatum, quod
omnibus gentibus admirabile est visum, adeo fa-
cile perculit, ut post diem tertium, quam Sicili-
am attigerat, Syracusas introiret. Depulsus
suo gradu Dionysius, eò redactus fuit, ut
cum sceptro ferulam commutare habuerit ne-
cessum.*

cessum. Alios capitale supplicium decessit :
& sæpius obtinuit, quod *Poëta* cecinit :

*Ad generum Cereris sine cade Et sanguine
pauci*

Descendant reges, Et sicca morte tyranni.
Tales exauctoraciones, à Deo profectæ, non
obscurè ad veram originem nos dimittunt, ut
agnoscatur illud :

Reges in ipsos imperium est Iovis.

Et istud *Tragici* :

Omne sub regno graviore regnum est.

Ex alterâ parte, quando populus vel clemen-
tem ac moderatum aspernatur Principem, vel
criminibus aliis divinam provocat vindictam :
plerumque Tyranni sævitix & rapinis per-
mittitur. Hæc illa pœna est, qua prævarican-
tis populi contumacia castigari solet. Præfi-
gurarunt id veteres in fabulâ de Jove, ranis,
petentibus regem, post spretam & contemptim
habitam Trabem, imponente Ciconiam. Et
confirmant plures, in Sacris occurrentes præ-
dictiones, de submovendis cordatis Principi-
bus ; & in eorum locum restituendis hypocri-
tis, imprudentibus, meticulosis, & qui præter
nomen, nihil habeant regium. Sub quibus in-
gemiscat plebs, malitiam tyranni experta. Ac-
commodatè ad ipsam rem differit *Cerealis* a-
pud TACITUM, *Hist. iv. c. 7. n. 4.* tyrannos na-
turæ malis, à Deo immissis, accensens. Quo-
modo sterilitatem, aut nimios imbres, Et cetera
naturæ mala ; ita luxum Et avaritiam domi-
nantium tolerate. Britannix insaniam, truci-
dantis optimum Principem, & solâ lenitate &
beni-

benignitate peccantem, ab egregio liberratis assertore Cromwello satis punitam, omnes novimus. Interim quando dicimus, Tyrannos immitti à Deo; cautio adhibenda est, ne officium cum vitio confundamus. Habet Tyrannus potestatem à Deo: crudelitatem, raptorem animum, & reliqua scelera, ex suo adjungit: quorum impulsu commissa potestate pessimè abutitur.

VII. Hæc omnia cum attenderent homines, facile deprehendebant Causam Majestatis, DEUM: quam communis populorum consensus approbabat. Nam enunciatum hoc adeò sanæ rationi apertum est, ut ipsi gentiles homines de certitudine ejus vix ausi fuerint dubitare. HOMERUS sanè ad descriptionem regis id pertinere arbitratus est, quem ita delineat; *Cui dedit filius sagacis Saturni Sceptrum.* Nihil adulationis habet ingenua & animosa M. Terentii, equitis Romani, oratio, & de origine Tiberianæ potestatis pragmaticum judicium, apud Tacit. vi. Annal. c. 8. n. 5. *Tibi summum rerum judicium Dii dedere: nobis obsequii gloria relicta est.* De Tito hoc habet Suetonius, cap. ix. *Duos patricii generis, convictos in affectatione imperii, nihil amplius, quam ut desisterent monuit, dicens, PRINCIPATUM FATO DARI.* Verissima sententia, & digna principali fastigio notitia. PLINIUS in Panegyrico Trajani: *Principem dat Deus, qui erga omne hominum genus vice sua fungatur.* Plura passim legentibus occurrunt: & cumularunt multa Auctores, in hac materiâ occupati. Apud Christia-

nos constantissimè id creditum est semper, ex præscripto scilicet Sacrarum litterarum. TERTULLIANI, *Apologet. contr. gent. c. xviii.* ista sunt: *Videte ne ille regna dispenses, cujus est Orbis, qui regnatur & homo ipse qui regnat: ne ille vices dominationum istis temporibus in seculo ordinavit, qui ante omne tempus fuit: ne ille civitates tollat aut deprimat, sub quo fuit aliquando sine civitatibus genus humanum. Et iterum: Inde est Imperator, unde & homo, antequam Imperator: inde potestas illi, unde & spiritus, testante scilicet Apostolo, nullam esse potestatem nisi à Deo. Quod in sequenti xxx. cap. latius deducit: Sciunt Imperatores, quis illis dederit imperium, sciunt quia homines, quis & animam. Sentiant enim Deum esse solum, in cujus solius potestate sunt, à quo sunt secundi, post quem primi. AUGUSTINUS id prolixâ disputatione ostendit, lib. v. de civit. Dei, c. xxi, concludens tandem ita. Quæ cum ita sint, non tribuamus dandi regni atque imperii potestatem, nisi Deo vero, qui dat felicitatem in regno cælorum solis piis: regnum vero terrenum & piis, & impiis, sicut ei placet, cui nihil injustè placet. Eximia sunt, quæ magnanimus ille FRIDERICUS I. Imperator, apud GUNTHERUM in hanc causam proloquitur. lib. vi. ligur. vers. 612.*

hujus collatio regni

*Auctorem sortita DEUM, contingere nulli,
Iure potest hominum: collator muneris
hujus*

*Est DEUS: hoc summis regnum confertur
ab astris.*

VIII. Omnia

VIII. Omnia hæc & singula corroborantur amplius *Sacra Scriptura testimonis*, cui contradicere nefas erit. Unum hoc testimonium divinum, citra metum falsi, in propriâ quoque causâ prolatum, suspiciendum est: cujus veritati nemo denegabit fidem, nisi impius & atheus. Clarissima autem illa sunt. *Per me*, inquit Divina Sapientia, Deus Opt. Max. *Prov. VIII. 15. reges regnant, & legum conditores decernunt justia: Per me Principes imperant, & potentes judicant terram.* Ita Deum mutare tempora & ætates; transferre regna & constituere, DANIEL testatur. *Idem* Nabuchodonosorem Regem Regum appellat, hæc adjectione: *cui Deus cælitus regna, potentiam, opes, atque honores dedit. c. II. vers. 37.* Repetit eandem formulam coram Belsazare cap. V. 18. Ipsa divina vox Nabuchodonosori, jactanti potentiam suam, prædicit exitium, & exactionem ob mentis e sedibus suis dimotionem, hac fini; *ut agnoscat in Altissimi manibus posita esse regna, & pro illius arbitrio dispensari potestates regales. A Domino potestas data est vobis*, inquit SAPIENS, cap. VI. 4. *& Majestas ab Altissimo, qui interrogabit de administratione vestra.* Et SYRACIDÆ scitum est: *Vnicuique genti praposuit Rectorem, sed Israel portio ejus peculiaris facta est. cap. XVI. 18.* In Novo Instrumento hanc propositionem luculentissimè deducit *Gentium Doctor*, & suis Romanis ex professo declarat cap. XII. *Non est potestas nisi à Deo: quæ verò sunt potestates, à Deo sunt.* Huc pertinent *Divina Prædictiones*, cum efficaci cou-

stitutionis, aut dejectionis actu conjunctę. Quales in Saule, Davide, Salomone, Hazaële, Jehu, observare licet. Promittebatur his regnum à Domino, & ab ipso conferebatur, absque alterius interventu. Nam *Sors*, & *nuntiores Prophetę*, aut *Prophetę famulus*, instrumenta erant, voluntatem divinam declarantia. Exactionem, quā liberi regii à successione arcebantur, prius rescivit Saul, quā sensit. Salomoni nunciabatur quoque ablatio sceptri Israëlitici, quo exuendus erat filius Rehabeam: eamque defectionem se auctore exstitisse, Deus affirmat 1 Reg. xii. 24. Ita Achabi extinctio prænunciata à Domino, & mandata postmodum fuit. Hujus imperio Jehu præsedit, jussu & determinatione divinā, in quartam usque generationem. In quem censum referenda Nabuchodonosoris temporanea exclusio, & Belzazaris omnimoda dejectio, cum omnibus similibus exemplis.

IX. Omnis igitur potestas à Deo est, & omne imperiorum genus hanc originem agnoscit. Ipsum imperium familiare, quod civili inferius est, supra ad Deum retulimus: quare ut Majestaticum inde derivemus, necessum omnino videtur. quod ignobilius principium haud possimus affingere pulcherrimę rei, cujus sublimitas nobilissimum auctorem palam prodit. Et immotam hætenus assensionem vel sola divina testimonia merentur, ut aliis nullis rationibus habeamus opus, ad confirmandum nostrum enunciatum. Cæterum, si homo impius, aut gentilis, auctoritatem cœlestem in dubium

bium vocare scelestissimè ausus fuerit; illi frequentia hæc meditanda & trutinanda permitimus. Principio, dari Majestatem, & imperium aliquod summum civile, quod in singulos, omnes, & universos efficax sit, nemo sanus inficiabitur: & dubitanti de re apertissimâ, sensuum memoriam revocarem, ut intueretur aliqujus Sultani & Turci, Mogolis Tartari, aut Persarum Domini potestatem, quorum nutibus omnis subiecta terra patet & paret; & invitus cogeretur fateri, esse aliquid in Monarchâ, cujus beneficio tot millia hominum diversorum moderetur. Hâc certitudine præmissâ, circumspiciamus causas, quæ ingentem illum effectum produxisse debebant: omnes, si supremum exceperis Numen, longè inferiores erunt, & augustissimæ rei impares. Fuerit Causa Majestatis Creatura animata, vel inanimata. Inanima, nullo imperio prædita esse, quod conferre queant in hominem, omnibus hucusque existimatum est. quod vel exinde claret, quod ne parere quidem imperio apta nata sunt; destitutæ facultate intelligente imperii tenorem. Eadem conditio animantium brutarum: nec imperium habent, nec suspiciunt, adeoque nec conferunt. Nam imperii, & huic oppositi obsequii ea natura est, ut in animâ, nisi rationali, non resideat. Imperii quippe est ordinare, præcipere, vetare: quæ opera, cum præsentiam intellectus includant, à bruto non proficiuntur. Obsequii munus est, præceptum imperantis exaudire; normæ loco habere, secundum quam actio civilis dirigatur; hanc cum illa

componere & comparare, ut operatio suæ regulæ applicetur & quadret. quæ ratiocinium postulant, sine quo nulla applicatio actionis & regulæ subsistit, proprium illud non brutalis animæ officium. Sed hæc in propatulo sunt: de Creatura rationali videamus. Multos invasit hæc opinio, humanum inventum esse Majestatem, quæ Principi, si non à singulis, à multitudine sanè conferatur. quod figmentum infra diffabimus: nunc verbo innuendum est, nec hominem in se, nec multitudinem à se Majestatem habere. Non sibi quacunque ratione dominatum præstat homo, nec ab aliis, suæ sortis, accipit. Omnes æquali libertate, pari dignitate, natura edidit. Descendat in seipsum homo, & intima viscera sua rimetur, scrutetur omnes facultates naturales: nullam imperii nomine reperiet. Quæ corpoream molem comitantur attributa, quantitate potissimum absolvuntur, à quâ Majestatis indoles longè abest. Facultates animæ tum vegetantem naturam, tum sentientem & Rationalem complectuntur. Executiamus singulas, nullibi Imperii vestigia deprehendemus. De prioribus duabus nulla suspicio; Rationalis animæ virtutes examinantibus, nulla occurret imperii productrix. Intelligere, velle; item loqui & ridere, subditi quoque personam comitantur: quæ si imperium conciliarent, à subjectione procul distarent. Adhæc, si homini imperium inesset per naturalem facultatem, omnibus individuis inesset; quod naturales qualitates singuli æqualiter participent: statim verò hinc consurgeret contradictio

dictio duplex, quæ imperium Majestaticum impediret. Nam si omnes imperio præditi sunt, nemo subditus est: si singuli potestate valent, nemo potestati paret. quod subiectus & parens, de imperio, tanquam opposita re, nihil retineat. cum autem singuli per naturalē potentiam, istud jus teneant, exulet obsequium oportet; sine quo tamen imperium ne intelligi quidem potest. Deinde Imperium Majestaticum nullo plane modo introduceretur in multitudinem: quod naturale illud singulorum imperium, nisi destructā naturā, non everteretur. nam quæ homini naturaliter insunt, perpetuò manent. quamdiu autem illud præses est, nullus relinquitur locus obsequio, quod Majestas requirit. Tales igitur absurditates obstant, ne putemus, homini aliquod imperium naturaliter inesse. Si tamen dicas, hominem naturā quidem imperium in alios non habere, benè interim acquirere illud posse aliunde: quæram, ubi nam sit imperium istud, quod acquirere laborat homo? penes quem resideat? In præcedentibus enim cognovimus, nec in brutā, nec in rationali animā oriri. Unde igitur in se derivabit acquirens homo? Id suffugium patere sentio, ut arbitreris, imperium eā ratione vendicari, si quis liber homo alterius voluntati subiciat se, & exuat eā libertate, quā antea fruebatur: hoc modò superiorem illum nancisci dominium, seu imperium in personam, pacto ei se submittentem & obligantem. Respondeo; nullum inde imperium in personam submittentem nascitur: ab ipso enim submittente superior illud non habet, ob rationem
supra

supra positam, quod homo imperium nec in alios, nec in se, habeat. Accipiens, à submit-
tente consequi imperium debebat; sed hic nul-
lum in se habuit; quare nullum ad alium trans-
ferre potest. Nemo sibi imperare potest: quod
imperium, respectivum vocabulum, necessario
duos diversos consignet, quorum alter præci-
piat, alter obediat. Unus autem sibi præcipe-
re, & obedire simul nequit: quod in potestate
obedientis positum foret, præcipienti non pa-
rere. Et quod multò maximè reclamatur; Im-
perium reverà complectitur jus vitæ ac necis,
quod in seipsum habet nemo: ideoque ad alium
neutiquam transmittet homo, quod nunquam
possedit. Quicquid negotii agitur inter submit-
tentem & recipientem, pactum & pacti vis est,
quo obligatur ille ad præstanda promissa; &
huic jus est, exigere, quæ pollicitus fuit alter.
ad imperium nullum ascendit hæc conventio.
Unica superest multitudo, cui quamprimum
congregata est, *naturaliter inesse imperium*,
commodandum Principi, plures somniant. Sed
præterquam, quod multitudo non est corpus
naturale, cui propterea nec imperium *natura-
liter* inhærere potest; id urgendum est, nullam
multitudinis operationem esse, nisi operentur
singuli. at in universa multitudine datur nul-
lus, qui participet imperium; ideo nec con-
ferre aliquid cœtui potest, nec hic possidere.
Conjungan- tur aliquot centena millia hominum
pauperum, quorum singuli ne teruncium ha-
beant: hîc quia singuli habent nihil, multitu-
do neutiquam locuples censebitur. Fieri haud
potest

potest, ut multitudo aliquid efficiat, nisi singuli sua conferant. Hucusque igitur causam Majestatis creatam invenimus nullam, quæ tantarum virium sit, ut sublime illud imperium civile producat: quod nihilominus adest, & omnibus se ostendat, & causam; cum nihil finitum à se ipso oriatur, præsupponit; majorem & veriorum illis, quas modò recensuimus. Cum ergò in Creaturis non reperiatur Majestatis auctorem, necessario nobis altius nitendum est, & perveniendum ad Creatorem Opt. Max. verissimum ac genuinum parentem venerandæ potestatis. Remotis enim causis omnibus, unam tandem supremam invenire oportet. Asserti hujus ratio porro ostendenda est: nullibi enim committam, ut in his Politicis Enunciatis, & conclusis, fundamentum, quod vulgò tanquam ex pacto, & condicito negligitur, nos destituat. Nimirum omnis civitatis ordo ab immoto fundamento procedere debet: quare imperium Principi datum omne, diximus, à Deo. Deus imperium habuit, & habet, postquam communicavit idem homini. Dei imperium igitur fundamentum est omnium Jurium, in quod, tanquam unicam causam, eadem resolvuntur. Quod verò Deus imperium possideat, creationis series nos cogit credere. Nimirum causa prima independens, dominium & imperium habet in productum effectum. In cujus potestate infinità positum est, procreare hominem, procreare orbem universum: in hujus manu situm est, regere à se creata. Hinc dominium in omnia, quæ

quæ fecit divina dextera: hinc imperium in ipsum hominē. Nam qui potens est, his attributis, his qualitatibus efficere hominem, & mundi machinam: hic idem valebit & dominari huic, & regnare illum. Ita Creatori in creata imperium est, quod singulari benevolentia homini communicavit. Concessum enim primitus dominium in res irrationales; mox secutum imperium maritale in Evam, & procreatos ex hac liberos: post pluribus peractis seculis, cum in immensum augeretur hominum numerus, nec sufficeret patrisfamilias potestas, præsentiore regimine coërcere volebat Deus multitudinem & ordinare. Induxit Reges, qui Civitatis corpus disponderent; & vicario imperio Personam Dei, omnia gubernantis, præ se ferrent & obtinerent. Adeoque transcripsit jus regendi hominem Principi Deus, quod vi creationis solus tenebat.

X. Quibus rite se habentibus, continuo illud sequitur; *DEUM Majestatis causam solam* *Unam esse*. Sive, ut communiter loquuntur, Deum Principi Majestatem *immediatè conferre*. Quæ loquendi formula, cum trahi possit, non tantum *ad immediatam causam efficientem*, sed *modum etiam constituendi*; disputationes, & errores excitavit. Immediatè dari Majestas aliquibus tunc creditur, quando citra ullam violentam occupationem, aut Electionem, successionemve, ab ipso Deo nominatur Rex. Ita Saul, David, alii à Domino, citra interventum populi creati sunt reges. Hoc sensu GUILLIELMO BARCLAYO dicitur immediatè con-

constitui, lib. III. contra Monarchomach. cap. II. quando nominatim in regem aliquis à Deo designatur: mediata, quoties eligentium arbitrium intercedit. *Nec hoc cum dico, id voluimen, Deum semper reges, sive Monarchas populis dare immediatè (usus ei verbo nunc locum fecit) Et quis cui imperet, nominatim præscribere: id enim perraro, Et non nisi extraordinaria, tum mutationis, rei que ingentis perficienda causa, priscis temporibus factum esse didici.* Nobis *immediata Causa* dicitur, quæ causæ propinquioris & secundæ influxum omnem excludit. Quare ad vitandam confusionem, & majorem in his civilibus accurationem stabiliendam, malletm separare à se invicem formulas illas; *Deus est causa Majestatis immediata*; & alteram; *Deus immediatè constituit Principem*; sive, *Deus confert immediatè Majestatem*. Non enim utrobique idem dicitur. Constitutio Principis, & collatio Majestatis, includit & conjungit modum acquirendi Majestatem. Nullius enim reprehensionem metuum, si dixerò: *Deus, mediante, seu intercedente populi suffragio, constituit regem*: item; *Deus, mediante, seu intercedente successione, occupatione, confert Majestatem*. Rectè inquam, ita loquar: quod latitudo vocabulorum illa complectatur, quæ medium admittunt. Sed causa Majestatis abstrahit & præcindit ab omni alio concurrente modo, & in se consideratur, quatenus producit Majestatem, non quatenus conjuncta est cum Electione, & reliquis. Jam non
nisi

nisi absurdè dixerim; *Deus est Causa Majestatis mediata*: utens vocabulo inusitato, & incongruo, & plures introducens causas Majestatis. Verbo: à Deo immediatè Majestas produci, nobis antè posito sensu dicitur, ut extra Deum nullam intelligamus aliam causam efficientem secundam, & proximam: sed uni & soli Numini Maximo potentissimum effectum adscribamus. Quæ verissima interpretatio & sententia est: nec adducar unquam, ut illi assistam, qui præter eligendi potestatem, amplius quid concedit populo. Nam *approbatorem* saltem potestatis, à populo collatæ, facit Deus; qui *potentiam dæmonationis instituto regi confirmat*: & populum adeò in causæ consortium trahit, ut *causam secundam* apertè nomenet. Quin exemplis naturalibus evincere conatur, populum ad illud causarum genus referendum esse, à quo dependet *fieri*, licet ad *conservationem* non requiratur: hoc est: ad *causas secundas* & proximas, quæ adæquatè effectum producant. Itaque hâc ratione à Deo constituti esse, & potestatem accipere dicuntur reges; *quod is potestatis à multitudine in ipsos collata, summus & auctor & approbator sit*: ut quamvis ejus potentiæ largitor populus videatur, qui regem super se constituit, & *suum omne imperium & potestatem in eum transfert*: tamen id *donum & beneficium Dei* frequentius, quam populi, in sacris litteris nuncupetur. Quæ vulgaris & plebeja opinio est omnium Monarchomachorum. Absit, ut aliquid detractum velim famæ tanti viri, quem acerrimum in reliquis asser-

assertorem regiae dignitatis novi : humani aliquid passus est in abstrusissimo negotio ; ubi errores , ut crebri , etiam viris Majestatis reverentissimis obrepentes , ita prolixiori veniâ digni sunt : removendi interim , ne malitiosis patrocinium invito auctore præstent. Licebit ergo simplicioremonere lectorem , ne forsanauctoritate tali intempestivè utatur ; & imprudens Majestatem atque salutem Reipubl. prodad. Deum non approbatorem collatæ potentia ; sed verissimam , unam ac solam causam appellamus : populo omnem collationem supra negavimus , & in sequentibus porro negabimus , ubi rejiciemus contrarias sententias , satis manifestas suæ absurditatis. Id nunc urgeamus. Quando subordinationem causarum habemus , secunda , & proxima causa , sibi adæquatumeffectum producit , per potentiam à primâ concessam. Populus ergo si causa secunda majestatis est , utique debet à Deo accepisse potestatem , per quam imperium producat. Documenta interim desunt , quibus id probari queat : & contrarium supra fuit ostensum. Causa est influere. est , communicare essentiam. quod autem causando tribui debet , id in causâ existat prius , oportet. Populus , qui nullum Majestatis jus habet , non poterit influere in imperium electi regis. Id præterea observatum est : Causam servare & retinere pristinam essentiam , & effectui eandem communicare , citra sui propriam corruptionem. Populo verò dicitur adimi imperium , quando confertur in Principem. Has ob rationes eximitur causarum

numero

numero populus, & solus Deus una vera causa manet: qui potentiam à se ipse habet, & communicat principi eandem, influendo in actus Majestaticos: retinet nihilominus ipse pristinum jus, ut per *cumulationem*, quemadmodum loquuntur, non omnimodam *abdicationem*, concessisse videatur.

XI. *Electio* plurimis occasionem errandi præbuit: quia cum causâ Majestatis *consequendi modi*, ob conjunctionem, confunduntur, & ideò animis à vero divertendis vulgò valent. Deceptus est, quisquis fuit Gallicus ille scriptor apud GRAMONDUM lib. I. *Histor. Galli.* p. 65. putans, paucos principes uni immediate Deo coronam debere; imperatorem electioni subjacere, Angliam Regem Parlamento obnoxium fuisse. Unus inter Reges, Christianissimus, inquit, jure suo regnat, unus immediate Deo debet quod rex est. Quo fit, ut vera in omnem casum sit *ethesis*, Regum Galliae immediatam à Deo potestatem esse, usque adeo, ut neminem in terrâ auctorem agnoscat. Sed hæc ignorantia Politicæ excuset. Dicunt. *Eligitur à populo Rex*, & per electionem consequitur principatum: ergo non immediate, sed mediante electione imperium habet. Vbi intercedit causa; ibi effectus immediate non potest produci. Hic ante omnia, secundum supra positam distinctionem, advertendum est, nobis sermonem esse, non de universâ constitutione regis, quatenus modum acquirendi imperii includit: sed de causâ Majestatis separatim consideratâ. Non disputatur in præsentî de accipiendi ratione, sed *causandi*:

sandi: non utrum Rex mediante electione accipiat imperium? quod concedi potest; sed, utrum Majestatis causa secunda detur? Nimirum quoties constituitur Princeps, plura concurrunt, Majestas, Majestatis causa, modus conferendi. Electio hactenus ab omnibus inter modos acquirendi relata est. Certum manet, effectum, productum ab interveniente mediâ causâ, non posse dici immediatè à primâ proficisci: sed applicatio hîc deficit. Eligens populus, electionis causa dicetur: & sic instrumentaliter concurret in constitutione, producendo modum acquisitionis; non principaliter, tanquam causa efficiens imperii. Causa igitur effectrix, & collatrix Majestatis, à causâ modi erit diversa. Constituatur nunc mediante electione Princeps, accipiat istius interventu imperium: nihilomagis Electio causa erit imperii. Accipiat mediante manu mendicus nummum: non tamen extensio manûs nummi causa est. Accipiat mediante occupatione derelictum equum superveniens aliquis: non tamen illa inventio & occupatio equi causa est efficiens. Præsupponitur in his talibus *Objectum acquirendum*, cujus causa efficiens non potest esse modus acquirendi. Nam si hic foret causa, nondum esset illud objectum; nec posset acquiri, nec daretur hujus acquirendi modus. Quare præsupponendum alicubi imperium, quod acquiri possit beneficio electionis: quæ hâc ratione, si nomen causæ alicujus rei mereri debet, *acquisitionis causa* dicetur, respectu certi subjecti deno-

142 DE CIVITATE, LIBER SECUNDUS
denominati : cum imperii causa nihil habebit
commune.

XII. Manet ergo immediata causa Maje-
statis Deus. Unde pulcherrima Enunciata Po-
litica consequuntur : quorum illud eximium
est; *Dei vicarium Principem esse*, qui illius lo-
cum in terris subeat, & personam gerat. Hinc
est, quod imaginem Dei in eo passim depre-
hendant gentes. *Artabanus* Persa, apud PLU-
TARCHUM, in *vita Themistoclis*, pulcherri-
mam optimamque legum Persicarum vocat il-
lam, quam sancitum fuerat, *regem esse honoran-
dum & adorandum*, ut *Dei cuncta servantis
imaginem*: idem docuit; *Regem, cum imperi-
um gerat nulli obnoxium*, & *lex sit animata*,
Dei effigiem inter homines exhibere; observante
CLAUDIO SALMASIO, *Defensione Reg. cap. v.*
Laudatur Eidem *Ecphantas Pythagoricus*, qui
docuit; *optimam quidem naturam rem esse homi-
nem, maxime vero divinam regem. Eum me-
liori conditione esse prae ditum, quam ceteros ho-
mines. Et quamvis corpore sit similis reliquis, ut-
pote ex eadem materia creatus, ab optimo aeterni
artifice esse productum, qui eum fabricavit ad
suum ipsius exemplar, seu, seipso utens prototypo.*
Subjicit continuo, *Regem singulare quoddam,*
*& unicum esse opus, utpote qui sit imago caelestis
Regis.* Idem *αὐταρχία*, quae regit seipsam,
& regitur à nemine, Dei primum esse propri-
am, deinde & Regis, dixit. CORIPPI AFRI-
CANI, in laudem *Iustini*, illud est, lib. II.

*Terrarum dominis Christus dedit omnia
posse.*

ille

Ille est omnipotens, hic omnipotentis imago.

Ex his illud conficitur; *Principem tantum posse in civilibus dependenter, & Dei concessu, quantum Deus independenter valet efficere.* Pertinet huc, quod *Philippus* dixit, citante *SALMASTIO*; *regem cum homo sit mortalis, accepisse potestatem divina parem.* Nec alienum est, quod *Diotogenes* ille scripsit; *ut se Deus habet ad mundum universum, ita regem se habere ad Rempublicam, cui praeest.* Et hac de causâ *Principes, Deos partiales*, vocat *CHRYSOSTOMUS*, *Homil. xxxviii.* hanc ponens differentiam: quod Deus universi gubernator sit; Reges jus dicant uni regno. Quo ipso Enunciato amplissima Principis Majestas concipitur; & quæ circumscribatur interim egregiè cancellis honestatis & pietatis, ne quid prætextu absolutæ potestatis inhonestum jubeat, aut faciat. Quum enim Deus contrarium aliquid sanctitati suæ statuere nequeat: nec vicarius tam impiam facultatem habebit. Quod si tale quid audeat, transilit officii limites, & subditi ad obtemperandum & obsequendū in turpibus, obstricti non sunt. Porro, quia Princeps Vicarius Dei est, illud sponte sequitur, *Principe in civitate superiorem non dari: nec Iudicem ejus esse, si Deum exceperis.* Judicium nullum sortietur Princeps in terris, multo minus condemnatoriam sententiam ab hominibus extimescet, si vel maximè affinis culpæ fuerit. Populus judicare illum, aut condemnare nequit: quod non contulerit majestatem, & ideò non superior sit, aut capax,

capax, qui iudicis vices agat. Judex enim excellentiæ superioris vocabulum est. Ejusdem quippe esse destituere, quem constat constituisse, esse moris ac juris indubitati, notat idem SALMASIUS. Nam & plebejis animis cognitum est, Administratorem generalem, qui universæ Provinciæ impositus est, neminis privati sententiæ subjacere; sed Domini constituentis arbitrio relinqui. Quæ singula, ut & alia plura, suis locis ostendemus.

XIII. Postquam nobis jam satis constat de vero Majestatis Auctore: rejicienda simul sunt aliorum erronea in hoc argumento asserta. De origine enim imperiorum, à quibus initiis eadem profecta primitus, & hodiè quoque deducantur; diversas passim legere est opiniones. Qui securius philosophantur, fieri haud potuisse autumant, quin sævâ violentiâ armorum sub jugum servitutis missi fuerint, liberi ante, & sui juris mortales. *Scilicet ad dominandum proclive humanum ingenium est: Et imperandi libido animis, quo erectiores sublimioresque sunt, eò magis assidet. ac cogit omnia facere, ut præceptum mente principatum obtineant. Id primis tempestatibus, quia bonis artibus haberi non poterat; (amantes enim libertatis suæ homines, sponte ut subjicerent arbitrio unius se suasque fortunas, nulla necessaria ratio adigebat) ad prava consilia versi dicuntur imperii avidi tyranni: Et bellorum vi extorsisse nolentibus, quod aquâ ratione consequi desperabant. Primos subdebat stimulus impotens ambitio, cui ut facerent satis, armorum strepitu infestabant omnium fines: Et*
hec

hoc superbia instrumento malè conceptum, & affectatum diu imperium, sibi tandem asserebant. Argumento esse arbitrantur, quòd ab initio soli reprobi, potentiâ ad injurias innocentium abusi, imperium acceperunt: adducto exemplo *Caini*, qui ante diluvium primus dominus fuisse creditur. Et postdiluvianis temporibus *Nimrodum*, qui ex maledicto genere Chami oriundus fuit, ad regni fastigium injurioso itinere grassatum volunt. Neque enim credibile censent, *Libertatem, sine vi maximâ, aut non perruptis natura legibus, eripi potuisse.* Latrocinia quoque vertisse in regna, constans fama est: quare & *Nimrodum* latronis nomine vulgò insigniunt. Plurima ejusmodi regnorum initia historiæ memorant, Arabum, Turcorum, Tartarorum, ex latrociniis, in magnas Respub. desinentium. De Viriatho, ex venatore latrone, ex latrone Imperatore, Florus lib. II. c. xvi r. Nobis aliter videtur: Deum imperiorum causam omnino asserendum etiam hoc casu esse. Sit avidus dominationis humanus animus: nondum interim efficaci satis instrumento utitur, ad obtinendum regnum, quoties ambitione principatum quærit. Misceat licet omnia armorum strepitu, & securos invadat: nondum decessit victor, nondum rex. Frustra igitur sunt, qui ad ambitiosam violentiam recurrunt; & armorum injustitiâ primum imperandi parendique ordinem institutum somniant. Ceterum, ut appareat, quam incerta nimis sit, & meris conjecturis nitatur ea opinio, fundamenta, quæ suffulciunt, docent. So-

lis improbis ab initio concessa imperia, credat, cui promptum est, quidvis credere. Cainum primum dominum exstitisse & regem: infra rationem est. Urbem eum condidisse novimus: quâ exstructâ non statim ponitur regnum. Et nihil impedit, quo minus placeat *Gregor. Cedreni* sententia: *Ante diluvium neque gentem fuisse, neque regnum.* Gens enim est populus, in rempublicam concinnatus. In quem sensum apud *Jeremiam* Assyrii, vocantur *prima gens*, non vulgari notione, cap. v. 15. *Nimrodum*, infami latronis, aut tyranni nomine, traducere qui solent, viderint, num firmâ satis ratione inducantur, & solidis argumentis in non levi causâ pugnent. Expugnaverit fortean aliquos, ferinos homines, & in societatem civilem transtulerit armorum beneficio; aliunde tamen causa imperii fuerit repetenda. Unde nimirum imperium in exercitum, quô refractarios fudit? nam si & hunc bello captum dicamus, in infinitum quæstio procedet. Victoriâ non militi adscribendam esse, sed Deo deberi, religiosa pietas credit: Eidem ut dominatum, subsecutum victoriâ, adscribamus, necessum planè est. Cœperint igitur sic regna: bellis, *principii nomen*, in adstrictâ significatione asseremus, *causæ* titulum non tribuemus. Non statim causa est, quod Principium. Verùm, ut minus credam, imperia prima bellis originem acceptam ferre, facit, quod *SABELLICUS* I. *Ennead.* l. I. scribit; post jam dudum constitutas respubl., & plurima gesta bella; eum beligerantibus fuisse animum, ut ex victoriâ laudem

dem reportarent , in victum jus sibi assererent nullum. *Ninum* tandem , qui rem , non umbram secutus , primum devictis Scythis tributa imposuisse. Latrones si contingat in civitatem coire , & auscultare superioris , quem constituerunt , jussis ; dubium non est , quin respublica dicenda sit ordinata illa multitudo , & majestatem quoque habeat electus Dux. Per electionem committitur illa quidem homini , non à prædonibus , sed à Deo : approbante communionis & societatis ordinem , non abusum imperii ad aliorum perniciem.

XIV. Mitiora foveant meditata , qui ad Jus recurrunt , aut per quendam naturæ ordinem exstitisse Imperia tradunt. Quam sententiam ARISTOTELES *lib. I. Polit. cap. II.* amplectitur. ubi vicum à naturâ constitutum defendit ; qui domûs quasi colonia est , quæ filiis , & filiorum filiis constat , subdit : *Principio sub Regum imperio civitates erant , & nunc etiam gentes , quia ex iis , qui sub regno vivebant , convenerunt. Omnis enim domus ejus , qui ætate antecedit , regno subjecta est , ergo & colonia. id est , familiae plures , quæ ab una domo fluxerunt , propter cognationem. Atque hoc illud est , quod ait Homerus : Iura autem uxoribus unus Quisque dat & natis.* Stabilire potest hanc opinionem ingens jus vitæ ac necis ; tum belli quoque gerendi : aliaque patribus familiarum non minus , quam regibus usitata. Non faciunt tamen nostræ expectationi satis à Naturâ deducta imperia : domestica primitus , mox crescente familiarum numero , regalia. Speciosa magis ,
G 2 quam

quam vera derivatio est. Civitatem à naturâ constitui, planè defendimus: non item Remp. quæ imperium complectitur. Sit naturâ locietatis appetens homo, studeat propagationi sui generis; deducantur liberi in suas familias, constituatur vicus quoque: imo, (vivat interim senior familiæ) ex pluribus vicis civitas: patriam potestatem exercebit familiarum princeps in liberos & nepotes, nullum imperium politicum & Majestaticum, quale quærimus, usurpabit. A quo mutaretur enim potestas illa domestica in familiares, dum multitudo liberorum respectum patris haud migrat. Nunc moriatur aliquando auctor hujus propaginis, quis in defuncti locum succedet? Quis credat fratres seniores, qui jam patriæ potestatis vinculis exempti, æquali fruuntur jure & libertate, tam faciles futuros in sui damnum, ut temere se pari submittant. Et fingamus id fieri; à voluntate eorum, qui se subjiciunt, & superiorem constituunt, universum negotium dependet: atque adeò naturæ ordinem excludit imperium uni concessum. Detur hæc venia *Aristoteli*, ut probabiliter interdum, & in speciem compositis rationibus, fidem facere in abstrusioribus negotiis conetur: eoque si non inventæ veritatis; ingenii tamen, solertiæque laudem mereatur. Liceat enim homini gentili atque profano ignorasse veram Majestatis originem, qui in universum de rerum, etiam naturalium, ortu, non nisi dubitanter sæpe, potuit differere. Quod argumenta concernit, negari non potest, penes ejusmodi familiarum dominos plurima

rima resedisse jura, (ita vocabimus interim,) æquali ferè excellentiâ, quâ hodieque ab Regibus exercentur. Jus vitæ ac necis, quod principem locum tenet, proprium fuisse patribus & dominis, non profanæ tantum; sed & Sacræ historiæ confirmant, supra nobis laudatæ. Sic novimus Abrahamum armasse trecentos ver-nas, & reges, qui abduxerant Lothum, per-secutum oppugnasse, fudisse, castrisque & omni prædâ exuisse. Interim & illud nobis dari oportet; Jus vitæ & necis, jus belligerandi, ac cætera, quæ patribus familiarum compete-bant in liberos, diversissima esse ab illis, quæ reges in subditos habent. Subjecta insignem differen-tiam constituunt. Pater exercet jura in liberos, in suam familiam; at rex in ipsos patresfami-lias: eâ virtute & efficaciâ, ut Jura, patribus ante competentia, trahat ad se; unâ benevolen-tiâ, aut castigatione modicâ relictâ. Eaque ipsa Jura, patribus ante constitutum regem dome-stica, non temerè & nascendi sorte, sed divinâ, & speciali ordinatione, concessa sunt.

XV. MARCUS ZUERIUS, BOXHORNIIUS, *lib. 1. Instit. Polit. cap. II. n. 2.* triplicem impe-riorum fontem habet, Jus naturale, Gentium & Civile. *Imperia*, inquit, & *dominationes sensim atque gradatim provenerunt. Primum quidem imperium ex Jure NATURÆ profluxit. Estque quod parentum in liberos, & nepotes, & ex his genitos appellamus. Estque Respublica hæc quasi seniorum cognatorum; quod imperium hu-mani generis exordio, cum longævi & fecundi essent mortales, usum habuit. Secundum impe-*

*rium ex jure gentium prognatum est, estque quo
gentes omnes eidem rationi, & unanimi consen-
su receptis institutis, se, velut legi, subjecerunt.
Estque illa universalis Respublica omnium o-
mnino hominum. Tertium imperium est, quod
ex singularum gentium utilitate, necessitate &
proprio, seu civili jure, peculiare & à ceteris di-
versum manavit, estque Respublica singularum
nationum.* GUILLIELMUS quoque BARCLAIUS, par-
tim ad jus naturale, partim ad gentium recurrit,
lib. II. contra Monarchom. p. m. 277. Quapropter
licet regnorum quidem institutiones juri gentium
rectè tribuantur, quod ea populi, dictante docen-
teque ratione, primitus amplexi sunt: tamen quia
homines occulto quodam natura instinctu ad ea
inclinabantur, eatenus juris naturalis dici pos-
sunt. Ac proinde, si quis rem alius repetat, in-
veniet, regalia cum ipso humano genere cœpisse
atque crevisse imperia. Verum quæ Cl. Box-
HORNIIUS de triplici Jure differit, & ex eò con-
stitutis Rebus publ; animum non satiat. Obscu-
ra nimis, & intricata penitus sunt hæc de Ma-
jestatis origine effata: & quæ minimè conci-
lies, si ad principia politica exigere velis. Pri-
mum, domesticum parentum imperium, ex jure
naturæ profluxisse, nemini persuadebitur, qui
satis assequitur, quid vocabuli genuina signi-
ficatio & indoles importet. Scilicet jus naturale
nihil aliud est, quam rectitudinis, seu Sanctita-
tis Divinæ instar, humano animo à naturâ infu-
sum, ut sit regula agendorum: præscribens,
quid in actibus hominum moralibus necessa-
rium, honestum & faciendum; quid item turpe,
exse-

exsecrandum, ac fugiendum sit. Jam facilis est dijudicatio, quousque se jus naturale extendat, & quarum rerum causa sit. Objectum sunt actus morales: iique vel honesti, & necessario faciendi; vel simpliciter turpes, & ideò necessario vitandi. Ad alia citra confusionem istud applicare non possumus. Nunc quum Majestas & imperium, in censum agendorum referri haud queat: oppidò apparet, extra Juris naturalis terminos, & sphaeram activitatis esse ponendum; & ideò ab hoc fonte non arcessendum. Occultus naturæ instinctus, & inclinatio ingenta, non satis probant jus naturale. Proponent aliqui naturâ in certas artes atque scientias: quæ tamen propterea juris naturalis non sunt. Tuetur se quidem BOXHORNIIUS *Aristotelis* auctoritate, quam ex I. Pol. II. desumpsit. Si rectè tamen memini, Philosophus imperium à natura, non à jure naturali deduxit: quæ diversissima sunt, & minimè erant confundenda. Erit, & derivabitur aliquid à naturâ, quod cum Jure naturali nihil habet commune. Quamvis & Philosophi dictum falsum sit, ut supra vidimus. Interim à NATURA esse dicimus, quoties impetum intrinsecum, & aptitudinem connatam ad certum negotium deprehendimus. Sic civitatem à Natura esse dicit Philosophus, quod ibi statim explicat: *Natura igitur appetitio est in omnibus ad talem societatem.* Quod doctissimus PIERCARTUS, in commentario ad hunc locum, liberius vertit: *Constare naturâ nihil aliud est, quam quod natura hominibus indidit impulsus & appetitum civilem,*

lem, id est, ad communem vitam consuetudinem. Sæpè sola aptitudo recipiendi & patiendi aliquid, eam loquendi formulam sustinet. Ita servi à Naturâ, Domini naturâ dicebantur: quod nimirum illi, destituti ingenii solertiâ, indigeant alterius ope ad transigendam vitam, & instructi corporis robore, apti sint, qui meliori inserviant: hi, ob ingenii dotes digni videantur, qui simplicioribus imperent. Neutrum tamen reverâ naturale, vel juris naturalis est; alias omnes deberent esse servi, aut domini: quod juris naturalis scita æqualiter & immutabiliter se habeant ad omnia subjecta intelligentia. Involvimus igitur rem miserè, quoties vocabulis tantopere abutimur. Quæ de Republicâ parentum & seniorum, exempli loco subjicit, sponte ex dictis concidunt. Nulla tum Resp. fuit, sed familia: & pater non Majestatem, sed patrium imperium exercuit. Eiusdem ponderis sunt, quæ de imperio, ex jure gentium prognato, affert. Æqualis efficaciam censendum hoc in negotio jus gentium, cum jure naturali. Neutrum eò usque pertingit, ut imperium producat: neque explicatio adjecta id præstat. Subjiciant se gentes omnes concordii consensu eadem rationi, & veluti legi, receptis institutis: nondum video, quomodo exinde resultet imperium. Vero perquam simile est, primos mortales, quos Reipublicæ vis nondum in ordinem coëgerat, ad ductum rationis rectæ vixisse, & observasse instituta, quæ vel sana mens, vel vicinorum consensus sanciverant: interim nondum constat, imperium inde fuisse enatum.

tum. Nec quidem eam applicationem admittam, quod gentes consenserint in imperia. Non omnis consensus populorum, jus gentium producit. In plura consentiunt gentes, non motu effectivo, ut ipsæ aliquid sanciant; sed parendi necessitate, quod accidit in naturalibus præceptis, & omnibus, à superiore, Deo, promulgatis. Addit: *Esse illam universalem Rempubli- cam omnium omnino hominum.* Quod minus politicè dictum videtur, & figuræ declamatoriæ propius est. Nunquam omnes mortales in unâ vixere civitate: & ille consensus rectè sentientium Rempubl. non format. Certum est, nonnullos hæc vocabula transferre ex quâdam similitudine ad universum orbem, *Stoicos* potissimum si evolvas: sed illud quoque dubio caret, impropriam loquelam esse. Ita SENECA multoties se *mundi civem* vocat. *Duas Respublicas*, inquit cap. xxxi. de vitâ beata, *animo complectamur, alteram magnam & verè publicam, quâ dii atque homines continentur, in quâ non ad hunc angulum respicimus, aut ad illum, sed terminos civitatis nostræ cum sole metimur.* Alteram cui nos adscripsit conditio nascendi. hæc aut Atheniensium civitas, aut Carthaginiensium, aut alterius alicujus urbis, quæ non ad omnes pertinet homines, sed ad certos. Quidam eodem tempore utrique Reipubl. dant operam, Majori minori que, quidam tantum minori, quidam tantum majori. Quis verò ex tali loquendi formulâ proprietatem, quæ hîc accuratissimè spectanda est, colligat, aut imperiorum genus constituat? Excludit ejusmodi flores, &

digressiones Oratorum, severitas civilis Sapientiae: in negotiis praesertim, quae fundamenta concernunt tantorum operum. Tertia derivatio est ipsa propago Juris Civilis; nullius imperii causa. Ex utilitatis, aut necessitatis publicae praescripto, aliisve causis, populi jus congruum acceperunt. Sed populi nimirum, qui in rempublicam jam erant ordinati, qui jam suspiciebant Majestatem imperantis. Ut conderetur aliquod jus, ut sanciretur lex, necessario requirebatur antecedens imperium. Nam juris constituti causa est Majestas. Contra naturae cursum & consuetudinem fuerit, si effectus suam causam antecederet non tantum, sed produceret etiam. A jure civili non manavit Respublica: sed Republica, per Majestatem concinnata, ab eadem Majestate leges civiles, pro captu, indole, commodo, subditorum civium, latae sunt.

XVI. *Necessitatem* aliqui, ac *indigentiam*, afferunt causam imperiorum. Nollem sane HUGONI GROTIO illa excidisse, lib. I. de I. B. & P. cap. IV. n. VII. *Notandum est, primo homines non Dei praecepto, sed sponte adductos experimento infirmitatis familiarum segregum adversus violentiam, in societatem civilem coisse, unde ortum habet potestas civilis, quam ideo humanam ordinationem Petrus vocat: I. cap. II. 13. quanquam alibi & divina ordinatio vocatur, quia hominum salubre institutum Deus probavit.* Cui sententiae quoque accedere videtur BOXHORNIIUS in Not. ad I. I. Inst. Polit. cap. II. §. I. *Dictum porro est: utilitatis causa Rem-*
publi-

publicam congregatam. Utilitas enim omnium non est postrema causa originis imperiorum. Ceterum experimentum illud infirmitatis, & utilitatis majoris procuratio, videtur ex illo genere causarum esse, quod *occasionis* nomine venire solet; aut ad agendum animum impellit quidem, ab efficiente tamen diversissimam naturam habet. Imo tantum abest, ut vel imbecillitas familiarum, vel utilitatis & lucri cupido, imperiorum causæ sint; ut ne quidem civitati, materialiter spectatæ, quam à naturâ deduci supra vidimus, originem dedisse, pro certo habendum sit. Et nimium sui obliviscuntur auctores, qui indigentiam, infirmitatem, nomina illa imperfectionis & defectus, causas constituunt sufficientissimi imperii.

XVII. Qui sensuum magis, quam rationis arbitrio utuntur, & spectra ac species à rebus discernere ignorant, ab hominibus derivant imperiorum primum fontem: ita tamen, ut hominem sibi posse quid comparare, negent; bene tamen alios, in quorum manu summa potestas residet. Sive universus populus, sive pars ejus validior contulerit: sive Majestas in mutatione Reip. translata, aut à retinente Monarchâ concessa fuerit Vasallo. Veteres evolventibus memorias temporum, non paucâ numero se sistunt exempla eorum, qui militibus, parti validissimæ populi Romani, imperii dignitatem tulere acceptam. In Republicâ Romana, cum jam præceps ireret, plurimi à militibus vel constituti, vel exauctorati Principes. Sæpe flagitiosissimus rerum summæ destinatus: sæpe fastigio

detrusus optimus. Prostabat venale Romanum imperium, cuius possessionem pecuniosis emptoribus facile impudentissimi caupones vendebant. Novo quidem jure; ut quoties pluris offerretur, aut spes affulgeret majoris pretii adipiscendi, dejicerent pristinum dominum. Hâc continuâ usurpatione, jus conferendi imperium haud sinebant senescere. Quomodo parricidali manu, sublato *Pertinace*, milites, turpissimi mercatores, de venalis imperii præsepte copiâ per clamosissimos præcones transeuntes adverterint; tum quomodo *Julianus* contumeliosum dominatum licitatus & consecutus fuerit, narrat *HERODIANUS lib. II. cap. VI.* Syracusarum simile fatum observat *CASAU-BONUS, commentar. ad Polyb.* Nulla tamen ratio subest, cur à militibus, sæpe mercenariis, Majestatem arcessamus. Non sine indignatione optimus quisque apud *Herodianum* legit, quam foedissimâ nundinatione imperium promercale habuerint milites. Sed quid ad hunc contractum *Dio*? *Accidit*, inquit, *tum res turpissima, urbeque Româ, plane indigna. Namque sicut in foro & mercatu quodam, & urbs & imperium ejus venale edictum est: vendentibus, Principis sui parricidis.* Senatus, Populusque diras imprecabatur. Et *prætereuntem*, verba sunt *Herodiani*, ex versione *Angeli Politiani*, *maledictis insectabantur, & turpes ambiguasque voluptates exprobrabant, sic ut etiam propalam in circo, ubi maxima vis hominum confluit, Julianum incesserent, ac vindicem Romani Imperii, præulemque summum principatus Nigrum vocarent:*

tarent: orantes, ut quamprimum adesset, ipsosque à tantis contumeliis assereret. Quæ omnia illustri documento sunt, tale quid non nisi in prolapsa Republica, & corruptissimâ accidere. Premebatur populi libertas, calcabatur Senatus auctoritas, universa Respubl. in præsentissimum discrimen deducebatur, cum miles sibi jus legendi creandique principis per malam libidinem vindicasset. Lethaliter decumbentis, & mox efferendæ ac conclamandæ Reip. indicium est, quando exercitus sibi civilium rerum, & principis sumendi potestatem arrogat. In confusiones enim atque tumultus; in cladem atque interitum ea insolentia expetit. Quod pragmatica observatione Historicus annotavit, *in fine cap, vii.* Cæterum nemo sibi corruptam Rempubl. imitandam proponit: vitant potius omnes, quæ scæda inceptu, scæda exitu in tali notaverunt. Neque igitur consultum est, scelus pessimorum hominum principii loco ponere, à quo profluat sacratissimum imperium. Nunquam effectricis causæ titulum & dignationem merebitur, quod ne modi quidem legitimi nomen tuebitur. Si quicquam militibus debuit Julianus, tanquam injustis electoribus debuit. Penes Senatum, aut universum quoque populum, tum temporis residebat eligendi potestas: quæ erepta veris possessoribus sacrilega manu, & ab inuasoribus detenta, non poterat adeo mutari, ut efficeret illegitima Electio, quod rite & ex ordine facta nunquam præstitisset. Majori applausu à plerisque Majestatis auctor universus populus recipitur, qui imperaturis

turis tradere imperium intricatissima assertione dicitur. Nimirum populus sumit sibi in regem, qui nulla potestate instructus antè, per electionem, & populi beneficium, consequitur summum illud regnandi jus. Extincto quoque nuper electo rege, eandem facultatem recipit multitudo, quam in Principem contulerat: & alium demortuo substituit, aut mutat regiminis faciem, prout libitum fuerit universis. Quem sensum præ se ferunt illa GROTII, lib. II. de I. B. & P. cap. IV. §. x. *Quare si populus à cujus voluntate jus regnandi proficiscitur, voluntatem mutet, is qui nondum natus, aut quibus jus quaesitum non est, injuriam non facit.* Et alibi populum subjectum commune Majestatis affirmat. In hanc sententiam nonnulla leguntur in Oratione Suasoria, de eligendo Friderico, apud GUNTHERUM, lib. I. *Ligurini, vers. 242.*

In manibus vestris regnum est: ea quippe potestas

Ad vos more suo semper viduat recurrit. Decepit hæc eligendi potestas BARCLAIUM quoque, disertissimum Regiæ causæ patronum, ut largiretur, à multitudine conferri potestatem in regem, à Deo confirmandam. Deceptus quoque fuit SALMASIUS, ut similiter concederet, Principem habere potestatem à populo, cap. VI. Defens. Reg. *Non timetur in regali, quia populi potestas in populo amplius non est, sed in rege, qui à populo eam accepit. In populari itaque statu populi est potestas. In regali populi fuit. Nunc regis est, qui in populum illam habet, quamvis à populo.* Et mox. *Quod statuemus ergo descri-*

• *discrimen popularis status & regalis, cum in utroque à populo potestas velut ab origine veniat? Hoc certe erit. In populari penes populum potestas manet, in regali à populo in regem transfertur. Populi esse desinit, ubi regis esse incipit. Nunquam benignius gratificari Monarchomachis poterunt regiarum partium Assertores, quàm si tam grande postulaturn ignari concedant, Potestatem principi à populo dari. Et in præcedentibus tamen Barclajus, Grotius, Salmasius, luculentissimis rationibus ac testimoniis evicerant, potestatem regiam à Deo trahere originem. Sine figurâ & colore dicam; Populum tantum conferre in Principem posse, quantum diabolus in Christum; cui regna mundi tam prolixè pollicebatur, qui ne in porcum quidem habebat imperiũ. Cum præsentissimo periculo, imperii auctor populus constituitur: aptissimâ seditioni sententiâ, quæ Majestatem, quoties displicuerit plebi, ex facili evertat. Eligit interdum populus, aut procerum ordo, regem: interim non conferunt imperium. Non dare potest aliquis, cujus compos haud est. Si jam adesset Majestas in populo, aut proceribus, constituta foret Respublica, nec opus esset Electione capitis. Ipsa electio modus est acquirendi imperii, sicuti bellum, sicuti successio, Causa non est. Non aliud præstant eligentes, quam ut producant personam, suo judicio dignam habitam, cui à Deo imperii axioma tribuatur. Demortuo quoque rege, non revertitur Majestas ad populum: sed potestas alium eligendi.*

XVIII. Vulgaris ista opinio stabilem explicationem non habet; aliis aliter fundamentum conferendæ in Principem potestatis, declarantibus. Communissimus error actu realem Majestatem plebi concedit, ut habeat nimirum, quod alteri communicandum est. Invaluit absurda illa doctrina, *multitudini naturâ inesse imperium in singula membra*. Sunt qui triplicem viam, producendæ potestatis aperiunt, dum alia ratione *causæ & effectus*, alia ratione *totius & partis*, alia denique ratione *agentis & patientis* nascitur. Secundam ita declarant. *Partem naturaliter subesse toti, & regi à toto. hoc modò Remp. habere auctoritatem in singula membra. Ab hac radice per commissionem provenire omnino potestatem Politicam Imperatorum, Regum, Principum, Magistratuum: & consequenter omnium eorum, qui ab his auctoritatem habent. Remp. publicâ liberam, per se & ex naturâ rei, habere potestatem regendi sui, & omnia sua membra: unde eam possit alteri committere, sive uni, sive pluribus, idque secundum varias limitationes & conditiones, prout ei visum fuerit. Et à Deo quidem, tanquam primâ radice, provenire potestatem politicam scribunt: sed per naturalē institutionem rerum. Hoc ipso enim, quo fecit singulos homines, sui juris, & dedit inclinationem ad vitam communem & politicam, censetur etiam dedisse communitati, quæ ex singulis illis junctis conflatur, potestatem regendi sui & singula sua membra. Nam naturaliter ex potestate singulorum. sic in societatem vitæ cœuentium, resultat potestas communitatis, à communitate autem ulterius per*

com-

commissionem derivatur ad Reges & Principes, ab his ad officiales inferiores. Hoc sensu, dici potestatem politicam esse à Deo, non quod potestas Principum aut Respublica sit ex immediatâ Dei commissione, sicut potestas summi Pontificis, sed ratione institutionis naturæ socialis, conficientis unum corpus politicum. Eadem habet alius: Cum verò Respublica constituta est, in ejus est potestate regimen Monarchicum, vel aristocraticum, vel populi politicam instituere, atque ita Respublica à Deo primò & immediatè, magistratus ab eâ designati, à Deo mediatè, à populo immediatè potestatem habent, quæ ex naturâ rei est tota in communitate primò & immediatè. Iterum. Cum verò in unum corpus politicum homines conveniunt, non possunt impedire, quo minus sit illa potestas inter illos; nam per modum naturalis affectionis & proprietatis enascitur. Quisque enim natura suâ ad societatem hujuscemodi adeundam aptus est. Liberales nimis sunt Auctores in fingendâ potestate multitudinis: quam si realem, personali Principis contradistinctam, intelligunt; spuria Politicæ figmentum est, & monstrum, in solas terras deportandum. Satis enim constat, hunc infelicissimum partum ab accuratis Politicis nunquam susceptum, sed expositum fuisse. Naturalis illa multitudinis potestas nulla sanâ ratione probatur. Partē naturaliter subesse toti, & à toto regi, si regimen civile, quale tractamus, intelligas, insultissimus eris. Lapides, arbores, cum nomen totius gerant, partibus imberabunt. Proculdubio partes animalis bruti, toti suberunt:

suberunt. quis autem bestiae imperium aliquod verum adsignaverit? Ne homo quidem; alias potestatis capax, in sua membra aliquod jus habet: quod non distincta sint ab ipso regente; sed eundem componant & integrent. *Facultatem locomotivam* loco regiminis malè accipiunt auctores. Subest pars toti ad hoc, ut componat totum, & sub toto comprehendatur: non ut obediat toti, & huius imperium suspiciat. Nunquam majori periculo exposita est veritas, quam ubi æquivocis locutionibus, in tam seriis negotiis, circumscribitur. Nullibi ostensum est, *imperium esse de natura totius*. Id vero hic probari debebat, quia nusquam in antecessum probatum legitur. Nullo conceptu tam temerarium axioma assequemur. Nam si Toti in partes imperium sit, in omnes partes hoc se extendat oportet. Si hoc statuitur, nullum habebimus imperans. quia imperium, toti naturaliter competens, secundum aliquam partem, cui primario inhæreat, competere debebat: ubi verò omnes subiectæ sunt æqualiter, nulla participabit imperium. quod ideo toti non inerit. Adde, si alteri partium jam inesset imperium, falsum foret, quod toti in partes competeret regimen: quod illa imperans non subesset, sed alteram regeret. itaque totum partibus non imperaret, sed totius pars imperans subiectam dirigeret. Præterea hoc ipsum de toto in genere predicandum foret. at supra n. IX. ostensum est, rem inanimatam, & irrationalem, haud esse capacem imperii. quod huc repetendum. Suspecta igitur omnino est assertio, dum non omni toti affin-

gi potest imperium. Si totum aliquod rationale substituas, imperium competeret, non quâ toti, sed qua *rationali*. secus enim omnibus Totis fuisset proprium. At ne rationali quidem Toti domesticum id esse, similiter demonstratum est: quod sibi imperare nemo sciat. Ita redeunt difficultates, quæ premunt ejusmodi opinionones, supra relatas & rejectas. Et si naturaliter toti inerat, in Physicis sub qualitatuum serie in genere explicandum & demonstrandum erat Imperium: quod apud nullum Peripateticorum explicatum reperies. Facilimum autem esset, ire per singulas qualitates animæ cujuscunque, tum rationalis potissimum, & ostendere, quam nulla sit, quæ imperium complectatur: corpus, iners materia, inhabile est, quod percipiat illud & exsequatur. Adeo non tantum datur nulla facultas naturalis, quæ imperii nomine veniat, ut supra diximus: sed ne quidem adest ulla, quæ imperio subsit intrinseco, ex totius naturâ resultante. Falsum igitur principium, ex quo nihil sinceri & solidi confeceris. Transeamus ad applicationem: modò id habeamus perspectum, Civitatem, nominari aliquod Totum, nisi cum ingenti vocis abusu, haud posse. Examinemus civitatem, nullam classem Totius sequetur. Non est totum *essentiale*; non *integrale*; non *Perfectionale*, quo titulo solus Deus utitur: non *Potestativum*; quod Majestati proprie quadrabit. Totum *universale* haud est, quod generis nomine præcisè intelligitur, & species includit, aut individua. *Individuale*, nihil novi introducit, sed sub aliis latet, vel essentialibus, vel integran-

integrantibus : & cum *Universali*, peculiarem affectionem Entis ponit. Si *numerale* totum quacunque applicatione adducunt ; multitudinem habent , quæ tantum abest ab Toto , quantum ab unitate. Quod *Totum*, utpote vera affectio, de Ente vero, in classe Rerum occurrente, affirmetur. *Multitudo* autem, quæ talis, nullam seriem Rerum intrat, & ideo affectiones Entis non sustinet. Annotanda hæc erant ex severiori Philosophia, nec pigebit similia, si occasio postubabit, monuisse. ne improbis Sophistis superfit color, qui patrocinium aliquod videatur præstare. Nunquam enim vilis, aut pudendus labor existimabitur, qui contra tenebriones ejusmodi, obscuris terminis nocentes, accuratius splendorem Majestatis asserat ; & quascunque technas & strophas, quibus imperitioribus illudere poterant, aperiat & repellat. Fallunt igitur duo præcipua fundamenta, *Totum habere imperium in partes*; & *Civitatem esse totum*. Non magis firma sunt innitentia illis fundamentis. Rempublicam per se, & ex naturâ rei, habere potestatem regendi sui & omnia membra ; obscurissimè dictum est. unde enim est, quod per se habet ingentem illam potestatem ? Quæ est illa natura Rei, quæ eam confert ? Dum singuli sui juris nascuntur, & ad vitam communem ac socialem inclinant ; ego nunquam censuerim, communitati concessam potestatem regendi omnia membra. Non se mutuò consequuntur, amor societatis, & civile imperium. Apertius deducenda hæc erant,

rant, quomodo inclinatio ad vitam socialem effectrix sit Majestatis. Naturaliter ex potestate singulorum, resultare potestatem communitatis, absurdissimè ac imperitissimè dictum est. Quis enim ex præmissis hæc tanta colligat? Quis sanus connexionem deprehenderit in illis: *Quicumque sui juris nascitur, & ad vitam civilem inclinat; ille in se habet potestatem, eandemque communitati tribuit?* Nemo inquam, sanus arenam hanc sine calce probaverit. Si quis sui juris nascitur, non suberit sui ipsius imperio. qui enim ulli imperio subest, non est sui juris. Aptus est colendæ societati & is, qui obtemperat: quod si hæc aptitudo imperium confert, nemo natus homo ab imperio actuali excluditur. Nunc verò si omnes imperant, ubi subditi? Institutio naturæ socialis supra congregationem nihil operabitur: quâ effectâ, quæstio redit, unde congregatæ multitudini imperium? Singuli nec in se, nec in alios potestatem à naturâ habent: & ideò multitudini huic nihil conferunt. & si conferrent, à Deo respublica immediatè non haberet eandem. Satuiunt: *Potestatem ferendi leges non modo à Deo esse, sed etiam immediatè proficisci. Nō esse potestatem, nisi à Deo. Id vero indicare, tum alios actus, tum verò punitionē, quæ est corporū, præcipuè mortis, quæ homini non possit, nisi à Deo concedi.* Quæ si vera sunt, sicuti verissima, deleamus illa, quod potestas ex naturâ rei totâ sit in communitate primò & immediatè. Divellendæ sunt tam repugnantes invicē, & contrariæ sententiæ, ne commissæ altera alterâ perimat. Si tota potestas est à multitudine, non debet legū ferendarū

jus

jus immediate Deo adscribi, quod partem constituit Majestatis. Sin adscribitur Deo legum potestas: multitudini immediate non erit tribuenda. Probatio adjecta plura includit, maxime potestatem in caput subditi; quæ fundamentum est omnium jurium Majestatis, & facit, ut reliquæ suo modo se habeant; quæ ab hoc fonte congruâ derivatione descendunt, & quasi compendio includuntur. (Et nimis audacter vocabulo *naturaliter*, *naturalis affectionis* & *proprietas* abutuntur. Multitudo non est subiectum naturale: & ideo naturales affectiones habere nequit. Recensuissent illas naturales affectiones in Politicis, & materiam refutandi haberemus: nunc, quia satis habent, inani sono decepisse lectorem, nobis quoque abundè erit, errorem indicasse. Si declarasset CONZEN, quare non possint impedire coeuntes in corpus politicum, quo minus sit illa potestas inter illos; pluribus in ea pugnaremus.

XIX. Recentior illa explicatio est, quæ totam rem ad voluntatem, & spontaneum subjectionis pactum devolvit. Accipit civilem facultatem princeps *ab ipsa Republicâ, seu toto cœtu civitatis, in certum ordinem coeunte*. non quasi ante ordinatam per principem rempublicam, apud populum resederit, & nunc collata imperatori cesserit: sed quia tota multitudo ejus arbitrio se permisit, *Et certo pacto sub potestatem, sive unius, sive plurium, ultrò concessit. Res tota est voluntatis, Et voluntarii pacti*. Sic uxor, quæ non habet potestatem maritalem, illam marito in se concedit: milites imperium, quo ipsi

non

non armantur, duci committunt. Liber antea erat populus ab omni superioris imperio: sed ultro concedit in obsequium principis, cui jus supremum sic permittit, ut neminem agnoscat superiorem. Idem docet THOMAS HOBBS in suis Politicis. Homines *hostilis* violentiæ metu cogi in civitates, & ut propria sit ac constans quies, Consilio alicui, seu Senatoribus, de re communi consultantibus, vel uni alicui deferre omnem potestatem de Republicâ statuendi. Illam potestatem pacto acquiri scribit, dum singuli voluntatem suam submittunt universæ Societati, aut eminentibus illis Senatoribus, aut denique Principi: & illud agunt, ut habeat vim cogen-tem in singulos, qui voluntatem suam expresso consensu & pacto subjecerunt, ut nolint aliter velle, ac superior jusserit. Plausibilis prima fronte hæc est sententia; sed quam admittat ille, cui integrum est, speciosa pro veris atque compertis agnoscere. Perniciosa enim eadem deprehenditur, si penitus introspiciatur. Scilicet hoc ipsum est, quod seditiosam plebem pestilentissimo instrumento armat, ut quoties displicuerit rex, aut subjectionis aliqua conditio cessaverit, mutet voluntatem, & illum deponat solio. Immobile fundamentum est, posse dissolvi vinculum, quod libera voluntas colligabat sola, quoties ex alterâ paciscentium parte aliquid fuerit non impletum. Quicquid enim solo pacto colligatur, si altera pars contrahens, promissis non stet; altera impune solvetur obligatione. Ideoque si Princeps contra subditorum utilitatem aliquid designaret, cessaret

sensus subditorum : & necessario aliud principium quærendum, cum bello subjugantur subditi ; aut paterno folio infidet hæres. Dubium hoc reddidit *Adamum Conzen*, qui cogeatur priorem casum excipere , licet per quandam naturæ necessitatem, populum auctorem Majestatis asseruisset. *Quod si tamen Regem revelatione, & jussu suo Deus constituat, aut legitime aliquam Rempublicam Rex quispiam bello subdiderit, potestatem à populo non dicetur habere.* Lib. v. Polit. c. viii. §. 5.

XX. Majorem applausum mereri videtur assertum, collationem Majestatis tribuens homini, qui habens verum imperium, hoc in alium transfert. Cujus exempla haberi queunt, quoties Imperator Romanus Reges creat, Vasallos regio titulo ornat, aut plane dimittit à sua potestate. Item quando filium successorem declarat, eidem vivus regnum tradit : tum quando Politia mutatur in Monarchiam. Qui Romanæ Reipublicæ formam describunt, & Imperatorum potestates tradunt, unanimi asseveratione Cæsari jus creandi Reges adsignant. Quod de regno Daniæ, Bohemiæq; testantur Scriptores laudati Dn. CARPZOVIO, in *Comment. de Lege Regia Germanorum*, Cap. III. Sect. XIII. n. 13. Et Dn. LIMNÆO, in *Jure Publico*, Lib. II. cap. ix. n. 18. De Regibus Cypri & Armeniæ, coronatis ab Imperatore Germanorum, Henrico VI. ex *Arnoldo Lybecensi* aliqua annotavit celeberrimus CONRINGIUS, cap. xvi. de *Finib. Imper. Germ.* p. m. 304. Nemo negaverit, Imperatorem habuisse Majestatem : & coronasse

H

hos

hos , illis honores regios circumfudisse , historia loquitur. quare dicendum pariter videtur, ab Imperatore collatam fuisse Majestatem. Et occurrunt antiquæ Romanæ exempla Reipublicæ, quæ sceptræ & diademata dono mittebat Regibus , quoties iisdem potestatem regiam confirmabat. Verùm dicta exempla non admittunt regulam unam. Diversum à reliquis judicium postulat coronatio Regis Cyprii & Armenii. Jam ante in suis regnis erant constituti ac confirmati à Deo , & obtinebant adeò imperium, non demum à Cæsare impetrandum. Expetierunt tamen coronationem, non ut acquirerent Majestatem : sed cum consequerentur honorem; Imperatorum judicio se dignos æstimatos fuisse, qui regnarent. Approbatio igitur potius honorifica & benevola, quam collatio hîc apparet: aut intelligitur simul quæsitum arctioris societatis vinculum; quod *Clientela* sub occidentali Imperio mentio fiat. Quod si aliquid præstitæ benevolentiaæ reposuerunt, cultus id fuit, quo solemus potentiores socios prosequi: aut observantia, quâ inæquali fœdere comprehensi superioris Majestatem comiter habent. Nam de verâ subjectione, & ejus effectibus, omnino tacent rerum conditores. Nec Coronatio sola imperium confert: aliàs Pontifex Romanus, pristinis temporibus diadema imponens Cæsari, & nunc sive Moguntinus, sive Coloniensis Elector, causæ Majestatis haberentur. Coronatur Galliarum Rex ab Episcopo Rhemeni: & tamen cum immediatè à Deo habere

bere potestatem, regni comitiis decisum est. In reliquis ad varias circumstantias acriter intendendus animus, & facilè patebit, à rebus distinguenda nomina esse. Regum Bohemiæ conditio, qualis tum temporis fuit, quando ab Imperatore conferebatur titulus, satis convincit, non habuisse eos Majestatem, ac proinde nec posse auctorem laudare hominem. Milites erant, seu Vasalli Imperii, cò ipso, quo Bohemiæ Reges. in vulgus autem notum est, militem, seu Vasallum, qua talem, non obtinere Majestatem. Regii nominis axioma, ob virtutis excellentiam, & meritum concessum, mutabat quidem appellationem, non pristinum obsequium. Neque enim alii finitabat id ipsum munus, quam ut conspectiores reliquis principibus, & digniores haberentur: non ut subtraherent se Imperatoris arbitrio. Sentiunt aliquando honorum incrementum homines, nullâ potentiæ majoris accessione. Ita in Romanorum liberâ Republicâ Princeps Senatûs dicebatur; non aliâ prærogativâ reliquos Senatores præcedens, quam primæ sententiæ declaratione. Adhæc subjectionem dictorum Regum evincebant plura. Ipsa ditionum, quibus præfecti hi tales, inauguratio, impetranda à Cæsaribus erat. Tabulæ FRIDERICI II. Cæsaris, anno MCCXII. exarata, disertè cavent: *Quicumque ab ipsis in Regem electus fuerit, ad Imperatorem accedat, Regalia debito modo recepturus.* Quotiescunque etiam comitia Imperii fuerunt instituta Bambergæ, Noribergæ, & Mers-

burgi, Reges teneri in curiâ comparere, si vocentur: trecentos itidem cataphractos submitti à Regibus debere Romam; coronæ Cæsareæ causâ profecturis electis Imperatoribus, observat Cl. CONRINGIUS. *de Fin. cap. xix.* Quæ omnia satis testantur, talium regum conditionem eandem fuisse cum reliquorum Ducum ac Principum, majestatem non habentium, & Imperatori subditorum. Ex GOLDASTO discere est, Tom. I. Const. Imp. p. 305. Imperialia testari diplomata, Fridericum II. de consilio Principum, Ducatum Austriæ & Stiriae, cum pertinentiis, effecisse regnum. Cessare tamen iterum potuit ea dignitas, ut Principes Austriæ hodiè Archiducum nomine veniant, non Regum. Eandem sortem Danos mansisse, quæ Bohemicorum fuit, tradit laudatus ille CONRINGIUS. Postquam enim *Henricus Auceps* regem *Worm* (aliis *Wurmo*, seu *Gormo*, item *Grom* dicitur) profligasset, & *Otto Haraldum* devicisset, imperata tum facere, & regnum à Germanis suscipere coacti fuere Daniæ Reges. Quamvis etiam id jugum, sive *Suenone* potito rerum excussum; sive à *Cunrado* Cæsare remissum sit *Canuto*: imposuit id ipsum tamen iterum *Lotharius Nicolao*, & filio ejus *Magno*; quem in gratiam eâ conditione recepit, si *Romani Imperii militem* ageret. Ipse FRIDERICUS ad *Ottonem Trisingensem* scribit: *Rex Danorum Petrus* (quem *Suenonem* Historiæ gentis nominant) *ad curiam nostram vocatus venit, ac hominio ac fidelitate nobis facta, coronam regni*
de

de manu nostra suscepit. De Evocatione pluribus agit OTTO FRISINGENSIS, lib. II. c. v. *de reb. gest. Frider.* & GUNTHERUS, lib. I. *Ligur.* Ex quibus facile arbitrari possumus, creatum à Cæsare regem, nomen quidem, non rem tenuisse. Longè abest à Majestate Regiâ, evocari posse ab alio, ejus judicio & sententiæ se submittere, hominum & fidelitatem jurare. Dum igitur in his Regibus Vassallis Majestas non invenitur, Cæsares conferentes nomen regum, Majestatis Causa nunquam æstimandi sunt. Interim non negamus posse Majestatem ab Imperatore, aut Rege, militi, seu Vassallo, non habenti, reverâ per coronationem permitti. Tali quidem modo, si conferatur, aut permittatur regius titulus; si vassallus reliquis solemnibus imperii insignibus decoretur, & superioris dominio tandem solvatur. Ita dicendum est, *Canutum*, Daniæ Regem, qui ex Antecessorum conditione obnoxius erat Imperio, beneficio Cæsareo, subjectionis nexu solutum, liberam accepisse Majestatem. Consequabatur enim absolutum imperii Danici regimen, postquam potestate Cæsaris esset liberatus. Omnia tum remittebantur tributa, omnia onera, præstanda imperio in signum obedientiæ. Ipsa illa firmata jurejurando fidelitas & hominum, exhibendum Imperatori, condonabatur: atque adeo Canutus, dimissus ex potestate Imperii, sui que juris redditus, subditos, non ad provocationem alterius, sed proprium arbitrium regens, illibatam Majestatem consequabatur. Ut causam

tamen Majestatis, exferentis se in rege, statuamus Cæsarem; nulla ratio sufficienter concludit. Licet Imperator se non exuat omni sibi propriâ potestate, eousq; tamen potentiam suam deminuit, quatenus coarctatur territorii amplitudo, & egregia pars subditorum recedit. Hos eâ conditione dimittit ex suâ manu, ut præposito novo Principi subjiciantur. Qui majestatem quidem nanciscitur beneficio cessionis & dimissionis: non tamen vel cessio, vel cedens acceptæ majestatis causa est. Cæsar tantum in hoc negotio operatur, quantum in ejus manu est. Expedit Militem suum vinculis pristinae obedientiae, quibus illigatur: quo ipso subditus nihil consequitur amplius, quam libertatem & immunitatem ab operis, præstari solitis superiori. Nihilo tamen minus accipit eò ipso Majestatem Vasallus, dum alterius arbitrio subtrahitur, Rex salutatur, & in terris sublimiorem non agnoscit. Solutio hæc & cessio, modus est congruus atque aptus, consequendi imperium. Et absurdum haud putaverim, qui ejusmodi negotium inter Electionis nomina reponeret. Liberantur inferiores subditi à Jurisdictione dimittentis, sub hac lege, ut pareant recens electo Principi, quem Majestas designat, & talem publicè proclamat. Illud quippe videtur necessum, quoties Vasallo permittitur regnum, ut vel consentiant subditi, obtemperaturi novo Principi, aut Majestas dimittens Vasallum, provinciam absolutâ potestate, quoad determinandum successorē, regat. Quæ sanè omnia electionis naturam sapiunt.

XX.E-

XXI. Evidentior videtur Majestatis collatio, quoties popularis status, in Monarchicum vertit. Quando *Julio*, quando *Augusto*, permittitur rei Romanę summa: *Et ei, Et in eum omnis populi potestas confertur*. Causſa Majestatis Monarchicę videtur populus transſcens. Non jam negabimus populari Statui Majestatem: quod ipsum dubium præſens ſtatim tolleretur: ſed concedemus vel ex abundanti, ut excuſemus formulam loquendi, tot ſcripto-ribus uſitatam; *translatam eandem Majestatem, quam habuit populus, in electum principem*. Dicamus licet, Principem accipere omnia jura potestatis ſupremę, quę exercebat antea civitas: nihil quicquam tamen efficitur inde magis, quàm populum translationis auctorem eſſe, non imperii. Non ſtatim aliquis cauſſa eſt rei, quam tranſfert. Manet enim hęc idem Majestatis tranſlatę conditor, qui primus erat ejusdem parens, quum populo concederetur. Verum translationem nullam populo largimur: à Deo potius immediatam traditionem proficiſci dicimus, quando in Monarchiam mutatur popularis cœtus. Non ſine urgentiſſimâ cauſſa ea converſio locum invenit. Ex ſuo ingenio ambitioſum vulgus eſt: & quicquid publici regiminis confequitur, tenaciſſimâ contentione retinet. At ubi civilis domeſticique belli, aut ſeditionis peſtis graſſatur, aliave externa viſ atque tempeſtas, ruinam civitati minitans, ingruit; cui declinandę non ſufficiunt vulgares Magiſtratus, nec aliud in manibus eſt, quod ſartam & te-

etiam societatem præstet : cedit pristinâ administratione multitudo, & abdicat se regimine, alii designato conferendo. Hæc cessio, hæc abdicatio, non est novæ Majestatis causa, sed possessi regiminis renunciatio, atque exclusio : multum operatura, si sistat personam aliam, capacem imperii, cœlitus dandi. Non tam verba Auctorum attendenda, quam ipsa natura Rei. Non prius confertur imperium in Monarcham, quam ubi se abdicaverit suo jure Multitudo : eo ipso momento, quo se abdicat, imperium non habet, & ideò non transfert ; sed eligit, qui à Deo accipiens potestatem, impofterum regnet. Eadem respondendi ratio locum invenit, in successoris denominatione, cum omnimodâ abdicatione : quoties Princeps vivus successorem constituit, & imperium eidem tradit. Quod Davidem fecisse Sacræ litteræ asserunt : & in Carolo V. tradente Philippo omnes ditiones Hispanicas, Ferdinando autem Imperium Romanum, observant Auctores. De quo negotio ita censendum. Provinciarum imperia abdicantur, jurata fides remittitur populis, ipsa Majestas ad primum auctorem redit. reducenda iterum, & communicanda designato heredi, electo ad hoc ipsum, illâ cessione & denominatione. Illustria sunt, & apprimè faciunt ad hujus loci declarationem, quæ DIDACUS SAAVEDRA scribit, in *Idea Principis Christiano-Politici*. Symb. XIX. *Tametsi ista regnorum faces communiter à Parentibus ad liberos transeant, illud tamen reges semper meminerint, à Deo se accepisse*

cepisse, eidemque suo tempore restituere debere, ut norint, cui acceptas eas referre debeant, & quam stricta de iis reddenda sit ratio. Itafecit Rex Ferdinandus, cognomento Magnus (Maria-na Hist. Hispanic. ix. 6.) qui sub extremum vita spiritum, sic Deum fertur allocutus: Tua Domine est potestas, tuum est imperium. Tu supremus es dominus super omnes reges, & omnia tuæ subsunt providentiæ. Regnum quod de manu tuâ accepi, tibi restituo. Tori-dem penè verbis in eodem mortis articulo, usus est alius rex Ferdinandus, quem Sanctum cognominant. Preclare Patres Concilii Parisiensis, l. 2. c. 5. Nemo regum à progenitoribus regnum sibi administrari, sed à Deo veraciter atque humiliter credere debet dari. Hi vero, qui à progenitoribus sibi succedere regnum terrenum & non potius à Deo dari, putant, illis aptatur, quod Dominus per Prophetam improbat, dicens: Ipsi regnaverunt, & non ex me, Principes extiterunt, & non cognovi. Ignorare quippe Dei, proculdubio reprobare est. Quapropter quisquis ceteris mortalibus temporaliter imperat, non ab hominibus, sed à Deo regnum sibi commissum credat.

C A P U T I I.

D E

IMPERIO IN PERSONAM.

I. Iura Majestatis non sunt divisibilia.

II. Contextus jurium Majestatis.

III. Imperium in Personam.

H 5

IV. B

IV. *Est fundamentum Legislationis.*

V. *Ius divinum Necessarium, & Positivum.*

VI. *Ius Gentium.*

VII. *Ius civile est huius loci.*

VIII. *Legum distinctiones.*

IX. *Potestas Legumlatoria quanta.*

X. *Princeps nec naturali, nec divino universali, nec gentium jure solutus est.*

XI. *Sed civili tantum.*

XII. *Iurisdictio.*

XIII. *Extrema provocatio, Evocatio.*

XIV. *Comitiorum, & conciliorum coactio.*

XV. *Munerum onerosorum impositio.*

XVI. *Deductio in hostem.*

XVII. *Obsidum datio.*

XVIII. *Deditio nocentis.*

XIX. *Innocens dedi nequit.*

XX. *An tradi possit in matrimonium.*

XXI. *Talium fundamentum non est ordo Reip.*



Extrinscū illud & summum Principium, quod Majestatis naturam producit, contemplati sumus hactenus: nunc porro nos penetrabimus in intimiora, quæ summi imperii essentiam absolvunt. JURA MAJESTATIS vocant communiter: quod nomen congruè retinemus; modò per *Ius* intelligamus *Potestatem* aliquam, in suo ordine summam, & *facultatem imperativam*. Nam qui JURA MAJESTATIS aliter conciperet, vocabuli sono in moralem, legum & Juris doctrinam abreptus, vehementer erraret, & diver-

diversissima opera indignè misceret. Jus igitur Majestatis perpetuò nobis potestatem aliquam summi imperii notabit. Et quamvis subinde *partes* vocentur *Majestatis*; id tamen idè haud contingit, quasi Majestas aliquod totum essentiale, aut quantitativum sit, cujus distincta membra, & invicem conjunctæ atque conglutinatæ partes reperiantur: sed potius, ut distinctius saltem caperemus diversas operationes, quæ ab una essentia Majestatis procedunt. Hæc enim civilis potestas simplicissimam naturam habet, & longissimè remotam à tam crassâ compositione, ut in distinctas, & separatas invicem portiones, scindi queat. Indissolubile suâ naturâ imperium est, & divisionis nescius contextus: nos mentali operâ unam eandemque rem, propter variam efficaciam, aliter atque aliter concipimus, & delineamus. Plures virtutes eminenti compendio Majestas complectitur: quas ubi in plura subjecta diffundit, alia sortiuntur nomina, cum tamen eandem ipsissimam facultatem designent. Similitudine liceat uti. Solis idem radius, & illuminat aërem, & calore viventia animat atque vegetat, humida exsiccat, duriora quædam liquefacit, pro capacitate & conditione scilicet objecti, in quod operatur. Non tamen propterea solis radium ex tot partibus componimus. Ut propius accedamus, consideremus Divinum imperium, cujus soboles Majestas est: extenditur illud sane in plura, cum in Majestatem ipsam humanam validum sit; & universos homines, in

tot rebuspublicis, multiplici ratione gubernet: nullas interim constituimus partes, ex quibus coadunetur. Nullum jus Majestatis numerabis, quod Deo excellentiori modò non affideat: absurdissimus autem fueris, si ex his juribus, tanquam partibus, fabricare volueris aliquod totum imperium. Imitatur hanc indivisibilem naturam Majestas, & natales suos refert sincerè: ac propter operationem in diversum objectum, diversum sortitur nomen; suâ essentiâ una & indivisibilis.

II. Quousque se porrigat *vis* Majestatis, cognoscemus haud melius, quam si revocemus in mentem illa, quæ de *Causâ Majestatis* dicta sunt. Hoc enim fundamentum est omnis civilis imperii. Scilicet Deus Opt. Max. ubi per suam omnipotentiam, cuncta visibilia & invisibilia creasset, continuò imperium atque dominium supremum in hæc sua creata habebat, & secundum placitum regebat ac disponebat singula, tum universa. In hominem, natura rationali præditum, competeat *imperium*, propriè dictum: obligans Adamum ad exsequendas leges, à Deo præscriptas. In reliqua animata & inanimata *Dominium* se exserebat: cujus vigore liberrimæ dispositioni creatoris relinquebantur. Imo in universum hoc pertinebat Regimè, & Dispositio generalis, quæ seriè totius tam concinnè temperabat, ut singulis benè esset, Consequabatur itaque creationis omnipotentiam, triplex (pro conceptu nostro potestas) *Dominium* in res irrationales; *Imperium* in hominè; *Regimen* universi. Ex singulari bene-

benevolentia creato homini concedebatur dominium in res fungibiles: ut iisdem ad vitæ commoditatem uteretur. Postmodum Adamo concessum est imperium in Evam: quæ deficiendo à Deo, & transgrediendo ejus præcepta, hanc quoque pœnam promerebatur, ut subjiceretur viro. Quum verò post diluvianis temporibus augeretur subito humanum genus, & in familiam quidem Patris imperium valeret; in ipsos autem familiarum Principes, ac universam multitudinem, regimen nullum competeret: magnificentior introducta est à Deo potestas, quæ terminos gentibus assignatos, ad modum universi, tanquam orbem quendam terrarum particularem, veluti Numen aliquod gubernaret. Introduxit quippe Reges, qui divinas subirent vices, & in designatam regionem, & commissum populum haberent jura, exercerentque, tanquam in sphaeram suæ civilis activitatis. Huic Vicario, & Pro-Deo, in partialem orbem facultatem attribuit similem illi, quam ipse habet in universum mundum. Cujus beneficio consequitur Princeps universæ Reipublicæ Regimen, Imperium in hominem, & Dominium in regionem subjectam, seu Territorium. His enim absolvitur in se augusta Majestas: quæ dum omnia posse debet in civitate, tria illa necessario completitur. Repetenda sunt, quæ in doctrina de Causâ Majestatis diximus; eo ipso dum Princeps Vicarius Dei est, tantum potest in civilibus dependenter, quantum Deus independent-

ter

ter in universo potest. Ut autem melius perspectam habeamus summi Imperii civilis indolem, in operationes excellentissimas descendemus: pro numero quarum diverso, distinctas concipiemus potestates. sed eâ lege, ut unam & indivisibilem Majestatem cogitemus, cujus virtutes, tanquam diversæ partes, cognitionis causâ, interim proponuntur. Cognoscimus autem operationes illas, quando Majestatem vel *IN SE*, & *ABSOLUTE* concipimus; vel in aliquali *COMMUNICATIONE*. *IN SE* considerata Majestas, continet omnia, quæ summum in civitatem imperium exprimere queunt. Hoc imperium respicit & universam Rempublicâ, & Partes singulares, imperanti subjectas. Neq; enim aliter fieri potest, ut universitas aliqua regimini sublit, quam si partes singulæ imperanti pareant. De *contextu* igitur, seu *coherentia* Jurium Majestaticorum ita censendum est. Majestas primariâ notionem, nihil aliud notat, quam *Imperium in caput civium*. Quatenus enim in caput & personam civium efficax est, eosdemque justis suis mandatis obligare potest, propriè dicitur Imperium. Hinc proximè surgit *LEGISLATORIA*. Propter imperium validæ sunt quælibet Leges civiles. Nisi caput pareret Majestati, frustra sancirentur jura. quare extra subjectionem viventi, obligationem nullam injungit lex. Quod si non obtemperet legibus subditus, præsto est Principis *JURISDICTIO*, quæ immorigerum civem judicat, damnat, castigat. Eidem Jurisdictioni adhuc subjacet, quam-

quamvis ab inferiori iudice fuerit dimissus. nam si fuerit iniquè iudicatum, PROVOCATIONI locus est. Surgunt ex hac potestate in Caput, seu Imperio in personam, complura, quæ dispersa hinc inde sunt in aliis iuribus; puta *comitia cogere, concilia vocare*. Hæc enim congregatio illi propria est, qui vocandi hominis caput regit. Ita cogi potest subditus, ut in hostem tendat, & periculosum in acie locum occupet; ut *Obses* proficiscatur, aut *Legatus*, ad gentem minus inoratum; ut nocens dedatur hostibus. Verbo; huius potestatis vigore imperari possunt omnes actiones, licet cum presenti periculo conjunctæ: modò in felicitate sint, & contra divina jura non impingant. Hoc imperium in personam ordinariè consequitur DOMINIUM, in bona publica atque privata. Duplex hoc est, alterum in Territorium publicum, & ejus proventus publicos; in subditorum res alterum dirigitur. Prius communiter *Fisci* nomine, & *Patrimonii* Principis indigitant. quò pertinent *Via, & Agri publici, Flumina, Fodina, Foresti jus, & omnis generis Venationes*; item, quæ ratione publicorum itinerum accedunt *Vectigalia*: & quæcunque res privatorum possessioni non sunt permittæ. Posterius vocamus *Dominium Eminens*: quod datur in res, quæ privatis possessoribus adscriptæ, & vulgari dominio adjudicatæ sunt. Nam quum Dominium privatum aliqua potestas sit: non aliter datur in Republicâ, quàm cum subordinatione, qua locatur sub Dominium Eminens. ne scilicet fingamus potestatem ullam,

lam, Majestati non subditam: aut heterogeneas causas effectis politicis assignemus. Domini Eminentis extraordinaria operatio est *privatarum opum occupatio*: ordinaria, est *ex-actio tributorum*, quocunque nomine veniant; tum quælibet de dominio privato acquirendo, retinendo, amittendove dispositio. Postquã ita in singulorum civium personam ac bona Majestas potens est, non potest non complecti *universa Reipublicæ Regimen*. nam qui singulis, & omnibus perfectè imperat; universum cœtum proculdubio regit. Quatenus autem in universam civitatē fertur Majestas, complectitur illa jura, quæ communiter omnium regimen, & vel *utilia*, vel *necessaria* promovent. Utilia publicè vix sub certam classem vocabuntur: quod pro diversitate populorū, & ingeniorum differentiâ, alia atque alia sint. Sub exempli tamen ratione hic nominarem *Annonæ provisionem*, *Cursus publicos*, *Nundinas*. quod potestas in hæc talia oriatur, ex regimine in universam publicam rem. Quocunque alio nomine promoveri egregium publicum posset, sub hac dispositione utilitatis continerem. Maxime autem necessaria & conspicua est universi dispositio, *Sacrorum*, *Belli*, *Pacis*, *Fœderum* jure ordinata. Hæc enim universam civitatem respiciunt, & ex regimine universali palā procedunt. Majestatis munus est, de quacunque re sacra, ad ductum divinæ normæ, leges ferre, Religionem, & verum cultum Dei ordinare; Bellum gerere; Pacem, ac Fœdera sancire: quatenus eidem integræ civitatis gubernaculum com-

competit. His præcipuis juribus tota machina civilis movetur. quæ Motio præterquam Motori summo civitatis, nemini permittenda est. Ea deinde urget necessitas, ut actu de his ipse Princeps constituat; & nullo modo alteri permittat eorundem Sanctionem. Piora ista, utilia, negligētior aliquis rex insuper habebit: hæc Necessaria, nisi Rempublicam perditam velit, neutiquā juxta æstimabit. Hæc tanta comprehendit Majestas in se considerata. Id præterea habet commune cum divino Regimine, ut se pluribus modis cōmunicet subditis: quatenus hi communicandæ rei capaces sūt. Fit hoc quoad *Dominiū*, quando singulis privatis rerū dominia permittuntur, Modi acquirendi à Majestate præscribuntur, & in cōmunes usus Mone- ta expenditur. Deinde cum Majestati summa dignitas adhæreat; per hanc confert omnivarios gradus *Nobilitatis*. Præcipuū vero est, quod imperiū aliquod producit in suis, dum *Magistratus* instruit potestate, ad exercenda & expedienda jura, quibus omnibus pertractandis haud sufficit Princeps. Tandem quoad potestatem & dignitatem simul sese effigiat Majestas in *Legato*: qui Principem ubique, apud amicos & hostes, eximio invento politico exhibet. Nunc singula, qualia sint, separatim examinabimus.

III. IMPERIUM est potestas in caput, seu personam subditi, cujus vigore Princeps injungere potest subdito quacunque non illicita; & refractarium, & negantem obsequia duriori modo coercere: & pro qualitate ac conditione peccati ultimo supplicio afficere. In eo quippe imperiorum

periorum vis & substantia posita est, ut personam subjectam ad quælibet justa, sub poenâ mortis, possint obligare. *Ius vitæ ac necis* vulgò nominant: in quolibet imperio repertum. Observamus enim, potestatem hanc naturalem esse omnibus imperiis. Supra vidimus, imperium maritalis, paternum, herile, includere facultatem in caput uxoris, filii, servi. Cum autem civile & Majestaticum imperium omnes has potestates complectatur & superet: vero consonum est, in eò multo magis hoc jus latere. Quisquis contra senserit, experimentum ipse capiat, scrutando naturam imperiorum: re ipsâ docebitur, omnem efficaciam, & animam imperiorum extinguere, si potestatem in caput, quæ jus vitæ ac necis complectitur, removeat. Fieri nullo potest modo, ut intelligatur imperium, sine facultate coactivâ, quæ potestatem in personam notat. Omnis enim imperii virtus in eo consistit, ut compellatur subditus, si imperanti non fuerit dicto audiens. Tollatur hæc compulsio: inane nomen erit imperium. Quin istud semel observamus, vix ullum jus Majestatis reperiri, quod vim suam non mutuetur tandem à Potestate in caput subditi: quæ adeò per reliqua est dispersa, ut separari inde haud possit. Frustra leges promulgarentur, nisi esset subditum caput, quod easdem observaret. Idem circa alia, etiam universalia jura observandum, quibus nunquam non hoc fundamentum opitulatur.

IV. Principium ergo omnium jurium, quæ
in

in Rempubl. valent, est jus, seu potestas in caput subditi. Cui innititur omnis NOMOTHE-
SIA; tum specialis, quæ personam & actiones subditi concernit, & mores disponit, ac definitè in subditum directæ est: tum generalis, de quacunque civili re aliâ. Nisi enim obnoxium foret caput parentis imperio Superioris; nunquam hic constitutionibus suis & sanctionibus illud sibi devinciret. Hinc enim profluunt omnes leges, quæ subditum ligant, ut aliquid faciat, vel omittat. Maximè circa res suâ natura indifferentes: quæ sine præcepto Majestatis, nec in bonum, nec in malum morale feruntur. Quale illud interdictum Salomonis, ne Simeï transfiret torrentem Kydron, nisi ultimo supplicio vellet affici. Cui affinis est vetita transcensio murorum; apud Romanos, Germanos, & alias plerasque gentes, capitali puniri solita judicio. Ea indoles est hujus juris, ut res intrinsecè non malæ, sub pœnâ capitalis supplicii possint prohiberi. Plurima exempla in Romanarum legum corpore occurrunt, quæ hunc fontem agnoscunt: & modò habitum vestimentorum determinant, modò definiunt mores, aut conventiones civium limitant, sive quascunque tandem operationes ordinant. Omnium ac singularum auctoritas proficiscitur à Potestate in caput: cujus virtute voluntas subditi, quæ causâ est actionum civilium, aliarumque liberarum, regitur ad arbitrium Imperantis: & nisi obediat, animadversioni ejusdem subjacet. Non obiter, sed attentâ accuratione exaudienda sunt

sunt

sunt verba Supremi Numinis, usurpata in formulâ, quâ Imperium in Evam Adamo assignatur; ubi signanter *Evæ voluntas marito subjicitur*. Quod omni imperio est naturale & perpetuum. Justum commentarium impleremus, si, quousque se Nomothesia in animi subditi bona exserat, & omnes effectus alios hujus potestatis, sigillatim vellemus persequi. Primū locum sibi vendicat hæc facultas: quod videatur omnia reliqua jura ambitu suo completi. Omne enim Principis verbum, legem ferè censendum esse, benè intellexit, quisquis dixit; Legis vigorem in civilibus obtinere, *quicquid Principi placuit*. Confusionis tamē vitæ causâ, Nomothesiā ab aliis Iuribus separabimus: cujus contemplabimur *Objectum*, & *Potestatem ipsam*. Objectum Legislatoriæ est *Lex*, seu *Ius*: de cujus indole, cum diversa genera legū aliàs contineat, non inutili, nec intempestiva, credo, digressionem impræsentiarum dispiciemus.

V. In genere dicimus, *Ius esse regulam actuum moralium, obligantem ad id quod justum est*. *Obligatio* essentialis quid Legis est, & hæc actiones diriguntur, quæ expressè mandatæ, vel prohibitæ sunt. Nam *Consilia*, & *Permissiones*, quia in utramque partem propendent, nec obligationem inducunt, nec regulæ necessariæ ac cogentis vices sustinent, hîc non attendimus. Dividimus *Ius* in *DIVINUM*, & *HUMANUM*. *DIVINUM* vocamus, quod auctorem habet Deum. Estque vel *Necessarium*, vel *Voluntarium*: illud *Naturale*; hoc *Divinum* in specie, seu *positivum* salutatur. *HUMANUM* respicit vel
Gentes

Gentes universas, invicem sibi obligatas; dicitur Ius GENTIUM. vel certum populū, superioris legibus devinctum; dicitur Ius CIVILE, quod huius loci est. *Ius Divinū Necessarium, seu Naturale, est habitus connatus, suggerens principia practica, quæ actum moralem honestum præcipiunt, turpem vetant.* Satis accuratè CICERO. L. I. de LL. *Lex est ratio summa, insita in naturā, quæ jubet ea, quæ faciendā sunt, prohibet quæ contraria.* Non erraverit, qui dictamen illud recte rationis, particulam quandam, & reliquias imaginis divine dixerit. Sanctitas enim divina sui imaginem & effigiem imprimit humanis mentibus: & benevolā indulgentiā illā largitur intellectui nostro regulam, quam sibi præstat ipsa. Quare & *Sanctitatis Divinae idea*, non absurdè appellabitur. Unde facile patet, subjectū Iuris Naturalis non esse nisi naturam intelligentem; aptā natā participare expressum sanctissimæ Legis instar. de quo jam alibi prolixè. Huius Legis duo sunt præcipua attributa, *Immutabilitas, & Evidentia.* Hac in eo posita est, ut perceptis saltē terminis, sine præviā ratiocinatione, assentiatur animus affirmanti: aut quærenti respondeat, sine hallucinatione, in alteram contradictionis partē inclinans. Unde colligitur; ea nō esse juris naturalis, quæ per impeditas & difficiles conclusiones demū rationi recte conformantur. Cautè tamē hīc versandum est, ne consuetudinē pro naturali iudicio acceptantes, decipiamur. *Immutabilitas* alterum indicium huius Juris. Cum enim Recta ratio, quam Naturale Jus, vel includit, vel ingreditur, originem suam cœlitus agnoscat,

&

& ad Divinam Justitiam referat; hæc verò immutabilis sit: necessum est, imaginem & instar ad sui prototypi rationem accedere. Secus enim contradictorium quid à Deo sanciretur, & Divina Justitia atque Sanctitas, variationem in pejus ac iniquum pateretur. *Ius Divinum Voluntarium*, seu Positivum est, quod Deus Israëlitis dedit observandum, & in Sacris Litteris consignatum est. Hoc naturalibus præceptis contradistinctum, commodè distribuitur in *Forense*, & *Ceremoniale*. Quorum illud in judiciorum forma, actionum civilium moderamine, poenarum irrogatione, & similibus politicis negotiis consistit: hoc in Sacris, sacerdotiis, victimis, & quæ typum aliquem venturi Messie prælucebant, occupatur. Quod hodie, præsentī corpore, antiquatum est: cum isti adhuc locus in judiciis nostris & Rebus publicis pateat.

VI. Jus Gentium similiter à ratione naturali inter omnes gentes constitutum esse dicitur. eò discrimine; quòd jus naturale in simplici, & apertâ justī notitiâ consistat: Jus Gentium circa negotia, jure naturali non determinata, cum discursu, & quadam disputatione versetur, & per præmissas inferat aliquam conclusionem. Sed non satis explicant objectum hujus Legis, qualia sint illa Negotia, jure naturali non determinata. Nec enim omnia huc trahenda erant. Et quæ naturalis ratio colligit, cum ex principio aliquo, & præcepto Juris naturalis deducantur, Conclusiones sunt Juris naturalis, non statim objectum
Juris

Juris Gentium. Cæterum circa obligationis causam variè disputatur apud Doctores. Plerique Jus Gentium à Consensu populorum & ortum, & vim obligandi accepisse, tradunt. Sed cum interim non ab omnibus observari cernerent, moratiores saltè constituunt causam hujus juris, quorum præsumitur consensus. Quare GROTIUS putabat, *in una parte orbis terrarum frequentari jus Gentium*, lib. I. c. I. n. XIV. d. J. B. & P. *quod alibi non est usitatum. exemplo captivitatæ & postliminii*. Sed hîc præcipimus verbo, quod infra notabimus: *plura dici Juris Gentium, quæ reverà illud non attingunt*. Servitus, Moneta, plurimi Contractuum, ad Jus Gentium vulgò referuntur, quæ nihil de naturâ ejusdem participant. Certum quidem est, Juris Gentium sancita, quadam ratiocinatione confici, & consensu populorum stabiliri: sed illud simul notamus; non omnem statim ratiocinationem, ex principiis naturalibus deductam, Jus Gentium efficere. Poterant aliquæ longius esse petitiæ: poterant non spectare ad societatem populorum. Latet enim ingens ambiguitas in Juris Gentium vocabulo. Significat aliquando id, *quod pluribus populis, ob aliquam commoditatem placuit*; sed non sub formulâ alicujus obligationis. non raro in sensu propriissimo, illud notat, *quod mutuam obligationem complectitur*. Ipsa causâ Obligationis à consensu peti nequit. Consensus enim solus exiguum populis inducit obligationem, quia non est universalis: quia incertum, num plerique consenserint tam arcto

vinculo : quia denique indubitatum , posse mutuo dissensu iterum solvi, quod solo consensu colligatum erat. Sed perpetuitas juris gentium , & obligatio , omnes stringens , inducens observantiam , vel pœnam , fixum aliquid , & mansurum postulat. Putarem igitur, verum , & strictè ac propriè sic dictum Jus Gentium , in eò positum esse , ut gentes obliget singulas , quæ Gens sunt. Sicut Jus Naturale est , quod homines instruit , & dirigit : Jus civile , quod cives , & subditos devincit : ita Jus gentium dicendum erit , quod plures populos in publicis commerciis ligat. Quare non dixerim , *Gentium moratarum solum esse* : cum omnes , etiam barbaras , obstringat. nam si contraveniant illius scitis , subjacebunt pœnæ , quòd contra-jus gentium fecerint. Fundamentum autem obligationis , non quæsi-verim in præsumto consensu populorum , qui incertus & mutabilis : sed in ipso contextu Rerumpublicarum , & Sanctimonia Imperantium ; quæ nec in se , nec in suis temerari debet. Hoc fonte , & bellorum solemnitates , & Legationum jura , & alia , quæ Rempubl. concernunt derivantur. Adeoque Gentium Jus est *regula quadam Actuum publicorum , qui diversis gentibus , quæ gens sunt , intercedunt ; dirigens populorum ad invicem operationes , in communem Iustitiam , & omnium tranquillitatem*. Verùm de his alibi.

VII. Jus CIVILE est *quod Majestas in civitate proprium constituit , prout & conditione Reip.* Cum enim Jus Gentium ad externos spectaret ;

Jus

Jus Naturale verò non sufficeret omnibus actionibus, & negotiis, quæ ingenium humanum adinveniebat: necessario quædam erant instituenda, quæ mores civitatis dirigerent, & utilitatem promoverent. Multa enim incidunt, quæ diversas Sanctiones flagitant. Temporibus, hominumque variis ingeniis servire, vel potius, scienter imperare, planè politicum est. Hæc de Legum, seu Jurium differentia, præmuniendæ cognitioni erant supponenda. Hic potissimum consideramus Leges, ex jure humano merè voluntario, hoc est, civili natas. Naturales huc non pertinere; satis certum est. Gentium Jus non subjacet Majestatis arbitrio: nisi quando improprie dicitur. Remanent igitur leges civiles, quæ de talibus constituunt rebus, quarum natura indifferens est: hoc est, quæ neque justæ, neque injustæ intrinsecè sunt; sed post legem latam ad utilitatem Reipublicæ, jubendo fiunt justæ, vetando injustæ. Quare ante promulgationem neminem obstringunt; post eam, omnes subditos. Negari equidem non potest, Naturalia quoque præcepta occurrere: ea verò *confirmative* potius, & *approbative*, quàm *effective* sanciuntur. Unde *legis naturalis præceptum*, à *præcepto observationis*, quod plerumque in transgressorem certam pœnam sancit, discernendum est. Exempli causâ; Blasphemiam damnat Jus Naturale; prohibet eandem legislator: non quasi tùm primum sanciat interdictum in civitate; sed ut Juris Naturalis assertum observetur à civibus, repetitur illud,

& intransgressores certam pœnam definit. Itaque lex de supplicio blasphemorum civilis est; prohibitio blasphemiae, naturalis. Lex igitur civilis propriam & domesticam sedem hîc habet: quam describimus per *Iussum Majestatis*, definiens quâ ratione unumquodque in civilibus agendum sit. Non probamus illorum sententiam, qui legis esse putant, tantum persuadere, non autem cogere. Quam in sententiam citant *Platonem*, lib. I. de LL., & *Diodorum*, lib. I. Biblioth. ubi reprehendit barbarorum leges, quod magis punire, quàm docere videantur. Adferunt quoque *Xenophontem*, lib. I. de Instit. Cyri, laudantem Persarum instituta, quod non ut ceteri, de pœnis, criminibus constituendis, solliciti sint, sed multò magis caveant, ne qua apud ipsos scelera perpetrentur. Quod si vim coactivam legibus adimas, vanum nomen erit auctoritas Juris: nec differet à consilio, quod licitè omittitur. Illud obiter notamus; non satis accuratè locutos esse, qui primis temporibus Reipublicæ Romanæ leges denegant, eam ob causam, quod manu regiâ omnia tunc fuerint administrata. Nam Principis jussus, licet in scripturam certo ordine non fuerit concinnatus, lex est. Nisi ad sensum Romanum, specialissimè legem dici velint, quæ ab universo populo sancitur. quo stricto significato in præsentî non accipimus nomen; sed pro jure civili, à quocunque latum sit; modo lator habuerit Potestatem Noinotheticam. Ita Romulum condidisse Jura suis novellis civibus, auctor est Livius.

Et

Et fragmenta prostant legum, quas priores Reges Romanorum promulgarunt. Manet ergo jussum Majestatis Lex. Potestas enim Legislatoria, quasi effectum quendam producit, quando se diffundit in legem, & efficaciter jubet, quid fieri velit. Hoc jussum commune id habet cum omni jure, ut sit *regula faciendorum*, quæ dirigat operationes civiliter morales. Huic directioni inest obligatio; quæ est de essentia cujusvis juris. Alias non distinctum quid esset jus à consilio. Dirigit consilium actionem; sed sub nullâ specie obligationis: quæ solius & omnis legis perpetuum quid & essentialis est. Nec putandum, obligationem demum subsequi legem, & legis constitutæ essentiam, tanquam effectum aliquem comitari: intrinseca quippe natura legis constituitur per obligationem; & rectè formalis ratio cujusque Juris ponitur in *præscripto obligatorio*. Hinc facile judicari potest, quid arbitrandum sit de *Jure permissivo*, quod in omnium ferè ore est. Quia in neutram partem inclinatur, & ad nullum contradictionis effectum adstringit subditos, sed permittit utrumque: jus non est, sed absentia juris prohibitivi. Imo toto genere à Lege distat hoc negotium. Jus enim est regula, est certa norma: sed ubi licet agere secundum beneplacitum, ibi regula nulla præfixa est. Eadem censenda sunt de Suasione juris Naturalis, quando nonnulli matrimonium dicunt esse *Juris Naturalis Suasorii*. Suasio est consilium: quod diversissimum esse à Jure, satis vident, qui primam definitionem

didicerunt. Quoties autem *permissio* denotat *facultatem aliquam faciendi* ; concessio plerumque est alicujus potestatis : & ex aliis capitibus judicari debet. In tempus obligationis sollicitè inquirunt Politici , quando lex incipiat obligare. Et consentiunt hætenus ad unum omnes , promulgationem requiri ad ipsam essentiam legis , ut vim obligativam habeat. Si enim regula est actionum civilium ; innotescere debet illis , quibus directionem præstare debet. Si jussum est ; alicui debet insinuari. Absentem non jubemus aliquid facere : nec absens & ignarus obligari potest. Jure Romano aliquando præfiniti erant duo menses , quibus elapsis promulgata lex obligare demum incipiebat. ut nimirum possit in notitiam omnium pervenire. Quanquam in universum tempus statum non definiatur in Politicis. Quid enim si regni angustiores termini sint , ut intra brevius spatium innotescere possit jussum Principis ? non desiderabimus illud interval- lum duorum mensium. Quod si nullum tempus præfixum sit , statim post promulgationem scientes devincit. Unde consuevit iste mos observari in nonnullis locis , ut sacratissimæ leges de suggestu & cathedra templi prælegantur , aut in curiis per campanam congregatis civibus promulgentur. Antequam verò à Principe promulgata lex est , nondum est lex : sed conceptus de lege constituendâ , si vel maximè concepta jam verba sint , & in scripturam redacta. Tunc enim in Fieri lex est , quæ complementum suum accipit , & consumma-

summationem perfectæ naturæ , quando promulgatur. Lex enim respectivum vocabulum est , quod imprimis ad inferiorem refertur , quem obligare debet.

VIII. Variæ sunt distinctiones Legum , quæ passim adferuntur ab Auctoribus. sæpe exiguum discrimen divisionem subministravit. Hinc repertæ leges *Scriptæ* , & *non scriptæ* ; *affirmativa* & *negativa*. Prioris generis illæ dicuntur , quæ scripturâ comprehensæ sunt ; Non scriptæ , quæ vivâ voce in publicum promulgantur. Verùm quia confusio Legum & Consuetudinis facile potest inde oriri ; satius est , eam distinctionem non attendere : imprimis cum ab extrinsecâ promulgationis formâ , quæ essentiam legis non tangit , petita sit. Scriptura nihil quicquam confert legi. Nam priscos Germanos habuisse leges , cogit nos credere Historia : quæ tamen negat , in scripturam illas fuisse redactas. De Celtis idem fama perhibet ; affirmans , utriusque populi iura consuevisse cantari. Quod *Aristoteles* quoque de aliis notat , in *Problematis* , sect. xix. Qu. xxviii. Cur , inquit , leges pleraque *Odæ* , seu Cantilenæ , appellantur ? An quod homines priusquam literas scirent , leges cantabant , ne eas oblivioni mandarent ? Quod & nostris temporibus *Agathyrsis* in more est. Ergo primæ posteriorum quoque cantilenarum eodem appellarunt nomine , quo omnes superiores vocabantur. Quod attinet posteriorem distinctionem , in *Legem Affirmativam* , & *Negativam* , usum habet in rerum momentis nullum : & ideo

ideò citra periculum, & notam imperitię, ignorabitur. Nullum enim tale discrimen in naturâ legis occurrit : & nullam difficultatem vanâ divisio tollit. Sunt qui legem distribuunt in *Naturalem, Civilem, & mixtam ex utraque*. Tolerabili utcunque distinctione: modò convenienti in sede id facerent, ubi de Jure in universali agitur. Hic naturales excludimus leges: quia sub definitione legis civilis, cujus species in divisione proponendæ erant, non comprehenduntur. *Legem* quoque *fundamentalem* hic tractant Auctores, quæ modum imperandi præscribit. Sed ex Legis descriptione non surgit hæc distinctio, ut lex aliqua sit *Fundamentalis*, vel *non fundamentalis*. Tantum abest, ut Imperantis potestas legem fundamentalem, tanquam proprium effectum, producat, ut potius illâ coërceatur, & quodammodo deprimatur. Ex occasione quidem *Mistæ Reipublicæ*, quam vocant, seu limitatæ Majestatis: hoc est, cujus exercitium aliquo modo per pacta solemnia circumscriptum est, lex fundamentalis tractari posse videtur. dum Ordines nimirum Principem, vel seipsum mutuis obstringunt conventionibus, ut neuter absolutè aliquid valeat efficere. Quanquam in simplici Republicâ, nihilominus locum invenire dicatur, quoties modus habendi imperium, quacunque ratione limitatus & restrictus est. Attamen quia fundamentales hæ leges, propriè leges non sunt, sed pacta; & hic nobis cum Republicâ mixta, aut limitato modo habendi Majestatem, nihil commercii sit;

fit; & confusionibus ingentibus sternatur via, si simplicior quis veram legem esse crediderit fundamentalem: è re veritatis facere censendi sunt, quotquot pactionibus illis Principum, & Ordinum, Legis nomen detrahunt, & totam rem ex doctrinâ de Potestate Legislatoria ablegant. In legem *justam* & *injustam*, admittendam esse partitionem, plurimi putant. *quasi ad legis naturam injustitiæ vitium concurrere possit, non aliter ac Reipublicæ bonitas & corruptio, essentiam ejusdem non variet. quasi generaliter concepta lex in utrumque inclinet: & malitiam non minus, quàm bonitatem moralem, sustinere possit.* Sed si per injustam legem capias illam, quæ jus Naturale, divinum, aut gentium oppugnat: dicendum est, legem non esse legem, si injusta fuerit. Nam essentia legis cessat, quæ in obligatione posita est. Leges autem, contra honestatem latæ, subditos non obligant. Hinc PLATO in *Minoë* statuit, *eam solam esse Legem Regiam, quæ recta est; non rectam verò non esse legem.* Et AUGUSTINUS, lib. I. cap. v. *de lib. arbitr. Mihi lex esse non videtur, quæ justa non fuerit.* hoc est, quæ contra dicta jura impingat. Nam cum in civilibus res indifferens versetur, non potest injustum civile committi, nisi à subdito. Princeps quamcunque propositionem sanciat, justum sanciet, ex auctoritate Legislatoris. Contra verum Jus gentium obligatorium si insurgat lex, dubio caret, eam ferri non posse: nisi cum obtemperante Rex plecti velit. Quippe in cujus manu positum minimè est,

vincula illa, quibus Respublicæ invicem co-
 hærent, labefactare. Similiter contra Natu-
 ralem legem nihil potest constituere impe-
 rans: quia & illa immutabilis, voluntati ho-
 minis non subjicitur. Quòd si verò audeat,
 vel gentium jura, vel Naturalis, aut divinæ
 legis dictamen temerare: violatoris manda-
 to non est obnoxius subditus. Obsequium sub-
 diti præsupponit imperium. imperium nun-
 quam ad injusta porrigitur, ergo nec obsequi-
 um. Quoties igitur injusta lex aliquid inho-
 nesti præcipit, nullum debetur obsequium:
 quia causa obligationis nulla subest. Legis
 enim tota vis & anima in obligatione ponitur:
 obligatio ex imperio nascitur; quod cum ad
 injusta non pertingat, tutò concludimus; Le-
 gem injustam non esse legem. Nam extra ter-
 ritorium jus dicenti, impune non paretur.
 Egreditur autem sphaeram suæ potentiae, qui
 contra legem divinam & Naturalem, contra
 communia itidem gentium sancita aliquid
 molitur. Magis est ut toleremus distinctio-
 nem legis in *Universalem*, & *Particularem*:
 cum fundamentum habeamus in obligationis
 modo. Supra, quando contemplati sumus ci-
 vitatem, materialiter se habentem, seu Multi-
 tudinem; vidimus ex pluribus pagis, hoc est,
 majoribus membris & regionibus, ut pluri-
 mum constitui civitatem. Ea interdum inci-
 dunt negotia, quæ universos tangant: non
 rarò, quæ aliquos. Ibi requiruntur univer-
 sales leges, quæ statum universæ civitatis
 concernunt, & omnes ac singulos obligant:
 hîc

hîc particulares sufficiunt, qui ob necessitatem præsentem, certo alicui membro feruntur. In Rebuspublicis, quæ ex diversis populis coaluerunt, maximum usum habet hæc distributio. quòd cautissimè versandum in talibus, ne diversis populis, quorum contraria ingenia sunt, eadem proponantur leges; sed diversis diversæ, omnibus congruentes. In imperio Germanico, ex obligandi vi declaratur distinctio, ut *Universales* dicantur, quæ vim habent omnes obligandi, & in Comitiiis Imperialibus sanciantur: *Particulares*, quodammodo illæ sint, quæ ex jure & potestate territoriali, provinciales obligant. Vel potius, particulares nominaverim, quæ in ipsiis quoque Comitiiis à Cæsare uni alicui provinciae separatim dicuntur & præscribuntur.

IX. Hæc de Legum naturâ & distinctionibus. Potestas Legislatoria maximè conspicitur, *leges condendo, interpretando, mutando, & abrogando*. Potestas condendarum Legum valet præcipuè in rebus civilibus, Rempublicam quovis modò concernentibus: quatenus ex earum observatione, aut neglectu, commodum detrimentumve in Civitatem redundare potest. Accommodat se ingenio & actui civium prudens Legislator. neque enim omnes promiscuè civiles leges omnibus gentibus congruunt. Leges naturales, & gentium, ut ante dictum, non condit Princeps: sed ut eadem observentur, sancit. Porrigitur præterea Nomothesia ad omnes actus, aliàs concessos, ut præcipere possit liberas virtutum actiones;

aut prohibere, quæ sua natura prohibita non sunt. Id obiter notamus circa condendam legem; non teneri Principem, consiliariorum vota, tanquam normam, attendere, ut efficacem legem sanciat. Hac enim ratione Consiliariis adjudicaretur Majestatis præcipuum jus, si absque horum consensu legem sancire non posset Imperans. Laudabile illud est, prudentium hominum de quocunque negotio explorare sententiam: sed eò redigenda minimè est Principis facultas, ut ministrorum voluntati alligetur. Valet lex, non quia Consiliario placuit; sed quia Majestatem agnoscit auctorem. Nunquam interim Princeps, ex malâ libidine, prudenti consiliariorum voto, in perniciem Reipublicæ, contradicet: nisi & prudentiæ, & famæ detractum velit plurimum. Audit ergo illos, ut consiliarios in civilibus hisce: non sequitur ut Dictatores. Quod si aliquis Consiliariorum suggererit legem, postmodum promulgatam; nihil tamen legislationi contulit. Distinguendus enim est à Legislatore, legum auctor & inventor. Novimus plures accuratè conscripsisse leges, qui potestatem Legislatoriam habuerunt nullam. Ita Plato, & Cicero, & multi alii, egregia nobis reliquerunt: quæ verò ad Nomothesium minimè referenda sunt. Ita Lycurgus Spartanorum; Solon & Dracon Atheniensium Legislatores perhibentur: non quòd propriâ auctoritate promulgaverint jura; sed pro ingenii facultate, & justî notitiâ, concinnaverint leges, ab ipsâ universâ multitudine

tudine faciendas. Non secus ac in Romano Corpore Juris plurimi Jctorum occurrunt: quorum effata, non ab Auctore, sed Approbatore Justiniano, vim ac pondus acceperunt. Secundum opus est *Legum interpretatio*. Quam *Authenticam*, & *Principalem* intelligimus, circa dubias versantem Leges: quæ judicio Magistratuum tam facile expediri non possunt, nisi subsequatur Principalis declaratio ac definitio, ab *Vsuali*, & *Doctrinali* longissimè distans. Alias quoque Jctis legum declaratio competit, qui ænigmata juris solvere docti sunt; & Consuetudinem judiciorum salutamus optimam legum interpretem: at diversum quid in hâc nostrâ interpretatione reperimus. Quoties enim duriores legem componere cum aliis, nec Doctores, nec Judices audent; ad Principem itur, qui legis tenorem explicet. De hac Principali interpretatione aliquod exemplum occurrit in Romano Jure; ubi Impp. VALENTINIANUS & MARTIANUS hunc in modum rescribunt: *Si quid verò in iisdem legibus latum fortassis obscurius fuerit, oportet id ab imperatoria interpretatione patefieri, duritiamque legum, nostra humanitati incongruam, emendari.* Et inibi JUSTINIANUS occasionem hujus interpretandi generis apertè ostendit. *Si enim in presenti leges condere soli Imperatori concessum est: & leges interpretari, solò dignum imperio esse oportet. Cur autem ex suggestionibus procerum, si dubitatio in litibus oriatur, & sese non esse idoneos, vel sufficientes ad decisionem litis*

illi existiment, ad nos decurratur; Et quare omnes ambiguitates judicium, quas ex legibus oriri evenit, aures accipiunt nostra, si non à nobis interpretatio mera procedit? vel quis legum anigmata solvere. Et omnibus aperire idoneus esse videbitur, nisi is, cui soli legislatorem esse concessum est? Tum igitur maximè consulitur Princeps, & ejus petitur Interpretatio, quando constituti Judices & interpretes legem cum aliis nequeunt satis commodè conciliare. Nomothesiæ tandem innectitur *Mutatio*, & *Abrogatio* legum: quæ secundum diversam naturam Juris restringenda est. Naturale jus, tantum abest, ut possit abrogari; ut nequidem mutationi vel levissimæ sit subjectum. Idem dicendum est de Jure gentium, propriè dicto: quatenus societati humanæ necessarium est, & regulam constituit actuum, qui populis, quæ populus sunt, intercedunt. Aliter se res habet in Jure Gentium, quod secundariò modo, & impropriè tale dicitur: quod est consuetudo, liberrimè recepta, plurimis gentibus usitata. Hæc talia & immutari, & abrogari possunt. In civilibus constitutionibus libera potestas relinquitur, variandi, tollendiq; pro lubitu: quam tamen prudentia sæpe coercet. quòd crebra mutatio Legum imbecillitatem judicii politici arguat, & confusionem nò rarò in civitatem soleat invehere, imperantibus quam maximè vitandam. quin solitis, licet non adeò còmodis legibus, constantius regnatur multitudo; quàm novis, licet congruentibus ejus saluti. Ad mutationem particularem pertinet *Solutio à Legibus*: quoties Princeps aliquas per-

personas, ob certas circumstantias & rationes, à communibus Legibus liberas & immunes pronunciat. Cujus enim facultatis est, lege scriptâ obligare: ejus quoque fuerit, à lege præstare aliquem exemptum. Nam qui invalidam reddere totam legem potest; quoad certos homines inefficacè efficiet. Inde *privilegia*, cujuscunq; generis. Quanquam hîc specialius beneficiû concessum intelligitur: quoties ob meritum virtutis, & operam, Reip. præstitam, remittuntur onera communia, quæ reliquos cives manebant.

Ita *veniam ætatis* concedit Princeps, & *natales* minus solemnium nuptiarum legitimos reddit. Determinatio enim certæ ætatis, intra quâ non est licitum, aliquid propriâ auctoritate agere, à solâ Majestate proficiscitur. Ita, qui ex secunda uxore procreavit infantem, jus illud in partum non habet, quod pater, qui ex legitimis nuptiis sustulit filium. Quû verò tota hæc materia ex Legislatione Majestatis proficiscatur, Principis est, pro facultate, quâ pollet, impedimentum, ab illegitimo matrimonio profectum, tollere, aut mitigare. Hæc innuisse sufficiat, quomodo subditi legibus solvantur.

X. Illud disputari consuevit inter Civiles Doctores; *num Majestas legibus soluta sit*. Antequam respondeamus ad quæstionem, repetendum ex antea dictis est juris discrimen, & mutationis licentia. Dictum est, Jus Naturale, item Jus Gentium, non posse mutari à Principe: cum in ejus manu positum minimè sit, illa migrare, quæ æternam sanctionem, aut populorum omnium salutem pro causâ agnoscunt.

Nam

216 DE CIVITATE, LIBER SECUNDUS

Nam quæ ex his fontibus ducunt scaturiginem, à nemine nato homine violanda sunt. Solutum autem legibus esse, id notat; ut possis contra legem latam, sine poenâ, sine crimine, aliquid committere. Quæ licentia, cum circa dicta jura nusquam data permissa sit; facile videmus, Majestatem talibus planissime obligari. De Jure Naturali dubium nullum est, quin Princeps, non secus ac alius, universalissimis illis scitis teneatur. Ita enim hoc Jus Naturam intelligentem stringit, ut nullo modo vinculum obligationis à quoquam possit separari. Nam cum divina Sanctitas sibi ipsi regulæ instar sit, & aliis sui imaginem imprimat: sine negotio patet, nisi destructa Sanctitate divinâ, Jus Naturale non posse destrui. Cumque Deus ipse omnipotens, sine notâ infirmitatis & impotentiae, non possit à Jure Naturali declinare: statim apparet, hominem sine exceptione his juribus teneri, & sanctissime obligari. Huic assertioni connectenda sunt *Jura divina positiva universalis*, quæ Noachidarum præcepta Ebræorum Magistris vocantur, quibus repetuntur Juris Naturalis sanctiones; sed cum novo additamento certæ poenæ; transgressoribus infligendæ. Quale criminale Jus est illud Noacho, & per hunc universo generi humano datum, circa homicidii poenam. Nimirum id Juris Naturalis edictum est; *Non occides*: hoc ipsum confirmativè repetit Deus, cum adjuncta poena talionis, si quid in contrarium factum fuerit. Juris Naturalis beneficio judicamus, quid

quid honestum, quid turpe sit: sed ex ipso illo Jure non surgit determinatio pœnæ; verum nuda dignitas pœnæ, dum transgressor dignus est, qui puniatur. Hæc dignitas non statim efficit, ut aliquis necessario pœnam det; aliàs nunquam dispensationi, & aggratiandi juri pateret locus; & nullus hominum salvari posset: cum ne Deus quidem dispenset contra jus Naturale: sed tantum idoneum reddit delinquentem ad pœnam sustinendam. Ita Cainus colligebat, se dignum esse ob fratricidium, quem obvius quisque occideret: Jus verò naturale nihil de hâc necessariâ interemptione dictabat. Eo enim casu non potuisset Deus de securitate Caino quicquam polliceri. Cæterum ubi terrarum orbis, temerè fusi sanguinis reus, diluvio erat perditus; solusque Noachus cum angustâ familiâ servatus: jure universali divino, omnes homines obligaturo, denuò obstringitur, de fugiendo homicidio: eâ interminatione, si quis contra faxit, ut capital esset. Hanc legem de supplicio ultimo, æquiparamus Juri Naturali: non propter originem, & omnimodam ac absolutam necessitatem; sed universalem vim divini interdicti. Licet Deus possit circa hanc sanctionem dispensare: eripuit tamen arbitrium homini, ne quis temerè intempestivâ gratiâ, regionem sanguine fœdaret. Obligantur omnes in Noacho ad persequendum homicidam, quotquot de aliquo imperio participant. (quanquam & cognatis ante Rempublicam, jus fuisse datum videtur, ut ulciscerentur cædem, & armaren-

tur

tur contra interfectorem, tanquam hostem) Hinc in Sacris legimus, quâ ratione David, Iobi parricidia plectenda commiserit Salomoni: ut sanguis, sine causâ effusus, redundaret tandem in caput nocentis. Ita hodiè regnatrices Potestates jure non possunt eximere capitalibus suppliciis homicidas; cum generali illi præcepto subsint: nisi velint tandem gravissimam ultionem à Deo, neglectori imminente, expectare. Maledictus, qui opus Domini negligenter exsequitur. Dantur quidem certæ circumstantiæ, quæ interdum gratiam Principi commendant: sed illæ dexterimè dijudicandæ sunt; ne in societatem sceleris, suâ conniventia trahatur. De *Jure gentium* similia obtinent. Id quoniam non dependet ab unius voluntate, non potest ab eodem solvi. Ex intimâ Naturâ Rerum publicarum proficiscitur: nec solvitur, nisi destructâ societate civili. Cum verò læsio & destructio ad hostilem animum transferenda sit: statim apparet, id nullo jure licere Principi, propter quod tanquam hostis puniendus est. Malè statuit DOMINICUS à SOTO, lib. I. de Just. & Jur. art. III. Q. III. *Jus gentium, cum positivum sit, cum discursu suo mutabile esse.* Nimium enim falsus est circa fundamentum & causam Juris hujus: quod alibi ostenditur. Quare ita censendum erit, nec Juris Naturalis, nec Divini Universalis, nec Gentium decretis, Majestatem solutam esse.

XI. Restant solæ Civiles constitutiones, quæ de

de rebus indifferentibus feruntur. In his plenissimam facultatem asserimus Principi. Nec possumus aliter. Si enim suis legibus non esset solutus, non posset easdem immutare. Omnes autem hactenus concesserunt, Legis derogationem, obrogationem & abrogationem, Legislatoriæ facultatis esse. Huc illud ex Romano Jure advocaverim: *Neque imperare sibi, neque prohibere se quisquam potest.* Qui superiorem non habet in civilibus, nullâ lege impeditur. Non opus est, ut rem per se satis claram, obscuremus distinctionum difficultate, ut dicamus; Principem quidem solutum esse legibus, *quoad vim Coactivam*; teneri *quoad vim directivam*. Putant nimirum, in Principem nullam vim aut compulsionem à parte subditorum proficisci quidem; nec Majestatem ita obligari, ut legibus à se scriptis cogi possit aut debeat: cæterum *aquissimum esse, sua sponte sequi tenorem præscripti juris; quod ab imperantis exemplo pendeat popularis multitudo.* Verùm utraque vis cessat in Principem. Ubi coactio non subest, ibi nec vis directiva. Vis enim coactionem includit. Et quis in Republica dirigeret Principem? nemo sibi legem sancit. In naturalibus, divinis & gentium juribus hæc distinctio locum ideò non meretur, quòd coactio adsit: si non à plebe, & subditis; tamen à Deo, qui transgressorem suæ legis, tardo quidem, sed gravi supplicio tollit; aut à Republica læsa, quæ violatorem juris gentium legitimo justoque bello coercet.

In

In civilibus sine pœnâ, sine peccato, innovare potest jura Imperans: non tantum in subditis per Privilegia, quod modò vidimus; sed multò magis eadem à seipso remove, cum à nemine obligetur. Unde Auctores aliqui hujus rejiculæ distinctionis & sententiæ statuunt; Principi legem propriam servandam esse, *ex quadam honestatis ratione & decentiâ*: quæ suadet legem melius posse imprimi subditorum animis, si à Principe servetur; non quasi obligetur, sed ut exemplum præstet suis. Per hanc explicationem plane nobiscum conveniunt. reipsa enim fatentur, Principem legibus non teneri, sed solum agere: consultum autem esse Reipublicæ, ut Majestatis vita sit regula civitatis. Quod nobis prorsus affirmatur. Sed *consilium & civilis decor*, cum *obligatione & vi*, non erat confundendus. Decorum aliquando est, secundum Regulam civitatis incedere: necessarium haud est. In hunc sensum exaudiendæ sunt usitatæ voces, de valore exemplorum in vulgus, quas eximiè CLAUDIANUS effert, de IV. Honorii Consulatu.

Componitur orbis,

*Regis ad exemplum, nec sic inflectere sensus
Humanos edicta valent, ut vita regentis.*

Mobile mutatur semper cum Principe vulgus.

Non aliter explicari debent, quæ Theodos. & Valent. Præfecto Prætorio rescripserunt, *Dignam vocem esse Majestate regnantis, legibus alligatum se Principem profiteri*. Sub aliâ interpretatione vim directivam assuerunt, quod *non cogatur Princeps aut puniatur;*

in

in conscientia tamen devinciatur ad suae legis observationem. Quibus necessario contradicendum est. Talem obligationem vel à Deo, vel jure naturali, vel populo, vel ipso Principe procedere, necessum foret. Divinum jus, cum in Republica nostra, circa res merè civiles, nihil disposuerit; nulla ratione ad observationem positivi juris conscientiam legislatoris obligavit. Jus naturale ignorat hæc merè civilia, & ideo de obligatione eorundem novit nihil. Populus, Nomothesià carens, Majestatem nequit devincire. Ut Princeps se circumscribat ipse legibus, id verò absurdum est. Legem fuisse, quam Simeï dictabat Salomon, ne transiret flumen, omnes affirmabunt: sed quis tam inconcinnus esset, qui assereret; Salomonem conscientia fuisse obstrictum, ut ipse servaret hanc legem, nec transiret fluentum. Leges, cum obsequium flagitent, & submissam venerationem, exhibendam Majestati, pugnant cum personâ imperantis, si in eandem concipiantur sub obligatione.

XII. Proximè consequitur JURISDICTIO. Nam judicare propriâ auctoritate nemo potest, nisi qui imperium habet in caput judicandi. Quare inter præcipuâ Jura Majestatis nomen profitetur Jurisdictio. à multis quidem omiſſa; Principi tamen ante omnia asserenda. Quod in hac & Judicum officium, & Appellationis fundamentum contineatur: & infallibile quoque lateat documentum summæ potestatis. Non alia res, bene LIPSIUS ait, imperium magis asserit, quàm hæc in bona

vitamque nostram potestas. Ubi eruditissimus vir necessitatem quoque exercendæ Jurisdictionis demonstrat, tum à *Causâ & Fine*; tum ab *Exemplis*. Hanc verò Jurisdictionem vocamus summam in rebus civilibus & criminalibus cognoscendi, statuendi, & exsequendi potestatem. Summam dicimus cognoscendi potestatem: ut Jurisdictionem magistratum separemus à Principali. Est quidem in illis potestas, etiam publica: sed limitata interim, restricta, atque dependens. Quod si accuratè velimus persequi omnia, dicendum est, *Judicibus non competere Jurisdictionem ipsam; sed ejus saltem exercitium*. Nam cum illa sit Jus Majestatis, nequit communicari subdito: cujus rationem subit omnis magistratus, ad principem relatus. Quia verò usus hoc vocabulum iudicibus inferioribus assignavit, retineamus illud: sed hâc cautione, ut exercitium in Magistratu, non principale Jus intelligamus. Habet illud quoque proprium hæc Jurisdictio, ut non cognoscat tantum & statuatur de oblatiis negotiis: sed omnem etiam sententiam propriis auspiciis exsequatur. Sive civiliter, sive criminaliter concepta sit. Huc enim maximè respicimus in præsentî, & attendimus executionem sententiæ: cujus qualitas distinctionem aliquam Jurisdictionis supeditat. Nam quas adferunt divisiones, in *Ecclesiasticam & Secularem; Voluntariam & Contentiosam*: fundamentum in ipsa potestate non habent. Potius ipsam efficaciam in sententiæ tenore quærimus: maximè ubi aliqua

qua

qua pœna infligenda est. Huc enim trahendæ sunt, *quacunque pœna*, sive bona, sive corpus, sive libertatem & famam affligant. Imponunt quidem inferiores supplicia, pro capto suæ Jurisdictionis dependentis; sed a lionâ auctoritate :) cum certa præscribatur formula, juxta quam decidenda est controversia, ita ut ad superiorem sæpe rejiciatur sententiæ complementum. Quicquid hi magistratus exercent circa Jurisdictionem simplicem, Mixtum & Merum Imperium, ut Romani loquuntur; sive ut Saxones, circa altam, & bassam Jurisdictionem; mutuati-
tium id omne est, & commodatum à Majestate, cui principale Jus, cum suis fundamentis adhæret. Resolvitur enim universa Pœnarum potestas, in potestatem, quæ in caput Subditi pertingit. Sive reus condemnatus sit in pœnam corporalem, sive pecuniariam. Ut reus Majestatis ultimo supplicio afficiatur, & bonorum patiatur confiscationem: Potestati in caput adscribendum est. nam supplicium, corpori inflictum, manifestissimè id jus postulat: bona vero sequuntur conditionem personæ. competit enim facultas in bona illi, cui in personam jus est. Non possumus coërcere, non multare hominem, in cujus corpus, & consequenter in bona, non habemus potestatem. Hæc est ultimum fundamentum *Ereptitiorum*, & omnium *multarum*: quas vulgò inter Jura Fiscalia referunt. Licet enim proximum fundamentum omnis pœnæ pecuniariæ, sit Dominium in bona privatorum:

rum :

rum: ultimum tamen est potestas in caput, in quam resolvitur Dominium. Elucescit amplius judicandi sublimitas in *Remissione poenarum*. Iudex inferior sententiam mutare nequit; quod alligetur legum observantiæ: secundum quarum tenorem judicat & damna, nec quicquam circa earum voluntatem migrat. At Princeps non illam tantum sententiam Judicis infirmare; sed propriam quoque mitigare potest. In cujus potestate fuit situm, liberrimè initio disponere de actione: is à nemine obligatur, ut perpetuò eandem normam observeret. & se obstringere non potest ipse, ad immutabilem observationem semel fixæ sententiæ, aut legis. Immutare poterit igitur, vel ex parte, vel in totum, poenam, aut remittere omnino. Hinc potestas remittendi supplicium, legibus civilibus definitum: quam *Jus aggratiandi* vocant.

XIII. Jurisdictioni Principis simul innectitur EXTREMA PROVOCATIO. Quam vocamus Jus Majestatis, cujus virtute Princeps litigantis subditi appellationem à sententiâ inferioris Judicis recipit, & controversiam ipse determinat. Sublevatur aliquo modo Majestas ministerio Judicum: sed nec supersedere potest omnino judicandi munere, quin subinde cogatur jus dicere, quoties ab inferioribus magistratibus ad Principis tribunal provocant litigantes. Rapiunt aliquando partium studium atque affectus; non infrequenter lucri cupiditas judices in transversum agit, quò minus ex æquo & bono decident controversias.

fias. Ipsarum quoque caussarum intricata difficultas plerumque obstat, ne verum omni ex parte possint deprehendere. Devolvitur ita ad Principem definiendi onus, qui incorruptus iudex est, & augustiori iudicio, quæ latebat, rei bonitatem, vestigat & capit. Ita sæpius ipsa necessitas subditos de Extremâ provocatione admonet; & ut eandem recipiat imperans, ipsa Majestas jubet. Non alia res splendidiorem confert auctoritatem, quam Jurisdictio hæc summa & decretoria. Quare tam arctè Majestati creditur assidere, ut nullo modo, illâ salvâ & incolumi, possit separari. De alienatione omnimoda nobis sermo est. Nam constitui poterunt Magistratus, qui appellationes recipiant nomine Principis, & hujus auctoritate componant lites. Ita novimus summa constituta esse huic fini judicia & collegia. Sed tum ministris mandatur exercitium & usus; ipsum jus, ipsa possessio hujus eminentiæ penes principem remanet. Perinde quoque fuerit, si constituentur Judices Majestatis loco, qui primam instantiam ultimato decident, ita ut appellari amplius non liceat. Tum enim una operâ, precariæ Jurisdictioni, appellationis effectus videtur inclusus. Cæterum, quamvis ejusmodi judicia constituta sint, à quibus provocare non licet; non omnis tamen ad superiorem intercepta est appellatio: sed eadem jam sub *Revisionis*, jam *Supplicationis*, jam alio titulo, ad primarium subiectum recipiendæ Provocationis defertur. Ab hujus tandem sententia provocare utique non

non licet. Nam superiorem non habet. & quitalem finxerit, Majestatis reus censendus est. Sanè **CONRADUS**, Romanorum Rex, Trajectenles perduellionis reos postulavit, quod ad Pontificem provocassent; testante *Othone Frisingensi*, de Rebus gestis Friderici. Nisi à Majestate ad Majestatem ipsam aliquis putet provocandum esse: à malè scilicet informatâ ad melius informandam. exemplo petito, à *Valerii Maximi* narratione, de Philippo Macedone. Similis Jurisdictionis species est **EVOCATIO CAUSSARUM**, quando imperans coram tribunali inferiori agitatam litem, nec dum plenè decisam, ad se vocat; cognoscendam, & dijudicandam ab ipsa Majestate. Quod negotium hîc sufficiat nominasse.

XIV. Ex eadem scaturigine profluit **COMITIUM** jus, quo congregantur in unum locum subditi, & vel mandata imperantis accipiunt, vel de utilitate publicâ interrogati, consultant in medium. Non immerito hoc negotium maximi momenti creditum est Politicis: quòd egregium publicum eximiè juvetur, si rite fuerint instituti conventus publici; & contra præsentissima pestis imminet civitati, quoties illegitimæ personæ exciterint seditiosorum conciliabula. Quare Majestati asserenda hæc provisio est, quæ Reipublicæ tranquillitatem respicit, & ingens illud imperium in caput præsupponit. Solius enim imperantis est, convocare cives, & cogere comitia; cum in ejus manu sit, compellere inobedientes. Nisi compareant vocati, spreto impe-

imperii pœnas dabunt. Si olim Prætor Romanus animadvertere poterat in omnes, qui non parentes jussibus, contemnebant Jurisdictionem: multò magis Imperantis Majestas dignâ severitate vindicabit neglectum hujus convocationis. Dirigitur enim hæc facultas in eos, quorum capita Majestati subsunt. Sicut in Jurisdictionis opere nemo citari, aut in jus vocari potest, nisi subjaceat territorio & Jurisdictioni: ita convocari ad comitia non solent, qui imperium in caput suum non patiuntur. Ex quo facilè apparet, Jus Majestatis præcipuum nefariè involare, quotquot sine superioris præscitu, aut jussu, multitudinem congregare fuerint ausi. Enimverò, quin seditiosa & incivilia agitent, dubitari haud debet. Invadunt illam potestatem, quæ summi imperii solius est: & ejusmodi attrectant munus, cujus substantia universæ Reipublicæ regimen concernit; & ideò, nisi Principi, non competit alteri. Id sponte sequitur, alienos subditos in unum locum haud posse jure Comitiorum citari. Nam cum oriatur hæc vocatio à Potestate in caput subditi, palam est, in alienos subditos eam non pertingere. Simile judicium sit de CONCILIORUM congregatione. Eadem ratio, idem fundamentum, eadem potestas circa hæc, quæ circa comitia. Materiâ saltem differunt; dum hæc civilia, sacra & ecclesiastica illa tractant. Ultro patet, neminis esse, vocare CONCILIA, præterquam solius Majestatis; quæ potestatem habet in capita convocandorum Episcoporum; quæ curam Sacrorum, injunctam à

K

Deo,

Deo, eminenter agit. Cogi ergo poterunt clerici, ut à Majestate vocati compareant, & rogati sententiam dicant, aut quidvis aliud expediant. Sed illi cogentur, in quos imperium valet. aliorum Principum Episcopi, non magis ac subditi huic congregationi parebunt. Quamvis igitur olim Imperatores Romanorum universalia coëgerint CONCILIA, cum Romanus orbis æquè latè pateret ac Christianus: hodiè interim, ubi tot Christiani Reges vicinis terris præsunt, asseri haud potest id ipsum; quòd in horum cives, jus illud amplius nostri Cæsares haud usurpent. Nisi rogatu suo impetrent, ut Principes Christiani permittant suis Theologis, CONCILIO interesse. Tunc enim invitatio erit amica, non imperiosa vocatio, aut coactio. Id obiter tangendum est, non omnes conventus comitiorum nomine accipiendos esse: nec jus Majestatis tribuendum continuò illi, qui convocare aliquos solet. Nam sæpe diversarum civitatum socii, pacto & fœdere colligati, convenire, de publicâ aut communi utilitate deliberare, consueverunt. Liberè conveniunt hi tales, nullius imperio coacti. Ita constituunt interdum principem aliquem fœderis, cui fas est, reliquos convocare: non virtute hâc Comitiorum, quæ Majestatis est; sed ratione pacti, & sociorum liberrimo consensu. In confœderatos enim vim nullam exserit Majestas; quæ non in pares, sed inferiores & subditos, efficaciam suam spargit.

X V. Huic potestati in caput accensendum est,

est, quoties muneribus minus gratis, aliquando periculosis, præficiuntur subditi. Quoties homines, rebus gerendis apti, sed quietis amantissimi, & qui tranquillitatem rei familiaris atque privatæ anteponunt publicis, & molestioribus negotiationibus, protrahuntur in lucem communis administrationis; cogunturque eruditionem suam, prudentiam, atque dexteritatem, quam privatæ delectationi impendebant, omnium salutis & adjumento consecrare. Novimus plures qui onerosum Magistratum & honorem deprecari sunt: sed plurimum quoque exempla prostant, qui legitimâ vi adacti, à Majestatis jussi, provincias subierunt. Maximè idonei vel eò nomine habiti, quod ambitus puri, majorem integritatem viderentur approbaturi Principi. Hujus loci sunt omnia ista Munia publicæ administrationis, quæ onus secum portant magis, quam emolumentum actori conferunt: ad quæ cogi civis potest, quâ subditus Majestatis est, propter hoc ipsum imperium in caput. Non aliena est ab hoc argumento *Tutela gestio*, quam declinare nequit civis, si à moriente in testamento fuerit nominatus tutor; aut ob proximitatem sanguinis, ipsâ legis perpetuâ constitutione advocetur; aut Magistratuum denique auctoritate pupillis præficiatur. Lege Romana permissæ sunt aliquot excusationes: sed poterat nulla admitti, sola insufficientiâ administrationis exceptâ, si Legislatori sic placuisset. Illustre quoque exemplum est, quod huic potestati ortum debet, *Legatorum Missio*, re-

spectu subditi, qui invitatus ablegatur. Sæpe ad
 exteras gentes longinquæ ac diuturnæ adornantur
 Legationes, quæ sine incommodo missi nunquam suscipiuntur, aut finiuntur.
 Præsentissima quippe damna rem familiarem affligunt,
 quoties abest ejusdem genuinus Rector. Ut taceam itinerum incommoda, sæpe
 adversò aëre contractas valetudines; pessima illa conditio imminet Misso, ut maxima pericula,
 non rarò mortem extimescendam habeat à barbarie populorum,
 quibus contra jus & fas legati persona, quam sua sanctimonia debebat
 inviolabilem præstare, in argumentum servitiæ trahitur.
 quasi non satis ejuraretur humanitas, nisi innocens Legatus malè haberetur.
 Satis notum est, quàm atrociter Christianorum Legatos plerosque exceperit Turcus: &
 quàm parum à captivitatis carcere absit publica illa custodia,
 quando amicè, pro sensu Barbari, & commode tractantur.
 Nemo adeo incautus fuerit, & fortunarum, corporis, ipsius capitis ac vitæ
 supinè negligens, qui prospiciens ista detrimenta, opret ad
 Busiridis aram mitti, & cultum illum publicæ auctoritatis, &
 ornamenta securitatis, tanquam victimæ mactandæ, sibi aptari.
 Et incidunt interim tempora, quæ ministerium tam periculosi operis
 flagitant, & omnium potius salutis, quàm unius securitati, cautum
 atque prospectum volunt. Tunc animis non tantum opus est, sed
 facultate quoque eximiâ, quæ subditum ejusmodi difficultatibus
 expediendis parem, sed detrectantem pericula, jüstè cogat, ut ad sæ-
 vum

vum Principem tendat, & communem causam oret. Hanc facultatem non aliam esse, quàm Potestatem in caput, persuasissimum habeo. Nam res ipsa loquitur, non posse aliunde hujus mandati, præcipuam & fundamentalem causam derivari. Imponere munus, non satis acceptum, aut fructuosum gerenti, & aliquo incommodo afficere personam, idque jure, ex vi legitimâ, non nisi ejus est, cui in personam jus & potestas competat. Ita caput Legati itinerum molestiis, & scvitiae Barbarorum juste exponere haud poterit, præterquam illum, qui in hoc caput plenam facultatem habet. In his omnibus, & similibus, objecta attendenda sunt, & ex Objectorum naturâ judicium fieri debet de indole potestatis, quo jure, hoc est, qua potestate, in talibus quid fiat. Objectum sanè quod in memoratis casibus cogitur, subditus est, seu persona civis: ex facili patet fundamentalis causa coactionis, potestas nimirum in personam subditi. Nunquam cogeretur justè subditus ad pericula illa obeunda, nisi Majestas includeret imperium in illius caput, coactivum & impulsivum ad ejusmodi actiones.

XVI. Ex eodem hoc imperio planè surgit vis illa compulsiva, quâ fervente bello, in hostem ducitur civis, vel invitus. Ipsa quidem totius belli administratio infra nobis deducetur ex Provisiōe, quæ universam societatem civilem regit: at particula hæc bellicæ potestatis, quâ delectus civium habetur, & justus numerus mittitur in hostem, fundamentum ha-

bet in imperio, quod in personam subditi valet. Bellum gerere, in universum non est opus Majestatis: cum & privati duello possint concertare; & numerosiores familiæ, aut plurimum familiarum congeries, extra Rempublicam, impressionem facere, aut hostem lacescentem repellere queant. At in Republicâ bellum decernere, & civium capita hosti objicere, solius Majestatis est. Privati enim illi gladiatores Reipublicæ nomine haud pugnant: & multitudo extra Rempublicam, neminem vi Majestatis cogit in expeditionem; sed quicquid geritur, vi præcedentium pactorum perficitur. Abrahamus, vernas suas armans in Reges orientis, cogit quidem subditam familiam ad prælium, eaque coactio ab imperio est: sed quia servos cogit, non cives; imperium utique herile, non Majestaticum, quæ Objectis parentibus differunt, causa istius profecti nis censendum. Socii verò Mamre & Escol, cum suis, propter fœdus, quod cum Abrahamo iustum habebant, sese adjunxerant. Manet igitur Imperii Majestatici opus, civem ad defendendam Rempublicam in bellum mittere: qui propter hoc imperium obstrictus est, patriæ suos labores, imò vitam ipsam immolare. Agnovit hoc debitum optimus quisque, & votis, consilio, manu, ingruentem à Republicâ arcuit hostem. Plures in Romanâ civitate fuerunt, qui privatâ clade publicam deprecari & amovere maluerunt. Quo referendi, qui se devoverunt pro patriâ: quod Decii, pater, filius & nepos, cum aliis fecerunt.

fecerunt. Ob gloriam hæc talia perpetrata, ego non credam: qui certo scio, ob salutem omnium contigisse. Vanitas fuisset inanis, ob rumores & laudem vulgi, oppetere mortem velle. Convincebantur interno quodam sensu, deberi vitam Reipublicæ, ac sanguinem; cuius parci haud deberent esse, quoties prodesse poterant in commune. Quod argumentum tantæ efficaciz fuit. apud cordatos homines, ut non tantum socii tradere spiritum voluerint: sed ne Reges quidem dubitaverint occumbere, si morte, vel saltem victoriam se paraturos subiecto populo sperarent. De Codro vulgarum memorat PATERCULUS. Ille nimirum pastoralis indutus veste, ut contra Lacedæmonios suis victoriam procuraret, ex oraculi Pythici responso, maluit occidi, quàm suorum cladi superesse. Quanto magis subditum urgeat debita communi causz, & Majestatis imperio fides? Cui si non faciat satis, cogi posse, ut eat in hostem armatus, nihil ambigendum est. Si enim tenetur ex officii præscripto strenuâ manu ultro consulere publico; ea verò animi hebetudine fit, ut id capere nequeat, aut perversitate, ut nolit: docendus omnino est, quid communi rei debeat. Efficaciorem autem Magistrum haud temerè inveniemus, præter imperantem, qui imperii dexteritate instructus, citra negotium & ambages, rudem ac contumacem civem informabit, & ipsò actu admonebit, quid sponte facere debuisset. Si tenetur ad aliquid subditus, propter imperium Majestatis tenetur,

& ab eodem simul cogi potest. Aliàs inanis foret obligatio, cujus, si contraveniatur, nullus daretur effectus, nullum jus exsequendi. Quod si aliàs castigari debet culpa, & animadverti potest in immorigerum: hîc vel maxime prospiciendum est, ne contumaciâ perfidi subditi, aut imperantis socordiâ, Resp. detrimentum capiat. Nisi competeret imperantibus hæc potestas in caput subditi, quâ hosti eundem possint opponere; in præsentissimo versaretur discrimine omnium salus: quæ a suis civibus deserta & prodita, cujusque insultantis hostis ferro & libidini pateret. Hoc igitur jure cum suo cive tendit in hostem Majestas, & illum periculosissimo loco statuit: nihil peccatura, licet ille inter acerrimos pugnatores conficiatur. modò malignitas, & necendi animus non abutatur ejusmodi prætextu. Uriæ, celebratæ fortitudinis bellatori, assignare stationem, quam pugnacissimi hostium infestarent, extra culpam hætenus erat, & militaris circumspeditionis laudem merebatur: at ubi proditorio consilio objicitur præsentissimæ morti, & deseritur à sociis; nunquam excusabitur, imperii allegatione, tam præmeditata malitia. Multæ particulares circa bellica jussiones ex hoc principio propululant, utpote, quando cives, ab hoste oblessi, jubentur repugnare fortiter, donec vita super fuerit: parebunt justè, & resistent, quamdiu resistere poterunt. Ubi verò fames adeò premet, ut prorogare vitam, nisi se dedant, haud possint: inhumanum fuerit, injungere subdito,

subdito, ut miserum illud moriendi genus anteponat deditiōni. Sive pereat fame, sive permittat se hosti subditus; utroque casu imperanti suo perit, & munimentum hosti cedit. æquius tamen agetur, si vitam quocunque modo servet obsessus. Nec video, quomodo contrarium ullum strictum jus satis defendat, ut subditus tam indigne extinguatur, nullo in publicum usu, nullo hostium detrimento. Illud enim satis patet, truculentissimum imperii genus esse, quo jubentur milites, accenso pulvere tormentario, se cum munimentis atq; navibus perdere, ne in potestatem hostium perveniant. Nunquam eò porrigetur imperium in caput, ut subditus cogi possit ad violentas manus sibi inferendas. Nec insanum illorum obsequium cum ratione quisquam laudaverit, qui ad probandam obedientiam, de sublimi se præcipitarunt ad jussum imperantium. Intra limites honesti & justī consistit imperium: nec ab infinito illo bono, Deo Opt. Max. jus sceleri datum, aut ulli concessa est facultas, aliquid impii jubendi, faciendive. Si excesserit hanc formulam commissæ potestatis Princeps, subditus non obligatur ad parendum. aut si stultissimum obsequium præstiterit impio præcepto, reum se facit impietatis, & vindicem Deum experietur.

XVII. In eandem classē referenda est **Obsidum datio**. Quoties enim pactiones populorum non satis sincere observantur, & fides alterutrius partis vacillare videtur, ad firmitatem conciliandam conventionibus fre-

K 5

quen-

quentissimè solent obsides postulari & impetrari. Cum verò molesta & periculosa conditio sit obsidum, quam plerique deprecantur: ad implendam pactorum fidem, Majestas etiam invitum hosti, seu populo, cum quo intercessit fœdus, Obsidem dare, vi potestatis, quæ in caput dirigitur, valet. Cogi potest, ut eat obses; & si fefellerit custodum solertiam, à civitate, ad quam redit, reddendus est. Ut *Clælia* factum laudem, non satis argumenta suppetunt. In hoc enim tradita erat à Civitate, ut pignus pacis esset: nec arbitrio ejusdem permissum, utrum redire vellet. Et populi Rom. redditio magis congruit præscripto Juris. Valet hæcenus potestas in caput, ut obses invitus tradatur; & si aufugerit, remittatur. Sed utrum vita obsidis innocentis obligetur, mihi nondum liquidum apparet. Si vel maximè traditionis formula transferat facultatem in Accipientem, ut eidem jus ac fas sit, si pactis non stet civitas, sumere pœnam ab Obsidibus: dispendiendum interim est, num civitas alterum, innocentem, hunc in modum possit obligare; & ex alterâ parte, utrum ulli populo fas sit, innocentem ob alterius perfidiam trucidare. GROTIIUS sanè putat, *Obsidem interfici non nisi Jure externo Gentium posse: interno tum demum, ubi par ipsius culpa accedat.* Externum illud Jus consuetudinem licentiæ Auctori significat, quæ aperte injustitiæ speciem in sinu foveat. Mihi dubitatum minimè est, respectu Imperantis, potestatem in caput eò haud porrigi, ut innocens tradatur mactandus. Quod autem Jus
Maje-

Majestas non habet, in alium nunquam conferret. Ipsa innocentem justè haud interficit. Nec patietur moralis doctrina, ut quocunque tandem figmento, aliorum perfidiâ, nocens fiat aliquis, ignarus & invitus. Ideoque Majestati accipienti obsidem, nullum Jus in vitam traditi, vel à tradente conciliabitur, vel ex subsequutâ violatione pactorum. Nunquam in his talibus rerum gestarum exempla sequar, nisi firmissimis rationibus stipata. secus furor irritati populi nihil moderabile suadebit. Nec video, quomodo sarcimentum plenum recipiat læsa perjurio pars, si vel obsidem trucidaverit: nam si præterea bello vindicanda erit injuria, in fontes potius expetat justâ ira, quam in Obsidem. cujus cædes nec ad victoriam futuram quicquam confert, nec acceptum damnum reparat. Sed prolixior circa hoc argumentum commentatio Juris Gentium est, quatenus nimirum accipientem spectat: nobis sufficit, verbo innuisse, potestatem in caput tradere quidem & remittere posse subditum; cæterum ejus valoris haud esse, ut vitam ejusdem obligatam alteri sistat.

XVIII. Sequitur proximè cognata materia DEDITIONUM. Ut Jure possit subditus dedì hostibus, id unicè proficiscitur à Potestate in caput; non à Dominio eminente: nisi diversa Jura Majestatis velimus confundere. Et præcedentia satis evincunt, non aliud Jus Majestatis circa personam subditi occupari, quam Imperium, seu potestatem in caput. Quod quidem statim patet, rem non obiter intuenti. Id

nunc paucis scrutabimur, quousque hæc potestas dedendi civem porrigatur. Ubi primo loco venit cōsiderandum, num aliquid adversus alium populum, postulantem deditiōem, admiserit dedendus; an innocens sit. Nec enim simplici responso absolvenda est quæstio. Si læssiverit vicinam gentem civis, & ingens damnum inflixerit, aut grande aliquod nefas designaverit; & ad hæc talia vindicanda imploretur Majestas; ut nefarium civem ne toleret amplius in suâ civitate, aut protegat, sed permittat læsorū judicio, ut dignam pœnam à scelestis sumant: non est quod inficiemur, Imperanti jus esse, ejusmodi hominem dedere, si liquidò de perpetrato delicto constet. Hoc enim omnes dederint, Majestati fas esse, subditum ejusmodi, vj Jurisdictionis, castigare, & pro qualitate criminis, vel ultimò supplicio afficere. Hæc facultas cum Majestati citra dubium competat, perinde fuerit, siue suis lictoribus tradat judicatum, & condemnatum subditum; siue læsæ Reipublicæ executionem supplicii malit permittere. Totum enim negotium pendet ab arbitrio Imperantis. Quod si polliceatur læso, sumturum se pœnam à violatore alienæ tranquillitatis, idque pro atrocitate sceleris justè præstet; cogi haud poterit, ut læso vindictam concedat. Interest læsi, ut scelus plectatur: si Princeps id puniat, satisfactum est justæ petitioni. Quare sub alternante petitione hæc plerumque solent urgeri, ut nocens vel dedatur, vel dignis pœnis afficiatur. Nihilominus ut dixi, Ma-

jestati.

jestati liberum est, lædentem dedere. Id quando usu venit, fundamentum habet in imperio, seu potestate in caput, qua peccantem subditū quovis modo, ac per quoscunque, punire apta est.

XIX. Intricatio excitatur disputatio *de cive innocente*, an deferendus, aut tradendus etiam sit hosti à Civitate, ad evitandum totius Reipublicæ excidium. Si GROTH de J. B. & P. II. xxv. 3. sententiam retinemus, non saltem deferi, sed & tradi posse, statuemus. Interim, ut desertioni forsan, ubi impares sunt Majestatis vires ad defendendum suos, sine disquisitione nostra patet aditus: ita non video tam præsens excidium, quod maturare debeat deditionem innocentis. Et fateatur oportet suam infirmitatem civitas, quæ extimescere potest aliquod malum, si hominem, nihil mali meritum, insolentissimæ crudelitati evertendum non tradat. Latiùs imperantis regimini se associent, qui tale quid verentur, & securi erunt, ab hoc metu ac disquisitione. Indigentissima bonorum consiliorum fuerit ejusmodi civitas, quæ, sibi conscia imbelliæ suæ, saltē non impetraverit potentioris vicini parentelam, & defensionem contra injustum petitorē. Quibus solatiis si destituatur Respublica infirma, ut diu juris sui regimē servet, vix est, quod speret. Quid enim si impetrato uno, alterove cive plures concupiscat hostis: formidatū illud excidiū hos quoq; dedendos suadebit, donec universi erunt traditi. Infrequentissimū hunc casum arbitror, & vix semel aut iterum contigisse credo. Postulaverit enim Philippus Demosthenē, alios
Ora

Oratorum: num ideo statim impetravit? aut everſi ſunt Athenienſes, Demagogos ſuos retinentes? Indigna ſit civitas, quæ poteſtatem in ſuos habeat, ſi hoc negotium habeat extimeſcendum. Nec puto, petitoſem equſque inſaniæ proceſſurum, ut repulſæ cauſſa, quam impij poſtulati nomine paſſus eſt, bellum minetur. Et ſac inferat: non aptus erit hoſtis tot clades accipere, quot intulerit? Non tam facili negotio evertuntur Reſpublicæ: nec memorant hætenus rerum monumenta gentium, his minis exciſarum, nomina. Sed ad umbremus, minus horibili conceptu, controverſiam, & fingamus, expeti civem innocentem & niſi tradatur, ingens imminere periculum civitati: jamque videamus, utrum deditiōe juſte poſſit deſungi Majeſtas, vi poteſtatis in caput, ad amoliendum præſens illud detrimentum. Rimandus hîc nobis eſt petentis animus, cui fini factam velit deditiōem: & pro capto illius deſtinationis reſpondendum. Si perditum velit innocentem, nec Majeſtas poterit tradi-tiōe juvare parricidium: nec cogere civem, ut ipſe copiam ſui faciat hoſti: nec ullo charitatis officio tenebitur ſubditus, vitam ſuam pro-dere. Poſſe quidem imperans ſubditi caput periculis objicere; ſed periculum non ſtatim abſumit contratendentem bellatorem. Vi-ctoriæ ſpes educit militem; non perdendi conſilium. Non excuſabitur à conſortio parricidii, & proditionis Princeps, immoderata illa deſideria, & cædem ſui civis tradi-tiōe adju-vans. Non huc extenditur uſque poteſtas in ca-put,

put, ut conspirare possit Majestas in perniciem hominis, nihil committentis. Injustissimum esse postulatum, virum bonum morti adjudicare, omnes vident cordati: qui simul censebunt unanimiter, hoc impium factum citra participationem peccati, haud posse ullam operam promoveri. Quo ipso conficimus pariter, cogi non posse subditum, ut spontaneam deditiōe liberet civitatem periculo. Nunquam periculorum, vel incommodorum contemplatio adeo transversos nos agere debet, ut illorum metu aliquid injusti designemus. Utilitatis, & damni argumenta nihil operantur in materiā morali, cujus immutabilis natura est. Num verò subditus ultro permittere se hosti debet, ex lege charitatis, & officio? Multa quidem sunt humanitatis opera, quæ certissimam laudem merentur, & suo modo stringunt hominem, licet civili lege non fuerint imperata: non tamen invenio ejusmodi obligationem circa nostrum institutum. Opera alia charitatis subveniunt necessitati aliorum: præsens deditio, sine fructu futura mihi videtur. Vulgaris, & infimæ sortis hominis eadem non quæsierit tyrannus: quid enim plebeja anima Principis alterius consilia moretur? Pone interim, talem postulari: manu prendes, insolitam rem occasione velificari, qua prætextui quæreretur aditus, ad infestandam bello Remp. vicinam. Circumspicit nimirum bellandi materiam petitor, & credens, dissensuram Civitatem, semina & speciem suis iniquissimis armis sperat. Sponte se sistat trucidandum honestus

nestus ille & simplex civis, nimium credimus,
 si amotum periculum esse, confidamus. Dila-
 tum bellum est, & proximæ inhiabit occasio-
 ni alter, dum absurdus quid petens, (si quid ab-
 surdus peti posset) & rejectus, vel palam ho-
 stilem animum manifestabit. Si virum, geren-
 darum rerum dexteritate commodum publicè,
 exposcat, nemo dixerit, charitatis præscripto
 hunc talem debere se barbaro tortori dedere.
 Satis enim videbunt prudentes, cui hæc milita-
 tura sit deditio. Dum subdolo proposito adori-
 ri cogitat, & obstantem reperit viri auctorita-
 tem, vel solertiam, ex armare satagit hoc muni-
 mento civitatem, ut improtectam invadat, &
 sibi subjiciat. Quis putaverit, consulturum pu-
 blico clarissimum civem, si spontaneo discessu
 destituat miseram futuram multitudinem. Id
 verò est, suos prodere, & latam sternere viam,
 quâ latro grassetur securius in apertam, & suis
 firmamentis nudatam Rempublicam. Non
 sunt hæc Charitatis officia, hosti in suos facilem
 victoriam procurare. Et quis ad hæc talia, hoc
 est, ad perniciem Reipublicæ, cogi à Majestate
 posse meritissimum civem, seriò affirmaverit?
 Ceterum ad nulla tenetur opera civis, vel ex præ-
 scripto charitatis, vel officio, ad quæ cogi non
 potest. Ubi cessat imperiū compulsivū, ibi ob-
 ligatio subditi nulla subest. Eadē respondebo,
 si non ad cēdem, sed ad aliud nefas perpetrandū,
 adjutores & ministros destinaverit dedendos.
 Nulli enim impietati famulari debet vel im-
 perium Majestatis, vel officium subditorum.

XX. Aliter censendum puto, si certo con-
 fiter,

stet, nec ad cædem postulari, nec ad scelus aliquod, tradendum civem. Puta si vir, rerum civilium peritus, aut eximius aliquis artifex petatur. Circumspiciet Imperans, num aliquod ingens detrimentum hæc via possit inundare rempublicam: an nihil metuendum sit post traditionem. Si satis à damno prospectum sit, & cautum Civitati: nulla injustitiæ ratio impedit deditionem. Quum enim nec tradenti, nec tradito timenda sit durior conditio; nihil morale suspendet dimissionem subditi. Extendam hæc ad negotium matrimonii. Quoties vicina gens paucitate scæminarum laborat, connubiorumque societatem à volentibus impetrare haud potest; mox implorat Principem, ut efficaci suasionem, aut imperio, mulieres jubeat faciles esse suis procis: non peccabit in ullam particulam juris, qui honestis petitis annuet: quin humanitatis laudem merebitur, quod naturæ desideriis non illegitimo modo satisfecerit. De Aurelio, & Mauregato, Hispanicarum rerum scriptores memorant, scædere, quod cum Mauris fecerunt dicti reges, comprehensum fuisse, ut annui tributi nomine traderentur ingenuæ virgines. Quod pactum nefarium, & ignominiosum Christiano nomine vocat *Mariana* lib. VII. c. VII. At si ingrata *Mahumedi* smi, aut *barbariæ* nomina demas, aut in matrimonii opere excuses: potestate suâ non impiè usi deprehendentur Reges. Hæc enim humanitatis commercia, si in se spectentur, detractis invidiosis circumstantiis, nullam culpam includent. Infideles
fideles

fidelibus junctos, Apostolorum severitas non
 damnavit. Et vix tanta excogitari poterit
 barbaries sponſi, quam non aliquo modo vi-
 cina femina participet. Si nudam quæſtionem
 contemplemur, *utrum imperium valeat ad
 elocandam invitam mulierem*: non poſſumus
 non affirmando reſpondere. cogitantes facul-
 tatem in caput, in omnia licita potentem; &
 examinantes hanc elocationem, quæ nihil
 moraliter malum includit. Tota difficultas
in religionem infidelis hîc reſolvitur. At ma-
 trimonium, actus naturalis, & externa quo-
 que cum infideli converſatio, cum lege natu-
 rali non prohibeatur, haud incuſabitur inju-
 ſtitix. Nam ſi vitium aliquod ſubſeſſet, ſan-
 ctiſſimi Apoſtoli, aut Veteris quoque Inſtru-
 menti Doctores, omnia connubiata lia reſci-
 diſſent. Dum jubetur infideli nubere Chriſtia-
 na virgo, non jubetur impietatem mariti re-
 cipere. Et quid, ſi inſtrumentum exiſteret, cujus
 conſuetudine ſalutarem fidem amplecteretur
 maritus? *At durum eſt, invitam barbaro &
 infideli ſociare*. At durum quoque eſt, exi-
 miam aliquam multitudinem virorum conju-
 gio excludi, & invito cælibatu in ea prolabi
 ſcelera, quæ humanitas & natura horret. *Sed
 petant ab aliis connubiorum fœdera*. Quid ſi &
 illi alii denegent? ad te redibunt. Romanos
 enim, quaſi conſulto & ex compoſito, omnes vi-
 cini repellebant. Et quid, ſi volens fœmina
 ejusmodi Mauro, & infideli jungeretur, num
 peccaret? Vix in morali prudentia inveniam
 argumenta, abſolutè crimen affirmantia. Ab-
 ſolvendus

solvendus ergo Princeps à crimine, quando impellit subditum ad ea opera, quæ si volens sponte suâ faceret, non peccaret. Num etiam severè damnandi fuissent Mauri, si ab Hispanis repulsi, raptu sibi consuluissent? Qui raptas Sabinas commentantur, benignius respondent pro raptoribus. Et cum Benjamitarum maximâ parte casâ, quadringenti superessent cælibes, qui consensu patrum filiarum, uxores ducere prohibebantur: seniorum consilio decretum est, ut virgines, in choreas procedentes, raperent. Id quoties contingebat, justè factum pronunciabant iidem seniores. Quomodo igitur injustè traderet Majestas illam, quam vicinus justè raperet?

XXI. Hæc omnia, & si quæ alia similia forsan occurrant, ex Potestate in caput deducenda sunt. Non me præterit, esse plures, qui ad finem universæ Reipublicæ respiciunt, quoties causæ ejusmodi potestatum designandæ sunt. Præclare ostendunt, destinationem ordinis communis haud posse explicari, sine actionibus illis si esset: finem autem in moralibus jus dare. Pessimam fore conditionem omnium privatorum, & proinde Reipublicæ quoque, si defuncti civis liberi infantes aut impuberes defensore destituerentur, qui nec caput imbellis pupilli, nec fortunas imperiti moderaretur. Inde detrimentum privatis bonis, quod Reipublicæ ubique nocet. Postulare concinnitatem universæ multitudinis, ut Munera publicæ administrationis, vel ab invitis Magistratibus suscipiantur. Idem velle securitatem

ritatem omnium circa Legatorum missionem. Sed confunditur causa impulsiva cum efficiente. Si enim ordinis observatio hæc talia operatur, non opus est Majestate: aut si ordinem à Majestate pendere, necessum habent fateri; motionem finis ne pro causa effectrice venditent. Quicquid cogitat, suscipit & molitur Majestas, salutis communi, & conservationi ordinis militat: propterea verò ordo hic non est causa, producens imperatoriam actionem; sed saltem instigans Majestatem, ut tali modo operetur. Nam si dixeris, propter concinnitatem, aut salutem totius civitatis, civem oneribus gravari, periculosa Legationi adhiberi: redundabit quaestio; quâ potestate civis caput, propter utilitatem publicam, in discrimen adducere possit Majestas? Ambages quaeret, & nunquam respondebit sincere, qui non asseverabit; Potestatem in caput esse fundamentalem illam causam, cujus virtute propter egregium publicum, labori, aut periculo exponi possit justè subditus. Hæc semel brevibus tangenda erant, cum auctoribus utramque paginam soleant implere.

CAPUT III.

DE

DOMINIO IN BONA PUBLICA.

- I. *Dominium differt ab Imperio.*
- II. *Dominii origo.*

III. *Quan-*

III. *Quantum concessum primitus.*

IV. *Summum retinet Deus, & regi communicat.*

V. *Bona publica in agris, sylvis, venationibus.*

VI. *Via publica, vectigal.*

VII. *Ædificia publica, Res sacra.*

VIII. *Salina, Fodina, Thesauri.*

IX. *Bona maris, fluminum, naufraga.*



E Imperio in caput Subditi ha-
ctenus: alio respectu Majestas
continet *Dominium in Territo-
rium*, & *res*, territorio adharen-
tes. Separatam hæc à se invicem
formalitatem sortiuntur, & non saltem Ob-
jectis, verùm etiam regendi modò, distin-
guuntur. *Imperium* est potestas in personam
subditam, quam jubendo obligat ad obse-
quendum. *Dominium* est potestas de re cor-
porali propriâ disponendi. Ibi *Persona*; hîc
res, subdita est: quæ patitur domini sui ar-
bitrium, & dispositionem, citrà ullam coo-
perationem. At subditus, natura intelligens,
jubetur, jussum exaudit, capit, obligatur,
obtemperat. Assequitur intellectu mandantis
Principis voluntatem, & expendens imperii, &
actionis naturam; ad illud hanc componit at-
que exigit. Res inanima, aut bruta, regimi-
nis, quod in eam est, nullum sensum habet, &
ideò juberi potest nihil, nec obsequi imperanti:
adeoque imperium, strictè dictum, ut in præce-
denti capite usurpavimus, non nisi cum ingenti
improprietate, in rem irrationalem dicetur
pertingere. *Imperare* enim aliquod mandatum
com-

complectitur, quod nisi in naturam intellectualem non dirigitur. Adjicienda etiam est illa diversitatis nota, quod Dominium Majestaticum consequatur Imperium, sive in publica, sive in privata istud se exferat. De privatis suo loco. Dominium in publicum Territorium nasci ex imperio, hinc declaratur, quod persona subdita imperio, nunquam extra locum aliquem ponatur; sed certum aliquod terre spatium occupet, ipsâ divinâ indulgentiâ facultatem ad id commodante. Quotiescunque autem Majestas conceditur alicui, multitudo insignis hominum præsto est, quorum singuli commodam sibi fixerunt sedem, universi autem sufficientem regionis tractum suæ civitati destinarunt. Ubi jam supervenit Majestas, & sub imperium recipit multitudinis hujus capita, non potest non locus, à singulis possessus, subjici potestati imperantis. Quod personâ redactâ sub imperium alterius, omnia bona mobilia, & immobilia simul subdantur regnantis potestati. Qui enim habet imperium in personam, simul habet potestatem in omnia bona, tanquam in accessoria. Ita constitutum imperium extemplò comitatur dominium in Territorium, seu regionem, quam sibi colendam multitudo, accipiens regem, sumserat. Quamvis illud quoque verissimum sit, Deum omnipotentem definivisse regnorum terminos, & Principi in universam civitatem tradidisse facultatem, divinæ parem, (infinitem & independens imperium in his formulis ubique excipimus, tanquam uni Deo dome-

domesticum) cujus vigore & homines regat, & dominetur terræ, sicut utrumque propriâ potestate Maximum Numen moderatur: ac inde surgere dominium in regionem. Attamen, quum ad unum aliquod primum caput, quicquid ubique rerum est, ordinetur; non nimis divellendus est conceptus dominii Majestatici, quasi separatim absque imperio subsistat, suâ virtute: sed reducendus est, ad fontem suum, ex quo derivatur. Præsertim, quum Deus regem constituat; & Majestate instruat, ut hominibus imperet; non ut primaria destinatione terram regat. Huic enim operi Dominium sufficeret; non requireretur Majestas: quæ imprimis homines subjectos habet, & propter homines, res illis subditas.

II. Antequam ad uberiores hujus Domini explicationem progrediamur, paucis occurrendum est dubio, quod obstare videri posset. *Nimirum ante Regis creationem, jam singulis dominium cessit in res suas, in animantia & immobilem sedem; & universis in universam regionem. Sive id jure naturali, aut gentium; sive etiam divinâ liberalitate contigerit: nunquam sine scelere vel singulis, vel universis eripietur, & Majestati assignabitur.* Huic difficultati ut faciamus satis brevi digressionem ut dispiciamus, quæ origo dominii humani fuerit; tum quanta, & qualis concessio ejusdem, opus omnino est. Fictitiis originibus Juris gentium & naturalis, non immorabimur prolixè; verbo saltem tangenda sunt. *Dominia jure Naturali constituta esse, & quarundam rerum domi-*

dominia singulos nancisci jure naturali, quod cum ipso genere humano natura prodidit; subinde legimus in Opere Romanarum legum. Quæ loca, quoties occurrunt cautissimè accipienda sunt; & interpretanda, de permissione Juris naturalis extra constitutam Rempublicam: non de verâ concessione dominii, & perpetua sanctione. Capere feram, volucrem, piscem, ubi civili lege nihil contrarium decretum est, Juris naturalis dicitur esse. non quasi Jus naturale tradat facultatem occupandi bestiam; sed quod non prohibeat. Diversissimum est à Juris Naturalis indole, efficacîâ, objecto, quicquid potestatem sapit. Jus norma est actionum, quibus honestatem commendat, turpitudinem condemnat. Dominium, nec actio est, nec res in se turpis, aut moraliter honesta: & ideò jus naturale de dominio nihil novit. Istius juris perpetua nota est, ut immutabile, & omnibus hominibus infusum sit. Omnes autem species occupationis, inventionis, & quas alias Romani *Juris Naturalis* affirmant, immutatas hodie jure esse, quis est, qui nesciat? Aquam sanè, cujus usus communissimus censetur, in quibusdam locis venditam, observamus. In Sacris notabile est *Num. XX. 17. XXI. 22. Deut. II. 7.* In ipso Romano Jure vestigia sunt, in *L. I. L. XIV. §. 3. de alim. vel cib. leg.* Omnibus hominibus commune est Jus naturale: trahe huc dominia, & una cum illo singulis inerunt. Sed quid dicemus de servo, qui jus naturale participat, nec tamèn dominium, ex illo surgens? Quo jure supera-

superatum hostem spoliabimus dominio, & in illum statum detrudemus, in quo domini omnis reddatur incapax? Jus naturale cum suis regulis, nec consuetudine Gentium, nec Majestatis civili Nomothesiâ abrogatur. Non magis verum est, Iure Gentium cœpisse Dominia. Tribuat huic juri distincta dominia Rom. J Cr: non magis tamen hoc certum est, quàm *Regna hoc Iure esse condita*. Supra observavimus, nimis ambigüe hâc voce scriptores uti, & per eam *consuetudinem ab aliquibus populis receptam*, intelligere, cujus interim causæ restant indagandæ. Eo sensu quicquid in materia Dominiorum ad Jus Gentium refertur, accipiendum est pro more & consuetudine; sed nec perpetuâ, nec obligante. Hæc enim citra obligationem recipiuntur à populis: plenâ libertate aliud atque aliud constituendi. Quæ autem veri Juris Gentium sunt, mutabilitatem ejusmodi ignorant. Id quoque naturale est huic, ut omni Juri, ut actiones humanas moderetur: non sit principium ullius potestatis effectorium. Nam ad productionem potestatis, aut imperii, nullum Jus, quâ tale, ascendit. Nos divinam indulgentiam Causam allegamus dominiorum: Sacram Scripturâ testimonium perhibente. Excipimus Apostoli dictum, *Omni potestatem à Deo esse*; generalissimè, ut dominium quoque, veram potestatem disponendi de re, comprehendat. Ubi primordia mundi scrutamur, Divinæ concessionis illam reperimus formulam: *Crescite & multiplicamini, & replete terram, & subjicite eam*:

Et dominamini piscibus maris, Et volatilibus cæli, Et universis animantibus, quæ moventur super terram. Gen. I. 28. Confirmatum hoc dominium post diluvium, recenti quasi orbi in Noacho fuit, *Gen. ix. Terror vester ac tremor sit super cuncta animalia terræ, Et super omnes volucres cæli, cum universis quæ moventur super terram: omnes pisces maris manui vestra traditi sunt: Et omne quod movetur Et vivit, erit vobis in cibum.* Hinc arcessenda dominiorum incunabula. Benignissimi enim Numinis liberalitati acceptus ferendus est tot beneficiorum cumulus, quibus in primâ creatione humanum genus in divinitatis consortium extollebatur. Nam & animam rationalem, instar illud divinæ sapientiæ, inspiraverat Deus: & sanctitatis suæ ideam voluntati imprefferat; regulam verò inscripserat intellectui. ut homo ubique circumspectè ac providè; ubique honestè ac sanctè versaretur. Adhæc cum Supremo Numini in universa sua creata competeret absolutissimi dominii potestas; in societatem ejusdem benevola communicatione traxit Adamum: ut ad modum terrestris Numinis, de animalibus, plantis, & reliquis, pro arbitrio ad usum suum disponderet; omniaque pro lubitu moderaretur. Qua dominii concessione, ipsis rebus subjectis, animantibus imprimis, quæ sensuum opera subtrahere se humano dominatui poterant, nova quasi circumfusa qualitas fuit, ut hominis metuerent potestatem, ejusque effectibus resisterent. Unde in sacris illa de terrore, & tremore, quæ animantibus cœlitus imponuntur.

III. Hu-

III. Hucusque sacra nos abundè instruunt: quantum autem concessum sit, non usque adeò clarum est. Quum enim dominium Proprietatem notet, quæ excludit alterius dispositionem: dubium emergere potest, quomodo primis parentibus divisim, & postea tot liberis, dominium in omnes res fungibiles datum sit. THOMÆ quidem HOBBIUS illud in mentem venit, *Iure naturali quemlibet habere jus in res omnes: adeò ut facere pro lubitu, quacunque voluerit, & ad se trahere ac possidere singula queat.* Hac lege concessum esse, alterius invadere bona, & universum mundum sub jugum servitutis mittere, quando cuilibet in cujuslibet fortunæ ac corpus ea sit facultas. Verum tam turbulento principio erat opus, ut status naturæ meræ & belli, quem omnis natura & recta ratio damnat, stabiliretur. In rebus tanti momenti nullius dictatoriam agnoscimus sententiam. robustissimis argumentis fulcienda, & validissimis rationibus animanda sunt, quæ in tam arduis negotiis, & nunquam alias inauditis, primum conscribuntur. Iure naturali rapinam & cædem probari, novum est in morali sapientia. Quin ipse Scriptor tandem agnoscit, dominium in res omnes, omnibus competens, frustraneum esse. Dum alius quoque in res omnes habet dominium, nostrum irritum fiat, oportet. Dum alter in rem meam plenam habet facultatem, res mea non est: dum ego in aliorum bona competens aliquid Jus possideo, reverâ detentoris non est dominium in rem detentam. quòd duo separata do-

minia nunquam subsistant, quæ subordinatione concinnâ sibi non cohærent. Aut enim meum dominium impediet alterius: aut hujus evertet meam dispositionem. Quando in sacris etiam legimus indefinitè *hominibus in res, & terram dominium permissum esse*: cavendum est, ne plus tribuamus singulis, quàm reverâ acceperunt. Ego planissimè existimo illâ divinâ beneficentiâ non esse permissum singulis rerum omnium dominium: ob rationem antea positam, quod hoc casu omnes omnia, & universi ac singuli nihil haberent. Non inficiabor, Adamum satis amplum dominium, sine detractiōe, sine concursu alterius accepisse: & quamvis post lapsum apprehensio paullo fuerit laboriosior, proprietati tamen nihil decessisse. Tantam verò potestatem ad posteros propagare, quo minus potuerit, ipsa domini singularis natura, quæ in diversos dividi nescit, obstat. Multiplicatis autem hominibus & posteris Adami, hunc in modum provisum esse arbitror, ut singulis assignata sit facultas, sufficiens sibi spacium occupandi, & quærendi in hoc dominium: & si ita loqui licet, *non continuo dominium ipsum*; sed *jus ad Dominium licitè acquirendum*, datum est. Unde signanter à Domino dictum censeo illud; *SUBJICITE vobis terram*: quod terram, dominio nondum subjectam arguit; aptam tamen & habilem eâ permissione, quæ subjiceretur. Contingebat hoc beneficio Occupationis, quâ perfectum dominium quærebatur possessori: ne cui alteri Jus esset, in posterum, de loco jam capto
ali-

aliquid constituendi. Postquam aliquis posuerat sedem, consecutus dominium, excludebat omnes alios. In hoc enim momento omnis domini virtus consistit, *ut sit proprium*: hoc est, *ita a persona adhereat, ut ipsa præferatur omnibus in usui rei quasita*, & avertat alterius occupationem.

I V. Quamvis autem possessor hunc in modum verum dominium sibi compararet, ut arceret alium hominem à rebus acquisitis: non abdicabat interim Deus in easdem res dominium suum. Animadvertimus enim nullâ traditione, aut communicatione, hominibus facta, posse à Deo removeri, quæ potestatem aliquam sapiunt, qualis in dominio utique comprehenditur. Sicut imperium, homini in hominem concessum, à solâ divinâ potestate oritur; simul tamen penes communicantem eminentissimo quodam modo remanet: ita in dominia humana validum manet dominium Dei; ut inferius illud hominum pro lubitu inhibeat. Ex hoc fundamento interpretandum est mandatum, de mutuandis vasibus Ægyptiorum. Non excusarem Israëlitas à furto, si aliena ipsi vendicassent sibi: sed ubi summi Domini auctoritas accedebat, non potest aliujus sceleris insimulari acquisitio. Rem quippe suam auferibat Dominus indignis possessoribus, & in chariores transferebat. Idem censendum est de damnis, tempestate, igne, fulmine, terræ motu, similibus, illatis. Quæ omnia naturæ mala justitiam immittentis in cō tuentur, quod dominia humana ab su-

premo Domino, ob causas sibi soli cognitae, eripiantur. Hoc supremum dominium amplissimè communicat Vicario suo Deus. Quando enim multitudinem hominum unius Majestate regendam decrevit, Principi inserit jus, quale in partialem illum orbem ipse habet; hoc est, imperium in personas, & dominium in regionem, atque res ibi positas. Et nihilominus in hoc Principis dominium retinet Deus excellentius aliquod, præponderans hanc Majestatis potentiam. Eximius locus exstat apud *Jeremiam*, xxvii. 5, 6. qui dilucidè docet, Deo Opt. Max. quia creavit universa, & imperium in homines, & dominium in animantia & terram ipsam, competere: quod utrumque pro lubitu suo distribuat Regibus. Verba apponam: *Ego feci terram, homines & jumenta quæ sunt in superficie terre, virtute mea maximâ, & brachio meo extento, ideò trado illam cui rectum videtur in oculis meis. Nunc itaque ego trado omnes regiones istas in manus Nebucadnezaris, Regis Babylonia, servi mei: quinetiam bestias agri trado ei, ut serviant ei.* Et in Psalmis (Lxxxii. 8.) notanter dictum est: *Surge ô Deus judica terram: tu enim hereditarium, seu perpetuum, dominium habes in omnes gentes.*

V. Postquam ita in Majestatem transiit dominium rerum, præprimis territorii: dividitur hoc ipsum in duas partes, quarum altera subditis cedit, reservatâ Principi superiore facultate; altera in possessione Principis manet, & *Bonorum Publicorum* titulo venit. Partiri hæc

hæc bona possumus, respectu *terrae & aquæ*. Aut enim solidus fundus est, aut fluvius, stagnum, mare, quod fines & limites alicujus Reipublicæ ingreditur. Terram iterum distribuimus in *Superficiem*, & *partes interiores*. In *Superficie* publicum est omne, quod privatis possessoribus non est traditum. Qua in classe ponimus *agros*, *segeti*, aut *gramini* destinatos, ad usum Principis. Item *hortos*, & quemlibet locum, fructibus floribusque ferendis confitum; & in genere omne spatium, quod vel utilitati, vel honestæ voluptati Regis inservit. Huc pertinent *Sylvæ*, & omne Sylvarum commodum, undecunque proveniens. Cujus enim territorium & solum est, ejus omnia fiunt, quæ in solo nascuntur. Inde *Jus Foresti*, & dispositio de lignis innascentibus sylvæ. Hac occasione oritur *jus venationum*, quod illi tantum justè tribuimus, cujus territorium est, in quo nutriuntur, in quo capiuntur feræ. Si peregrinum, ingredi parantem fundum, prohibere privatus potest: quidni multò magis subditos arceat Majestas ab ingressu publici arbusi? Sed cum hæc ratione plures utilitates interciperentur, satius erat concedere transitum per ejusmodi sylvas: sed ne quid attrectet subditus, aut peregrinus viator, quod privatis usibus dicatum non est, severâ lege sanciri potest. Venationum igitur, subditis interdictarum, fundamentum, est Majestatis dominium in territorium, specialiter, in sylvam, & nascentia in sylvis. Quò posito, non habemus opus confugere ad infirmas rationes, quibus excusatur

Jus Venationum, Principibus solis in plerisque locis assertum. Dicunt; *Principem continuos labores pro Republicâ sustinere; eos solandos esse aliquâ voluptate. Accedere præscriptionem longissimi temporis, possessorum jus firmaturam. Nascentur lites inter venatores, & rem propè abfuturam à seditione, si promiscua venatio, & usus armorum esset vulgo. Verendum esse, ne agricultura negligatur, aut species quæque ferarum perpetuo venatu extinguantur.* Honestè differunt, qui ita statuunt: sed nisi aliunde accesserit justitia, & facultas feras sibi attribuendi, dictis argumentis non asseretur Principi Jus. Concessa voluptas abundè est Regibus; sed illa ne injusta sit oportet. Sola voluptas hucusque justitiam non includit. Quid si Princeps eam voluptatem sectetur, quem Reip. cura non nimis tangit? cessabit laboris præmium, & iniquè forsan excludetur subditus à venatu? Præscriptio nimis extenditur ab Scriptoribus ad negotia, quæ plerumque fulcris aliis non sustententur, & alienissima sunt insuper à præscriptionis virtute. Necessum est, ut Præscriptio habeat fundamentum in aliquâ Potestate, & versetur circa negotium, suâ naturâ non injustum. Si venatio subditis iniquè eripitur, nullo temporis spatio iniquitas in æquitatem vertet. Ingravescit injustitia, diuturno tempore exercita. Lites & certamina averruncari poterunt legibus, certum modum venatori definientibus. Venatio concessa fuit, cum armorum usus esset illicitus. quanquam seditionem, ob concessum

cessum armorum usum , non metuat , nisi corrupta Resp. Incertus metus , negligendæ agriculturæ , non sufficit ad auferendum certum jus. Nec periculum erat , ut omnes species interirent ; quum vix capiantur tot à singulis , quot à Principe unâ venatione. Non tuerentur Principem invalida hæc auxilia , nisi Dominio suo tutus atque securus esset. Quid enim responderent , si Princeps , Reipublicæ non satis studiosus , nec laborum , quas dignitas illa secum trahit , patiens , prohiberet subditos à consuetâ hæcenus , & nunquam vetitâ alias venatione : si præterea populus pacatissimus , qui Majestatem reverenter habeat ; & ferarum copiosissimus numerus esset , singulis venatoribus abundè sufficiens ? Tali rerum statu affirmandum fortean erit ; Principem injustè ad se trahere venationes. Tantum est ignorasse actionum regalium fundamenta. Eadem conditio est *Ancupii*. Quanquam enim aëris dicuntur volucres , qui aër proculdubio communis est : nidificant tamen vel in terrâ , vel sylvis & arboribus , & ex territorio aluntur. Domino ergo territorii cedent. Quod tum quoque affirmandum est , quando in privatis fundis capiuntur. Idem quippe Judicium hîc est , ac si privati jumentum in alterius fundo reperiretur.

VI. Huc referendum est spatium illud superficiæ , quod à Principe quidem separatim non possidetur ; nemini tamen privatorum assignatum , sed omnium transeuntium usui dicatum est , quod *viam publicam* appellamus.

Intuitu potestatis in hanc viam, promulget Majestas illa Edicta, & Interdicta, quæ hunc locum concernunt. Animadvertit quoque in omnes, qui contra privilegia viæ publicæ aliquid commiserunt. Summa enim securitas huic tramiti debetur, ut peregrinantes, & cives hinc inde commeantes, extra periculum positi sint. Hîc fundamentum suum habent *Vectigalia*. Nemo enim cogitur, ut patiatur suas possessiones quemlibet ingredi: præsertim si aliquod damnum ex frequenti transitu emergat. quod usu venire solet, ut viæ, quæ frequentantur, refectione indigeant, & sumptuum erogatione. Quamvis autem vectigal in genere significet omnem pecuniam, quæ vel *tributi*, vel *collectæ*, vel alio nomine in publicum confertur; unde Festo, vectigal dicitur *es, quod ob tributum & stipendium, & extraordinarium populo debetur*: regna quoque, principatus, & agri dicuntur *vectigales*, qui aliquod tributum solvunt, aut publicè locati sunt. Nobis tamen est precium, *quod à trans-euntibus solvitur*; præsertim pro evehendis, invehendis, aut distrahendis mercibus. Imperatur nimirum ordinariè mercatoribus, qui commerciis suis rem faciunt. Quanquam etiam personæ possit imponi; modicum tamen illud est, & ab exteris præcipuè petitur, quando regionem nostram appellant. Quemadmodum in Angliâ fieri, notum est. A civibus tantundem exigere quidem Majestati fas est: prudentiæ tamen rectoris monitum erit, ut extra necessitatis casum vel planè remittatur hoc

onus

onus, aut exiguum quid pendatur. Minus molestum erit subditis, vel peregrino æquiparari in vectigali, pro transitu per pontem, aut aliam molem, quæ commoditati & utilitati Reipublicæ, sumtibus Principis exstructa est. Tum enim præter Dominium in locum, accedit impensarum ratio: quæ vectigal æquum pronunciat. Verùm æquitas exercendi vectigalis, alii doctrinæ, quæ officium Principis explicat, propria est: præsentī opere Potestatem persequimur: cujus vigore Majestas exigit aliquid à quibusvis transeuntibus, & si opus sit, solitas exactiones auget. Instituire simul vectigalia, & augere licet Majestati: tum certis personis gratiam facere hujus expensæ; item Pœnam Commissi infligere, si quis gnarus ac sciens, & satis monitus, defraudare voluerit publicum. Ejusmodi merces eripere impostori, vindictæ potestatis opus fuerit. Ignoranti autem dictare mulctam, nulla potestatis efficacia potest.

VII. Ex genere publicorum Bonorum esse *Ædificia publica*, Armamentaria, Curias, Regias, similia, clarius est, quam ut dici debeat. Circa *sacras res*, templa, vasa, & alia loca atque instrumenta, Deo dicata, dubium restat. Nam consecrasse hæc Numini devotas mentes, in aperto est. Romanorum lege prohibitum est talium rerum commercium, ut nec alienari, nec pignore obligari queant. Verùm satis certum est, ejusmodi res mobiles vel immobiles, exemptas quidem esse privatorum patrimoniiis; non tamen desinere esse sub domi-

nio & possessione Majestatis. Nam constitutio, de non alienandis, aut oppignorandis his talibus, ab imperantis potestate, quæ in hæc extenditur, procedit: tum maximè approbati casus, quibus venditio rei sacræ permissa est. Excepta nimirum à prohibitoriâ sanctione, *captivitatis, & famis causa*; item *sepulture*. Nam ut redimantur ab infidelibus capti, ut alimentis juventur egeni, ut mortuis insepultis præstetur ultimum humanitatis officium: legitimas venditiones, & oppignorationes esse, censent leges civiles. L. *xxii. C. de SS. Eccl.* cum *Auth.* quod non absurdum sit, *animas hominum quibuscunq; vasis, & vestimentis præferri*. Eximiè quoque Canones: *Aurum Ecclesia habet, non ut servet, sed eroget, & subveniat in necessitatibus. Quid opus est custodire, quod nihil adjuvat?* c. *aurum. 20. xi. 2.* Eo ipso dū alienari permittuatur Sacra, in potestate permittentis, & dominio Majestatis sunt. Nunquā efficaciter transfertur res ad alium, quæ nō est in dominio transferentis, aut cujus permissu transfertur. Plurima exēpla egregiè annotavit GROTIUS, quibus ex jure Gentium ostendere conatur, *Sacra Republicæ esse*: L. *III. c. V. n. II.* quod captā civitate profana fiāt, & in potestatem redigantur hostium. Sed cū facta & dicta, circa hoc argumentum, hominum sint gentilium; nescio, an satis tuto iisdem fidendum sit: & valdè dubito, num locum inveniant circa res, immortali Deo consecratas, judicia Ethnicorum, qui hostium Idola plerumque pro falsis Diis habebant, quos spoliare atque contemnere fas esse

esse putabant. Quo ipso satis controversū redditur, quod illis probari debebat; quod *qua sacra dicuntur, non eripiantur humanis usibus, sed publica sint, sacra autem nominentur à fine, cui destinata sunt.* Nam TERTULLIANUS etiam, in Annotatis citatus, *id negotium sine injuriâ Deorum non esse, ex hypothesis disputat.* Et tot *Sacrilegia Romanorum*, quod Trophæa, statuit. Non impugno Grotianam Thesin, cum idem sentiam: verum istis allegatis & exemplis, nondum probatâ satis video. Tutius quid suppeditarent exempla, ex Sacris litteris petita. Thesaurum quippe sacrum à Regibus Israeliticis, non impiis, traditum hostibus, non uno loco observamus. *Ioas enim Hazaël, Syriæ Regi; sive tributis ac vectigalis, sive muneris nomine dedit, quicquid in consecratis bonis reperit. iv. Reg. xii. 18.* Idem in *Hiskia* rebus gestis occurrit, qui Sanheribo, Assyriorum Regi, propitiando misit, quantum in regio, & sacro thesauro pecuniæ fuit. *iv. Reg. xviii. 15.* Non arbitrandū est, optimos illos reges, bona, extra potestatem suā posita, contrectasse. Nam monuisset procul dubio Hiskiam Propheta, quum supplex ille Dei auxilium imploraret, & impetraret. Justè igitur fecerunt dicti Reges: sed quodnam est fundamentum justæ hujus potestatis? Quod Poëta dixit ex personâ adulatoris; *Divisum imperium cum Iove Caesar habet*: invertendum est, ut fiat civilis sententia, hunc in modum; *Conjunctum imperium & dominium, cum auctore suo, Deo, Princeps habet.* Fac, ejusmodi consecratione donari

donari Deo aliquid posse: eò ipso momento, quo donaretur, particeps domini fieret Majestas. Qui Principem consortem fecit imperii, & domini, in universam multitudinem, in integrum territorium, nunquam excepit hæc donaria. Sed simulac donarium à devoto homine capit, continuo illud sub vicario dominio Regis ponit. Quòd nulla caussa subsit, cur hæc subtrahat Majestati; quæ nunquam extra sacros usus adhibebit talia, nisi urgentissima forsan necessitate Reipublicæ. Nam in hostium quoque, verum Deum colentium, sacra, nulla petulantia victoris excusabitur, quæ profanis usibus illa aptabit. Quo animo quid fiat, hîc multum interest. Diruere templum, nostrum, vel alienum, nobis propter hostium præsentissimam vim nociturum, licitum esse per Dominium publicum, omninò censeo. In contemptum Numinis non violabit, nec vasa, destinata sacris, in luxuriæ instrumenta vertet, nisi qui cum Belfazare certo & condigno infortunio cupiet mactari.

VIII. Intra terram Bona Publica habet Majestas, quantum in intimis recessibus & visceribus continetur. Quò pertinent *Salinae* & *Fodinae* omnis generis: quæ non tantum sub viis & locis publicis, sed privatis quoque, Majestati cedunt. Non movemur dictorio; *quòd prædia, ut supra terram libera sunt in cælum usque: ita libera debeant esse usque in profundum.* Nam libertas ejusmodi ex naturâ privatæ possessionis nunquam surgit. Concessio superioris utrumque permittet, utrumque poterit

erit impedire. Nam vel sola superficies agro, aut prædio destinari potest; aut quantum fundamentis jaciendis satis est: reliqua servabuntur imperanti. In hujus quippe manu est, tribuere privatis possessoribus, quantum æquum judicaverit, in subterraneis. Sunt qui metallorum fodinas, propter amplissimas impensas, & ingentes sumptus, quibus privati non sufficiunt, Principi transcribunt. Sed dominium in territorium complectitur loca subterranea, ut non opus sit potestatem in metalla, & reliquas fodinas, ab heterogeneo principio divitiarum, opulentiæ, & sumptuum petere. Si enim universi subditi sufficerent sumptibus erogandis, forsitan extorqueretur Principi facultas in hæc bona, & subditis assereretur? Num huc referri debeant thesauri, ambigere posset, qui reputaret, non amplius partem, aut proveniunt terræ esse, ab homine reconditam pecuniam. Interim, quia evasit dominium privatum, & factum hominis, plerumque avari, humanis usibus subducta, & pristinis tenebris, atque natalibus adeò restituta est; non arguemur ingentis confusionis, si eodem jure thesaurum censeamus, quo mineralia & metalla reliqua, & una cum his Majestatis dominio vendicemus. Nam quod interdum inventi totus, aut ex parte cedit, liberalitati Principis dandum est; non quasi nequeat sibi servare Majestatem, & possessioni inferre, quod nullius privatorum est.

IX. Tandem dominio publico Majestatis subjacet *aqua*, cujuscunque generis sit. Non
tan-

tantum in fluvios, aut stagna, intra territorium, valere dispositionem Principis; sed maris quoque alluentis certos posse designari limites, intra quos imperium & dominium valeat, mihi indubitatum est. Utilitas ex hoc elemento in Rempublicam varia potest redundare: præcipua posita est in piscatione, & navigatione. Piscatio omnino Principis est, tam in flumine, quam mari, subjecto alicujus dominio. Neque adulatoriè locutus esset, qui Tyranni omnes pisces maris esse, respondit: modò de piscibus intra limites Romanos id voluisset intellectum. nam hîc continens appropriat domino suo contentum. Sicut privatis possessoribus cedit, solo superimpositum, inædificatum & implantatum. Nascuntur pisces in flumine, aluntur in flumine, publico aliquo bono: cedent igitur publico. Piscinas, & harum contenta non intelligo, cum artificiales aquæ sint, & privatis jam permissæ. Sed publica flumina, & maria. Eodem modo se res habet, ac in venatione ferarum. quod & piscatio genus aliquod sit venationis. Ut igitur arcere potest imperans privatum venatorem: ita quoque repellere & subditum, & peregrinum, qui ripam & littora piscandi animo accesserit. Non mirum est, Romanis licitum fuisse piscari in flumine publico, & multo magis circa littora in maris: cum in hoc populo omnis venatio fuerit permissa. Nihilominus hæc permissio Majestatis est, quæ poterat non permittere. Quemadmodum videmus multis populis mare accolentibus,

jus

jus piscandi curæ esse, ne promiscua licentia damnum inferat Reip. quâ occasione ad arma sæpe ventum est. Interest tranquillitatis publicæ, ut privatis, non nisi permissu Imperantis liceat piscari. Navigationem, in flumine & mari, quatenus subditum est; determinare potest Princeps, in quantum dominium in hæc habet. Sicuti transitum per viam publicam definire valebat, vi domini in partem illam terræ: ita navigantibus leges præscribet, beneficio ejusdem potestatis in aquam. Ex hac facultate nascuntur vectigalia, à navigiis exigì solita. quod in fluminibus frequentissimum est; nec non ubi maria in fretum angustantur. Eadem, quæ in terrestribus vectigalibus, hîc ratio subest: quòd non cogatur ullo jure Majestas, permittere cuilibet flumen navigare; & impedire idèò possit, si quis contra voluntatem domini flumen, aut fretum transire paratus sit. Inter fructus domini publici, quod in aquam est, numeraverim ejecta in ripas & littora: quæ scilicet ex fundo suo fluvius, aut mare adjicit. nata in hoc fertili elemento, non secus ac metalla terræ, fiunt Imperantis, ut hujus solius jussu, aut permissu occurrant: similiter si maris unda quædam ex his ad vexerit, & littori appulerit, domino littoris proprium fiet. Et quamvis iterum Romanum jus talia ejecta inventori permittat; indulgentia est Principis, aut populi liberi communis usus: non perpetuum & immutabile jus. Ita Electrum, quod in
littore

littore Borussiae reperitur, Domino territorii servatur. Ita de omnibus ejusmodi advectis censendum est: Domini regionis esse, qui ex re suâ fructum percipit. In hujus manu positum est, indulgere subditis, ut aliquid ex his suum faciant: sed tum meminerint, ex beneficentia Majestatis illa acquiri, non suo jure aut merito sibi deberi. Quod in universum verum est de rebus, quæ nullius privati dominium adhuc dum ingressæ sunt. Cæterum his bonis publicis nullo modo accensenda sunt bona naufragorū, hyberno fluctu littori adjecta: quæ in pluribus locis, tanquam proventus maris, qui impendia, in aggeres facta, solari debeat, fisco adjudicantur. Immanitas est, & plus quam barbara consuetudo, amici & confœderati populi civem, qui nec læsit quemquam, nec lædere voluit, facultatibus spoliare, quibus tempestatis rabies pepercit. Iniquissimum jus est, quod afflictum exuit fortunis; salvum & divitem, dimittit integrum. Si in portum descendisset firma navis; jus nullum habebas in peregrina bona: nunc cum miser naufragium fecerit, deprædandus est, ne qua calamitas sola sit. Humanæ societatis interest, juvare miseros: afflicto verò addere afflictionem, paulo supra beluarum feritatem eminens crudelitas est.

CAPUT IV.

DE

DOMINIO EMINENTE.

- I. *Potestas in bona privata;*
- II. *Non est Protectio, Administratio, Iurisdictio;*
- III. *Non Imperium.*
- IV. *Non ordo Reip; aut necessitas.*
- V. *Sed Dominium Eminens.*
- VI. *Probatio ex jure civili, remittitur.*
- VII. *Probatum a Consensu Doctorum;*
- VIII. *A Scriptura & locis;*
- IX. *Ab Essentia domini.*
- X. *Ostenditur Causa proxima.*
- XI. *Dom. Emin. non commendat rapinas.*
- XII. *Nec peccat contra Principia juris.*
- XIII. *Nec damnatur in Sacris Litteris.*
- XIV. *Ejus effectus, Conservatio dom. priv.*
- XV. *Vfuscapio; erepta hostibus res.*
- XVI. *Detractio, Multa, beneficii revocatio.*
- XVII. *Tributum.*
- XVIII. *Occupatio privatarum opum.*
- XIX. *Dom. Em. semper & ubique habet Rex.*
- XX. *An Veneatur ad Compensationem?*



Ltera portio bonorum, quæ in Republicâ inveniuntur, in subditos transcripta, & singulis possessoribus assignata est: ita ut vi domini, quod privati in has suas res habent, possint pro lubitu disponere; modè

modò dispositione tali nō peccent in leges imperantis, quibus illa circumscribitur & limitatur. Nam dominium privatorum potestas quidem est disponendi de re; verū non absoluta & summa potestas; sed quæ superiorem agnoscit, à qua legem, & normam accipit. quare de essentiâ Dispositionis hujus, crediderunt J Cti, esse restrictionem ad voluntatem legislatoris, ut procedat hætenus disponendi facultas, *quatenus quis lege non prohibetur*. Quæ definitio satis docet, de natura esse privati domini, limitationem ejusmodi pati à Majestate, cui, post constitutum dominium singulorum, facultas superest in hæc ipsa possessa: quæ apertissimè se exserit in occupatione privatarum facultatum, quoties Reipublicæ ratio id postulat. Quoties nimirum hostis imminet urbi, munimentis non satis validæ, Imperantibus fas est, subvertere ædificia, incommodatura defensionis, & spatium dirutarum ædium, exstruendo propugnaculo, latius ducendis fossis, adhibere; & proximiores hortos, in valli usum transportare. Suburbia toties cognovimus diruta atque cremata, ne hosti receptaculo essent, quoties obsidionis periculum opidanis incussit metum. Extra hostile periculum quoq; , ædificia, mœnibus & publicis operibus ita sociata & cohærentia, ut ex his incendium, vel insidias vicinitas reformidet, dirui ac prosterni, Imperatores *Arcadius & Honorius* præceperunt. quod ut in commune jus Romanis iret, æquum putantes J Cti, Imperatorio Codici inseruerunt. L. XIV. C. de op. pub.

Et

Et hucusque consentiunt ferè omnes; esse Majestati jus, adhibendi privata in usum publicum: nec in diversum abeunt, qui ipsum Dominium Eminens inficiantur. Nam cogi posse subditum, qui suis fortunis nolit succurrere laboranti civitati, communiter tradunt, & à doctissimo FELDENO datur. in l. 1. Grot. *Quia munus civis exigit, ut omnia bona pro salute patriæ profundat: ad ejusmodi actionem virtuosam imperans subditos cogere, & nisi ultro faciant, vel auferendo, vel pœnâ coercendo, vim addere potest. Non tamen dominium absolutum in bona civium eidem competit.* Ad hæc formula Jurisjurandi, quo subjectionis fidelitatem sanctissimè pollicentur ac spondent inaugurato jam Principi, illud usitatum vinculum complectitur, ut *vitam & sanguinem; tum omnem fortunarum suarum substantiam, Reipublicæ usibus, & Principis imperio, consecrent atque promittant.* Ratio autem, propter quam subjicimus dominium privatorum Principi, illa est, quod dominium sit *aliqua Potestas; in Republica verò Majestati tanquam summa potestati, omnis privatorum subsit potestas.* Cæterum, qualis, & quanta sit illa facultas, qua Princeps obligatas subditi opes ab invito petere, & publicæ utilitati impendere queat, impræsentiarum dispiciendum est. Si cogi potest jure subditus, repugnans provisioni imperantis; considerandum accuratè, quæ sit illa potestas, cujus beneficio validè & efficaciter exigere queat bona subditi Majestas. Quodibet munus civis, cui obli-

obligatur, præsupponit aliquam imperii facultatem. nec assequimur intellectu officium subditi, quod respectum non habeat ad præcedens aliquod Jus Majestatis. Aperiendum igitur erat, quodnam Jus imperantis, munus illud parenti tam potenter imponat, ut in nolentem justa procedat coactio, & occupatio bonorum sine scelere, & infami notâ rapinæ.

II. Qui vulgo hoc argumentum tractant, non rejiculam illius dispositionis, quæ in privata se exserit, adduxerunt rationem: statuentes, *omnia Principis esse; Majestatem omnium in Republicâ esse dominam*. Sed verissimam assertionem corrumpunt, detorto interpretamento; Principis omnia esse, *ratione Protectionis, Administrationis, & Jurisdictionis*. quo ipso evertunt potestatem in bona privata. Sola protectio non denotat efficacissimam hanc potestatem: cum peregrina quoque soleamus protegere, in quæ nullum jus defensori datum est. Ita præsidiarii defendunt cives, & civium bona, contra hostes. ita custos aliquis mercede conductus, vigili oculo observat merces, ne furibus pateant. interim jus in bona nec vigili, nec militi competit. Et diversissimus à Protectione actus est, quem imprimis examinamus hîc. Occupandi scilicet jus quærimus, cujus beneficio Majestas, flagitantibus ita rationibus civilibus, invadere queat privatas possessiones. Tuetur suos atque defendit imperans, universali illa belligerandi facultate, quando ingruentium hostium impetus armorum

rum ope repellit, & integram Rempublicam salvam præstat atque incolumem. Sed multum distat hæc tutela ab occupatione. Ipse Princeps suo, & Reipublicæ tempore, invadens privata, quidvis potius aliud agit, quàm ut possessori eadem, quæ eripit, defendat. Quamvis etiam dixeris, *propter Defensionem universæ civitatis, cui singulorum Protecilio coheret, eripi bona privata*: alienissimum à quæstione attuleris. Non enim finem, scopum, ac destinationem eripientis attendimus jam; sed fundamentum quærimus, & facultatem eripiendi. Superest pristinum dubium; quæ sit illa potestas, ex quâ involare queat singulorum fortunas, ad defensionem universi. ADMINISTRATIONIS vocabulum minimè explicat tam ingentem rem: & mihi non uno nomine suspectum est. quod sacram illam referat sententiam, opinantium; *Reges procuratores esse alieni imperii; quibus præter administrationem rerum, ad utilitatem publicam, concessum sit nihil à populo*. Sed hi tales Majestatem, in faciem Magistratus transformant; & imperium regnantis in ministerium atque servitium migrant. A quibus hominibus, non saltem civilis prudentiæ studiosis; sed ipsis Potestatibus regnatricibus cavendum sedulo est. Magnum enim momentum in labefactandâ & evertendâ Republica faciunt ejusmodi assertiones, quoties in vulgares & seditiosas animas inciderint. Usurpabunt quidem hoc nomen *Administrationis*, etiam reverentes Majestatis viri: id tamen generalissimo significato, &

qui

qui idem notet, ac regimen, seu imperium, exaudiendum est. & tum maximè Deum intuebuntur, cujus Administrator, & Vicarius in regendâ multitudine Princeps est. respectu populi, imperans ubique Deum, præsentissimo imperio refert. Quis etiam ministro talem licentiam permetteret, ut invitis rerum dominis auferre possit bona? JURISDICTIONEM non nisi præposterè allegaveris. Sive enim impropriissimè, & plusquam vulgari notione, intelligas universam Majestatem: non penetrabis in veram & proximam causam nostri negotii. adhuc nempe ignarus, quale sit jus istud, propter quod Princeps justè ad se trahit privata. Et in præsentī materia non satis habemus, nominasse integrum Jus Majestaticum: ad domesticos fontes cujusque actionis civilis & imperatoriae respiciendum est; secundum quem particularem & determinatum respectum ejusmodi quid possit Majestas. Sive suo genuino, & nativo sensu capias Jurisdictionis vocem, *pro Facultate judicandi*: in longè difficiliore ambages atque errores te indues; & eadem concinnitate, ex jure foederum, aut pacis, derivare poteras hunc actum. Nimirum *ipse actus* contradicit, & *objectum* Jurisdictionis longissimè hinc abit. Judicium Majestaticum circa controversias civium, aut actiones, contra leges impingentes, & animadversionem eis debitam, occupatur, nihilque aliud agit, quam ut cognoscat, decidat, condemnet, puniat. Facultas autem in bona nec litem aut controversiam respicit,

icit, nec aliquod privati delictum; & oratur deinde illa, quæ à decisoriâ sententiâ, pœnâ, quam maximè distant. Non enim agimus tantum de illis, quæ in pœnam erantur possessoribus. Nisi ergo velis distinctima confundere, opum privatarum ablationem nunquam ad Jurisdictionem retuleris.

III. De IMPERIO idem affirmandum arbor. Quamvis enim interpretum vulgus in Protectione, Administratione, & Jurisdictione, conjungat *Imperium*: accuratiores nilominus, deprehensâ istorum vocabulorum separatissimâ naturâ, maluerunt *imperium* solum laudare causam facultatis, in privata tendentis. Optimè poterant mereri de civili studio, & reportare laudem rei dextrè plicatæ, modò aperuissent, *quid nam sit illud Imperium*. Nam si quæsieris hoc ab illis, i ad ductum Romanarum legum hanc distinctionem tractant; non video quale, præter *Merum* & *Mixtum*, imperium sint allegari. & utrumque hoc sub Judicandi Potestate comprehenditur: dum alterum causas civiles, & minus graves; alterum severiores pœnis moderatur. Aliud igitur fuerit hoc Imperium. Quod inexplicabile manebit, licet C. I. LDENI in L. I. Grot. sequaris declarationem, si imperium civile *non dominium comprehendit in res singulorum, sed disponit circa mores civium, seu justum universale*. Quomodo jam circa bona privata occupabitur imperium, quod mores civium format? quod justum ordinat universale, cui ablationis actus minimè

innectitur. Non obiter nominandū saltem hoc principium; sed perspicuè illustrandum, ut ejus natura innotesceret omnibus: tum robustis quoque rationibus firmandum erat; ut convinceretur quilibet, non aliud esse fundamentum, quando Princeps privata in publicos usus trahit, quam Imperium. Hæc inquam, planis & vivis argumentis ostendenda erant. Non satis est, *Senecam* adduxisse, qui primus videtur apportasse titulum *Imperii* in hanc disputationem. Pluribus quidem verbis explicare conatur illam loquendi formulam, *Principis omnia esse imperio*: num verò expleat cognoscantis animum suā declaratione, experiatur quisque, seipsum sincerè examinando, an satis capiat negotium. Verba *Annaei* hæc sunt, *De benef.* VII. 4. *Iure civili omnia Regis sunt: Et tamen illa, quorum ad regem pertinet universa possessio, in singulos dominos descripta sunt, Et unaquæque res habet possessorem suum. Itaque dare regi Et domum, Et mancipium, Et pecuniam possumus: nec donare illi de suo dicimur. Ad reges enim potestas omnium pertinet, ad singulos proprietates. Et principio sequentis capituli: Enim sic omnia sapientis esse dico, ut nihilominus proprium quisque in rebus suis dominium habeat: quemadmodum sub optimo rege, omnia rex imperio possidet, singuli domino. Fateor me nec dum capere, quid sibi velit Imperium: adeò ancipiti & inconstanti sensu posuit illud nomen. Interpretatur quidem de potestate: non malè; sed qualis illa est potestas? Ambiguum per æquè ambiguum explicat. Millies dicat*

at licet, *Principis omnia esse Imperio*, hoc
, potestate: nemo doctior inde recedet. Po-
 tatis vox generalior adhuc est Imperii voca-
 lo: cum Dominium quoque respiciat, cui
 alè hîc opponitur. Istud quoque ignoro, quo-
 modo ad regem pertineat univèrſa poſſeſſio,
 unaquæque res habeat poſſeſſorem ſuum.
 actenus inauditum eſt in Poſſeſſionum do-
 rinâ, duos unius rei poſſeſſores eſſe ſimul.
 ec opus erat optimum regem huc vocare:
 m peſſimus Tyrannus eadem jura Majeſta-
 habeat, quæ pientiffimus Rex. Et magis
 magis ſuſpectum mihi evadit hoc Imperi-
 n, quo attentius contextum iſtius ſcripti,
 aſſerti occaſionem perſequor. *Sapientis o-*
nia eſſe, dixerat. Hoc Paradoxum Stoicum
 uſtrat exemplo regis; ſic omnia ſapientis
 ſe, quemadmodum optimi regis, imperio.
 onſociat Regis imperium ſapientis poſſeſ-
 ſioni: quâ ſi verius illud non eſt, paradoxum
 oportet. nam ſapientis dominium in omnia
 uſquam figmentum eſt: in cujus conſortium
 Principis poteſtatem trahimus, nullam eſſe
 tebimur. Et extingunt totum negotium,
 iæ habet capite VI. *Posſum donare ſapienti,*
quod viritum meum eſt, licet illius ſint omnia.
Tam cum regio more cuncta conſcientia poſſi-
dat, ſingularum autem rerum in unumquem-
que proprietas ſit ſparſa: Et accipere munus, Et
habere, Et emere, Et conducere poteſt. Caſar
omnia habet, fiſcus ejus privata tantum, ac
ia: Et univèrſa in imperio ejus ſunt, in pa-
rimonio propria. Quid ejus ſit, quid non ſit,

sine diminutione imperii queritur. nam id quoque quod tanquam alienum abjudicatur, aliter illius est. Sic sapiens universa animo possidet, jure ac dominio sua. Destruitur Majestatis jus, imaginaria illa sapientis facultate. Quoties imperium in tam vilem comparisonem detruditur, ut privati hominis conditioni assimiletur, quantum in componente est, evertitur. Transcendit omnium privatorum, sapientissimorum etiam, potestatem, quicquid Majestatem constituit. Regii moris haud est, conscientia aliquid, aut animo possidere: præsentior, & efficacior vis ad nostrum opus requiritur. Exponatur mihi, quid sit *conscientiâ possidere*, quid *animo*: in oppositione veræ possessionis, & veri domini. Omnia esse alicujus, citra veram detentionem, & genuinum dominium, solâ conscientia; hoc est, imaginatione invalidâ, quæ de rebus istis universis, aut singulis, nihil possit disponere: nemo serius, qui extra figuram ludentem usurpet vocabula, affirmabit. ad regiam verò potestatem, in privatorum bona se exserentem, illud paradoxum non transferet, nisi Majestati inimicus. Quare non magis assentiar huic loco, quàm judicio, quod de hereditate, præcedente libro, vel probat, vel non reprobat. *Iurisconsultorum ista acuta ineptia sunt, qui hereditatem negant usucapi posse: sed ea quæ in hereditate sunt: tanquam quidquam aliud sit hereditas, quàm ea quæ in hereditate sunt.* Et passim plura notavi in hoc Scriptore, quæ fundamenta civilia quatiunt & convellunt: & nolim

nolim auctor fieri Politicæ Studioſo, ut cum eloquentiſſimo *Seneca*, qui argumento nunquam non ſervit, in tenebris micet. Cæterum, qui auctoritate *Seneca* freti, aut ſuo ingenio uſi, Imperii nomen adhibuerunt, ut modò dixi, quid per imperium intelligant, non aperuerunt. Quod ſi tamen politicum ſignificatum inefſe crediderunt, ut par eſt, huic voci, duplici notione accipi potuit: ſed quarum nulla expediendæ quæſtioni conducit. Si enim accipiant, tanquam *universalem & generalem terminum, qui integram Majeſtatem involvat*; minimè pugnamus, propter imperium habere Principem poteſtatem in bona privata. Idem quippe eſt, ac ſi dicerem; propter Majeſtatem Principi illud jus competere, nam imperium civile, & Majeſtas, hætenus Synonyma ſunt. Verum quia non vulgariter & confuſe tractanda ſunt Majeſtatis Sacra: nominandum eſt jus certum, cujus virtute talia Majeſtas expediat. Redit enim quæſtio; *qualis ſit illa, & qua poteſtas, qua propter Imperium, & Majeſtatem, Principi in ſingulorum bona conceditur*. Ubi habemus actum aliquem particularem, ab aliis diſtinctum; non ſufficit, imperium in genere, aut integram Majeſtatem allegare cauſſam: niſi jus armorum, leges ferendi, Sacrorum, cum reliquis, titulo ſuo & diſcrimine exuere, & relegato diſtincto ſingulorum conceptu, informe chaos velimus Politicæ inferre: ſed oſtendendum eſt, quodnam proximum, & genuinum principium determinata illa actio habeat. Eodem numero

ac jure censendam putaverim opinionem illorum, qui *Plenitudinem potestatis* in ore habent. nam præter summum imperium Majestaticum, nihil ex hac loquendi formulâ expresse-
 ris; quod cum imperio, nude posito, unum ac idem est. In eo nimirum peccat assertio, quod integrum adducat, ubi pars certa nominanda est. Originem interim suam satis defendet Plenitudo Potestatis, ut necessum haud sit dubitare, num à Deo, an à Diabolo proveniat. Nulla quippe potestas est, quæ ad Deum non referat suum ortum. Alio modo Imperium *strictiori*, & adeò *specialiori significatione accipitur*, pro *Potestate in Personam*: quemadmodum supra usurpavimus. Si dispiciamus jam applicationem, ad præsens nostrum negotium, neutiquam aptabitur hoc principium. quod persona satis discernatur à bonis, & imperium circa ejusmodi objectum occupetur, quod jussa regnantis exaudire possit. Ideo discrimen Imperii, & Potestatis in bona, supra ostendimus. Non potest autem particularis quædam facultas Majestatis, objectum suum deferere, & in aliud operari. quod singulæ circa congruam, & propriam sibi rem versentur: potestas autem inferior, non nisi ab analoga potestate inhibeat & suspendatur. In occupatione quippe privatorum bonorum id potissimum agitur, ut dominium privatum, & ejus efficacia extinguatur: quod ut fiat, necessum est, *potestatem sublimiorem aliquam, & ejusdem generis intercedere*. Sic enim opus est, ut similia in similia agant. Imperium quod
 Pater

Pater habet in filium, Maritus in uxorem, Dominus in servum, Principis absorbet excellentius imperium, in personam patris, mariti, domini. non aliter dominium privatum intercipi potest, quam per dominium aliquod sublimius; non per imperium, circa dominia minimè occupatum, nisi per mediatam consecutionem.

IV. Allegant alii *Necessitatem*, & *ordinem*, quem natura Reipublicæ servandæ præscripsit. Verùm quod Necessitatem attinet, statim apparet, causæ impellentis sustinere vices, non causæ efficientis & fundamentalis. Posito enim, quod propter Necessitatem invadere possit Majestas privata: abundè constat, illud *propter*, non inferre principium, *per quod*, & *a quo* actus ille producat, restat enim quaestio, *cujus potestatis jure Princeps contrectet privata, quando necessitas ingruit*. Necessitas nemini jus contribuit ad illa perpetranda, quæ in sua natura illicita sunt; multo minus confert potestatem aliquam. Figuratissimi sunt loquendi modi, qui ab inopiâ, & defectu ordinarii auxilii, aliquod insolitum jus mutantur. Confundunt quippe causam, *ob quam*, & impulsionem, cum causâ, *per quam*, seu efficiente. Solent quidam Moraliùm Doctorum defendere hæc de extrema necessitate; *quasi jus egeni concedat in res alienas; Et ideo furtum non committat, qui in tali necessitate constitutus aliunde sumat, degendæ vitæ conducensia*. Quod ipsum primitivâ illâ rerum communione comprobatur GROTIUS, in quam tali casu re-

cidant res, ut cuilibet fas sit, easdem sibi adjudicare. Sed præterquam quod illa communio non est liquidæ veritatis: ipsæ Sacræ litteræ furti coarguunt hominem, qui ad levandam famem aliena contrectat; & ad reddendum septuplum damnant. *Prov. vi. 31.* Et plures eruditissimi viri contendunt, ejusmodi necessitatē haud posse contingere. Quod ipsum in præsentī persequi haud licet. Utcunque se res habeat, nusquam sufficienter probatum est; necessitati eam adhærere virtutem, quæ jus det in aliena. Admisso etiam hoc ipso; communis hæc erit natura necessitatis, quæ singulis privatis tale jus conciliet: sed in Majestate excellentius quid sit oportet, quàm quod singulis assidet. Non conficies magis solidum fundamentum ex illis, quæ de *fine*, de *ordine Reipublicæ* differunt: cujus natura aliquando insolito more fines inferiores negligat, ut summus, conservatio universi, constet sibi. Subtiliora videntur, & longius perita, quæ plurimi in hac doctrina, & alibi de juribus Majestatis philosophantur; quam ut percipi satis possint, vel negotium clare exponant. Quis enim quæso *finis ille*, qui tantam potestatem tribuat? Singula curatè æstimanti patebit, finem qualemcunque posteriorem esse potestate. Propterea scilicet potestas data est, ut finem obtineamus. Finis, qui nondum est, operari nescit: multò minus facultatem concedere aptus est. non enim saltem dilutè nimis, sed periculosissimè quoque dicitur; *finem in moralibus jus dare*. De ordine itidem non satis perspicua res est.

non

non præcedit, aut confert imperii aliquod jus; sed constitutum demum insequitur. Et oppido difficile fuerit determinare, quis ordo ille sit, qui in bona privata tantum permittat. quòd abunde pateat, novæ quæstioni semper fore locum. Jam vero de *naturâ* si quærere instituas, quæ illa sit, quæ Reip. modum & ordinem præscribat; vereor, ut ejus indolem vel declarare quis sufficienter, vel assequi possit. Solemne quippe est in hac Philosophia, quæ ex *natura finium & ordinis* res morales deducere conatur, ut plura verba reperiās, quàm fundamenta.

V. Nobis sine ambagibus, Potestas in bona privata, quæ præter actum ablationis plures alios producit, est DOMINIUM EMINENS. Quod vocabulum mutuamur hactenus ab incomparabili GRO TIO; licet ab auctore non satis explicatum. nam præter titulum, pauca reperiās, naturam hujus rei tangentia; & illa quidem talia sunt, ut in nonnullis emendari velint. Ipsam rem alii pluribus persecuti sunt, & ad Jura Majestatis retulerunt, sub generaliori inscriptione, *Potestatis in bona privatorum*. Propius accesserunt plurimi JCtorum, qui proprietatem in privata Principi adsignarunt: quæ proprietas, eadē cū dominio, sub *Plenitudine potestatis*, intelligitur Scriptoribus. Quin ipsum vocabulum *Dominii Eminentis* non omnino primū à Grotio excogitatū, inde conjicio, quod *Dominii Excellentie*, quod Deus habet in res omnes, etiam in possessiones privatas, apud Moraliū Doctores occurrat. Forsā ex imitatione, Vicario Dei, Dominii Eminens adscriptū est. Apud

varium quoque reperio, post *imperium regium* in universum orbem terrarum, Christo asser-
tum, *Dominium in res singulas*, propter Im-
perium, Servatori secundum humanitatem
vendicatum. Quod Dominium Recentiores
vocant *Medium*; inferius quidem *Divino Ex-*
cellentia: sublimius tamen illo *vulgari humano*
utilitatis. Quale imperium habuerit Serva-
tor, dispiciant Theologi: hæc tamen senten-
tia commodè ostendit, præter summum ac in-
dependens Dominium Dei Creatoris, & com-
mune illud, seu vulgare hominum singulorum,
dari adhuc posse dominium intermedium,
quod imperium regium consequatur. Tale
asserimus Majestati, & cum GROTIUS voca-
mus EMINENS: & dicimus, esse *summam in*
republicâ potestatem disponendi de rebus priva-
torum. Ita enim generaliter definienda est hæc
potestas, ut omnes effectus genuini, inde pro-
deuntes, possint includi. de quibus statim
videbimus, ubi dederimus probatum, hanc
facultatem esse verum Dominium: tam pro-
priissimo sensu, ac JCTI Dominium, privatis
possessoribus tributum, accipiunt. In hoc
quippe momentum contrariæ Disputationis
positum est, dum impugnatores Domini E-
minentis acerrimis oppositionibus id infici-
antur, & suum illud Imperium substituunt.
Optarem autem, GROTIUS, aut alius hujus
Domini Assertor, perspicuis rationibus Do-
mini veritatem probasset, atque adversarios
convicisset: & supersedere possemus jam hæc
operâ, & ad alia transire: sed hoc subsidio
destituti,

destituti, rem ipsi tentabimus: demonstraturi Dominium hoc, non tam auctoritate & consensu maximorum virorum; quam testimoniis Scripturæ; & imprimis ex naturâ intimâ Dominiorum. exposituri quoque Domini Eminentis causam, atque effectus; tum commodâ sede satisfacturi contradicentium argumentis.

VI. Principiò removendæ mihi videntur, non satis robustæ veterum *Commentariorum* & *Glossariorum Juris*, probandi rationes: quæ propter unam, aut alteram legem Justiniani, proprietatem & Dominium Principi addixerunt. Laudatur famosissima imprimis lex, *Benè à Zenone. 3. C. de Quadriennii Prescriptione.* quæ omnia Principis esse, affirmat. & non minus celebris illa *Antonini* ex veteri Jure, L. 9. *Ad l. Rhod.* in qua se *Dominum mundi* appellat Imperator. Quarum neutra sufficit ad probandum dominium in privata, multò minus in orbem universum. Nam posteriorem assertionem Principis potius, quam veri studium, obsequentissimis viris extorsisse, tot imperantia sceptræ, quæ præter Deum superiorem agnoscunt neminem, satis persuadent. & *Mundus* ibi pro *Romanâ ditione*, notissimâ loquendi formulâ, accipiendus est. Utræque verò lex, nudam continet assertionem, quæ suas probationes ultiores desiderat. Ad res enim politicas universales, quæ omnes Respublicas, & specialiter Jura Majestatis concernunt, decidendas, nulla est auctoritas Juris civilis, qua civile est. non enim obligat alios

populos, præter Romanos. Quando autem communis aliqua ratio subest, & allegatur, efficax ea est, suâ propria virtute; non legis civilis allegatione. Quanquam interim dictæ leges Romanis Citis adhuc opponi possunt; quod phrasîs illa, *omnia Principis esse imperio*, ex Iure Romano vix possit adduci: & dum *Antoninus* Romani orbis *dominus* salutatur, in eundem Dominium, quod præcipuè, & propriè res tangit, habere asserendus sit. Hucusque igitur suffragium darent nostræ sententiæ. Ratio autem quare inter argumenta, firmiter probantia, non reponamus hoc suffragium, illa est, quod novâ ratione firmante habeat opus. Cum enim nudè asseratur, Principis omnia esse; hoc enunciatum suis probationibus fulciendum est.

VII. Eadem classe recensebo veterum atque recentiorum sententias, concordēs nostræ: quæ consensui, circa hoc argumentum probando, interim sufficiunt. PHILONIS locus, l. II. de Plant. Nicæ, eximius est: *Quemadmodum reges imperant quidē omnibus subditis, sed maxime domesticis, quorum ad corporis curam & reliquum victum quotidianis utuntur ministeriis. Idē quavis totius regionis possessionū sint domini, etiam earum quæ privati juris sunt, tamē sola habere putantur, quæ commiserunt suis procuratoribus, à quibus annuos redditus exigunt. in eos secessus sepe animi gratia se conferunt. gravissimis regni ac Reip. sepositis aliquantisper curis & hi censentur possessionū regiarum nomine. item argentum aurumq; & cetera pretiosa, quæ reconduntur apud subditos, regum magis sunt, quā eorum à quibus habentur:*

alii a-

ut amen sunt qui propriè dicuntur regii thesauri,
in quibus ordinarii tributorum exactores totius re-
gionis proventus solent reponere. Iterum: Et ne
quis suspicetur Deum indigere creatura quacumq;
vicini (Propheta) necessario: Dominus regnabit
in secula. in æternum & ultra. Rex autem nullo ha-
bet opus, sed sub ejus jure sunt omnia. Gemina
habet GUNTHERUS, in Lig. l. III. ubi magnani-
mum FRIDERICUM, Principem suæ potestatis
preclare intelligentem, loquentem introducit:

*Quo mihi divitiæ? cui servit gloria Mundi,
Quæ possessor opum cum paupere dives adorat.
Quicquid habet locuples, quicquid custodit a-
varus,*

*Quicquid in occultis abscondit terra cavernis,
Iure quidē nostrū est, populo concedimus usum.*

*Rege figuratam, regis patet esse monetam:
Casaris & domino sub Casare fulget imago.*
Non est, quod cassetur aliquis, hæc testimonia
Oratorum & Poëtarum esse, quæ invalida sint
ad tantam rem comprobendam: quod utriq; fi-
guris uti consueverint, & veritatis scrutinium
non semper cordi habeant. Qua de causa GRO-
TIUS, in Prolegomenis ad Jus belli & Pacis, reji-
cit ejusmodi argumenta. Poëtarum & Oratorum,
sententia, inquit, non tantum habent pondus:
quantum Historiæ) & nos sæpe iis utimur non
ut inde adstruamus fidem, quam ut his qua-
licere voluimus, ab ipsorum dictis aliquid orna-
menti accedat. Quod si ejusmodi solitaria aucto-
ritas loco rationū nobis esset, suspectū hac ob-
jectione fieri posset argumentū. Jā alia ponde-
rosiora nobis supersunt. Quamvis ex Oratorum
& Poëtarum dictis veritas & communis con-
sensus

sensus de veritate possit elici. Nam & illud iudicium in laudato loco GROTIUM est: *Vsus sum etiam ad Iuris hujus probationem testimonis Philosophorum, Historicorum, Poëtarum, postremo & Oratorum: non quod illis indiscretè credendum sit; solent enim sectæ, argumento, causæ servire: sed quod ubi multi diversis temporibus ac locis idem pro certo affirmant, id ad causam universalem referri debeat: quæ in nostris questionibus alia esse non potest, quam aut recta illatio ex natura principis procedens, aut communis aliquis consensus.* Cumulari hîc possent loca Juris Romani, quæ auctoritatem Poëtarum, præsertim *Homeri* allegarunt, in decisione controversiarum. l. i. §. i. de contr. empt. item *Virgilii*, l. 6. §. 5. de Divis. rer. Quanquam causâ non est, quare *Philonem*, tanquam Oratorem; aut *Guntherum*, tanquam Poëtâ suspectemus. Non id agit Philo, ut causam aliquam desperatam perorer, & conquisitis coloribus iudici caliginem offundat: sibi secedens, ac solitariæ meditationi intentus, explicare conatur, *quomodo Israël, sit hereditas Dei, cum in omnes homines habeat imperium.* utitur tunc exemplo regii dominiî. quod idem facit in asserendâ divinâ sufficientia. Non opus erat, ut Tyrannum, aut ipsum Deum Opt. Max. adularetur: qui secum divinam clementiam atque potentiam perpendebat. *Guntherus* rem verissimè gestam describit: & sententiam, ac verba Imperatoris exprimit. Quod si *Lucanum, Martialis, Servius*, ac plures alii eruditorum, testante *Vossio, de arte Poët.*

Poët. cap. II. §. 3. eximunt Poëtarum numero, & Historicorum inserunt; quod non Poëma, sed res gestas scripserit: idem *Gunthero* facere haud dubitabo, qui nihil fictum suis libris intulit. Imperatorem quæque illius fuisse sententiæ, quod *proprietas rerum privatarum ad Majestatem pertineat*, notum est in vulgus. Dum efficiebat, ut *Martinus* Jctus, contra *Bulgarum* id defendens, & asserens æquum, haberet equum. Ventilabatur tum temporis vehementer hæc controversia; num *dominium & proprietas rerum privatarum penes Principem esset*: & prævalebant adeò rationes ajentium, confirmatore ipso *Friderico*. Propugnarunt hanc doctrinam plures Itali & Ultramontani Jcti; quos recensere ordine, longum foret. Ex antiquioribus tacendus haud est *Theophilus*, qui signanter scribit de Principe: *non solum nostrorum bonorum, sed etiam nostrorum corporum dominus est*. Plures recentiores Jcti atque Politici, *Dominium Eminens*, expressis verbis adstruxerunt. Ita Nobilissimus *THEODORUS GRASWINCKEL*, in *Disser. de Jure Majestatis*, cap. IX. *Quinimo rectè rem consentibus, ne quidem vera sunt illa Seneca*, Reges imperio cuncta possidere, in singulos dominio. *Namque cum in bona nostra, tum in actiones nostras, major potestas sit legis ac Regis (cujus quidem Regis potestatem ostendimus excedere potestatem legis) quam sit nostrummet ipsa atque ipsorum; verius est, dictum dominium esse penes Regem, subjectis vero non aliud superare, quam utile. Qua sane in*
re,

re, ut ut dura & praefractior videri possit, nullum tamē est flagitium dominationis. Similiter sentit in subtilitatibus civilibus exercitissimus BOECLERUS, in Disquis. de Dom. Em. Simul illud intelligi datur, in jure supereminens Domini, non quamvis & communem ordinationem summæ potestatis animadverti; sed exerceri actus verissimo dominio debitos. Ut nunc celeberrimi Germaniæ JCTI, HAHNI, & summi viri, HERMANNI CONRINGII, & complurium aliorum scripta ne tangam, qui omnes unanimi consensu, post severissima examina, Dominium Eminens approbarunt. Quorum consensus ingens momentum inquirendę veritati confert, & nostram sententiam à novitatis crimine facile potest excusare.

VIII. Non abnuunt Sacræ Litteræ. quę Majestati dominium in omnia privata tribuunt. Locus I Sam. ix. 20. de Jure Regio, eximius est, qui Majestatem compendiosę declarat, & post imperium in personas, dominium quoque in res exponit. Ubi post sublatas ad publica officia personas, id jus fore imperaturi Regis, proclamat ex formula divinæ Sanctionis Propheeta: *Agros vestros & vineas, & oliveta optima tollet, & dabit servis suis.* Non est, quod dicas potestatem, non regiam, sed tyrannicam designari. GROTIUS ipse neutiquam ad jus referendum putat, quicquid ibi de Rege prædicitur populo: potius ad injuriam interpretatur, & declinationem regni in tyrannidē; cum effectu negatę resistantiæ. quod in communē opinionem evaluit. Longè abesse à bono principe rapto.

raptorem animum, & aliena invadendi libidinem. Suum cuique tribuere, & publicam salutem ante privatam ponere, id regii muneris arque ingenii opus esse. in id à Deo quoq; constitutos reges. Non præscribi normam igitur recturo, secundum quam imperari debeat, aut liceat: sed prædici imperaturi vitia, & iniquam potentiam, quam sibi arrogaturus sit, ex malâ libidine omnia turbans. Sed potestas nulla vitiosa, aut tyrannica est. Et Regem petierant Israëlitaë, non tyrannum; Regem quoque se daturum pollicebatur Deus, & regium Jus proponebat. Quod si tyranni fuissent illa commemorata à Samuele opera, jure excepisset populus; deprecari se talem sævitiam, bonum ac facilem Regem se petere. nunc ubi non movetur ingenti regis futuri potestate in capita & fortunas: indicio fuerit, nihil nisi regium à Deo fuisse prædictum & constitutum. Nec simile vero est, Deum licentiam dedisse sceleri, & ut fas esset Sauli, injusta quævis designare, amplissimo privilegio indulgisse. Jehovah non est Deus, cui placeat iniquitas: nedum qui eandem publicè promulgato diplomate confirmet. Id quoq; dubio caret, plerosq; actus, inibi designatos, fatentibus ipsis adversariis, vitium nullum tyrannidis continere. Quam ægrè ferat aliquis, si indulgentia Principis, vulgari conditioni exemptus, constituatur Chiliarchus, aut alio splendido munere decoretur. Partem decimam fructuum exigere, moderatissimum jus est. Ablatio sola vinearum, agrorumq; haud damnabitur: cum prægnantem causam ubique inclu-

includat; & moris divini nunquam sit, æqua iniquis commiscere. Et non puto Samuelem pro adulate se egisse, ubi Sauli, de asina sciscitanti, regnum annunciat. *Cujusnam erit, quod optimum habetur in Israel, an non tuum erit, tuæque familiæ?* Non habebat opus Propheta, ut Sauli blandiretur, & ejusmodi suggereret, quæ in rapinas inclinarent animum futuri Regis. Postquam à cæde Orientalium regum Abrahamus rediisset, occurrebat Sodomorum Rex, & subditos suos, hostibus ereptos, ut redderet sibi victor, petebat; bonis subditorum ei permissis. Abrahamus verò & viros reddebat, & negabat, se ex bonis, quæ ad Regem Sodomæ pertinerent, minimum retenturum. Impudentissimus simul, injustissimusque fuisse rex, qui sibi arrogasset facultatem aliena donandi: & quomodo Patriarcham à consortio iniquitatis excusem, quod non contradixerit continuò, increpando regem, quod liberalitatem voluerit exercere de alieno, non invenio. nisi dicamus, & Regem suum jus in privata bona novisse, & tale credidisse Abrahamum. Ex Novo Fœdere notatu dignum, quod Servator respondebat Phariseis, de censu & tributo, Cæsari pendendo, subdolè interrogantibus: *Reddite Cæsari, quæ sunt Cæsaris: & Deo, quæ sunt Dei.* Quibus verbis expressè dicitur, Cæsaris jam esse, quæ eidem solvenda erant. Et vocabulum *Reddite*, non est temerè positum: sed præcedentem potius liberalitatem imperantis notat, qui nummum communi utilitati donavit. Plura ejusmodi

modi advertere licet in Sacris , quæ Dominium Majestatis præclare roborant.

I X. Nunc ad ipsam Naturam Dominii contendimus , ostensuri , ex ipsâ essentia Dominii , ut sic , arguendum esse , Dominium Eminens esse verum Dominium. Descriptio Dominii accuratior illa fuerit ; quâ dicitur , *Potestas perfectè de re corporali disponendi*. nam usitatio definitio , qua statuitur , *jus disponendi de re , quatenus lege non prohibetur dominus* ; angustior est , & dominium sub Republicâ constitutum explicat. In nostra definitione autem duo præcipua membra latent , *Potestas non tantum disponendi* , sed etiam *perfectè disponendi*. Utrumque jus asserimus Majestati. Habet facultatem disponendi de rebus , non obstante , quod singuli privati possessores ipsi quotidie disponant de rebus suis ; emendo , vendendo , locando , commodando , donando , & multis modis alienando. Scilicet in hac ipsa privatorum dispositione , Majestatis dispositio posita est in Civitate : quod ab hac dependeat illa. Ut possit subditus talem in modum de rebus suis disponere , id omne proficiscitur à dispositione Imperantis. Hic introduxit modos privatæ dispositionis , ut sub hac , non aliâ conditione , liceat emere , vendere , donare , & sua ad alium transferre : & concessit deo facultatem singulis , de rebus suis legitime disponendi. Intra limites nimirum præscriptos. quos ubi observat subditus , habet jus disponendi , atque adeo dominium : sin egrediatur definitos terminos , nihil agit ; quod desti-

destituatur jure disponendi, propter cessantem, aut contrariam Majestatis dispositionem. Utrumq; à Majestate est, ut possint subditi disponere, ut non possint. Quàdo igitur quotidie privati disponunt de suis facultatibus, ipsa exercetur Majestatis Dispositio, quæ permittit civibus, ut disponant; & præscripsit regulas, secundum quas tenentur sua ordinare. Si enim observent singuli Imperantis Dispositionem, in ordine disponendi; nemo dixerit; exulare Principis dispositionem ab hac privata dispositione; cum hujus integritas ab illâ, & in illâ consistat. Sive contraveniant, & legem dispositionis transiliant; conspicua magis redditur superioris dispositio, quæ illam subditi impedit, & irritam facit. Quotidie videas Judices disceptare litigantium causas, & definire controversias: hæc ipsa tamen disceptandi, & definiendi potestas, à Majestate proficiscitur, conservatur, regitur: & Jurisdictio Principis, in Judicium sententiis viget ac observatur. Eadem Domini ratio. Deinde *Perfecta* est illa Principis potestas: hæc est, secundum Moralistarum formulam, habet Jus prælationis præ suis subditis in jure disponendi de rebus privatis. Sola Majestas est in Rep. quæ modos transferendi domini constituit, quibus alligatur subditi dispositio. In istius manu est, novas acquirendi proprietatem figuras introducere, pristinas immutare, atque adeò coërcere dispositionem privatam, aut novis legibus circumscribere. *Perfecta* illa, & propria facultas disponendi, in eo maxime illucescit; quod dispositio priva-

torum

torum nihil valeat sine dispositione Principis : hæc autem illi omnem suam substantiam largiatur, eandemq; possit plane evertere. Ad hoc ipsum enim , ut evertatur privata disponendi potestas; amplior atque prolixior superioris accedat disponendi facultas oportet. Illud vero demonstrari posset ad oculum , omnibus illis Domini Eminentis effectibus, seu operationibus, quibus eripiuntur privatorum res , & subtrahuntur eorum dispositioni. Ad illustriores retulerim , extraordinariam illam occupationem privatæ possessionis , quam civiles rationes sibi postulant. Item revocationem prodige donationis , ab antecessore potissimum factæ. Multas item, & bonorum publicationem , ob delicta: nec non omne impedimentum , prodigo positum, ne dispenset de rebus suis. Ut & Jus Detractionis, usurpandum in bona emigrantis civis: usucapionum introductionem. & si quid aliud est , in sequentibus exponendum , privati dominium suspendens , aut eripiens. In his omnibus deprehendes perfectiorem Principis potestatem, superantem pluribus modis illam singulorum dispositionem. Ut jure domino & justo possessori eripiatur aliquid ; excellentior aliqua potestas , de rebus legitimi domini disponendi , præsupponatur oportet. Ut hominem , aliquid delinquentem , pecuniaria poenâ castigare queat Princeps; in pecuniam castigandi habeat potestatem , ut invito possessori queat extorquere. Prodigus nullum hactenus designavit delictum , nisi quod liberalitatem incautius exercuit: supervenit Majestas, & inter-

interdictione bonorum docet, quousque illud verum sit; *quemlibet sua rei arbitrum ac moderatorem esse*. Ut per usucapionem dominium alteri eripiatur, alteri adjiciatur, à proprietate illâ disponendi imperantis procedit. Major scilicet potestas minorem in his talibus absorbet. Et sublimior omnino est facultas disponendi, quæ alterius dispositionem sistit & extinguit. Unde clarissimè patet, Imperatoriam, seu Majestaticam illam potestatem disponendi de rebus privatorum, adeò perfectam, ut contra dispositionem & voluntatem possessoris jure valeat, verissimum esse Dominium.

X. Ejus fundamentum aperiamus, quomodo Eminens Dominium Principi adhæreat. Recurrendum principio nobis erit ad summam Causam, à quâ Principis Majestatem descendere docuimus. Deus nimirum Optimus Maximus est, qui suam potestatem, quam habet in aliquam regionem, & ejus incolas, tanquam orbem particularem, Regi communicat, suo Vicario. Quemadmodum autem supra ostendimus, duplicem esse hanc potestatem, in personas & in res: ita utramque, imperium & dominium, conjunctim in Vicarium suum transfundit Deus. Et dominium quidem Dei, cum non tantum valeat in res immobiles, tractum illum, & definitum spatium, quod civitatis socii infederunt; sed res quasque mobiles, & omnem supellectilem atque instrumentum civium: consequens est, ut in immobilia atque mobilia quævis, Principi similiter concessum
jus

jus adstruamus. Tum propter naturam Vica-
 rii, quæ in hoc consistit, ut Princeps, supre-
 mum Numen in suâ civitate referat, quoad o-
 mnem potestatem civilem. dominium autem
 in Republica esse potestatem aliquam civilem,
 nemo facile negaverit. Tum, ne in potestati-
 bus hiatus detur, & vacuum politicum, si pri-
 vati domini potestas in Republicâ non agno-
 sceret superiorem. Sed hucusque communi-
 catio Domini, Regi divinitus facta, genera-
 lis & remota causa est: proxima est *Imperium*
in personam subditi. Illud quippe effectum per-
 petuæ veritatis est; *Quicumque in personam a-*
liquam plenum habet imperium, ille simul habet
dominium in omnes fortunas, personæ subjectæ.
 Ratio hæc subest, in vulgus notissima; quod
Accessorium sequatur conditionem principalis
sui. Iam verò citra operosam arguendi figuram
 manifestum est, Personam cujusque hominis
 principale quoddam esse; Bona autem & divi-
 tias, accessorium. Conficiendum igitur neces-
 sariò; Bona subjici potestati illius, cujus im-
 perio persona subdita est. Eamus per omnia
 imperiorum genera, quatenus plena sunt, &
 naturam perfectam servant: in singulis depre-
 hendemus inclusum dominium. Servum ni-
 hil habere proprium, clarius est, quàm ut
 dici debeat. Quicquid acquirit, Domini facul-
 tatibus adjicit. Non propterea, quod incapax
 est domini, civilis facultatis, in servum haud
 adentis; quæ causa remotior est; sed quia
 persona, seu caput servile, subest imperio domi-
 nico. Propter hanc subjectionem capitis, im-
 pe-

peranti domino cedunt omnia bona, per servum acquisita. Similiter filius familias, licet respectu servi liberum caput habeat, quia tamen Patriæ potestati subjacet, non habet dominium in res suas. Quod exemplis Romani Juris illustrari posset, præsertim si bona adrogati consideremus. Quoties enim sui juris persona se adrogandam dabat alicui; concedebat sub ejus imperium, & omnia sua bona illius potestati mancipabat. Circa maritale imperium eadem contingunt; ut mulieris, cujus voluntas viro subjecta est, bona quoque subjiciantur. Multo magis summum illud imperium Majestaticum, quod reliqua omnia transcendit, complectetur dominium. nisi forsan potestatem herilem, aut paternam excellentiorem Majestate absurdè statuas. Frustra sunt, qui dominii & imperii discrimen urgent. Novimus enim hæc distingui, tanquam constituens & consequens: illud quoque non ignoramus, proprietatem ita distingui ab imperio, ut dominus ædium, jus imperii in illas non habeat. At ideò invertere negotium, & negare, *imperio includi dominium*, haud licet. A CAROLO enim MOLINA perperam traditum puto, *proprietatem & directum dominium non esse de substantia regni, seu regie dignitatis, quia illa non principi, sed corona, scepro & solio regio inseparabiliter cohæreat*. Quasi vero hæc verba sensum aliquem conficiant in civili doctrinâ. cum nullus politicorum intelligat, quid sit corona, sceptrum, solium, proprietate illa instructum, & oppositum Principi.

Non

non credo, inanimis illis Majestatis insigni-
s, jura Majestatis tribuentur. Si quis forte,
perio non comprehendi dominium, evin-
e velit inde, quod apud Romanos, & uxo-
præter dotem, quæ tamen irrevocabiliter
n cedebat marito, *bona paraphernalia* ha-
erint; & filii familias peculia *adventitia*;
m *Castrensia* & *quasi-castrensia*. Is attendat
peria illa civium Romanorum; & infracta
n reperiet à Majestate. mirum ergo non est,
imminutum imperium, eum effectum se-
m non trahat, quem habet integrum. Imo in
c ipso imminuto dominio parentum & ma-
orum, agnoscat Dominium Eminens. Sicut
imperium Majestaticum omnia imperia infe-
ora ad se rapit; & ipso actu in republicâ Ro-
ana, & hodiernis ferè omnibus, sibi vendi-
t: ita quoque Dominium Eminens illa pri-
torum Patrum familias dominia, ex impe-
o domestico propullulantia, vel elidit, vel
aximoperè circumcidit. Inde est, quod in
epublica uxores scire velint, quid in mari-
m transferant, quid ipsæ retineant sibi; quod
ius habeat suum peculium, dominio patris
ementum. Si illibatum mansisset imperium,
tegrum quoque fuisset dominium. Ab hac
itur instantia, quæ imperia non vera, sed so-
m nomen gerentia, nobis objicit, non la-
efactatur nostrum assertum.

XI. Excipiamus deinde, & infringamus
lversa tela. *Turbari*, clamitant, *quietas pri-
atorum possessiones*, *dum proprietates tollun-
ur*, *Et in unum transferuntur principem*. An-
N tiquari

riuari juris naturalis scitum, quod jubet suum cuique tribuere, dum nemo est, qui aliquid proprii habeat. Damnandam doctrinam, & quæ Principia arbitrio subditorum bona sic permittat, ut nullâ urgente necessitate huic auferat, quod alteri donet, aut sibi servet: quæ Principi etiam optimo, minime bonum datura sit consilium; utpote extra officium raptura integerrimum: malum autem, & Respublica negligentem, pessimo tyrannidis instrumento armatura, ut sub prætextu Juris, privatorum facultates invadat. Ut ut omnem substantiam Domini Eminentis pervadam atque perscruter, nondum possum assequi cogitatione, quomodo hæc horrenda dogmata Dominium Eminentis consequantur. Quo si turbantur possessiones, etiam obscuro illo, & inexplicabili imperio, quod illis in privata valet, turbabuntur. Sive enim Dominium, sive imperium facias superius singulorum dominio, eadem turbatio fuerit metuenda. quia tam facili negotio sub specie imperii, quam domini, invadere posset bona. Sed ab imperio non tolluntur proprietates. Respondeo; nec à dominio eminenti, cujus munus est, dominiorum & proprietatum privatarum conservatio. Non infert hoc dominium aliquam rapacem invasionem; sed superiorem, & vulgari sublimiorem potestatem, quæ dominia privata moderetur. Quare verendum non est, ne desit occasio exsequendi legem, quæ suum cuique associat. A Dominio quippe Eminente singuli cives habent sua bona, contradistincta aliorum facultatibus, & adeò munita,

aita, ut quietâ possessione fruantur. Habet quisque privatorum suum proprium, licet patiatur jus superius Majestatis: quod ad illicita nunquam porrigitur. Dicis; *Si Princeps habet Dominium in privata, pro lubitu bona rapiet, spoliabit subditum: quod de re sua plenum jus disponendi habeat, eamque ad se possit trahere, nemine reluctante.* Ego vero, ut Deus misericors tibi, ineptissime argumentator, sanam mentem, & jurium Majestatis intelligentem velit indulgere, seriò precor. Quis unquam tradidit illam dominii efficaciam, per quam dominus possessionem rei cuique alii detinenti, possit eripere? Nusquam Romani Jcti domino concesserunt facultatem expellendi pro lubitu usufructuarium; aut subtrahendi pignus creditori. Nec Feudalium Interpretes docuerunt, Seniorem ex suo arbitrio, posse Vassallum feudo exuere. Hos nimirum dominos ab invasione rei suæ pactum prohibet: Majestatem officium; tum civilis ratio ac decor. Principes nimirum originis suæ memores, populi potius, quàm suum commodum procurant: eò lucro, ut & propriæ divitiæ inde constent. Dei vices se gerere arbitrantur, cujus licet omnia sint, omnium tamen usum largâ manu dispensat hominibus. Idem faciunt Vicarii, omnium fortunas suo complexi jure, nemini citra causas quicquam adimunt. Sciunt ad hoc concessam omnem potestatem, ut tanquam beneficium aliquod Numen, suorum procurent utilitatem & civilem decantitudinem: non ut conceditam sibi mul-

titudinem affligant. Præterea existimationis
 regiae interest, ut extra causam necessitatis
 Princeps absteineat manum à privata posses-
 sione. Puerorum est, repetere, quæ dederant
 paullo antè. Imprudentissimus censeretur me-
 rito Rex, & suæ auctoritati inimicissimus,
 qui sua decreta subinde labefactaret temerè.
 Assignavit jam semel subditis propria bona,
 definivit modos acquirendorum dominio-
 rum, & omnibus tranquillam possessionem
 promisit. neminis magis interest, ac Regis, ut
 quisque suum habeat atque retineat. Immuta-
 re ordinem hunc, quem ipse introduxerat, à
 prudente longissimè abest. Cui etiam fini ten-
 deret bonus ac prudens rex, sine causâ priva-
 ta invadens, nondum intelligo. Si indigentia
 diceres, jam causam nominares, licet in
 principem haud cadat. Si Aristotelem quidem
 audimus, *Rex non est, cui sua non satis sunt,*
quique non omnium bonorum copia antecellit.
At qui talis est, nihil præterea desiderat. Ita-
que non sua, sed eorum, quibus præest, commo-
dè intuebitur. Ut avaritiæ explendæ operetur,
 causâ suspicandi non est. Diviniora cogitata
 sunt regalis animi, quam ut sordes illas an-
 gustæ & opacæ animæ admittant. Indecorum,
 & repugnans majestatico splendori, & prope
 maximum scelus putant reges, famæ studio-
 sissimi, pecuniâ capi. In promptu est magni-
 ficum exemplum FRIDERICI, augusti illius
 Imperatoris. Hic & noverat, & publicè pro-
 fitebatur, sua esse propria, quæ subditi pos-
 siderent: num propterea rapinis fuit infamis?
 potius

potius censuit, plura in vulgus distribuere, ut satisfaceret ubique suæ Majestati; quæ

*Fundit opes, nitidaque manus arugine turpi
Fœdari, scelus esse putat, dignumque pudore.*

Nunquam obliviscetur hujus decori verus Princeps; sed Patris, sed Dei vices referet ubique benefaciendo. Tantum igitur abest, ut bonus Princeps degeneret ex suggestione doctrinæ, de Dominio Eminente; ut hæc potius sublimi, & prolixo cogitatu, cum abstrahat ab invasione privatarum rerum; & doceat, abjectissimi hominis opus esse, pretioso illi luto inhiare; indignissimumque personam Regiam. Si propter Tyrannum rejicimus hoc dogma: universa Majestas damnanda est, qua ille horribilem in modum abutitur. Sed Tyrannus in corpora & fortunas sæviet, (alias nondum esset tyrannus) citra Domini Eminentiis suffragium. nec retinebitur intra cancellos officii, si millena Imperia objeceris. Conservantur ab optimo Rege per Dominium Eminens singulorum bona: quæ à Tyranno infestantur, ante cognitam sententiam nostram. *Sed quid? si putet Dominium ad promiscuam valere direptionem?* Malè id putabit; malè id prætendit: & discere debebat, nullam potestatem tam injustam esse, ut ejus beneficio tyrannus ex malâ libidine alicui possit nocere. Quid si imperium extendat ad idem maleficium? *Forsan illud justâ causâ circumscriptum est?* quasi vero Dominium sine causâ ulla in extraordinariam occupationem erumpat. Quid si tyrannus Jurisdictionem, seu potestatem in

caput adeò amplam sibi imaginetur, ut demerere possit innocentium capita ? Nemo propter falsam illam imaginationem opponet se Majestatis Judicio.

XII. Ulterius infestant nostrum Dominium Eminens, tanquam rejiciendum ab omnibus principiis Jurisprudentiæ. Decantatum esse in scholis Juridicis ; *ejusdem rei non esse duos dominos. Si igitur privatis permittimus dominium aliquod, Principi erit detrahendum : Et contra, si Princeps illud habet, excludendus erit subditus. Adhac certum esse, dicunt, rei suæ nullam esse acquisitionem. Principem autem per donationem, testamentum, emptionem, acquirere satis constare : unde colligendum, Principem non habuisse dominium in res taliter comparatas Et quasitas. Urgent Rei Vindicationem, qua fundamentum habet dominium vindicantis : quod actori proprium ita est, ut rem, à Fisco Principis possessam, intra certum tempus extorquere possit. Quod iterum tollit dominium Principis. De primo, utrum res patiatur duos dominos, videamus. Interrogabo hîc opposcentes, an seriò credant, Deo omnipotenti aliquod superesse dominium in res, quas ipsi privata possessione, & domini jure tenent, puta ædes, fundos, pecuniam ? Non puto aliquem fore tam impium extremè, qui Creatori omnium rerum, subtrahere velit dominium in sua bona. Quo divino dominio admissio, iterum quæram, quâ fieri possit, salvâ regulâ, & incolumi principio Juris, ut & Deus, & ille privatus possessor, Dominus sit earundem rerum ?*

rum? Quamcunque attulerint responſionem, continuo eandem Principi applicabo. Si enim non evertuntur principia juridica, affirmato Dei dominio: haud corrueat eadem, ſi Majeſtati illud permiferimus. Deinde, rei ejuſdem, non ſunt duo domini in ſolidum; ut uterque liberrimè & independenter poſſit diſponere. Quamvis autem ſingulis ſubditis verum dominium aſſeramus, reſpectu reliquorum concivium; adverſus quos bona ſua pleniffimè poſſident: intuitu tamen Majeſtatis, dominium ſubditi induit rationem uſusfructus; & dominium Eminens, verum atque primarium dominium videtur eſſe ſalutandum. Quod ipſum tamen, ſi ad independentem Dei dominium referamus, quod ſolum pleniffimum & abſolutiſſimum eſt, iterum imitatur uſusfructum aliquem, & diſpoſitionem revocabilem. Adeoque non putamus in Republicâ duos eſſe in ſolidum dominos; ſed per ſubordinationem. Hujus beneficio contingit, ut ſubditus habeat diſpoſitionem de re ſua; & Princeps ſuum retineat dominium; & Deus ipſe in utrumque valeat. Quæ ſubordinatio minori difficultate premitur, quam dominium commune, quod duo privati in eandem rem habent. Simile judicium ſit de iis, quæ de donatione & teſtamento dicuntur. Minimè efficitur, Majeſtatem non habere dominium in privata, cum eidem aliquid donari poſſit. Iterum quippe divina objiciam. Omnia Dei eſſe, vel diabolus credit. Nihilominus donaria appendimus. *Omnia deorum ſunt*, inquit SENE-

CA: VII. de Ben. IV. *tamen* *Et* *diis* *posuimus* *do-*
num, *Et* *stipem* *jecimus*. Deo quoque legare
nos posse, Romanæ leges perhibent. l. 1. §. 5.
ad L. Fal. Nisi igitur hæc collectione Deo eri-
pere velimus dominia; nequicquam sollicitabi-
mus dominium eminens. Longè diversissima
est donatio, quæ in privatum aliquam rem
transfert, ab illâ, quæ in Principem confertur.
Quando civi donamus, facimus eum domi-
num: principi autem non permittimus demum
dominium in rem nostram, sed tradimus sal-
tem nudam & vacuam possessionem. quæ hacten-
us nobis, Principis indulgentia, erat assignata.
Ita rem nostram legari posse nobis, sub exem-
plô dotis, pignoris, docuerunt I Cti. Licet enim
dominium non acquirat denuò legatarius, ali-
quod tamen beneficium, aut commodum adi-
piscitur. Eadem causâ emptionis: quando Prin-
ceps aliquam rem à vendente subdito sibi com-
parat. non acquirit dominium emendo, sed
pro dimissione possessionis, subdito assignatæ,
illud pretium numerat, quod alius civis dedis-
set. Neminem enim temerè aliquo damno
afficit, quamdiu Reipublicæurgens ratio non
jubeat diversum: præsertim cum subditus
vendendis rebus suæ familiæ conservandæ
prospiciat, non patietur eidem Princeps sine
causâ aliquid deesse. Nam & hic memor le-
gis, quam ipse sanxit, vivit, quæ venditori
pro re vendita pretium statuit. Hanc ipse non
violat; & si forsan privatæ possessionis bona
Fisco illata sint, permittit vindicandi pote-
statem. Qua permissione non infringitur
Dominium

Dominium Eminens in tales vindicandas facultates; sed injungitur Fisci Patrono, ut dicat, num bona illa secundum latus à Majestate leges debuerint publico inferri; & si ecus res se habuerit, restituat petitori rem illam. Vindicationis fundamentum est dominium, sed privatum, quod Eminens haud tollit: & illa contra Fiscum admissa est, ne vires à rapaci magistratu contra fas suis possessionibus spoliarentur, non ut negaretur Dominium Majestatis.

XIII. Sacrarum quoque litterarum auxilio onantur evertere Dominium Eminens. In re omnium historia vineæ Nabothi. Qui regi petenti, & offerenti tantundem, noluit cedere avitas possessiones. Achabus invitum abditum haud potuit cogere justavi, ut dimitteret vineam: sed insidiis, & falsissimis testibus evertendus erat Nabothus, ut remoto legitimo possessore, rex demum cupitum patium nancisceretur. Sed diris, & imprecationibus Domini; qui & cædem, & occupationem vindicaturum se, minabatur. Si abuisset aliquod jus in rem privatam Achabus, allegasset illud, & legitimâ viâ intrasset vineam, regio jure suam: nec opus habuisset, per calumnias innocenti frueretur exitium; & iram atque maledictionem in se provocare. Apud Ezechielem XLVI. 18. quoque locus est, Dominio Eminentem palam, ut autumant, adversus. Postquam ibi Dominus præscripsisset legem, quomodo Princeps donum filiis suis dare possit; & quomodo possessio, in servum translata,

revertatur in anno libertatis ; subjungit : *Ve non accipiat Princeps de possessione populi , oppressione deturbando eos de jure possessionis ipsorum , de jure suo possessionem tradat filiis suis : ut non dispergatur populus meus ullus de jure possessionis suæ.* Et in capite præcedenti, certam portionem terræ Principi addicit Deus , in hanc legem : *Ipsi inquam portio hujus terræ esto in jure possessionis apud Israëllem , ut non opprimant amplius principes mei populum meum , sed terram reddant domui Israëllem per tribus ipsorum.* Sed paratas habemus responsiones. Si generaliter inspicimus factum Nabothi, non attendendo circumstantias singulares, & nulli alii Reipublicæ communes, haud dubitandum est , postulatum Achabi fuisse minimè iniquum. Quæ enim injuria est, quando rex subdito, pro suâ possessione, aliam æquè bonam, aut justum pretium offert ? nullam justam causam reperio, ob quam tergiversari velit civis. In eo verò peccatum arbitror, quod Achabi uxor, postquam Nabothus negaverat vineam, occidi curaverit virum, mortem haud meritum. Quod parricidium non impedivit Achabus ; & approbavit potius, cum vineam statim occuparet. Scelus fuit in ipsa occupatione per cædem domini. Ad locum quoque Ezechielis responderi posset, quod integra illa visio grande aliquod mysterium contineat, & vix explicabile; certè quod secundum sonum verborum exponi renuat. Observant enim Theologi atque Interpretes, si verbis inhaerendum foret, miram futuram descriptam

etiam illam civitatem; & vel ex altaris altitudi-
 ne, humanam staturam longè excedente,
 aliter interpretandam esse, ibi notarunt. Ni-
 hil igitur mirum, si hunc etiam textum de
 possessione Principis, mysticam desiderare ex-
 plicationem, quæ integra visioni respondeat,
 arbitremur. Sine cavillatione enim seriem to-
 tius visionis, & connexam plane materiam,
 & mysticam ubique significationem urgere
 possumus. Aut differendam dicemus hujus
 sanctionis efficaciam in illud tempus, quo
 edificabitur ejusmodi civitas, & talem in
 nodum terræ possessio dividetur. Nam futuro
 tempori prospicit illa lex. Quo ipso tamen
 casu, qui de solo Principe Israëlítico loquitur,
 ad alios reges nihil spectat, quod Dominium
 eorum Eminens infringat. Etenim specialis-
 simi omnino allegati casus sunt, quæ ad so-
 lam Judaicam Rempublicam pertinent, & ex
 ejus regimine volunt declarari. Quomodo
 ibi delegerit Deus hanc gentem, & forma-
 verit civitatem, se ipsum constituendo regem,
 ex historiis sacris notissimum est. Postquam
 enim Ægyptiorum tyrannidi subduxisset Israël-
 itas, Politiam formabat planè singularem,
 quæ à reliquorum rebus publicis longissimè
 distaret in plurimis. Leges promulgabat sum-
 mus ille Rex, quæ maximam partem ventu-
 rum Messiam præfigurabant; & forensia jura
 multa continebant peculiaria. Quibus annu-
 nerari debent leges, de divisione terræ pro-
 missæ in singulas tribus: sub expresso inter-
 dicto, ne possessores terram vendant nato

ex altera tribu. Ita conceptissima verba habent, *Leviticæ* xxv. 23. *Terra autem ne venditor lege mancipii, mea enim est ea terra: nam peregrini & inquilini vos estis apud me.* Et *Numer.* xxxvi. 7. *Nam non avertetur possessio in filiis Israël à tribu in tribum: quum filiis Israël adhærebunt quisque possessioni tribus paterna sua.* Et *Deuteronom.* (xix. 14.) *Ne moveo terminum proximi tui, quem determinaverint præci, in possessione tua quam possidebis, in ea terra quam Iehova Deus tuus dat tibi ad possidendum eam jure hereditario.* Hæc erat lex, omnibus Israëlitis lata, sub Monarchiâ Divinâ: quæ post constitutionem Regis Saulis antiquata non est. quod nusquam legamus, introducto Rege, exspirasse civilia jura, Israëlitis à Deo lata. Nec enim deserebat Rempubl. illam Deus, post creatum regem: sed ipse præsidebat, & Regem ad observantiam legum divinarum obligabat. Satis certum est, Judaicorum Regum Majestatem, quoad habendi modum, nimis fuisse limitatam. Res enim merè indifferentes suâ naturâ, si jam lege divina essent determinatæ, haud poterat pro lubitu, & vi Nomotheticæ facultatis, immutare: sed tenebatur obtemperare divino decreto. Non obstat, quod Jus regium, ablationem agrorum, & vinearum permittit: id enim sub perpetua exceptione exaudiendum est; quatenus lege divinâ prohibita non est. quum autem translatio possessionis de tribu in tribum vetita fuerit, nec usquam legamus, gratiam hujus interdicti factam Regi: eò fuisse obstri-

obstrictum, asserendum est. Et simile vero est, Deum ostendisse populo suo absoluti regis potestatem; & qualem illimitatam ei possit permittere, ut regum orientalium more, qui Dominatum exercebant in subditos, pro lubitu auferat cujusque possessiones. Nam penetrante verbo concludit Propheta illud jus: *denique vos eritis ei servi*. Non verò actu permiffam esse infinitam illam facultatem, exinde colligo, quod Deus non sustulerit leges suas, aut abrogaverit, sed viridi observantia voluerit florere omnes. Harum obligatio, quia remiffæ non sunt regi Israël, in hunc ipsum fuit efficax. Et nullus dubito, quin temperamentum, genuini illius absoluti imperii, petendum sit ex loco *Deut. xvii. 18*. Non enim consilii, sed veri præcepti formula illa est: *Sed erit cum insidebit solio regni sui, ut describat sibi exemplum hujus legis in libro, ex eo qui erit in conspectu Sacerdotum Leviticorum: Eritque penes eum, & leget in eo omnibus diebus vite sue; ut discat timere Iehovam Deum suum, observare omnia verba hujus legis, & statuta ista faciendo ea*. Pars autem legis illius observandæ concepta erat, de non migranda possessione. Ponebatur quidem descriptum à Samuele Jus regni, coram Domino: ut scirent posteri, quantum jus regium esset, si lege divinâ non terminaretur. Quoniam vero capitulum illud, de auferendis agris, circumscriptum erat lege Domini, præsentem quoad hoc, agnoscimus limitationem. Hujus vigore non ritè satis Achabus petebat vineam, & Nabotho suppetebat verissima causa,

caussa, negandi Regis petitum: & certum, rebus ita se habentibus, non nisi injustissimâ violentia, quæ Deum judicem & vindicem expectasset; Achabum eripere possessionem, divinâ sorte civi assignatam, potuisse; licet vitæ ejus nullum intulisset damnum. Has antiquas leges respicit Ezechielis locus, & eandem habere potest interpretationem. Ex quibus omnibus patet, nusquam à Scripturâ daminari Dominium Eminens; sed unicum actum limitari, qui in occupatione immobilis fundi versatur, certæ tribui assignatæ: reliqua capita manere absoluta. Et in historia illa particularem Reipub. Israëliticæ subesse rationem, propter limitationem ab ipso Numine introductam apertum est: hoc vero speciale regimen, ut reliquis civitatibus ideam Politicæ haud præscribit; ita nullo modo ex circumscripto exercitio Majestatis, imperium absolute spectatum definit. Non igitur Reip. speciale institutum allegandum erat, ubi sequestratâ omni particulari contemplatione, Jura Majestatica interpretamur. Idque putarem perpetuò observandum, ut circumspectius uteremur exemplis, ab Israëliticâ Republicâ petitis: cum in plerisque peculiarissimam conditionem hæc Politia habuerit, nunquam per omnia aptandam ulli civitatum. Aliis argumentis impugnandum erat Dominium Eminens; quæ ostenderent Deum, nec dominium habere in privata, nec illud communicare Majestati. quæ evincerent, definitionem domini non quadrare potestati Regis,

gis, & everterent maximè effatum, quod ex Imperio derivat dominium.

XIV. Effectus Domini Eminentis varii sunt, qui omnes concernunt dominium privatum, & multiplici modo se explicant. Respiciunt autem domini privati *Conservationem*, vel *Ablationem*. Ad conservationem domini privati pertinent imprimis *Modi acquirendi* domini per pacta & conventiones, a Majestate instituendi & confirmandi: ut in tranquillo sint civium possessiones. Quas sanctionibus pœnalibus defendit imperans: & ubique cavet, ne subditi à malefieriatis hominibus patiantur rerum suarum detrimentum. Hujus loci est illa Majestatis provisio, quæ infantibus, aut impuberibus, item minoribus, quorum parentes vita concesserunt, assignat Tutores & Curatores, qui bona fideliter administrent, ne quid imprudentiâ dominorum Reipublicæ pereat. Tutores & Curatores ut hoc munus subeant, ex imperio cogi possunt: sed bonis impuberum & minorum cavetur propter dominium, quod Majestati in hæc competit. Licet enim adulti, & impuberes ex parte, in plerisque possint sibi consulere: cùm tamen verendum sit, ne malè suas res custodiant: impedit Majestas eorum administrationem, & aliis prudentioribus defert. Quod apertissimè intelligitur ex interdictione bonorum, prodigio fieri solitâ. Huic omnem administrationem facultatum suarum eripit Majestas, ne rebus suis perversè abutatur: & curatorem extra ordinem sistit, qui moderetur omnem istius hominis

minis familiam. Proficiscitur hoc impedimentum, ab Dominio imperantis, quod in privata bona tunc salutariter exseritur, ne abusus Reip. noceat. Cū verò respiciat utilitatem ipsius prodigi; merito numeramus hoc exemplū in classe eorū, quib. cōservatio dominiī privati quēritur.

XV. Notabilis deinde efficacia Dominiī Eminentis est *Ablatio bonorum* privatorū. Quæ iterū non una formā peragitur. Aliquando ita subtrahit civibus dominiū, ut nil redūdet in publicum, sed alii privato adjudicatur translatum dominiū. Accidit hoc in usucapionibus, quando emptor, seu possessor, bona fide rem alienā sibi comparavit, nec tamen dominium à tradente potuit accipere: consequitur illud si legitimo tempore rem possederit. non beneficio temporis, quod potestatem nec habet, nec confert: non solius possessionis, quæ alteri dominium eripere non potest: nec etiam propter causas illas impellentes; ut litium aliquis sit finis; ne dominia sint in incerto. Sed à dominio Eminente: quod pristino domino detrahit suum jus, & novo possessori adjicit. Opus enim est sublimiore potestate, quæ illam privati tollat, & alteri assignet. Præclare hoc aperit Consultissimus HAHNIUS, in *Observatis ad Wesemb. de usue. n. ix. Quamquam hæ rationes* (de certitudine dominiorum, & sine controversiarum) *potius externe, quā interne videantur, nature tamen juris in hoc conveniunt, quod summa Majestati sit potestas, jure supereminētis dominiī, ob utilitatē, quæ in publicā privatamq; rem inde redundat, isthac legibus statuere, & uni rem auferre, alteri adjicere,*

addicere, cum per Majestatem rerū dominia constituantur, quæ alioquin jure naturali nulla sūt. In hanc classem referenda est Constitutio, quæ res, subditis ab hoste, aut pirata ereptas, occupatori permittit. Quamvis enim æquitas postulet, ut suis dominis restituantur res ablatae, & ipsæ videantur jure Postliminii in veteris possessoris manus reverti: attamen, quia difficillima est earum recuperatio, cuiq; victori hostiū, aut piratarum, à Majestate addicuntur, ex facultate non aliâ, quā Dominii Eminentis.

XVI. Sæpius publico impenditur quidquid Dominiū Eminēs delibavit. Ut in *Detractione*, quando civi alicui permittitur migrare sedes, & in aliam civitatem cum fortunis suis transire. Quamvis enim dimissio personæ subjæctæ ab imperio pendeat; occupatio tamē partis bonorū & retentio, à dominio proficiscitur. Non equidem cogitur Princeps emancipare subditum: humanitatis interim laudem habet, favere ejusmodi libertati, nisi prægnantes causæ eam inhibeant. Ut cognoscat discedens quā facilitate ac gratiâ eum dimittat Imperans, in signum ac contestationem dominii, solet pars bonorum publico retineri. Quoties igitur hoc usu venit, à Dominio Principis procedit. Ab eodem fundamento est *Multa*. Ut possit delinquens, vi perfectæ Jurisdictionis damnari in pœnam pecuniariam, & ad eandem solvendam cogi: id verò à potestate fit, quæ in bona damnati pertingat. Sed nobilis plane virtus Domini regii cernitur in *repetitione prodiga donativis*. Quoties Nero aliquis publicas divitias

in

in homines indignissimos malè profudit: in successoris manu positum erit, num revocare velit demortui decoctoris donationes, & à possessoribus auferre, ac publico restituere. Si consultum hoc deprehenderit, vi domini Eminentis, vel totam substantiam donationis, vel partem à donatario repetet: cā ratione, quam prudentia commendabit.

XVII. Restant duo maxime conspicui effectus, Tributum, & Occupatio privati boni. **TRIBUTUM** dicimus pensionem, quam ratione bonorum & fructuum exigit Majestas. Mirari quis posset, inventos fuisse, qui negarent Tributorum exactionem ad Majestatem pertinere: quod imponantur vigore Jurisdictionis & superioritatis. Id solemne est scriptoribus, confundere vocabula publica: & Jurisdictionem pro integrā Majestate confuse accipere. Tributa hīc specialissimè sunt onera fructuum, quæ solvuntur ratione privatæ possessionis. Generaliter tamen & capitationes includunt. Differunt ideo à vectigalibus; quæ etiam à peregrinis solvuntur, ob transitum per vias publicas, pontes, fora, aut distractionem mercium, cum lucro. tributa autem à solis subditis præstantur, propter bona sua, ex fundamento Domini Eminentis. Nisi enim Principi competeret facultas in fortunas subditi, nec ullum tributum indicare, nec quantitatem ejus definire, nec quicquam postulare à subditis posset. Circa tributa imponenda omne judicium Majestati indulgemus: nec subditi hīc sibi quicquam vendicant, nec alius quis-

quisquam. Nec tenetur Princeps subditis rationes promere, quare indicat collectas. Consiliarios malè & periculose agere, qui Principi auctores sunt, ut causas petitionis detegat subditis, ut eos in conscientia convincat, necessarium esse subsidium tale, bene monet B. HULSEMANNUS, in MSS. de Cas. Conf. L. I. c. VIII. §. 8. Evanescent nimirum consilia publica, & hostis occupabit civitatem, antequam necessaria instrumenta defensionis fuerint disposita. Optimè sibi constat Respublica, in qua imperantur tributa, non rogantur. Declinabit tamen omne nimium Majestas, & prudenter aget, si moderatissimè in hoc negotio versetur. Pecunia subditis alter sanguis est: qui sine sensu, & dolore, nunquam mittitur. Quamquam ex altera parte subditi officium fuerit, optima quæque de prudentia, cura publici boni, & continentia Principis sui credere ac sibi polliceri, & nunquam sibi arbitrium arrogare in his talibus. Quin si aperte iniqua sit tributis exactio, resistere nequit, cum patientis personam sustineat. Si vel maximè gulose perdat tributa tyrannus; haud negabit subditus. Cum Christiani impiis imperatoribus, & una cœna trium provinciarum tributum consummentibus, tribuere plura haud cessaverint. Non video casum, quo negari posset à subdito tributum. Casuistæ & Moraliū Doctores res causas allegant, ob quas retinere pecuniam queat subditus, & petenti Principi nihil lare. Primò si *subditus probabiliter opinetur, tributum in rem illicitam impendendam esse: li-*

cet alii eā pro legitima habeant. Deinde, si dubitet de necessitate præsentis temporis. Et tandem, si dubitet de legitimo titulo Principis. Sed hoc genus hominum plerumque seditiosissima effata divulgat. Subditi opinatio non est fundamentum negandi tributī. Imo si sciret rem ab aliis pro illicita haberi, ipse probabiliter opinari debet, aut indubitato credere, rem licitam esse. Momenta necessitatis expendere, non est arbitrii subditorum res. nullum iudicium circa definitionem necessitatis ad illos pertinet. poterantque forsan arbitrari, tributum nunquam esse necessarium. Dubium de titulo Principis deponendum est. Imò quoties apertè constat, Principem injustum habere titulum: nihilominus, quia Possessor injustus etiam imperium habet; subditus tenetur tributum pendere. Cū hoc non ex iustitia tituli, sed præsentia imperii, quod Dominium Eminens committatur, dependeat.


XVIII. Progredimur tandem, ad nobilem illam OCCUPATIONEM privatorum bonorum, quæ Dominium Eminens clarissimè prodit. Hujus enim virtute repetitur possessio subditi, & causæ publicæ impenditur. Contingit hoc interdum sub pacto mutui; ut cogat Princeps subditum, eximiam pecuniæ summam mutuari Reipublicæ. Subditus nunquam sua sponte commodasset divitias civitati; ab Imperante coactus, succurrit. Quia verò pactum intercessit, restitutio plenaria facienda est. nisi fidem fallere Princeps velit; quod crimen Majestatis indignum est. Frequentius tamen
fine

sine mentione mutui, in rebus etiam immobilibus, aliisve, ubi mutuo locus haud est, Occupatio se exserit, & invito domino, rem privatam publicis usibus adhibet. Illustriora exempla petuntur à belli tempestate. Quando hostilis impetus periculum minitatur civitati, uruntur segetes, corrumpuntur fruges omnis generis, & quicquid adversario commodum esse potest. Proceditur ulterius & invaduntur non saltem, quæ hosti eripienda sunt: sed nostræ quoque securitati atque tutelæ cavemus, & si munimentis non satis fuerit septa urbs, quicunque circumjacet privatus ager, aut hortus, insidetur & fortalitio assignatur. Si quod ædificium obstiterit, diruitur, & superficies operibus adjicitur. & si quæ sunt similes justæ invasiones. Quum autem hæc invasio, extraordinarius, & minus frequens effectus sit Dominiæ Eminentis, ultro intelligitur, causam ingentem præsupponi: quam Necessitatis nomine vulgo exprimunt. Quia vero Dominiū Eminens bono publico prospicit, non demum, quando mœnia circumfedit miles; sed pacis quoque tempore, futuri belli incommoda prævidens, occurrit iisdem; usu venire potest, ut extra ejusmodi periculum, causa prægnans existat, quam *Rationem civilem*, hoc est, utilitatem communem ac publicam, rectè dixeris. Prudentis enim est, summa circumspectione præcavere, ne locus sit Necessitati. Convenit hætenus omnibus Politicis, cum Iure consultis; *Majestatem posse Necessitatis tempore invadere*
pri-

privatæ bonæ: & ipsam illam Nabothi vineam, à qua pellebant Achabum, occupandam esse autumant, si irruenti hosti castellum ibi opponeret. Quod ipsum sacrarum Litterarum Interpretibus ad eum locum probatur: licet ex diverso capite invasionem istam deducant. Necessitati nimirum ab omnibus remedium quæritur, & habet illa hanc prærogativam, ut defendat, quicquid coëgit. Hoc durum telum excitat penitissimas virtutes Majestatis, ut incumbant tota mole, ad incolumem præstandam civitatem. Tunc provocatur quoque hæc Eminens in bona privata Facultas, & actum verissimi domini, occupando, & disponendo de occupatis, exercet. Quando verò incidat hoc punctum Necessitatis, seu civilis utilitatis, dispicere, solius Majestatis est. Nam qui universæ civitatis salutem procurat, & singula momenta civilia expendit: cujus arbitrio decernuntur omnia magnarum rerum consilia: eidem soli hæc decretoria summi imperii portio, cum Judicio, definiendi tempus invasionis, relinquenda est. De hoc judicio Principis, non nisi præclare sperandum subdito; & ubi se aperuerit, eximiè sentiendum est. Nunquam enim à Majestate, nisi curatissimè examinatis omnibus, hoc magnum exemplum statuitur. Nec sapientis, nec Principis est, temerè aliquid agere: & opus est evidentissima & maximè conspicuâ ratione, quæ opponatur plebis rumoribus, ut tam invidiosum opus, incolumi famâ conficiat Imperans. Quare ad occupationem non procedet

Rex

Rex sine Necessitate publicâ, aut huic æquali causâ.

XIX. Interim haud tolerabo vulgare istud assertum; *Principem, tempore necessitatis posse in usum publicum auferre bona privata: extra casum necessitatis nullum habere jus in eadem.* Quod minus politicè dictum arbitror. Quamvis enim occupatio extra necessitatem haud procedat; Jus interim perpetuum est. Affirmandum igitur serio est; Dominium Eminens Majestati SEMPER & UBIQUE inhærere. Principem semper & ubique habere potestatem in bona civium. Quam sententiam nemo damnabit, nisi Politicæ ignarus. Ea Majestatis indoles est, ut in indivisibili posita, integra ubique sit, & sua jura omni tempore simul habeat. neque enim fieri potest, ut ullum ejus membrum decerpamus, nisi dissolvere velimus totam. Jam verò dominium Eminens Majestatis jus esse, controversum amplius haud est: retinebit ergo naturam Majestaticam, & cum reliquis Juribus, à quibus divelli haud potest, Principi inseparabiliter affidebit. Ipsorum, qui Imperium faciunt causam occupationis, suffragio vincam. Scilicet quæram, num Princeps Imperium semper & ubique habeat? an necessitatis tempore tantum? Non puto aliquem fore tam impudentem, qui Principi detrahere velit Imperium extra necessitatis casum. Causa igitur nulla est, cur verissimam hanc & perspicuam sententiam, immanibus istis, & nunquam cohærentibus sequelis imperitè onerent; *Si Princeps semper*


Et ubique habet potestatem in bona subditorum; semper Et ubique sine ullâ causâ, pro lubitu, potest diripere cives, Et ad se trahere eorum fortunas. Iterum quæram, num hoc tempore, quo carcer delinquentibus & captivis est vacuus, Princeps habeat Imperium merum, seu Jurisdictionem criminalem? Si negas: potestatem Principis inficiaris, quod sacrilegium est, & læsæ Majestatis crimen. Sin affirmas; eodem modo debes colligere: Quia Princeps habet semper & ubique criminalem Jurisdictionem, pro lubitu, sine precedente delicto, potest demetere capita innocentium civium. Tam vere consequitur hæc conclusio, ac superior. Miserum est, non posse discernere actum primum à secundo. Primus semper adest; secundus aliquando. Ita homo semper habet potentiam loquendi; sed non semper loquitur: cum eloquentissimum sæpe videris tacentem. Idem homo semper habet potentiam ridendi: si tamen citra decori causam rideret, stultitiam agnosceres; & ille semper ridere haud potest. Ita non semper operatio invenitur, ubi potentia datur. Universale hoc est, & in Majestatis doctrina verissimum; ubi similiter Jus, seu Potestas, ab actu secundo, exercitio & operatione distinguitur. Omnia & singula Majestatis Jura, semper & ubique secum habet Princeps: sed hæc jura non ordinantur semper ad suas operationes, ad sua exercitia. Semper habet Imperans armorum Jus: sed non semper delectus habet; sed non semper arma expedit; nec conti-

ti-

tiuis bellis exhaurit suos. Semper habet potestatem sanciendo fœdera, condendi leges : ac non semper pangit fœdus , nec legem super legem cumulat. Ita Dominium Eminens semper habet Majestas ; non semper exercet. Non est , quod propterea ipsam facultatem inficiemur , quæ acquiescit interdum ab operatione. non otiosa , aut nulla est , quæ agendi habet intervalla. Quamvis ab occupatione plerumque abstineat dominium Principis : alii interim effectus sunt , quibus se prodit , quos supra vidimus.

XX. De COMPENSATIONE breviter aliquid monendum est. Communiter urgent plenariam restitutionem ; exemplo usi levatæ per jactum navis , *ubi omnium contributione sarcitur , quod pro omnibus datum est.* Alias quoque Societatis regula vetat , *socium cum detrimento alterius fieri locupletiores.* Verum dispar ratio est exemplorû. Multum differt actio privati hominis , à necessitate se expedientis , ab imperantis potestate. Æquales sunt illi , qui jactu mercium servant navim : hîc nobis sermo est de facultate summi Principis. ad quem nunquam producetur commodè ratio, desumpta ab hominibus privatæ sortis. Socii , ut æquale ferant damnum , pacti sunt : at subditi omnes jurarunt , se paratos fore , profundere opes suas in salutem Reipublicæ. Quoniam firmis rationibus asseruimus , potestatem in bona esse verum Dominium : necessum est , ut concludamus , Principem ad justî pretii solutionem non teneri. Aliud enim si asseras, Domi-

O

nium

nium evertis, quod compensationem adeò strictam ignorat. Ea interdum rerum occupatarum conditio est, ut nisi cum incommodo maximo civitatis pretium redderetur. Puta quando plurium magnarum urbium amplissima suburbia prosternuntur; quando integræ provinciæ segetes perduntur, ne hostis vel sedem, vel cibum reperiat. Quis ingentia illa damna dixerit reparanda esse? non suffecerint reliquorū civiū bona. Reliqua occupatio circa immobiles fundos potissimum versatur: quos si Lycurgus eripere possessoribus potuit, ad æquanda prædiorum spatia, sine compensatione; quidni eosdem necessitati publicæ impenderet Princeps, sine pretio. Nam ne invadantur mobiles res, maximè pecunia, molliori viâ præcavebitur. Quamvis autem Principem ad compensationem nullum Jus adigat, æquissimum tamen judicandum est, si quocunque modo, vel remisso tributo, vel donatâ materia & instrumento, novis ædificiis struendis, vel denique aliâ superficie designata, soletur exutum possessione civem. Æquitas inquam, hoc suadet: nullum strictum Jus cogit. Nam qui compensationem propugnant, statuerunt; Principem *vi imperii aliena*, invadere, quæ restitutionē flagitant. Postquam verum Dominium assertum est, nihil debet Majestas subdito, cujus fundum, ab hoste occupandum, in possessoris, & totius civitatis tutelam insidet. Eadem de restitutione sententia est, incomparabilis nostri CONRINGII, in opere *de Finib. Imp.* c. XIX. p. 351.

Uti que

Utique in omni societate, etiam maxime civili, quilibet salutis publicae est obstrictus & re & corpore. Sarcit quidem acceptum damnum Respublica si potest, at magis in primum, quam ex debito: itaque si non potest, necessum est, ut pars quaeque ferat, quod mutari non potest, ob reliquae corporis salutem.

CAPUT V.

DE

REGIMINE UNIVERSALI.

- I. *Regimen universae Reipublicae.*
- II. *Annona; Nundina; Cursus publici.*
- III. *Sacra: Scholae.*
- IV. *Potestas belligerandi.*
- V. *Quanta sit?*
- VI. *Inducta: Pax.*
- VII. *Fœdera.*



Exposuimus imperii in personam primum consequens, Dominium in res singulorum: alterum est *Regimen universi*. Postquam enim in singulorum personam, & omnium adeò, imperium consecutus est Princeps, & per hoc, dominium: atque adeò nihil quicquam exemptum est ejus arbitrio: palam fit, universam multitudinem subjectam esse Majestati. Quemadmodum singulorum capita, imperanti obnoxia, eidem comparant

bant in fortunas dominium: ita conjunctâ hâc facultate in singulorum personam ac bona, non potest non oriri in universam civitatem potestas. Collectivum quid Multitudo est, quæ nisi ex singulis, non componitur: eam ob causam imperium in multitudinem haud datur, nisi in singulos valuerit prius. Ideoque Regimen universæ civitatis aliud est nihil, præterquam imperium in singulos, collectivè sumtum. Cæterum quia imperium hoc collectivum posterius quid est *naturâ*, si non *tempore*, imperio singulari; ab hoc non immeritò nobis separatur. Licet enim actus, ab universali dispositione resultantes, non aliter in singulos dirigantur, quàm secundariò, per reflexionem, quatenus partem faciunt civitatis, quæ dirigenda est: quod civilis hæc provisio, communem utilitatem sibi præfigat metam; aut potius ab ejus procuratione publicâ incipiat, quæ in singulos demum conferatur. e. g. Belli gestio, Pacis ac Fœderum sanctio, in universam civitatem concipiuntur; emolumenta postmodum, aut damna, ad singulos redundant, quatenus cives sunt civitatis. Ipsa tamen facultas, disponendi hæc universim, aliâ viâ minimè producit, quàm quæ à simplicibus & singulis procedit. Hæc est vis illa sublimis, naturam Majestatis exprimens, quatenus dicitur potestas *in civitate universam*. Quapropter soli Principi asserenda est, nemini privatorum permittenda. Ægrè ferat Paterfamilias, si servus aliquis sibi arroget ordinationem rei familiaris,

& de

& de domo universâ disponere audeat. quinimo ipsa secutura confusio prohibet quemque alium, præter dominum, à licentiâ dispiendi de domesticis administrationibus. Multò magis alienæ potestati injiciet manum, quisquis jus ordinandi civilia sibi transcripserit.

II. Distribuimus hoc Regimen Universale secundum conditionem Objectorum, quæ tum *in civitate*, tum *extra civitatem* disponit. In civitate ordinat universaliter *Divina & humana*. Ad humana referri possunt omnis generis *leges universales*, imprimis quæ personam subditi, aut possessionem non concernunt, tanquam objectum: stringunt tamen istam circa res, universæ Reip. conducentes. Nomothesia supra explicata, quæ in caput subditum, & ejus actiones dirigendas tendebat, determinata erat circa personam, aut bonam civium: hîc legis universalis nomine intelligimus maximè Provisionem generalem, quæ communem utilitatem aliquo civili instituto adjuvat. Ideò vocamus hanc *Provisionem Utilium*, quod citra alium respectum, commodum universi promoveat. Hæc licet tam ingentis momenti non sint, ac reliqua, eximiam nihilominus præstant utilitatem: & si neglectius tractentur, incommodo possunt privatos onerare. Quodque caput causæ est, nunquam nisi à Majestate instituuntur. In horum numero ponimus exempli gratiâ, (nam indefinitam indolem habent, nec possunt certa serie comprehendi) Provisionem generalem

ANNONÆ. Prospicere enim de rebus, ad vītum necessariis, illius fuerit, qui communis pater civium sit. Unde curam rerum, in foro vendi, aut emi solitarum, Majestati addicit alibi Philosophus. Huc pertinet jus NUNDINARUM, quo Mercatus universales & solemnes, certo loco ac tempore, à Majestate ordinantur, certisque privilegiis & immunitatibus dotantur, in emolumentum publicum. His mercimoniis plura inferuntur, quæ nostræ civitati forte deerant; & quibus eadem abundabat, permutantur. Traxerim huc quoque CURSUS PUBLICOS, plurima conferentes universis. Ne damnum patiantur, sed commodum sentiant, quotquot illis aliquid concedunt; Majestatis est præcavere. Certum est, plura posse, pro indole Reipublicæ surgeræ, quæ dispositionem hanc generalem, ex titulo utilitatis, pro fundamento habeant, nec ex alio jure immediatè trahant ortum: quæ omnia nec prævideri possunt jam à nobis, nec universalialia sunt omnibus Rebusp. & ab exercitatio in talibus facile in suam sedem ac seriem reponuntur. Satis enim habemus hîc monuisse, ejusmodi negotia, ex generali regimine, & potestate in universam civitatem, quatenus universum quid est, promanare.

III. Magis necessaria sunt DIVINA, quæ comprehendunt SACRORUM & Religionis; tum SCHOLARUM curam. Divinorum administrationem, gentiles quoque homines, ut maxime necessariam civitati, Principi committunt. Si tamen fundamentum, & limites
hujus

hujus potestatis indages, ingentem difficultatem ubique reperies. Vocamus quidem publicam potestatem, veram religionem introducendi, & introductam asserendi: sed unde illa potestas, & quanta? Pro institutione, verbo saltem indicabimus. Ideò Majestati asserimus sacra, quod eorum ordinatio sit actio publica, quæ à solo Imperante debet produci, non à privatis. Animos enim, nobilissimam partem personæ subjectæ dirigit, qui Sacra constituit. Hucusque autem privatus quidem arcetur Sacrorum Regimine: nondum patet ratio, quæ Principi illud asserat. Abstrusum negotium, fateor: vero tamen simillimum est, hoc jus Principi competere specialissimè, *quatenus Vicarius Dei est*. Tenetur Vicarius, reverentiam, superiori exhibendam, quam potest, maximam insinuare subditorum animis: quod in hoc divino negotio aliter haud contingit, quam veri cultus conservatione. Impressus est humanis mentibus supremi Numinis cultus per Jus Naturale: cujus præcepti custodia, una cum reliquis ingenitæ legis capitibus, injuncta Majestati est, ne deferatur. Inde cognoscitur, quod absolutâ potestate non ordinet sacra imperans: sed ex necessario officio resistat omnibus irreligiosis conatibus; sicuti homicidia, adulteria, & omnes læsiones proximi vetat. In modò cultus aliquid permittitur: quæ internam religionis ac fidei essentiam atque mysterium spectant, cum ex revelatione divinâ, atque adeò universali obligatione procedant, nec mutari, nec

refingi possunt. Tam inviolabilia hæc sunt, ac Jus naturale, cui Majestas subest. Quare in res fidei nulla vis Majestatis valet, nisi quatenus commendantur subditis. In exteriorem autem provisionem, quæ aptis instrumentis, manifestatam Dei cognitionem & voluntatem expediat, liberior facultas est. Compendiosè ergo dicemus. *Reverentiam Numinis insertam esse rationali creatura, quam cum reliqua lege natura observandam, præcipere debet imperans: cum verò hæc naturalis notitia haud sufficiat perfecta Dei cognitioni; Et benedictum Numen omni tempore, omnibus hominibus sese aperuerit propius, Et consummata religionis arcana cumulatissimè patefecerit: obstrictam esse Majestatem, sequi ductum manifestantis, Et ex formulâ Legis Et Evangelii colere Deum, Et ut simili modo subditi adorent, operam dare. Insistendo cælestis veritatis præscripto: non detrahendo divina doctrinæ; sed puram sinceramque propagando per orthodoxos Ministros Et Sacerdotes, qui verbum Dei inculcent auditoribus, Et sacramenta, secundum institutionis integritatem, exhibeant. Strictissimi hæc Juris sunt, quibus si intercedere perversa hominum, & imprudens æquitas velit; aut superstitionis, aut impietatis rea evadet. Omnem heterodoxiam damnandam, & removendam esse, spontè sequitur: cujus rei gratia congregari solent Concilia: quorum coactio, quatenus persona imperativè vocatur, ex imperio proficiscitur; sed *universa directio, præsidium,**

con-

confirmatio actorum, uberioris commentationis argumenta, ex Jure Sacrorum oriuntur. Non aliena est à conservatione divini cultus, SCHOLARUM & ACADEMIARUM inauguratio. Individuo nexu cum Ecclesiâ Scholæ colligantur. Multum refert ad propagandam divinam veritatem in subditis, quomodo à puero fuerint instituti; plurimum ad docendam, quomodo fuerit tradita. In his officinis fundamentis fidei imbuuntur laici: in Academiis futuri doctores ad solidam eruditionem adspirant. Quamvis & eo nomine Majestati adscribendum sit negotium, quod Academiae omnis humanæ sapientiæ atque elegantiae sint promæ condæ. Quod habet civitas, quos publicis muneribus præficiat, invigilatuos omnium salutis, & promotuos communis rei custodiam, his nutricibus ingenuæ prudentiæ & alumni profundioris eruditionis, Academiis, debet.

IV. Amplius ad Dispositionem universalem, & communes illas Provisiones, quæ Rempublicam, & ejus salutem in genere attingunt, referre maximè licet illa, quæ cum exteris aliquid negotii habent. Haftenus enim præcipua Jura ipsam civitatem concernebant, & in eadem terminabantur: sequuntur alia, quæ rem cum peregrinis expediunt. Idque *vel hostili, vel pacifico animo*. Quod efficit Jus armorum, seu BELLUM, PACIS, & FŒDERUM. Jus armorum universis, vel salutem, vel pestem maturare potest: ideoque inter maxima semper fuit relatum. Quamvis autem exter-

nos imprimis concernat; quòd civem refractarium judiciorum vis castiget, quam frustra opposueris hosti; qui tibi, extra territorium tuum jus dicenti, impune possit non parere; atque ideò desideretur aperta violentia, qua reprimatur injuria adversariorum, quoties sedenti quiescere non licet: nihilominus vel ideò quoque inter prima civitatis jura reponitur, quòd seditiosos subditos, qui in hostes degenerant, hoc validum instrumentum in ordinem cogat, & obsequium Majestati doceat exhibere. Jam olim sagaciter Philosophus observavit; *Vt maneat, vel non maneat Respublica, in ejus manu positum esse, penes quem potestas tractandi arma sit.* Id quod de injustè usurpatâ potentiâ eò magis exaudiendum est, quò vehementius in novitates eadem propendet. Jus Belli vocamus potestatem *constituendi de omnibus belli instrumentis, aut circa ipsum bellum inchoandum finiendumq; necessariis.* Digerit Majestas negotia, quæcunque belli, vel armorum nomine veniunt: vel quacunque tandem ratione parando, gerendoque bello congruunt atque conducunt. Respiciunt autem hæc vel *instrumenta belli, vel belli gestionem.* Ad Instrumenta referimus omne genus *armorum*, & dispositionem de usu eorundem; item *Munimenta Fortaliorum.* Hinc generaliter armorum usum in civitate ordinat imperans, & subditis, pro conditione Reipublicæ, vel concedit, vel eripit: ut aliquando ne permissum quidem sit, ferrum gestare. In Republicâ sanè Romanâ olim ne-

fas

fas erat, pacis tempore in Civitate cum ferro deprehendi. Victis quoque solebant auferre arma. quòd non fuerit usitatum Romanis, sancire pacem cum eò, qui adhuc arma teneret. Id apud plerasque gentes observatur, ne in palatia principum, aut cubicula, importet aliquis ferrum: ne militibus quidem, nisi specialiter custodiæ causâ excubent, id licitum fuit. Quod in concionibus & senatu valere adhuc, licet publicè concessus usus telorum sit, affirmant. Nota est Charondæ lex, quam Thuriis tulit, *ne quis cum telo in concionem prodiret*; nimirum ut pacaret conciones, ad vim & cruorem usque seditiosas. Contra quoque gestatio armorum, pro statu temporum, aut ingenio populi, vel tacitè concedi potest omnibus, vel expressè mandari. Helvetiorum legibus cuivis injunctum esse ferunt, gestare gladium: quem ne tum quidem deponunt, quando vaccas mulgent. Perpetuum quoque usum in *Parthis* observat JOSEPHUS l. XVII, *Ant. Jud. c. III.* tradens, *eos nunquam discinxisse gladios*: quod similiter de *Persis*, memorant antiquiores. Aliquando nobilioribus tantum permitti solet hæc facultas. Et hæc talia non saltem circa cives, sed peregrinos quoq;, Rempublicam intrantes, fas erit sancire. Sive ut consulatur nonnunquam securitati Majestatis, aut quieti & saluti publicæ; quæ invicem arctissimè colligantur: sive voluntas jubentis sibi sola sufficiat, nullâ aliâ urgente causâ. Tranquillitatem certe communem juvit Imperatorum cura, quâ fabricas & cu-

stodias publicas armorum sibi reservarunt. Eâ lege; ne cuiquam fas esset, sine jussu Principis, cum telo apparere; sed ne liceret quidem privatis, arma facere, aut vendere, aut quolibet modo mercari. Ideò publicè institutæ armorum officinæ, quas *scholas Fabricensium* antiquæ leges nominant; & *Armamentaria*, loca reponendis armis fabricata. Instrumentis, bella juvantibus, annumeramus *jus muniendarum urbium*, & *extruendorum Castellorum*: magni momenti negotium, in commodum Reipublicæ, aut ejusdem detrimentum evadens, & ideò sapientissimè tractandum, ac nemini privato, aut magistratui temerè concedendum. In gente præsertim non satis fidâ, aut in novitates & tumultus propendente. Præcipuum verò caput hujus Potestatis consistit in *Belli administratione*. Bellum vocamus *dissidium populorum*, per vim concertantium; susceptum ad propulsandam, aut vindicandam injuriam. Aliter describit CICERO, ubi bellum certationem per vim nominat. Angustior tamen hæc videtur descriptio, quàm quæ omnes hostiles molitiones includat. Unde GROTIUS inquit, l. I. c. I. §. 2. *Sed usus obtinuit, ut non actus, sed status, eo nomine indicetur, ita ut sit bellum status per vim certantium, quæ tales sunt. Dissidium* huc quadrat: quod & consilia, & præparationes comprehendit. Nam benè intelligitur, bellum etiam tunc reverâ agitari, ubi repentinæ adsunt invasiones, & ab alterâ parte consilia resistendi; quæ sufficiunt, licet exercitus nondum sit conscriptus. Finem & causam

sam adjicimus, injuriæ propullationem, aut vindicationem. Non quòd omnia bella talia sint; sed videri velint. Litigaturis enim, & belligeraturis nunquam prætextus desunt. Distribuitur quippe bellum in *justum*, & *Injustum*. Utriusq; conditionem Causæ qualitas determinat. Nam si causæ gravitas sufficiat armis movendis, justum bellum appellabimus: sin, injustum continuo dicetur. Si defendenda Respub. contra hostilem insultum erit, justum bellum habemus, ob legitimam tutelam. Item si vindicanda illata injuria; quando civitati integrum non est, sola resistentiâ iniquitatem hostium repellere. Si res nostræ, per vim ereptæ, non restituantur; aut quævis alia enormis illata sit injuria. Ex his, & aliis similibus causis justitiam, vel injustitiam belli determinarem; neglectis illis, quæ vulgò hîc requiruntur. Nam belligerantem in Republica, personam debere esse publicam; supervacaneum est dicere: quòd nemo privatorum regimen civitatis moderetur. Contra Rempublicam, & Majestatem, ab homine, non habente Majestatem, bellum posse ornari justissimum, argumento fit, expeditio Abrahami, contra Reges Orientis. Alii privati, lacescentes civitatem, latrunculi erunt, & prædones; non belligerantes hostes. Intentio & modus, si vel maximè honoris cupido & lucri se immisceat justæ causæ, aut indictio solennis non semper præcesserit, non vitiabit Justitiam universi belli. Nisi quod in modo gerendi aliquid subest morale, prohibens nimis crudeliter uti victoria. Quamvis enim

in

in hostem injuriosum plurimum liceat; subest tamen aliqua humanitatis ratio, quæ mensuram ac modum sæviendi præscribit, & temperamentum circa occisionem, vastationem, & similia, non tantum probabiliter & decorè suadet; sed clarè satis præcipit. Quæ tamen omnia ad Jus belli, hoc est; ad jus gentium spectantia, hîc non erant nominanda, nisi obiter.

V. Potestati autem bellicæ primò inest potestas *Decernendi belli publicè*. Provisio enim generalis Majestatis hîc ante omnia dispicit, num tanti negotium sit, ut bellum geratur; num expediat Reipublicæ, vindicare armis injuriam, an dissimulare; aut pacificâ viâ emendare. Ubi necessitatem armorum prehenderit, Ejusdem est, *modum ac tempus* decernere, quando, & qua ratione injurii pro hostibus habendi sint. Postquam ita examinata singula sunt, & decretum à Majestate bellum; per Fetiales, solemniter indicitur. Putaverim nihilominus omitti posse clarigationem, citra injustitiam, si illata injuria tam atrox sit, & evidens, ut negari possit à nemine, & adversarii nocentes, malè sibi consciî, ipsi expectent pœnam. Licet enim tum consultum fuerit, explicatis causis, bellum decernere solemniter, & per legatos illos militares, aut literas indicare: non injustum interim tali rerum facie censendum bellum, si Clarigatio negligatur. Modò jussu Majestatis læsæ inferantur hostilibus finibus arma. Privato ad tantam rem nulla auspicia. nam quæ
à tali

à tali geruntur, latrocinia dicenda sunt. Bellum enim gerere, præterquam Majestati, in Republicâ conceditur nemini. Quod non tantum in antiquâ, & recentiori Romanorum Republica; sed & hodiernâ Germanicâ, & qualibet benè constituta, sanctissimè observatur. In crimen læsæ Majestatis incidit, qui bellum in Imperio, invito Imperatore & statibus indicit, pœnâque fractæ pacis coërcetur. Certè PLATO capitaliter punit, si quis pacem vel bellum fecerit cum aliquibus, sine consilio & decreto publico, *lib. II. de LL. Lex Julia* illum Majestatis reum proclamat, qui injussu principis bellum gesserit, delectumve habuerit, exercitum comparaverit. Bene: nam sola Majestas id potest. Invadit ergo Majestatis jura, quisquis ejusmodi quid attentat. Nec ab alio expediri possunt omnia, quæ ad bellum gerendum pertinent. Sive scriptiōnem, & delectum militum; sive præfectorum constitutionem spectes: sive consilia tandem, quæ modum administrationis determinant. Id saltem obiter annectendum est, ut privato non licet inferre bellum alienæ Reipublicæ: ita resistere potest, ac debet quilibet ingruenti hosti, citra expectationem consensûs imperialis. Ita inferior quisque magistratus pro virili arma expediet. Contra hostem nimirum. nam paucos aliquos refractarios cives apparitorum coget manus: nec opus erit, in manipulum hunc inobedientium, jurisdictionem ad bellicam vim ascendentem fingere. Deinde, ad reprimendum hostium conatum, id permisc-

rim

rim inferioribus tantum. Nam ad vindicandas injurias, quas Rex persequi negligit, nullum jus concederem subdito. Mihi certum est, Magistratum, sine jussu Principis, bellum inchoare haud posse. Neque enim universaliter hoc alicui mandari potest: cum belligerandi tempus & modus, quo injuria vindicanda est, maximam partem constituat judicii civilis, de administrandâ universâ civitate. quod judicium citra confusionem inferioribus potestatibus nequit permitti. Nisi patentissimum statuas imperium, cujus membra longissimo intervallo à se dissita sint, & in extremas illas ditiones mittatur aliquis universalis Administrator, qui vicem Regis sustineat, amplissimâ auctoritate instructus, & quæ nominatim permittat, belli gerendi facultatem, quotiescunque causa fuerit præstò. Cum enim ejusmodi remotissimæ regiones, barbaros vicinos habeant, ita instrui debent, tanquam bellum perpetuo gerendum sit: & ea potestas Proregi communicanda, ut quamlibet invasionem barbarorum, non saltem repellere, sed alternâ impressione, cæde, rapinâ ulcisci queat. Ad terrorem nimirum incutiendum maleferiatis vicinis, ut aliâ vice quiescentem ne lédant. Et solet ejusmodi præfectis universæ provinciæ plenissima ad eò assignari facultas, ut pro arbitratu viri prudentis, quælibet possint expedire, quæ Majestas ipsa præsens constitueret.

• VI. Tandem potestati Bellicæ adhæret jus *finem imponendi bello*, aut præliis, & concertationi-

tationibus. Quod fit *Induciis* & *Pace*. Aliquatenus enim terminatur, si non bellum, tamen concertatio, Induciis, illis bellorum feriis. Habent aliquid pacifici, licet bello nondum sublato. Rectè vocantur *conventio*, per quam bellum manente, bellici actus cessant. Non pax sunt inducie: bellum enim manet, pugna cessat, inquit GELLINS. Pacificum certè aliquid subest, & notanter Poëtæ dicuntur, *Pax sequestra*. Efficacia in eo consistit, ne aliquid violenti metuendum sit eo tempore. Videmus autem inducias dari à Præfectis quoque & ducibus: illas nimirum particulares & brevioris temporis, in horas, aut dies aliquot. Videtur enim hæc humanitas idonea ad subjugandum hostilem animum, & commoda propriis necessitatibus consulendi. Quare administrationi militari creditur inesse hæc quietis imago, & ducibus, non tantum summis universi belli, sed minoribus, qui separatim, non omnino alligato ductu, hostem oppugnant, aut obsident. Universales autem inducias, in aliquot menses, aut annos porrectas, cum paci propius accedant, Majestati soli competere, verius est. Ad ipsum illum, ad quem belligerandi potestas spectat, simul pertinet jus PACIS: ut possit commodo tempore, & quibus conditionibus, si liceat, civitati publicam quietem conciliare. Et hinc judicium illud commune, & Regimen universale flagitatur; ut caveat pacem pangens, ne pacificatione detrimentum capiat Respubl. Hujus est omnes scrutari rationes, quæ vel famam ac decus, vel ignominiam adferre vide-

videantur; quæ vel in præsens, vel in futurum fructuosæ, aut damnosæ civitati expetant. Addeò prudenter hoc negotium tractandum est, ut, quamvis pax sit optima rerum, quas novisse datum est homini, expediat non infrequenter eligere bellum animoso consilio, quam servili, & abjecto animo, intutam quietem, aut propudiosam pacem optare. Ejusmodi plurimum inspectio satis argumentum præbet, cuiuslibet ex vulgo permissum non esse pacis opus: sed uni servatum, cui disponendi publica, facultas data est.

VII. Idem arbitrandum de FOEDERIBUS: quæ providâ cautione fieri amant, ne in irreparabile damnum præcipitetur omnium salus. Quod si enim ex privatorum amicitiiis, cum quibuslibet initis, sua resultant incommoda; quare & prudentiores suadent, non omnes legendos in amicos: multò circumspectius agendum erit cum amicis publicis, qui eximiū Eidem ergo sancienda Fœdera copia est, cui emolumentum, vel damnum inferre possunt pacis introducendæ. Fœdus nobis *dicatur publica conventio, auctoritate imperantium facta inter duos populos, ad societatem & amicitiam colendam, & utriusque utilitatem promovendam.* Respicit extraneum hoc Jus: sed sub amica compositione. Nec ad duos tantum restringitur fœdus: licet plerumque illa societas inter duos terminetur. Possunt enim plures civitates illam conjunctionem participare. Publica hæc est conventio, nec ab alio, quam imperante, certitudinem suam consequitur.

Sæpe

Sæpe quidem minora imperia, bellica imprimis, videntur tale quid constituere: sed tunc *Sponsio* dicendum est illud pactum, quatenus Reipublicæ interest. Duces nimirum, aut alii Magistratus, qui ejus rei mandatum nullum habent, promittunt aliquid, quod populum tangat. Ad quid teneatur talis sponsor, si improbetur promissum, an ad restituendam rem in pristinum statum, an ad deditionem, alibi tractatur. Item de Notitia, & silentio Majestatis circa sponsiones, cum ad Jus Gentium pertineat, a nostro instituto, quod imperium, & ab imperio immediatè pronata persequitur, hætenus alienum est. Id satis certum est, quia Ducis, aut Magistratus imperio non subest civitas, haud obligari ejus consensione, aut pactione, nisi quatenus ipsa consenserit: & ideo Fœdera non panguntur ab ejusmodi officiali. Solet ex Fœdere obligatio induci in Imperantem & universam multitudinem: obstringitur enim iræ divinæ, qui minus steterit conventis. Hinc solemniter fiebant apud Romanos per Fetiales, addito Patre Patrato. Sacrum aliquid, non impiè temerandum, pactionibus his publicis subesse, fides data jurataque persuadet, & ceremoniæ veterum confirmant. Formulam, & ritum habemus apud Livium; Lib. I. & explicant Antiquitatis Consulti. De animali cæso videtur nomen habere: quod sanguine confirmatum fuerit olim fœdus. Nam hæc vox propriè de sanguine effertur; & fœdum, item fœdare, nativâ significatione de cruore dicitur.

tur. Ex circumstantiis variæ admitti possunt distinctiones, quæ causas initi fœderis notant; aut modum, vel durationem determinant. Inde *Fœdera defensionis*, quando socii, & confœderati se immiscunt bello, nullam aliam ob causam, quàm ut socios belligerantes adjuvent. Sic dantur *fœdera commerciorum*, quæ mercaturæ conservationem, & commoditatem promovent. Fœdera *Temporaria* & *Perpetua*, durationis tempus ac modus definit. quamvis de priorum naturâ omnia participant. Occurrunt quoque Fœdera *Æqualia*, in quibus socii ab utraque parte ad paria obligantur. *Inæqualia* sunt, ubi altera pars ad majora & plura, altera ad pauciora & minora tenetur. item ubi altera pars est inferior, & superioris Majestatem comiter observare tenetur. Inferior autem illa dicitur, respectu *fœderis*, non *subjectionis*: retinet enim Majestatem, & civilem suam libertatem, licet reverentiam aliquam, & honoris signum exhibeat potentiori. Egregiè PROCLUS: L. VII. D. de Capt. *Quemadmodum clientes nostros intelligimus liberos esse, etiamsi neque auctoritate, neque dignitate, neque jure omni nobis pares sunt: sic & eos qui Majestatem nostram comiter conservare debent, liberos esse intelligimus.*

C A P U T V I.

D E

COMMUNICATIONE DOMI-
NII & NUMMI.

- I. Princeps confert dominium privatis.
- II. Idem Nummum invenit.
- III. Nummi Materia, Pondus, Forma.
- IV. Valor pendet à voluntate Principis.
- V. Usus æstimat rem.
- VI. Proportio nummorum. Peregrini receptio.
- VII. Potestas mutandi monetam justa est.
- VIII. Nummi abrogatio.



Ognovimus ex dictis, quomodo Princeps, omnium capitum Rex, omnium bonorum in Republicâ Dominus, & universæ civitatis gubernator sit.

Tantam enim potestatem comprehendit Majestas, in se & absolutè spectata. Nunc ordine persequemur *Ejusdem communicationem*, quomodo variis modis subditos participes faciat sui. Pro captu scilicet recipientium, & qualitate rei recipiendæ. Communicat Princeps DOMINIUM; DIGNITATEM, POTESTATEM separatim; tum DIGNITATEM & POTESTATEM simul. Vidimus quomodo Deum imitetur Princeps *dominico jure* omnium rerum: statim apparet quomodo Vicari-

us

us divinam æmuletur bonitatem *dominii distributione*. Non sibi creavit Deus terrestria, volatilia, & aquatica; sed usibus & necessitatibus humanis. Ita Princeps non indigus omnium, plurima in subditos dividit. Ita enim arbitrandum est, constituto in Republicâ rege, omnia rerum dominia, quæ concesserat Deus homini, recidere in hunc Vicarium: eâ tamen conditione, ut tanquam Deus partialis, nova indulgentia sibi devinciat animos subditorum. *Regi omnia terra, æris, aqua munera Deos dedisse, Regem vero usum earum rerum populo indulgisse, reservatis sibi pro communi felicitate curis & laboribus*, SYNESIUS tradidit. l. i. de Prov. Quum Rex totius territorii dominus, divinâ ordinatione proclametur, primum beneficentiæ opus est, distribuere inter suos terræ superficiem, & assignare cuique immobiles possessiones: aut divisas jam, & occupatas confirmare. Animadvertunt Jurisconsulti, ad constitutionem dominii, rerum præsertim immobilium, necessariam esse Majestatis auctoritatem. Ejus quippe sententia definiendum principio erat, quid singulis concedendum, quid publico quoque usui reservandum. Pulcherrimus textus *Augustini*, relatus est in *Canonem*, quo jure. d. 8. Postquam disputatione minus impedita, ostenderat, Ecclesiæ villas post regna condita, non divino, sed humano jure, hoc est, Imperatorio, possideri: eximie scribit: *Tolle jura Imperatorum, & quis audeat dicere, mea est illa villa: aut meus est ille*

le servus, aut domus hac mea est? Et in fine. Nolite dicere, quid mihi *ſ* Regi? Quid tibi ergo *ſ* possessioni? per jura Regum possidentur possessiones. Dixisti, quid mihi *ſ* Regi? Noli dicere possessiones tuas, quia ipsa jura humana renuntiasti, quibus possidentur possessiones. Ambrosii quoque illud est: Non vis obnoxius esse Caesari, noli habere, quae sunt mundi. Talem in modum indigentiae humanae succurrit Princeps, concedendo locum, cujus culturâ cives ali possint. Non solum fructus hujus privatae terrae subdito permittit, sed magna pars ex publicis bonis & proventibus ad hunc redundat. Nam pisces, feras ac aves comedunt, qui nec aucupii, nec venationum, nec piscationum jura possident. Aliquando Majestas proventum illum publicum plenius permittit suis. Nam quae dominium continent, facilius conceduntur subdito, quam quae imperium sapiunt. Quum igitur in manu Principis sit, solum superficiem colendam ac habitandam concedere subdito: saepius contingit, ut bona publica eidem permittantur, tam quae juxta privatum fundum sunt, quam quae intra terrae viscera. Inde repetenda est concessio mineralium, & fodinarum omnis generis, quoties privati easdem tenent. Ita de *inventione thesaurorum* censendum. Thesaurus nimirum pecunia est, cujus dominus ignoratur, cum jam dudum vivere desierit. illius acquisitio, cum dominium includat, sine praescripto civilis legis haberi non potest. quare si disponat Majestas de thesauro, de qualicunque re inventa, ut

ut cedat inventori, legitima est acquisitio; sin contra prohibeat, injusta erit detentio. Hinc est, quod tam diversimodè dispositum legamus circa thesauros, fodinas; item venationes, & alia publica bona. Jure suo potest Princeps talia sibi servare, tanquam res dominio publico debitas: quando verò eadem permittit subditis, communicatum, & commodatum dominium agnoscendum est. Quod toties deprehendimus, quoties facultas venandi, ligna publica colligendi; item vectigalibus fruendi, & proventu maris, civibus indulta est. Scilicet tali conditione, rerum acquirendarum isti modi sunt, à Majestate introducti, plerique sub occupationis titulo aut inventionis latentes. Quæ introductio domini comparandi solam Majestatem agnoscit causam. Id vel ex Jure civili planum est, quod nullum admittit modum domini acquirendi, nisi à Principe constitutum. Multis quidem Jus naturale, & Gentium in ore est, quò dominia referunt: sed si premas & urgeas afferentes, nunquam commodam causam ejus derivationis prodent. Illa enim jura mutari nesciunt; quemadmodum figuræ domini quærendi mutabiles sunt. Tutissimum est, Principem solum facere auctorem dominiorum in civitate, in cujus arbitrio est, hac, vel alia ratione determinare acquisitionem. Et quoniam hoc opus solius Majestatis est; non omittenda erat in Politicis communicatio domini, quæ fit per potestatem adinveniendi modos domini quærendi.

II. Non

II. Non verò tantum communicat suum dominium Princeps dictis modis ; sed ut commodissimè celebrari possint commercia; *Nummum* invenit, quem utilitatibus subditorum largitur. Ut nemo privatorum cudat monetam; omnes nihilominus pecunias possident, liberalitate imperantium publico donatas. Hoc negotium dirigit *Potestas Nummaria*, quæ Nummum constituit, mutat, abrogat. Domestica hæc est facultas Principi: à Majestate adinventæ. Non puto, indistinctè à Gentium Jure, seu consuetudine, Nummi incunabula petenda esse: sed potius à constitutis rebus publicis. Quis enim ad arbitrium socii, dignitate paræ, consensisset? incertus, num illa materia valorem obtineret apud alios. Et convenisse gentes omnes, ut pacto se obstringerent, de æstimatione rerum, nummo perficiendâ, simile non est vero. Bene HERMOGENIANUS tradit, L. 5. d. J. J. post condita regna, cœpisse emptiones & venditiones, quarum natales nummo cœtaneæ sunt. In quam sententiam palam inclinat PAULUS noster, ubi materiam, cujus PUBLICA ac perpetua æstimatio, difficultatibus permutationum debebat subvenire, PUBLICA formâ percussam asserit. L. 1. pr. de cont. em. Quod constitutam Rempublicam oppidò arguit. Et licet videatur de suis temporibus loqui; respicit tamen primam originem nummi. Consentit Aristoteles, qui Νόμισμα à νόμος deducit, *quod sit lege constitutum*. v. Eth. 8. Lex vero ibi invenitur, ubi Reipublicæ usus est.

P

Et

Et alibi acute ad Oeconomiam regiam, administrationem nummariam refert; *quando faciendum* sit, ut nummi pretiosi sint, aut viles.

II. Oec. i. Firmat hanc opinionem asseveratio plurimorum scriptorum, qui indagaturi primum auctorem monetæ, regem aliquem conjiciunt fuisse, & aliis speciose persuadent. Sed sufficiat argumentum, quod hujus negotii curam omnes Principes, à plurimis retro seculis, sibi vindicarunt propriam: nec privatæ fortis homines involare passi sunt; sed tanquam insigne imperii usurparunt.

III. Hæc verò potestas circa Nummum conspicua maximè est in *Constitutione, Mutatione & Reprobatione*. Constitutionem absolvimus *Materia, Pondere, Forma & Valore*. Materiam principio elaborabimus. de cujus ratione id imprimis requirit *Aristoteles*, i. Pol. ix. *ut sit ex rerum utilium numero*. Quapropter ad res contrahendas tale quiddam de communi sententiâ constituerunt inter se dare & accipere, quod cum esset è numero rerum utilium, usum haberet tractabilem ac facilem ad vitam degendam. Quod ideò factum censet doctissimus PICCARTUS: *quia si prorsus materia nummi inutilis esset, nemo pro rebus suis eam adceptorus fuisset, puta si ex papyro, corio, aut ungulis animalium, pisciumve squamis, vel testulis, nummi facti fuissent*. Id trahere in dubium potest *Lycurgi*, sapientissimi Principis institutum; quod *Sabellicus*, post *Plutarchum*, & alios ita tradit: *Habuit à principio in animo res mobiles dividere: sed invidiam veritus, qua*

quæ inde imminebat (plures enim videbantur id agrè laturos) omnem auri argentique usum è medio sustulit, ferreumque nummum induxit, percussitque decussem, quem jussit minimi valere: ac tum demum omnis furandi occasio sublata est. Ignitum ferrum, ex quo nummum percussit, aceto exstinxit, ut ad rem nullam amplius ob mollitiem utile redderetur. Constat omne genus metalla fuisse adhibita. quod tamen primum fuerit, nemo in re tam creperâ & antiqua præsumet definire. cum modò auro & argento successerit æs, aut ferrum; modo æri nobilior illa materia. Spartani & Byzantii ferreis nummis usi sunt. Stanneos Dionysius Tyrannus in Siciliam introduxit. Attamen necessario ad metallarem materiam non adstringitur imperans, licet commoditas eam suadeat. Nam cum totum negotium ab arbitrio superioris dependeat, non à natura: liberum omnino est, designare materiam, quæ pretii nomen sustineat. Opinione hæc omnia constant: & auri, argentique nobilitas ab eò fonte fluit. Nihil peccasse arbitror in politicas regulas Principes, qui ex còrio, chartæve nummos fabricarunt. Quemadmodum de Tartaris memorant, & aliis populis, qui scorteis atque testaceis nummis usi sunt. Hæc omnia videntur elevare illam requisitam materiæ conditionem, ut necessum sit, eam ad alios usus adhiberi posse, abrogato nummi valore. Cum enim ex institutione hominum dependeat nummus, si penitus rem contemplemur, manifestum evadet, quamcunque ma-

teriam nummo destinare posse Principem. Materiae hodie *pondus* proximè cohæret. Satis constat, nummi valorem initio fuisse definitum solo pondere. Expendebantur, appendebanturque metalla. Hinc descendit illud, *pendere vectigal*, quod solvere est. *Pendere pœnas* propriè dicitur, qui ob delictum pecuniam solvit. quia, quum ære gravi uterentur Romani, penso, non numerato, debita & mûltæ solvebantur. Unde *Pensiones*. Diu retinuerunt morem hunc Romani, ut invento licet nummi usu, subinde tamen pondere & libra metirentur valorem metalli: tenaces nimirum pristini ritus. At non poterat illa appendendi consuetudo suis carere molestiis: quibus ut occurrerent rerumpublicarum rectores, signatus demum nummus est; non sine definitione certi, & forsan pristini ponderis. Et quamvis hodiè solo pondere non definiatur moneta; necessum interim est, hîc aliquid certi constituere: ut nummorum genera invicem aliquo modo distinguantur. Ut autem materiae denominatio uni relinquebatur superioris placito: ita similiter ponderis designatio eidem propria est. Ponderis vero, ut & æstimationis indicium, *Forma* illa externa est, quæ numismati imponitur. Post sublata ponderandi & appendendi incommoda, necessaria hæc est, quæcunque tandem fuerit. Pecudis insigne gestasse primos nummos, constanter omnes tradunt, indeque pecuniæ nomen deducunt. Sequentibus temporibus, cum nummus ad insignia & jura imperii spectet, conveni-

venientius creditum, imperantis effigiem ei-
em insculpere, ad declarandum auctorem.

I V. Primarium verò locum sibi vendicat
Æstimatio, seu *Valor*: omnem nummi natu-
ram constituens & absolvens. Contemple-
mur aurum, argentum, aliud metallum, in
propriâ suâ substantiâ: mercem habebimus;
non nummum, non pretium, quod aptum na-
tum sit, æstimare cæterarum rerum dignita-
tem. Potest materia certò pondere, certâ for-
mâ determinari: si absit valor, nummi haud
tuebitur nomen. Quod in antiquatis monetis
videre est. Æstimatio igitur anima est mone-
talis corporis. Hæc unica est, quæ nummo
essentiam, & propriam largitur naturam. una
hæc, pro sui differentia, nummorum diversa
genera introducit. una facit, ac sola, ut num-
mus perficiat & operetur illa, quæ ejus indoli
sunt domestica. Requiritur materia; sed ut
subjectum recipiens, nihil agens: additur for-
ma, sed tanquam signum imperantis valoris.
Hanc ob causam, æstimanti Principi, omnem
substantiam nummi adjudicaverim; & boni-
tatis metallaris, & designati ponderis unicum
fundamentum esse, publicam æstimationem,
ac Principis voluntatem pro lege ac ratione,
affirmaverim. Ut metallum idoneum judice-
tur fabricationi nummorum, nemo inficia-
bitur, decisionem ab Principis arbitrio ex-
pectandam. Ut nummus ex determinato me-
tallo cusus, hoc vel illud pondus sustineat, ab
auctoritate itidem superioris proficiscitur.
Hic idem, ut æstimationem adjiciat, neces-

sum est. Tædiosè disputant, qui in hoc argumento materiæ intrinsecam bonitatem & æstimationem urgent, cui respondere debeat nummus, si veritatem suam tueri velit. Principem astringunt isti, cujus intrinsecum valorem teneatur observare. Sed quæ illa metalli bonitas? num quæ ex metalli raritate, & naturalibus proprietatibus; partim etiam ex communi hominum captu & affectu sumitur? Non satis firma indicia sunt, ob quæ metallum metallo postponamus. Metalliraritas non statim materiæ nobilitatem arguit: aliàs ferrum, quod alibi locorum non invenitur, pretiosius foret auro. Et id conficeretur, metallum, quo frequentius, eo ignobilius esse. Sic Tagus, & Pactolus, & reliqua auro scatentia loca, ignobilissimum metallum vcherent. Ex quibus omnino sequitur, nihil certi posse concludi de bonitate metalli: cum modò ferrum, modò aurum, pro ratione infrequentis usus, in pretio forent. Unde igitur colligitur certa quædam, & stata materiæ bonitas ac excellentia? Si ad naturales proprietates recurrimus, omnia metalla bona sunt: quia habent debitam in suo genere perfectionem: nec hic quærere licet, quid sit melius, cum singula sint optima. Si nobiliores operationes objicias, ostendendæ erunt, cui soli metallo adhæreant. Nunquam probabitur; æs, ferrum, aut aliud metallum, suis destitui virtutibus & efficacis. Et si vel maxime naturales qualitates interdum nobiliores inveniantur in hoc, quàm illo: in Medicina id aliquid

aliquid valebit, ubi morbis occurritur, & imbecillitatibus opponuntur naturales facultates. in hoc civili negotio nihil operantur istæ dotes. Nam si ad illas qualitates respiceretur, procul dubio margaritæ, gemmæ, alia efficaciora, materiam nummorum constituerent. Et illa supradicta raritas quid est, num intrinseca quædam materiæ nobilitas, an penuria metalli? Sic defectus tandem nobilitatem complectetur. Si lubet ad hominum affectionem proclamare, procul dubio vincimus; & formulâ excidet, quisquis contra senserit. Si prima secula & incunabula nummi vestigamus, vix est ut argenteum, nedum aureum inveniamus. Non unam, sed plurimas gentes habemus, quæ æs, quæ ferrum, quæ aliud quid præter aurum, vel argentum, legitimam nummi materiam crediderunt. Prolixum foret, & supervacaneum, ex pluribus scriptoribus id ipsum confirmare: & occidentalium & septentrionalium, aut meridionalium quoque populorum monetas examinare. In quibus omnibus consensum habemus, non tam plebis, quam Principum; in quorum potestate fuit materiam nummi designare. Et nonne iudicium multitudinis in hac civili re pendet à iudicio Majestatis? Quæ omnia, ut planissima sint, rejiciuntur ab auctoribus, qui intrinsecam æstimationem nummis asserunt, *cujus accessoria sit imposita Reipublicæ æstimatio: tam obsequens principali, ut falsa sit, nisi respondeat interna.* Modicum quidem excessum tolerant, impendendum fabricationum sumtibus: con-

sultius interim judicare, numismata impensis publicis percudi, tanto valore, quanto ejusdem ponderis massa distraheretur. Verum hæc tandem probabunt, nummum a naturâ constitui. Si jam æstimationem secum habet, frustra non tantum, sed injustè imponetur diversa, vel minimùm ab ingenita discrepans. Quis autem illud arcanum aperuit assertoribus, quæ & quanta sit materiæ æstimatio intrinseca? Ego constanter affirmabo, rebus, quatenus merces sunt, nullam æstimationem inesse. Nihil potest simul esse mensura & mensuratum. Res sunt æstimatum potius, quam æstimatio. Et ne id quidem ab intrinsecâ rerum naturâ provenit, ut sint æstimatæ, quia hæc respectiva æstimatio extrinseca est, & aliunde per accidens supervenit, nec tangit penitam rerum essentiam, ex qua per se resultet. Quod concedunt Principi augmentum modicum externi valoris: id ab intempestivâ quadam æquitate proficiscitur. quasi in eorum manu situm sit, præscribere normam Imperantibus, secundum quam monetam æstiment. Exæquationem nummi ad rudem massam nolim repetere: eximiam juris monetæ ignorantiam præ se fert. Meminisse debebant, pecuniam omnes res æstimare, à cæteris verò non æstimari. Quamdiu metallum materia est, merx est; & recipit æstimationem, nullam confert. Quæ de lucro dicuntur, abjectum animum arguunt. In Principem illæ sordes non cadunt, qui nundinationibus ejusmodi non habet opus. Indignetur merito hanc perversam doctrinam

Strinam Majestas: quæ, cum non suis, sed populi utilitatibus produxerit nummum, suspèctatur injusti, & furtivi alicujus lucri.

V. Non turbabit sententiam, quod in permutationibus oporteat æstimationem positam fuisse in ipsis rebus, quæ absente nummo ad æqualitatem erant reducendæ. quæ reductio fieri non potuerit citra valorem utriusque rei permutandæ. Videaturque æstimatio ipsis rebus adhasisse, cum defuisset alias permutandi facultas; permutatione non interveniente locum, nec reductione ad æqualitatem, nisi utraque re, in suâ naturâ æstimata. Quin ubi nummo hodie mercem comparamus, dandum sit aliquod medium intercedens, quod æstimationem pretii applicet rei æstimatæ. Ratio quoque subesse debeat, cur tanto pretio ematur vendaturque res: ac illam à naturali & infito valore proficisci, necessum sit. Verum enim vero fundamentum ejusmodi comparatæ æstimationis Usus est. In permutationibus quærenda erat æqualitas: sed hæc posita minimè fuit in naturali æstimatione rei permutandæ. Nam quæ permutantur dissimilia plerumque sunt, & penitus inæqualia. quod verò ad æqualitatem reducuntur analogicam, id dependet potius ab hominum opinione, quæ cuique rei, pro ratione usus, valorem assignat. Egregie ARISTOTELES: v. Eth. 8. *Res inter se tam dissimiles ac dispares, si verum quarimus, nullâ communi mensura inter se convenire, nec coherere possunt: sed quod ad utilitatem indigentiamque attinet, satis commodè possunt.* Et paullo ante dixerat de rebus

diffimilibus permutandis. *Non poterunt comparari, nisi quodammodo sint equalia: ergo unum quiddam esse oportet, quod cetera omnia metiatur. Hoc autem re quidem verum usus, seu indigentia est, quæ omnia continet. Nam si nulla re egerent homines, aut si non similiter egerent: vel nulla, vel non eadem esset permutatio.* Usus ergo rerum æstimationem iudicat; non natura. Similiter quotidianus usus emptiones & venditiones moderatur: quare & pretia rerum non sunt ubique eadem. Quamvis in singulis locis, certo tempore aliqua communis rerum æstimatio sit; quam præsentem vocant Civilia jura; item *justum pretium, verum, verum & præsens pretium*: extra iudicis tamen sententiam, tanti æstimantur res, quanti emptorem invenerint. Aliquando luxuria & voluptas faciunt res pretiosas. *Qui modus est in his rebus cupiditatis, idem est æstimationis*; inquit CICERO. Adeoque rerum æstimatio procedit ab opinione, quam hominibus, vel præsens utilitas, vel delicata luxuria commendaverit; nunquam à naturali perfectione, aut excellentia. Quamvis hæc omnia circa æstimationem rerum obtineant, quæ variare consuevit: non circa æstimationem Nummi, quæ semper fixa est, nec mutatur, nisi à voluntate imperantis, cui originem debebat.

V.I. Æstimationi adhæret iudicium *de proportionem nummorum*, diversæ materiæ; de comparisonem auri cum argento, & reliquorum invicem metallorum. Ita viginti libris æris,
unum

unum auri solidum; & singulis libris argenti, quinos solidos exequarunt olim Romani Imperatores. Id affirmamus; liberrimam Principis voluntatem determinare proportionem: quarum varietas, in Rebus publicis deprehensa, id satis approbat. Romę auri partem modo decem partibus argenti, modo duodecim & dimidia æstimatam, observant Scriptores. Fuit aliquando auri ad argentum quindecuplex analogia, secundum GOVARRU-
VIAM. Quod verò idem Auctor, rationem tam variæ æstimationis in qualitate metalli reponit, non videtur esse sufficiens causa; nam fundamentum saltem generale habemus in materia, ut differentiam constituamus: sed quantum, ac quale discrimen statuendum sit, Majestatis arbitrium decideret. Hęc in republica absolvunt nummi Constitutionem: cui equiparanda est *Receptio monetae peregrinae*, aut veteris cujuscunque, quæ in desuetudinem abiit. Extraneum numisma nullam æstimationem ex suâ natura invenit in alterius territorio. Sicut leges extraneæ non possunt ullum hominem obstringere, nisi obnoxium potestati legislatoris: ita nec moneta extraditionem imperantis ullum valorem obtinet. Sed propter commerciorum frequentationem recipi solet interim: eaque receptio jus ac potestatem civilem arguit. Idemque præstat approbatio peregrini nummi, quod proprii percussio: ut teneantur nimirum subditi in emptionibus atque venditionibus, tum aliis contractibus, suscipere approbatam monetam.

V I I. Secundum momentum Juris monetalis, in potestate *mutandi pecuniam*, positum est: dum aliquid materiæ, ponderi, aut æstimationi, adjicitur, vel detrahitur. Circa materiam supra vidimus, illam planè justam atque legitimam esse, quàm Princeps elegerit. Ex hoc fundamento mutationem, introductam in materiam, defendimus. Hinc dicimus, Lycurgum monetam ferream nummis aureis jure substituisse. Et Dionysium, Syracusanorum tyrannum, stanneam introducentem pecuniam, nihil tyrannicum admisisse. Nam metallorum omne genus aptam numismati materiam subministrat, si auctoritas publica accedat. Ergo & invicem variari poterunt. Ad hæc si mistio instituatur metallorum, arbitrium cudentis pro ratione & æquitate stabit; quia res mere civilis hîc vertitur. Idem ut de pondere affirmemus, nulla difficultas impedit. Quia par utrobique ratio. Similiter se res habet cum æstimatione: cujus incrementum ac decrementum, optimo jure, in manu sua positum habet nummi primus auctor. Et magnum utrumque atque notabile, justâ ac stabili lege, poterit constitui. Nummus qui à Lege, si Philosopho fides adhibenda, nomen accepit, ad legis conditionem exigendus est. quam in civitate mutari posse ab eo, qui rerum summam tenet, dubio caret. Latentem aliqui, & occultam concedunt Mutationem. Ast si vitium dominationis, aut tyrannidis subest, minimè concedendum, si vel maximè fiat occultè. Silentium, & loci obscuritas, delicto
nul-

nullam justitiam circumfundunt. Si vero legitimum illud Jus est Principis, indignum fuerit, imperatoriam justitiam ad carceres condemnare. Fraudes, & furtivæ artes tenebras quærunt, & conspectum hominum declinant. Majestatis jura lucem affectant, & ab omnibus cognosci amant. Sed hîc nos omnibus diris devovet BODINUS, & parum abest, quin Principem, cum affirmantibus, ferventi oleo destinet. Referam verba ex VI. de Rep. III. *Ex quo intelligitur, nummis à Principe ipso, lege & auctoritate publica corruptis: quanta perniciēs ad Rempub. perventura sit. Quanquam Principi non magis licet improba numismata cudere, quam occidere, quam grassari: nec à jure Gentium, quo quidem auri & argenti pretium est constitutum, discedere, nisi Regis nomen atque splendorem amittere, ac falsa moneta fabricator, quam Princeps appellari malit. Rursus. At non modo corrumpi moneta, sed ne mutari quidem potest sine incommodo civitatis: quoniam mutatio pretii ac materia numismatum, census etiam ac bonorum cujusque dubitationem affert. quod dubium prolixâ digressionē explicat. Principiò mirari subit, illustrem virum, de jure Principis circa monetam, tam vulgariter & abjectè sensisse. Quid quæso est nummus, à Principe, ipsa lege & auctoritate publicâ corruptus? Post natas contradictionēs, vehementiorem non inveneris. Si Princeps adest, si lex & auctoritas publica adest, nulla corruptio timeri potest. Falsæ monetæ fabricatorem vocare Principem, reverentia summo Imperio de-*

debita, vetat: & à crimine læsæ Majestatis id vocabulum proximè abest. Inter homicidium, & pecuniæ mutationem, nulla jacet proportio. Et quænam est illa constitutio pretii, jure Gentium sancita? quale est ipsum illud Jus Gentium? num obligatorium, quod omnes populos ad observationem, aut pœnam obstringit? an aliquod Jus civile, per plures nationes dispersum? Planè hîc meminisse debebat, in merè civilibus institutis liberrimam esse voluntatè Principis, ut decernere possit, quicquid illa suggererit. Dubium illud non affliget Rempublicam. quod variatæ quoque monetæ certus valor insit: & collatio nummorum satis accuratè queat tradi: & ipsa mutatio in commodum publicum suscipiatur. Nobis enim hoc discursu id minimè agitur, ut persuadeamus Principi continuam mutationem pecuniæ, hætenus in suis ditionibus usitatæ; & protrusionem deterioris sortis in publicum. Id factum enim & intempestivum aliquando accider, & si frequentius iteretur, imprudentiæ speciem habebit. Laudamus illud sapientum monitum; *non temerè quid mutantum esse in Republicâ*; & ideò nec pecuniam. Vilescit auctoritas tam variabilia, & nunquam fixa condentis: & ut mollissimo verbo dicam, habendi cupiditas in suspensionem adducetur. Hoc interim consilium, ut decorum, ita minus validum est, ut omne Jus mutationis perpetuo inhibeat. Dabunt contradicentes; necessitate excusari mutationem: quod satis est juri præsumendo. quum suâ natura

turâ turpe, inhonestum, & moraliter impossibile, necessitatis nomine haud possit approbari, aut legitimum judicari. Dicunt, *impediri commercia*. Respondemus; hæc impedimenta nullum jus imperanti adimunt. Si absque illis civitas consistere nequeat, infirmitatis ac imperfectionis hoc grande documentum erit. quod talis civitas aliunde expectandum habeat, quod indigentia, & usui quotidiano impendat. Strenuè atque feliciter gesserunt rem majores nostri, licet distrahendis mercibus rem non facerent. Multum interim conferat Reipublicæ commoditatibus mercatura: ob mutatum nummum non inhibebitur. Quomodo floruerunt commercia, quando permutatio celebrata fuit? Et quasi maxima mercimonia permutando hodieque non promoveantur? quasi non dentur Respublicæ, in quibus nefas est, monetam exportare. Anglicana sanctio, & Moschorum interdicta, nota sunt. Aurum ad Barbaricum transferri à mercatoribus, noluerunt Romani Principes. quod multo tempore antea, consule *Marco Tullio*, senatus prohibuit; teste ipso *Cicerone* Orat. pro Flacco. Exempla in *Recessibus Imperii Germanici* obvia sunt passim. Sic ergo poterit mederi & illi malo Princeps, quod exportatio melioris monetæ, & levioris importatio, ab exteris facta, Reipublicæ videbatur minari.

VIII. Ejusdem ordinis est Nummi *Abrogatio*. Quoties moneta, tanquam reprobæ & rejiculæ speciei, aut illegitimi ponderis, exterminanda est; id à Principis judicio & potestate

state pendet. Cum Majestati ortum suum debeat nummus ; in hunc abrogandum neminis alterius potestas porrigitur. Nam quoties desuetudine quadam suscipi desinit , ad tacitum imperantis consensum omnino interpretandum est. quod vivente, qui primus percusserat, vix est, ut locum inveniat : cautis non minus, quam tenacibus suę auctoritatis Principibus. Alienam autē monetam amoveri frequentius videmus. Nec in abrogatione nummi, nec in mutatione, subditi consensus necessarius est. Plures interim consensum multitudinis requirunt, quando ponderi detrahitur, aut deterior admiscetur materia ; tum quando veteribus & usitatis monetis novum ac majus pretium imponitur. Rationem illam ponunt. *Pecunia usus & commoditas publica esse debet: quod vero omnes tangit, ab omnibus approbandum est.* Accedit & illud, *quod populo magnum detrimentum inferitur: id autem injustum est, nisi populus consentiat.* Sed magis est, ut dicamus, Principem solum, citra consensum subditorum id efficere posse. quod omne obsequium debeat imperanti in merè civilibus : nec subditus ullo modo possit suo dissensu Principis actiones facere irritas. Id de natura imperii censendum, ne ad alterius arbitrium examinetur, alias degenerat à nativâ suâ indole. Tenetur subditus, Principis decreta de quacunque civili re approbare : at neutiquam obstrictus est Princeps ad suffragium subditi emendicandum. Invitis subditis leges præscribit Imperans, judicia ordinat, bellum indicit,

dicit, moderatur omnia jura. Vanum est imperii axioma, si precarium sit. Nunquam expectat subditi consensum Rex, nisi in Republicâ temperata, seu regno limitato: quando jurat regnaturus, se nihil immutaturum in imperio, nisi consentiat integra civitas. Tunc religione jurisjurandi tenetur, non alio jure. Sic Arragonum reges consueverant jurare, se non immutatuos monetam. Quod singulare est, & malè ab *Interpretibus Canonum* ad universalem pronunciationem extenditur. Regula, de necessariâ approbatione, vera intelligitur de illis, qui habent consentiendi & arbitrandi facultatem, non de subditis. Leges civiles omnes tangunt, à Principe tamen, non interrogatis subditis, promulgantur. Ita de presenti negotio. Quin concedunt plurimî Auctores in hanc sententiam, ut dicant, licere Principi, etiam non consentiente multitudine, monetam mutare, *si justa causa subsit*. Sed præsumendum semper est, justam causam urgere, quæcunque tandem illa sit. Credendum id subdito est, qui in his civilibus nullum judicium, nullum examen habet. Quod verò nonnulli adjiciunt; cessante illa causa, illatum damnum restituendum esse: isti non intelligunt, mutationis, aut abrogationis finem. Nunquam mutatur moneta, ut damnum subsequatur; sed ut lucrum sentiat Respublica. Cum augetur valor, non potest subditus detrimentum sentire: quia nummo, quem jam possidet, accessit augmentum. Si vel maxime deminuat antea auctus valor; in parte lucri po-

ponet, quod nummum majori æstimatione hætenus expenderit. Et providere possunt alias Principes, ne damnum sentiat universitas.

C A P U T VII.

D E

COMMUNICATIONE DIGNITATIS, & POTESTATIS.

I. *Collatio Nobilitatis.*

II. *Magistratum institutio.*

III. *Varia Magistratum genera.*

IV. *Quæ jura tantum Majoribus permittantur.*

V. *Superioritas territorialis.*



Amiliarius communicat se Majestas, & propius in consortium trahit subditos, quando iisdem vel *Dignitatem*, vel quandam *Potestatem* circumdat. Quemadmodum enim *summa potestas* in Republica Imperanti assidet: ita simul incomparabilis *dignitas* oritur ex potestate. Utramque à Deo habet Princeps: à Principe subditi omnes, quos vulgari sorti exemptos vult ille. Confert autem *Dignitatem* indultis privilegiis rerum, quas inter præ eminentias opinio & consuetudo gentis posuit: qualia fuerunt purpurâ vestiri, flava cera uti, cæsariem alere, solis sanguine regio oriundis aliquando concessa. Hæc
tamen

tamen *insignia* potius sunt Dignitatis, quam ipsa Dignitas : conferri solita titulo Nobilitatis, aut cujuscunque Honoris publici, qui virtutem civilem pro fundamento habet.

Quum cives omnes inter se æquales sint, facile patet, Nobilitatem, quæ prærogativam, & inæqualitatem adeò status infert, non proficisci ab alio, quam Imperante, qui summam in Republica dignitatem habet. Quemadmodum hoc inventum efficaces stimulos generosis animis subdit, & ad res præclarè gerendas magnum momentum habet : ita ingens civilis ratio jubet, regnanti Principi quemque acceptam ferre suam Dignitatem. Hujus fundamentum est civilis virtus. Ita consuevit enim à multis retro seculis fieri, ut Principes viros de Republica optimè meritos, sive belli, sive pacis, sive utriusq; artibus, inferiorum ordini eximere, in sublimiorem locū evehere, & in testamentum ac præmium virtutis, nobiles proclamare soleant. Secundū gradus meriti, & facultatem, quā juvare possunt nobilitandi Civitatem. Inde *Ducum* nomina, & *Comitum* genera, apud Europæos : quum his titulis ornarentur, qui exercitibus præerant, aut commendatam provinciam judicabant. Nobiles enim reverà erant illi *Honorati*, qui Honorem alicujus Magistratus in salutem communem Reipublicæ gerere didicerant. Et habebat Majestas summam rationem, ut conferret dignitatem illi, qui vel strenuā manu, vel prudenti consilio, Reipublicæ commoda promoverat. Hæc dignitas, una cum fundamento suo civili, nec
auro

auro emitur, nec divitiis comparatur: quin, si verum amamus, per genus non transfunditur; sed personalissima est. Potest quidem Princeps etiam in indignum collocare axioma huius eminentiæ: sed Principis ipseus maximè interest, ne id fiat, & si forte accidat, Nobilitas sine fundamento est. Æstiment alii censu & divitiis nobilitatem; opinativa erit, & imaginaria; nulla politica eminentia. Cum pessimus quisque & ignavissimus, & ne unâ quidem operâ Rempublicam instruens, divitiis abundare possit. Nobilitatis genus consequuntur Doctores in Academiis. Nam in præmium ac testimonium Eruditionis, Majestatis auspiciis, confertur illa Dignitas; Equitum prærogativæ in Imperio Germanico semper æquiparata. Sed hæ Dignitates de imperio nullo participant.

II. Alio igitur modo se communicat Majestas, quando *poteſtatem* aliquam transfert in subditum. Contingit fere hoc secundum exercitium omnium Jurium Majestaticorum, in quantum subditus exercitii capax est: ut sublevet Majestatem, omnibus exsequendis non sufficientem. Eam quippe expeditionum publicarum & multitudinem & varietatem inveniunt, qui rerum summam in civitatibus moderantur, ut omnibus & singulis obeundis, impares ipsi non rarò deprehendantur. Ne tamen Reipublicæ commoda jaceant intercepta, prudenti consilio in partes vocari consueverunt, qui sagacis ingenii, & fidi ministerii ope, adiutant imperan-

perantibus: & exerceant horum nomine, quæ præsens usus postulat. Verissimum quippe est, quod *Vellejus* dixit; *Magna negotia, magnis adiutoribus egere.* Hi usitato nomine dicuntur *Officiales* & *Magistratus*. Omnibus his aliqua civilis facultas confertur à Majestate, ad exequenda ejus jura. Imperium enim Magistratum in Exercitio & Executione potius consistit, quam propriâ potestate. Eximuntur quidem vulgari sorti Magistratus: subjecti tamen manent Principi, qui potestatem illam exequendi repetere potest. Id enim ultro manifestum est, magistratum non aliunde habere originem, quam unde omnis potestas in Republica solet derivari: hoc est, à Majestate. Hæc una causa Magistratus; hic genuinus & domesticus illius effectus. qui sine opera sui Efficientis nunquam oritur. Quare in Romanis quoque legibus bene cautum est, ne quis magistratum gerat injussus, nisi reus velit censi Majestatis. Nemo enim sine scelere involare potest imperii sacra, quæ à Principis indulgentia descendunt. Quotuplex autem sit indulgentiæ hujus commissio, prorsus difficile est determinare. Distribuant aliqui hos Officiales in *Ordinarios* & *Extraordinarios*. Illos vocant, quorum administratio certis legibus definita est; hos, qui uni alicui rei distinantur, absolutoque negotio ad pristinam formam redeunt. Quæ secundum præsupposita certæ alicujus Reipublicæ instituta, & particularem considerationem civitatis, verissima sunt.

Ita

Ita enim Romanę civitatis gnarus statim respondere potest, qui ordinarii Magistratus sint; qui itidem aliquod imperium extra ordinem consequantur. Ceterum si hęc in universum aliquid pronunciaretur, facile suboriri posset confusio, descendentem ad particularem Reipublicę formam. Ordinariis vulgò annumeratur *Censor*. qui apud Romanos quidem ordinarius fuit; hodię apud paucissimos populos invenitur. Et plures decepit Romanę Reipublicę splendor, ut eam, tanquam perpetuam ideam civitatum in Politicis delinearent: nec discernere particularia illa, & temporaria instituta, ab universalibus. Discrimen Officialium haud melius assequemur, quam si juribus Majestatis singulis insistamus, & contemplemur, num executio eorundem committi soleat, aut possit.

III. Eundem igitur nobis est per Jura, in antecedentibus explicata, & primo loco illa universalia. Ubi generalior illa provisio, invigilans universę civitatis emolumento, communicatur *CONSILIARIIS*; qui in consortium ejusmodi curarum communium trahuntur: ut suggerant Majestati regimen concinnum, & salutare multitudini. Subditi non est rimari negotia & cogitata sui Principis: at Consiliariis hisce penitissima quęque Reipublicę, & intimi recessus regionum sensuum patent. quare benę intellexit rem, qui hostiles *COR PRINCIPIS* vocavit. Quamvis autem imperium nullum habeant, & nec decernendi facultatem, quę Præsidi hujus collegii, Majestati

jestati debetur: instruuntur nihilominus po-
 testate regendi consiliis Rempublicam. unde
 & summum gerere officium censentur, & pri-
 mum à Principe locum meritò occupant. Et
 similes his sunt, quoad defectum imperii, o-
 mnes qui Sacris & Academicis officiis præfi-
 ciuntur. Nam munus imperativum haud pos-
 sident. quanquam specialem ob causam utri-
 que careant imperio: illi; quod facultatem con-
 sulendi, sine decreto & executione habeant;
 hi, quod doctrina non procedat à Principe,
 quâ tali, sed adhibeatur tanquam instrumen-
 tum, ordinatum ad beatitudinem Reipublicæ.
 Participant tamen subditi aliquam potestatem
 circa Sacra, quando *Ius Patronatus*, ut vocant,
 seu facultatem vocandi Ministrum verbi di-
 vini, accipiunt. Imo ipsis personis Ecclesiasti-
 cis solet assignari potestas dijudicandi res, suo
 muneri cohærentes, quæ in CONSISTORIIS,
 Principem repræsentantibus, deciduntur. Hæc
 species Jurisdictionis est, quæ ab objecto, sin-
 gulare nomen sortitur: quoad suam naturam
 omnibus Magistratibus ferè committitur, una
 cum determinato illis officio. Id enim inter-
 est, quod Jurisdictio, vel diversum nomen
 sortiatur, vel cum alio munere jungatur.
 Consistoriorum Auctoritas puram putam ha-
 bet cognitionem & decisionem rerum Eccle-
 siasticarum. Similiter Belli Duci, & præfecto,
 unâ cum ductu exercitus, & administratione
 belli, permitti solet potestas animadvertendi
 in refractarios milites: quæ Jurisdictionem
 in causas militares, sive delicta militum com-
 plecti-

plectitur. & hæc separatim Judici Militari mandari poterat; ut solus ductus Imperatoris bellici esset. Sive autem conjunctim, sive separatim communicetur facultas animadvertendi in facinorosos, & contra leges impingentes: à Principis jurisdictione id nascitur. Nunquam JUDEX haberet illud jus, nisi Majestati judicium competeret in caput subditi. Inde munus quoque CENSORIS oriundum est. Nam quum Princeps mores subditi possit legibus formare: introducit magistratum, qui constitutionibus publicis difformes, corrigat. Hoc enim à Potestate in personam descendit. Et quamvis extrema provocatio propria sit Majestatis; institui nihilominus possunt COLLEGIA APPELLATIONUM, quæ ut CONSISTORIA, Principis vices suppleant. qui suo muneri satisfaciet, ubi in talibus præsederit. Ex Dominio Principis Magistratus prodeunt, qui bonis publicis præficiuntur; sylvis, venationibus, fluminibus & piscationibus, fodinis; ædificiis & viis publicis. Hi omnes curam peculiarem rei commissæ, & singuli jubendi aliquid, aut prohibendi habebunt facultatem. quanquam animadversio in delinquentes conjungi cum horum officio, vel separari, & loci Judici permitti possit. Harum autem rerum pecuniarii redditus, ut & vectigalium ac tributorum coactiones, quibus iterum peculiare ad sunt Magistratus, tandem traduntur QUÆSTORI. Quod officium modò sub fisci, modò ærarii; & hodie CAMERÆ titulo administratur. Innumeri
alii

alii Magistratus possunt constitui, qui *annonam, nundinas, cursus publicos*, & ejusmodi alia regant: quorum omnium potestatem ex cognato Jure Majestatis derivare, minimè fuerit impeditum. Oportet enim adesse in Principe imperium, si aliquod Magistratui communicari debet: hujus munus statim prodet, cujus generis istud sit.

IV. Illud vero tacendum non est, aliqua Majestatis jura, à solo Principe exerceri, & magistratui non posse committi. quorum exercitium immediate à majestate vult produci. Ejusmodi est *Legumlatio*, quæ à nemine subditorum expeditur. Licet enim Juris prudentes suggerere possint, quid justum sit: & Consilarii, quid utile: suggestio tamen illa instrumentalis, longissimè abest à Legis ratione. Iura quoque authenticè interpretari, mutare & antiquare, solius Majestatis opus est. Quicquid huc commodaverit subditus, vel scriptoris, vel præconis ministerium erit. Si permittantur *Statuta*; leges non sunt, sed pacta multitudinis, à Principe permissa. Similiter belli gerendi facultas transcribetur in Ducem: inchoandi, seu decernendi, neutiquam. Sicut nec finiendi. Nam sancientiæ pacis arbitrium nulli magistratui indulgetur. Qui tractandæ & promovendæ concordia adhibebuntur; interpretes erunt ac nuncii voluntatis regiæ. Idem circa conventionem foederum. Nisi per veros Legatos hæc peragantur, in quos persona Principis pulcherrimo invento transfunditur. quorū interim negotiatio, certa formula à

Q

Ma-

Majestate præscribitur. Ita Jus *Aggraviandi*, cum transcendat legum latarum tenorem, & impediatur inferioris Judicis sententiam, à solo Imperante peragitur. Cujus generis *Evocatio causarum* est, quæ ordinariam cognitionem Judicis sistit. Non aliud dixerim de coactione comitiorum, quæ potestatem in caput præsupponit. celebrari enim possunt conventus per amicam invitationem; sed hi differunt à comitiis. Et imprimis *Legati Missio* in hanc classem referenda est: quæ proximam translationem personæ regiæ postulat. Huc etiam pertinet Revocatio beneficiorum, à Principe antecessore, in præjudicium utilitatis publicæ, concessorum. Tum dominiorum privatorum, & modorum acquirendi Constitutio: & eorundem occupatio tempore necessitatis. Item tributorum & vectigalium institutio. Hæc enim singula speciale jussu Imperantis postulant: & magistratibus ordinariis non temerè committi queunt. Ponuntur autem in majorum Magistratuum manus, quando Administratores & Pro-Reges in remotiores provincias plenissimis mandatis ablegantur. Ejusmodi ministris, personam regiam commissa potestate referentibus, plurima licent, quæ aliis officialibus, præsentem Principe, minus conveniunt. Designantur pleraque in amplissimâ illâ delegati muneris formulâ: sed cum plures inopinati casus queant contingere, prudenti Vicarii prolixa facultas assignanda est. ne defectu mandati; & morâ detrimentum capiat res Principis. Quare & necessarias promulgare

gare leges , & innovare minus utiles ille poterit. Ordinabit Ecclesiasticum statum , si fortean correctione indigeat. Habebit largissimam Belli administrationem : & in subditorum Personam ac fortunas tantam accipiet potestatem , quantam suffecturam Reipublicæ conditio dictaverit. Contingere solet, ut belli tempore, Ducibus quoque , & urbium Præfectis majus aliquod imperium largiatur Princeps : potissimum quando hostis obsidionem minatur. Tunc creditur permissum, quantum defendendo loco necessarium est : licet in mandati formulis nihil specialius sit designatum. Inprimis autem hoc casu Dominii Eminentis exercitium, quod ad occupationem privatæ possessionis tendit, intellectum ubique tacite crediderim, quamvis expressa mentio non fiat. Quod omnis potestas ejusmodi Defensori concedita censeatur, quæ retinendo fortalitus conducit. cujus tutela explicari satis haud potest , nisi occupentur vicina, aut corrumpantur hostibus profutura. Solet enim Majestas in extraordinaria ejusmodi commissione regiminis, pleniori modo se communicare.

V. Eximium , & plane singulare , atque incognitum antiquioribus Politicis , specimen communicationis Majestaticæ posteriora hæc secula viderunt , in Sacro Imperio, circa SUPERIORITATEM TERRITORIALEM. Hæc Majestati æmula , & futura Majestas , nisi hanc superiorem tamen in suâ ditione agnosceret. Dixero omnia jura Majestatica in hanc confluisse : adeò proprio nomine atque

auctoritate hæc talia expediuntur, sine manda-
 to, aut præscripto superioris: ut aliqui seriò
 defenderint; *Statibus Imperii competere Maje-*
statem. Sed quum Imperium Germanicum u-
 na Respublica sit, cui repugnat pluralitas
 Majestatum: rectè quidem tistì opinioni fuit
 contradictum ab accuratioribus. qui interim
 nimis parcè ingenium Superioritatis, in rela-
 tione ad Majestatem, explicarunt. Indubita-
 bile illud est, magistratu amplius quid hîc sub-
 esse: quod operationes satis ostendunt. Con-
 dunt ejusmodi Principes leges, & suis Pro-
 vincialibus præscribunt, sæpe ab Imperatoriis
 diversas. imo contrarias, in publicis comitiis,
 protestatione facta, sæpe tutatus est serenissi-
 mus SAXO, tanquam JURIS SAXONICI De-
 fensor. Et habent Hujus, aliorumque Consti-
 tutiones, ejusmodi decreta, quæ veram vim
 Legislatoriam arguunt: distinctam planè à
 Statutis civitatum, quæ pactiones & conven-
 tiones sapiunt. Quoad RELIGIONEM tam ex-
 imia conceditur directio, ut Status diversam
 ab Imperatoris, Episcopali jure introducant.
 Habent quoque ingens illud armorum jus,
 cum omnibus suis adherentibus. Et ferè to-
 tam rem absolvit, imperium in caput subdi-
 ti, cum omnibus annexis potestatibus, Juris-
 dictione, & similibus; item Dominium in
 publica, atque Eminens, & propullulantia
 inde jura, notabili complexu tenent. Unde
 illud, sanè intellectum, verissimum est; *Prin-*
ceps in Territorio suo tantum potest, quantum
Imperator in Imperio. Quæ omnia magistratu
 publi-

sublimiorem potentiam inferunt; nec tamen ad Majestatem ipsam ascendunt. Nam *Extrema provocatio* cum modo concessa est, & quiescit in casu negatæ justitiæ, ut ad Imperatorem proclamare possint pressi subditi. Qui cognoscit ejusmodi controversiam, & ipsos etiam Principes, præsertim ubi contra Majestatem aliquid designatum est, judicat. Pluribusque aliis modis declarat imperium suum in superioritatem, feudali nexu obstrictam ejus Majestati. Interim hoc Potestatis genus analogum Majestati, inter quam, & magistratum jacet medium, ita tamen ut ab hoc longè absit, & proximè ad illam accedat. A quâ licet oriatur & dependeat, tolli haud potest pro lubitu: sed in perpetuam & hæreditariam possessionem, promisso Cæsareo, confirmatur. Non versatur circa nudam executionem jurium: sed veram continet Potestatem, analogam summo imperio, secundum omnia ejusdem Jura. Hujus ingenium, pro institutione, verbo tangere libuit: accuratior cognitio à Juris publici interpretibus petenda est.

C A P U T V I I I.

D E

L E G A T I O N E.

I. *Legationis causa est Majestas.*

II. *Legati Admissio.*

Q₃

III. In-

III. *Incolunitas.*IV. *Fundamentum incolunitatis.*V. *Legatus Iurisdictionem habet.*VI. *Legatum reum dimittendum esse;*VII. *Negatur; Et respondetur prajudiciis.*VIII. *Et Conjecturis.*IX. *Legatus, Principem referens, qui puniatur.*X. *Conatus jure punitur.*XI. *Quousque jus Talionis valeat?*

Non tantum munia propriæ civitatis administratos flagitant: incidunt tempora, quibus cum externis potestatibus de maximi momenti rebus transigendum Principi est. Cum vero nec commodum semper Majestati, pergere ad externos, & sedem suam ac caput rerum omittere; sæpe nec tutum satis, credere se peregrinæ fidei: salutari invento, omnium Gentium approbatione, recepti sunt publici nuncii, qui sustineant Principis personam in peragendis apud extraneos functionibus: præditi ea sanctimoniâ, qua & dignitati Mittentis, & securitati missorum consultum est. LEGATOS appellamus, quibus Princeps regiam personam induit, quos dignitate maximâ & illustri potestate ornat. Ut enim aliquis Legatus fiat, opus est auctoritate publicâ mittentis: quam sollicitè scrutantur populi, ut credere nolint Legatis, nisi mandatum sui muneris produxerint, & publicarum litterarum fide personam impositam fecerint testatam. Non immerito. Majestas enim

nim est, quæ intimam naturam Legati constituit, sine quâ nulla est. Sustinet partes publicas Legatus, quod accidet minimè, si mittens privatus sit, hoc est, imperii Majestatici non compos. Officialium constitutio, qualis cum excellentiâ quadam Legatus est, ad Jus Majestatis spectat. quod parziale non habebit, qui integro destituitur. Hinc *bello victi, & capti reges* hanc potestatem, cum reliquis regni axiomatibus amiserunt. *Pirata, latrones, &* id genus immanes homines, nunquam hoc jure gaudent. qui civitatem non habet, hoc privilegio Gentium caret. qui commercia & omnium Gentium jura intervertunt, immunitatibus communibus haud debent uti. Si distracta seditionibus civitas sit, & intestino bello impetatur Majestas: missos perduellium haud æstimandos esse Jure Legatorum, sine prolixâ ratiocinatione intelligitur. Principi in subditos perpetua est auctoritas: & legationum jura licet hostibus, perduellibus non competunt. Benè apud *Livium* Senatus Romanus censuit, *jus Legationis externo, non civi comparatum esse.* Admittendos aliquando & benigne habendos esse à Principe, suadebit indulgens æquitas: ut redeant cæteri ad frugem ac bonam mentem, & civili sanguini parcatur. Si inter duos, qui civitatem in diversis partibus, divisis auspiciis gubernant, controversia oriatur, cui seponendæ destinentur aliqui; hos Legatos esse, & tali jure frui debere, verius existimaverim. Nam tum hi Oligarchi plenario jure imperant, & singuli plenam obti-

nent Majestatem. Accidere enim potest , ut plures civitates arctissimo fœdere coalescant , ut unum corpus referant ; cùm interim singulæ perfectam Rempublicam forment. Quod ex *Strabone* & *Aristotele* GROTIO quoque notatum est. I. de J. B. III. num. vii. *Pu- pillos & infantes non mittere Legatum ; nisi ve- niunt aetatis fuerint consecuti ; pro illis autem Tu- torem mittere , & administrationi præfectos , re- gni nomine* , censet HERMANNUS KIRCHNE- RUS. I. de Legat. c. I II. n. 48. Mittunt Tu- tores Legatos, sed nomine & auctoritate Prin- cipis infantis ; cui Majestas asserenda est. Isti ut plurimum administri sunt , qui & reliqua Majestatis jura, & legationis , jussu & auspicio domini expediunt. Aliàs si propriâ facultate mitterent , necessario adscribenda istis foret Majestas. quod aliter se habet. Tutor enim, qua tutor , nullâ prærogativa summi imperii fruitur. Quæ de *venia aetatis & privilegiis* di- cuntur , ad Principes transferri nequeunt. A quo veniam ætatis consequeretur, qui superio- rem dispensantem non habet ? aut quî privile- gium habebit , qui extra leges , & supra omnia privilegia positus est.

II. Accedamus propiùs ad JURA , quæ Le- gati personam comitantur. Occurrunt po- tissimum duo : primum est *Admissionis*, ne re- jiciantur temere legati : alterum *securitatis* , ne violentur. Nam *obviatio* , *hospitium* , & alia, quæ honoris causâ exhibentur, ad ritû , & con- suetudinem potius , quàm jura referenda sunt. Hinc si omittantur , aut minus splendide præ- beantur ,

beantur , nullam culpam violatæ legationis secum trahunt. De Admissione prius. Plurima sunt legationum nomina & causæ , indeque non similiter de omnibus arbitrandum est. Si fuerit pacifica oratoris negotiatio , ab sociis , aut iis , qui bellum nullum inferunt , missi , non poterit non admitti. Culpatur igitur jure meritoque *Hannibal* ab omnibus , non solo *Hannone* , cujus hoc judicium : *Legatos ab sociis , & pro sociis venientes , bonus Imperator vester in castra non admisit , jus gentium sustulit.* Nimirum postquam *Annibal* , rupto fœdere , quod hætenus inter Romanos & Pœnos ictum erat , *Saguntum* , sociam urbem immani vi oppugnasset : Legati Romanorum mittebantur , hortantes , *absisteret bello , & socios sineret quietos agere.* Hos castris exclusit , mititque iis obviam , qui nunciarent ; nec tutò eos adituros inter tot tam effrenatarum gentium arma : nec *Annibali* tanto discrimine rerum operæ esse , legationes audire. Id *Hanno* vocat *Jus gentium tollere* ; qui statim subjicit : *hi tamen unde ne hostium quidem Legati arceantur , pulsi ad vos veniunt , res ex fœdere repetunt.* Proprium hoc omnium legatorum , etiam hostium , privilegium est , ut audiantur : nisi gravissimæ causæ contrarium suadeant. Quoties opinio subest , non bona fide geri legationis opus ; & documentis certis nititur suspicio , hostili animo emissos esse speculatores , incommodaturos tuis consiliis : jure non admittentur. Nullum jus gentium persuadebit Principi , ut pestem ex occulto grassantem ,

intra viscera regni ultrò recipiat. Tres causas ponunt justæ repulsæ, ortas ex persona mittentis, aut missi; tum ex causâ Legationis. Quando *hostis armatus* mittit; cui *hæreticum* aliqui adjungunt. Si legati persona ob impietatem, perfidiam, invidiam invisâ est. quosdam ob statum & sexum, ut *Judæum* & *fœminam* excludunt. Denique si in detrimentum Reipublicæ expetere possit, quod profertur: sub prætextu conciliandæ amicitiae, revera ut in seditiones atque defectiones concitetur multitudo. Quod ultimam illam fraudem attinet, si de eâ certò constet, arceri poterit perfidus Orator. Secundum momentum satis aliquando ponderis habebit, in eam sententiam inclinandi animum, ut excludat infensum atque invisum. Et tum nihil legationi decedet: persona impia, perfidaque rejicitur. Quæ *Judæum*, *fœminam*, vilem comitatum, repellant argumenta, nondum inveni. cum forsitan reperiri possint, quæ & impio, & perfido, & vili succurrant: quod mittentis & missi personam hæc vitia tangant, admittenti non noceant. Nisi manifestum sit, contumeliæ causâ tale quid fieri. Sic prima causâ nescio, an semper obtineat. *Hæreticum* quod concernit, hunc ineptæ quorundam argutiæ repellunt, nulla civilia argumenta: & *hostis armati* Legatum exempla quædam rejiciunt; at sine constitutione universalis regulæ. Belligerantibus nunquam intercederet Oratorum commercium: nemo primus poneret arma, usque dum constaret de certa pace. quæ quomodo inter-

cepta

cepta legatione possit coire, ego non assequor. Potest forsan eousque valere ista ratio, si suspectum sit hostis ingenium: si aliud nihil quaesiturus legatus, quam ut extrahat tempus, rebus suis firmitus prospiciendi; aut si non unâ vice, simulatione hâc callidâ, decepit admittentem. Id verò in universum non satis causâ est, cur penitus à tali missâ legationes excludantur. Durante bello plura se ingerunt, quæ internunciis publicis peragi amant: ipsa pax nunquam conciliabitur, nisi sint, qui utriusque feroces animos mollire, & difficultates quæ obstant quietis consiliis, removeverint. Quamvis etiam sufficiens causâ subsit, quæ rejiciat suspectum oratorem; & nemo cogi possit, ut admittat hominem, de cuius non tantum dubitatur fide, sed perfidiâ jam constat: ne tamen inhumanitatis alicujus insimulari Princeps possit, admittendus iste videbitur. Interim honoris specie, arctiori custodiâ observabitur: nec liberum permittetur, egredi designatum hospitium, aut colloqui civibus, nisi præsentibus fidissimis hominibus: in quorum conspectu nihil seditiosi possit moliri. Sic semper poterit recipi legatus; nisi luculentis testimoniis constet, eum concitandæ multitudinis causâ accedere: aut ipso ingressu, & admissionis actu, aliquid contra dignitatem Admittentis, & majestatem imperii sustinuerit designare. Quin si hæc talia prævideantur, denunciari poterit, ne mittatur, alias hostium loco futurum.

III. Si cessat justa repudii causâ, omnino

Q 6

reci-

recipiendus est legatus: & semel receptus statim ex jure gentium id consequitur, ut sacrosanctus atque inviolabilis omnibus habeatur. Hinc MARCUS TULLIUS, III. Verr. *Nomen legati ejusmodi esse debet, quod non modò inter sociorum jura, sed etiam inter hostium tela incolume versetur.* Sed nihil attinet hîc conquirere testimonia Scriptorum; cùm unanimis populorum consensus in vulgus notus sit. non invenietur ulla, nisi fortasse ferina gens sit, quæ neget in totum, *legatorum capita inviolabilia esse.* Nam & Barbaris morem esse, legatos venerari, *Totilas* dixit apud *Procopium*. Non diffitebor, dari aliquando homines infrunitos & facinorosos, qui contraveniant institutis gentium, & nullâ injuriâ laceßiti violent legatos. Id verò neutiquam tollit, aut infringit commune jus: quin roborat potius, quod hi tales & pœnas dederint læsis, & infamantur æternis notis à populis sanioribus. Non memorabo bella, quæ ob violatos Oratores gesta sunt: satis arguentia, ingens scelus fuisse perpetratum. Nam ut possit pœna sumi ab integro populo, necessum est, contra jus gentium aliquid esse commissum. Multum tamen interest, quis violentas manus inferat legatis. Si ipse Princeps id fecerit, contra totam rempublicam insurget læsus, & armis vindicabit injuriam. Si privatus eam intulerit, consilio publico, idem judicium esto. Si privato scelere quis aggressus fuerit sanctum legati caput, postulabitur reus ad deditionem, aut peti poterit, ut Domino suo
justas

justas det poenas. Alterum si locum inveniat, jam satis habet legatus. quoties nec deditur, nec castigatur à suis transgressor, poenam in se Princeps, aut populus convertet: exemplo Titi Tatii, & Lartii Tolumnii. Quod si lateat sceleratus homo, qui sacra legationum temeravit, non poterit territorii dominus accusari.

IV. Indagemus nunc fundamentum hujus rei, & descendamus in causas incolumitatis Legatoriae. Jus gentium tutelam esse Oratorum, in ore omnium est: sed rationem hujus paucissimi explicant. Legationes Juris gentium esse propterea dicunt, quia apud gentes passim usus legatorum fuit receptus. Ego legatorum sanctimoniam juris gentium dici & haberi exinde arbitror, quod populi, non tam voluntario motu in eam consenserint, quàm necessariâ Rerump. ratione ad eam colendam teneantur. Neque id dederim Magno GROTIO, *jus hoc, non ut jus naturale ex certis rationibus certò oriri, sed ex voluntate gentium modum accipere.* Nam unde nobis constat de inito illo consensu, quo primitus inter omnes populos hoc institutum invaluit? quis produxit tabulas, quibus formulæ horum pactorum continentur? Quin non potuisse nudo consensu obligari populos in perpetuum, ex eo constat: quod subinde novi Principes Rebus publ. præficiantur. hi ut non tenentur prædecessoris leges observare: sic multò minus extraneorum vinculis subjacent, nisi conventionibus ipsi denudò subscripserint. Præterea si hoc jus est

est obligatorium, & coactivè quidem, ut omnes populos obstringat ad observationem aut pœnam: necessum est, id à nudo & solo consensu non pendere. Eam ob causam, quod populi non cogantur semper & perpetuò eundem consensum, quem liberum habuerunt, quem nullum obligatorium vinculum ob necessariam rationem determinat, servare ac retinere. Consentiunt in illa, quæ commoda in aliis rebus publicis deprehendunt: sed ad perpetuam obligationem haud stringuntur. Consenserant plures populi, ut victus victori subiceretur. Sed ille consensus non habebat jus obligatorium: quia ex mera imitatione, non urgente alia causa morali, fuerat introductus. Quare nec puniri potuerunt tandem à finitimis Principibus, Christiani Imperatores, tollentes illam injuriosam victoriam, & subsequentem servitutem: quasi sustulerint confuderintque humanæ societatis jura, & vincula populorum temeraverint. Quod si non ex certâ ratione, sed solo consensu, procederet hoc negotium, posset mutuo dissensu rursus dissolvi. Nam quæ unicam voluntatem pro ratione habent, possunt citra controversiam in Rebus publicis mutari. Id tamen de legationibus ubi admiserimus, confusionem in ordinatas Respubl. magno molimine introducemus. Ausim ego securitatis causam omnem a Majestate mittentis arcessere. Nimirum Princeps, qui alterius territorium volente Domino ingreditur, quamdiu se hostem peregrinæ Reip. non profitetur, eò honore, ea-
que

que reverentiâ colendus est, ac si apud suos ageret. Si temerè, neminem laceſſens, violaretur: contra jus ac fas ſcleratiffimos parricidas facere, quilibet cenſeret. Neminem lædere, ne quidem infimę ſortis hominem, quamdiu innocens agit, ex præſcripto juris naturalis jubemur. Sed hîc concurrit ſimul publica gentium ratio, quòd Princeps, inſtructus imperio ac Majeſtate, quocunque loco fuerit, divinitatis quendam impreſſum charaèterem circumferat, & univerſæ Reipublicæ inſtar ſit. Quare ſive à Principe peregrino, ſive hujus ſubditis lædatur, ſemper Dei Vicarius, & integra communitas offenditur. Suſtinet nunc illas Principis vices Legatus, & huic quicquid accidit, ſibi vel honori, vel contumeliæ ducit Mittens. Nunquam verò ſine præſentiſſimo metu ſecuturæ vindictæ contemni, aut violari Princeps poterit, aut in hoc Reſpubl: niſi diſſolvatur ſimul vinculum & omne jus, quo hætenus gentes invicem conglutinantur. Majeſtas igitur, quæ Principis, Legati quoque caput tuetur: nec caput tantum, ſed comites & omnia vaſa. Quod hæc accessoria æſtimentur ex conditione principalis; & ſingula publico nomine miſſa intelligantur. In antiquâ formulâ Fetialium, poſtquam publicus interpres juſſus erat fœdus ferire, & jam puram ſuſtulcrat, ſic concepta erant verba: *Rex, fac ſne tu me Regium nuncium populi Romani Quiritium? vaſa comiteſque meos?* Rex reſpondit: *Quod ſine fraude meâ, populiſque Romani Quiritium fiat, facio.* Ubi ſimul licet obſer-

observare causam securitatis, & signum peti-
tum à Rege fuisse. Causam enim publicæ san-
ctimonix, communicandæ Legato, ab aucto-
ritate regiâ impetranda erat. Ita bona, & quic-
quid secum publicus nuncius affert, invadi sine
crimine, aut retineri ab aliquo haud posset. Et
si vel maximè antea contraxerit æs alienum,
privatus existens, aut fidejusserit pro aliis: non
tamen vel minimum ex fortunis legati in so-
lutionem debiti poterit capi, distrahive, aut
in pignus retineri. Idque accidit imprimis,
quod publico nomine adest, quicquid cum le-
gato est. Sed publica non possunt capi in solu-
tionem privatorum debitorum. Eodem jure
censendi comites, quo vasa. Nam & hi securi-
tatem, à primario Legato communicatam ac-
cipiunt: quare injuria illata comitibus, ipsi
legationis Principi illata censetur, & graviter
puniri consuevit.

V. Obtinent hæc omnia, quamdiu intra
terminos honestatis substiterint comites, nec
aliquâ affecerint provinciales injuriâ, quâ ho-
spitii Jus violari solet. Nam quoties damnum
aliquod intulerint hospitibus, aut admiserint
scelus, excidunt privilegiis, & postulari pot-
erunt, ut dedantur, vel coëreantur à Legato.
Non enim dederim; Legato nullam jurisdic-
tendi potestatem, aut imperium in suos com-
petere; quod ex plurimis historiis constet, a-
nimadversum esse in comites, quando aliquid
mali perpetrarunt. Et illud Politicorum axi-
oma; *mutato territorio mutari potestatem*; ad
privatos peregrinatores pertinere dixerim. Le-
gatus

gatus Principem refert, qui nunquam sine imperio est : & minus consuleretur mittentis auctoritati, si Legatus tanti imperii non esset capax, quantum sufficit ad comites regendos ; sed oporteret suos aliis tradere castigandos. Si vero non puniat Legatus prævaricationem suorum ; nolim eos abstrahi : sed dissimulari potius crimen, & committi vindictam Oratori. Nisi scelus palam atrox & immane sit, quod labefactet dignitatem, aut statum Reipublicæ. Tunc enim flagitari poterit deditio noxæ ; & nisi dedatur, nec luat debitas pœnas, vel ipse suspectus videbitur legatus, qui contra Remp. fecisse existimabitur. Quod ubi compertum fuerit, nec legatum supplicio eximendum arbitramur.

VI. Anceps quæstio est, & in utramque partem disputata ; *num Legati etiam tum gaudeant jure Gentium*, hoc est, incolumitate & securitate, ut inviolabiles sint, *quando aliquod crimen designarunt*. Sunt qui subjiciant ordinariæ pœnæ caput Legati, quoties aliquid admisit, institutis populi apud quem degit, contrarium. quod Jus Gentium à corpore legatorum tantum vim injustam declinet. Alii contra impunitatem promittunt transgressori, & dimitendum putant ad suum Principem, cum postulatis, ut eum dedat, vel puniat ; neutiquam vero læsos supplicium ab illo sumere volunt. Allegant consensum populorum, omniaque jura, quæ in genere securitati Oratorum favent. Subtiliter & conciennè hanc controversiam ventilat GROTIUS, II. C. XVII. N. IV. cujus

jus argumenta his verbis includuntur. *Recur-
rendum* inquit, *tum ad Sapientum Iudicia, tum
ad conjecturas*. Iudicia duo habeo maxime illu-
stria; *Livii alterum, alterum Sallustii*. Livii hoc
est de *Legatis Tarquinis*, qui proditorem con-
citaverant Roma: Quanquam visi sunt com-
misisse, ut hostium loco essent, jus tamen Gen-
tium valuit. Videmus hic etiam ad eos, qui ho-
stilia patrant, jus Gentium extendi. Sallustii
dictum ad comites Legationis, non ad legatos i-
psos pertinet: sed recte à majori, id est, minus
credibili, ad minus, id est, magis credibile pro-
cedet argumentatio. Is ita ait: Fit reus magis
ex æquo bonoque, quam ex jure Gentium, Bo-
milcar, comes ejus, qui Romam fide publicâ
venerat. Bonum & æquum, id est merum na-
tura jus, patitur pœnas exigi ubi reperitur qui de-
liquit: at jus Gentium legatos, & qui his similes
fide publicâ veniunt, excipit. Quare ut rei fiant
legati, contra jus est Gentium, quo vetari multa
solent, quæ jus natura permittit. Conjectura
quoque hinc stat. Verius enim est, privilegia ita
intelligenda, ut aliquid tribuant ultra jus com-
mune. Quod si legati ab injustâ tantum vir-
ti essent, nihil in eo magni esset, nihil præcipui.
Adde quod securitas legatorum utilitati, quæ
ex pœna est, præponderat. Nam pœna haberi pot-
est per eum, qui legatum misit, volentem: & si
nolit, ab ipso exigi bello, tanquam criminis ap-
probatore. Hoc ultimum alii amplificant duo-
bus, à comodo incommodoque petitis ar-
gumentis. Satius esse dicunt, nocentem dimit-
tere, quam fidem, publicè à Gentibus datam,
de

*de securitate Legatorum, violare. cum prætere-
verendum sit, ne legati nostri talionis jure male
tractentur apud eum, cujus legatus ante erat pu-
nitus. Obtendunt insuper obsequii necessita-
tem. Legatum non ex suo arbitratu agere; sed
ex præscripto mandati, quod à Principe acce-
pit. non esse subditi, Principis voluntatem
anxiè & scrupulosè rimari, cui exsequendi ce-
leritas sola incumbit. Hoc unum contendo, in-
quit hujus sententiæ propugnator, impune le-
gatis licere, sive per fas, sive per nefas, quicquid
sibi à Principe mandatum est, exsequi & perfi-
cere. Rationem vero, quæ maxime stringere
videtur, ex ipso fundamento, quo supra inco-
lunitatem Legatorum adstruebamus, petere
possunt. Subit Principis vices legatus, & quæ
istum sacrosanctum ac inviolabilem præstant,
ministro conciliabunt securitatem. Majestate
gaudet mittens, & inferior haud est illo, qui
legatum supplicio afficere studet; sed eidem
æqualis. Æqualis vero ab æquali judicari &
condemnari haud potest; sed subditus & infe-
rior coërcetur à superiori, qui judicis perso-
nam sustinere potest. Cum igitur legatus Prin-
cipem iterum referat; æqualis censendus erit
Principi, ad quem missus est. Et sic neutiquam
cogi poterit, ut judicii discrimen subeat: sed
mittendus erit ad suum judicem & Dominum.*

VII. Speciosissima hæc sunt, & quibus
nunquam satisfecerint hunc in modum colli-
gentes; *Secundum communia populorum jura
Legatum judicandum esse: quæ Gentium jura
in homines seditiosos, conjurantes, & similes a-*
nim-

nimadvertunt : quare legatum non excludi, et alia perpetrantem. Nam, quum hoc ipsum in quaestione sit, *num legatus, contra jus Gentium admittens scelus, possit trahi ad supplicium:* nihil contra dissentientes hoc discursu faciunt. Id libenter admittunt, & facile ambabus largiuntur negantes, violatorem Juris Gentium puniendum esse; affirmant etiam, Legatum, contra Jus Gentium peccantem, gravem poenam debere; sed hoc negant, poenam sumi posse à Republicâ, contra quam deliquit. Adeoque cum quaestione eadem est probatio. Alia igitur ratione ostendendum erit, Jure Gentium licere poenas sumere ab ipso quoque legato, si sacra Gentium attaminare fuerit ausus. Diluenda sunt breviter argumenta contraria. Quicquid de consensu Gentium hoc loco adfertur; id omne intelligendum est de legato, qui intra limites honesti & justi consistit. Tunc apud quoslibet, etiam hostes, tutus ac sacrosanctus censebitur. Gentium enim jus virtuti favet, vitium exterminat. Duobus judiciis sapientissimorum licet hominum, præcipuè si in eadem civitate vixerint, populorum consensum non posse probari, manifestum est. Hinc enim jus & consuetudo alicujus civitatis, non omnium Rerumpub. colligitur. Fuit istud ingenium populi Romani, eaque calliditas, ut æquitati & clementiæ plurima dare videri vellet: eoque nomine omnes ferè gentes in sui admirationem traxit. Quare non mirum si sæpius ex generosâ quadam animi magnitudine permiserunt aliquid, quod Jure poterant

erant non concessisse. Tarquinii legati ut admitterentur, Ratio status videbatur suadere. Propter ejectum non ita pridem regem, infames atque invisi proximis erant Principibus Romani: & attracturi videbantur omniū odia, si insuper legatis vim attulissent. rei scilicet omnium populorum judicio. Nam Regem expellere, qui revera habet imperium in populum, omnium suffragio nefas est: nunc si præterea legatos violarent; præcipuè, cum vicini haud crederent, eos in culpâ fuisse: id vero erat, non tam in Tarquinium, quam omnes populos esse injurium. Ne cumularent igitur invidiam, liberos atque securos abire jusserunt ultima meritos. Sic consulebant famæ, ut existimarent vicini, nimiam sævitiâ excidisse regno tyrannum, non subditorum perfidiâ; qui ne in noxios quidem animadverterent. Et quid si hunc sensum adjuvarent Livii verba: *Quamquam visi sunt commisisse, ut hostium loco essent, juxta tamen Gentium valuit.* Hoc est; Tale quid commiserant legati nefarii, concitatores populi, & turbatores publicæ quietis, ut ex facili deprehenderet quilibet, eos hostium loco censendos, ultimoque supplicio afficiendos esse. Valuit interim ex singulari quadam recens constitutæ Reipubl. ratione, & solertia Populi Romani, jus illud Gentium commune, quod legatis probis atque innoxiiis sanctitatem quandam circumdat, quâ inviolabiles sunt & habentur. Atque ita non dabant locum exceptioni reservatæ; sed communem admittebant regulam. Aliquis Tarquinio infensior illa adderet. Singularem

gularē æquitatē in ipsā admīssione conspicī. Non fuisse obligatos Romanos, Tarquinii legatos admittēre: quia ille exul, exutus majestate, & omni imperio, jus legatos mittendi amplius haud retinuerit. Non fuisse legatos; sed speculatores, sed proditores: & potuisse cēdi citra periculum Juris Gentium lædendi. *Sallustii* judicium magis videtur nostræ sententiæ favere. Bomilcar ille, proximus, & ob similitudinē morum maximē fidus Jugurthæ, quod Massivam, ex stirpe regiæ Masinissæ oriundum, hominem probum plane & innocentem, nefario scelere obtruncari curaverat; reus sit *magis ex æquo bonoque*, quam ex *jure Gentium*. Quid jus sit, quid æquitas, satis notum est. Quæ jus strictum universaliter consciscit, non possunt semper omnibus singularibus applicari: ob diversitatem circumstantiarum, quæ actiones, & regulam actionum variant. Succurrit statim æquitas, & particulare jus adaptat. Jam universali Gentium Jure cautum est, ut sancti & inviolabiles sint legati: sed quia hac universalitate nihil comprehensum de iis, qui contra fas aliquid perpetrant; necessario supplet illud Æquitas, & legatos quidem recte agentes etiam hostibus venerandos esse docet: at immemores honestatis atque justitiæ, gravibus pœnis reservat. Hoc *æquum ac bonum* vocat Sallustius: quod nullo modo injustum, nec Jure Gentium, nec naturali contrarium est. Hæc sunt duo ista iudicia; quæ ex antiquis rerum gestarum monumentis prolata sunt: quæ tamen commodam nostræ

nostræ sententiæ interpretationem recipiunt, & omnium populorum jus haud probant. Aliis haud æquè observatum esse hunc morem, vel ex Lampfacenorum concilio apparet; qui homines *Et naturâ Et consuetudine Et disciplina lenissimi* dicuntur Marco Tullio: (III. Verr.) & tamen, ubi *Verres*, cum comitibus, nefarium conatus esset scelus, in eam sententiam universi censebant; *tolleretur flagitiosus homo*. Et illa Romanorum consuetudo perpetua haud fuit: quod suppeditatum à Sallustio exemplum docet. Reus jam agebatur Bomilcar, & proculdubio supplicium ab eo sumptum fuisset, nisi eum furtim in Numidiam dimisisset Iugurtha. qui propterea paucis diebus à Senatu jussus est ipse Italiâ decedere. Agebatur id iudicium ab universo Senatu, Populi Romani nomine: quorum omnium tum prolata sententiam, potiore fuisse Sallustii opinione, si ea nobis contrariaretur, ego arbitrarer. Et exstare satis multa in partem utramque exempla, fatetur ipse Grotius: qui in *Annotatis Theodabati Gorhi*, ad legatos *Iustiniani* responsum adducit tale: *Sanctum apud homines legatorum nomen, plenumque honoris. Sed hoc jus legati interdum servant, quamdiu sua modestia legationis dignitatem tuentur. ita enim existimant homines, fas esse vel interficere legatum, si is in principem, ad quem mittitur, sit injuriosus, aut alienum matrimonium violet. Subnectere possem huic iudicio, Europæ ferè omnis consuetudinem, recentioribus potissimum Scriptoribus annotatam: quæ exempla,*
nostræ

nostræ sententiæ subscribentia, ab insipientibus, aut barbaris, & humanorum jurium contemptricibus gentibus, non producerentur.

VIII. Nunc ad Conjecturas. Certum est, privilegia legatorum tribuere aliquid ultra jus commune: & legati non tantum ab injusta, sed etiam justa vi tuti sunt. quod accidit in legatis hostium. Hostem occidere, ubicunque occurrerit, gentium jure communi licet. Ultra hoc jus commune aliquid tribuitur legatis: ut salvi & incolumes agant apud hostes, & tuti sint à vi, quæ in hostem semper justa est. Hæc verò privilegia non sunt extendenda ad eum casum, quem jus gentium noluit immunitate gaudere. Non permittit parricidia, seditiones, conjurationes, jus gentium; ergo nec hoc poterit tegi talium machinator. Nec est, quod admittam, securitatem legatorum utilitati, quæ ex pœna est, præponderare. Utilitas ex pœna vix una redundabit: nisi *securitatem admittentis*, utilitatis notione hîc capias. Quod tum neutiquam dederim. Securitatem nimirum hominis callidi, & ad fraudem acuti, sine ullâ religione ac fide; (nam de tali quæstio est) præponderare securitati universi populi: cujus salus plerumque in capitis regii incolumitate sita est. Et legatorum securitati, & Admittentium saluti prospiciendum est. Faciles essent Principes in suam perniciem, & ad cædes facinorosos homines invitarent, si ejusmodi legatorum execranda scelera dimitterent impunita. Pœna quidem haberi poterit per eum qui legatum misit:

misit: sed quid, si volente Domino conjuratio facta sit? Bello exigere vindictam, & tot civium capita fortunaſque perjuris proditoribus objicere maſtanda atque diripiendas, ubi citra ullam ſuorum cædem poſſit illa ſumi; ejus fuerit, qui non ſatis parcus ſit, ſed prodigus atque profuſus ſanguinis civilis. Quod ſi vel maxime bello impetatur poſtmodum, pœnam ſumens; conſcientiæ ſatis eſt, ſui deſenſione niti. Nec tunc fides publica læditur ab ulciſcente legati delictum. nunquam eo nomine alteri promittitur ſalus, ut promiſſoris periclitetur. Multò minus ex talionis lege poterit occidi innocens. Non eſt lex talionis, quando imparia penſantur; ſed quoties eadem quis patitur, quæ alteri fecit. Illius legatus ob ſua ſcelera punitus eſt: hujus innocens, non poterit tanquam nocens puniri. Quod ſi ejusdem farinae ſit, patiatur eadem, quæ juſ aliis injunxit patienda. Quod mandatum Principis, & obſequium legati attinet, id manifeſtam abſurditatem habet. Novimus, ad quæ juſ imperandi, ad quæ parendi quoque neceſſitas extendatur. Non niſi honeſta imperare poteſt Dominus: nullis mandatis, quæ pietati adverſantur, obligatur ſubditus. Hæc omnia certis rationibus, certo jure conſtant. Miſerè diſputant de jure, qui licere legato fas ac nefas exſequi, juſ gentium vocant. Emiſſarium & ſicarium vocaverim mancipium illud nequitiae, non legatum. Eſt hominum genus, quod regium veritatis tramitem tranſilit, & ex turpi aſſentandi libidine, diſcrimen honeſti ac perperam

R

facti

facti aut ignorat turpiter, aut impugnat malitiosè: propudium sapientiæ civilis, & regiæ doctrinæ dehonestamentum. Tales controversiæ hujus decidendæ incompetentes judices sunt. Licet mandetur aliquod nefas, cavebit tamen legatus, ne id perpetrandum in se recipiat, nisi jure plecti velit. Norit, omnia rectæ rationi debere esse consona, quæ gentium jus defendit: nihil absurdi, nihil impii ab eo profluere; & malitiam ab eo nullam consequi tutelam. Proferre quidem debet, quicquid Princeps jusserit: at post fidem publicè datam acceptamque, nihil contra hospites moliri.

I X. Superat arx totius disputationis, cujus destructione nostri asserti robur & fundamentum nititur. *Legatus Principis personam sustinet, at Princeps ab alio Principe non judicatur: quia par in parem non habet imperium.* Negari non potest, Principem præter Deum, superiorē non agnoscere, & ideo nec alium judicem. quia judicium præsupponit potestatem in caput: quam Princeps in subditos, nemo natus homo in Principem habet. Gaudeat igitur hucusque eâ securitate legatus, quamdiu legatus manet. Sed illud mihi detur oportet, posse Principem hostilia moliri, arma expedire, posse præliantem vinci, & victum captumque, si ita res ferat, trucidari. Sane hoc modo innumeros reges in acie cæsos, vel captos, post conflictum interemptos novimus. Non sortitur judicium Princeps, quamdiu Majestatem retinet, ubi in victoris manum ac potestatem fuerit redactus, exspirat pristinum imperii axioma

oma, subjicitur alterius arbitrio, & judicium subit, qui antea nullum patiebatur judicem. In hoste nemo quæsierit, Princeps sit, necne. Hostilia molientem hostilia manent. Quando Princeps pacatus alterius territorium transiit, volente Domino, colitur ac honoratur: sed cessat ille cultus, & in oppugnationem vertit, quamprimum iste hostili animo hospitium infestavit. Tunc omnia licent in Principem, quæ in hostem licere Jure Gentium possunt. Censeatur eodem jure Legatus. dum pacem colit, ipse colitur. Nam hoc causis Sanctimoniam adscribendum merito venit. Quod non omisit observare Clodovæus: *Inter arma namque sola legatio pacis sequestra est. Exiit hostem, qui legatione fungitur.* Eadem attendit Herodes: *Quid fieri magis impium potest, quam legatos occidere, pro aequitate, seu pace, loquentes.* Pacifico igitur nihil mali metuendum. Quando vero in caput imperantis, apud quem sedet, conspirat: quando subditos concitat in turbas atque seditiones: hostili jure puniendus est, quia hostilia molitur. Non poterit majori privilegio frui missus, quam ipse Princeps mittens. In quibus Princeps securitate gaudet, & venerationem exterorum recipit, in iisdem actionibus eadem legatus expectabit. Ubi vero nec Principi parcitur, incolumitatem nullam sibi pollicebitur minister. Fictio illa, quæ legatum quasi extra territorium constituit, plus quam fictio est. ita & Princeps alterius territorii invasor, in eodem captus, impunitatem consequeretur. Et si vim armatam intentans

legatus occidi potest, quod concedit GROTI-
 us ; *sive per modum pœnæ, sive per modum natu-
 ralis defensionis id fiat* , Jure Gentium id fieri
 necessum est. Cujus sequela est ; posse lega-
 tum, nefaria molientem, occidi Jure Gentium;
 quod in quæstione erat. secus enim ne defen-
 sionis quidem causâ occidendus esset, si Jus
 Gentium nullo modo cum violandum cense-
 ret. Istud vero notandum est ; ut puniri queat
 Legatus, *crimen adeo debere esse manifestum,*
*ut reus vel confiteatur ipse, vel luculentis con-
 vincatur testimoniis.* Non hic suspicionibus a-
 gendum : quæ temerariæ ut in virum bonum
 non cadunt, ita non sufficiunt, ut viri magni,
 quales legati sunt, ex iis sortiantur judicium.
 Deinde non ob quodlibet peccatum manife-
 stum puniri volumus legatum : sed quod *in-
 gens atque immane* fuerit. Hinc nonnulli di-
 cunt, vim inferri legato posse, quoties contra
 jus gentium fecisse compertus est. Quod ni-
 mis latè patere GROTIUS putat : *cum in jure*
gentium jus naturæ includatur ; & sic ex omni-
bis delictis puniri posset legatus, nisi quæ ex
mero jure civili oriuntur. Verùm non opus est,
 ut tam latè extendamus Gentium jus. quod in
 suâ naturâ consideratum contradistingui juri
 naturali, satis demonstratur in Morali doctrina.
 Hic potius arctabimus ad illos casus, quibus
 Resp. sibi invicem bona fide obligantur. Qua-
 les, ne hostili animo legatus hospitium lædat,
 ne concitet populum, ne struat insidias hospiti;
 aut in caput regis conspiret : & si qui similes, qui
 personam Principis, statum Reip. & datam pu-
 blicè

blicè fidem concernunt. Ob alia crimina, quæ magis in privatorum tendunt injurias, quam ut lædant dignitatem imperantis, quemadmodum Principes invicem nec sumunt, nec dant capitales pœnas: ita nec legati subjacebunt suppliciis. Cum satius sit, hæc talia dissimulare; aut significare domino legati, & ipsi relinquere punienda. Hinc facilè arbitrari licet, quid censendum de barbarie *Basilii*, *Moschi*, qui cujusdã legati capiti pileum clavo affigi jussit; caussatus, *rusticè istum texitse caput*. Sic Alexandri Magni factum, cædentis Persarum legatos, ob libidinem atque lasciviam, alii viderint quomodo excusent.

X. Porrigam dicta omnia ad conatum magnorum scelerum, & consilia seditionum deprehensa. Utut alii sint, qui contra fas gentium agere illos putant, qui legatos ob conjurationes, adversus imperium & principem deprehensas, pœna capitali persequuntur. *Legem civilem punire subditum propter conatum in crimine Majestatis læsæ: Legatum vero peregrinum, subditum non esse, nec in Majestatem peccare; Et solo jure Gentium judicari, quod affectum Et conatum non punit.* Principio liberaliter concedam, legatum contra Principem peregrinum peccantem, crimen læsæ Majestatis non committere. Id enim apud Politicos in confesso est, non peccari in Majestatem, nisi à subdito. quod legati personam, tanquam extraneam, non tangit. Dabo præterea, legibus, quibus subditi tenentur, Oratorem minimè esse judicandum. Instituta,

quæ propria civitatis sunt, sanctissimè observare debent cives, nisi a superiori pœnam expectare velint. Exteros ea cura non sollicitat: & legati igitur causam, non civilis lex, sed Gentium fas cognoscit atque disceptat. Quin illud etiam ex abundanti remittam, non omnes pravorum consiliorum molitiones capitali pœna esse persequendas. Conspirationem verò, adversus imperium & Principem deprehensam, non impunitam dimittendam, sed ultore gladio castigandam arbitror. Quod dicitur; *jus Gentium affectum sceleris pro consummato scelere non habere*: id ad liquidum nondum satis deductum est. Imo plurimum Gentium observantia, conatum conjurationis punit. Quod si quis excipiat, *conatum quidem fuisse punitum; sed quando subditus deliquerat; in legatum hoc jus non extendi*. Huic exempla non conquiram, id asserentia; saltem hoc pono: Legatum, conspirantem in caput Principis, plecti, non tanquam reum Majestatis; sed tanquam hostem, & quidem perjurum hostem. Ut hostis occidi possit, Jus Gentium non requirit alterius cædem præcessisse: sufficit hostili animo eam agitari. Alias nunquam aggressor, nequidem in bello defensionis causa, posset transfodi. Legatum autem, moventem seditionem, hostilia nefario ausu meditari, probatione haud indiget. Interimitur ergo jure, quod in hostem competit, in quem æterna porrigitur auctoritas.

XI. Supra incidebat talionis mentio, quam paucis evolvamus. Nimirum Principis alicujus

jus

jus Legati, nihil mali ausi, temerè, sine causâ, contra jus ac fas violantur; accidit postea ut lædens mittat aliquos, ad eum ipsum Principem, cujus nuncii antea contumeliosè erant excepti: num hoc rerum statu læsus poterit retribuere nefas, ac jure talionis uti; & occidere, si fuerint sui occisi, aut durius, inclementiusque habere, si tale quid fuerint experti? Videbatur id asserendum, non tantum, quod plurima historiarum monumenta suffragentur: sed etiam, quod Principem lædentem videantur referre legati. tum quod non insolitum sit, ut subditi pendant pœnas ejus crudelitatis atque injustitiæ, quâ Principes deliquerunt. Quod in bellis usu venire cernimus. Reges delirant, Achivi plectuntur. Belligerante domino, subditorum corpora ferro, bona rapinæ obnoxia fiunt. Sunt qui hoc retributionis jus admittunt idè; *quod paria delicta mutua compensatione tollantur, Et dolus dolo claudatur. Non potest aliquis fructum privilegii consequi, quod impugnavit: ac frustra sibi fidem postulat, qui fidem non præstitit. Non enim violari jus, sed reddi creditum est, si jura violanti non præstetur.* Largimur facile, talionem æquissimam esse, si par pari referatur: interim de hoc negotio nihil temerè asserendum. Refert Principis personam legatus, sed publicam: non privatam, non vitiis contaminatam. Et ex alterius voluntate nocens ac reus fieri minimè potest. Sustinent belli incommoda subditi, quia subditorum & Principis una voluntas præsumitur. ob

hanc inferunt, & accipiunt cladem, quam belli jus permittit. Sed legationis jus belli jure non infestatur ex præsumptione. Delictum delicto, & dolum dolo expiabit, qui per scelera tutum iter promittit sceleribus. Hoc axioma hætenus ignoravit gentium jus: à quo nihil admittitur, quod justitiam non referat & honestatem: cui exosum est, quicquid impio dolo inficitur. Quicquid delictum est, alienum sit oportet à pietate, à justitia, à vero Politico, qui semper vir bonus est. Quæ de impugnatione & fructu privilegii dicuntur, hic nullo modo possunt applicari. Si legato, hospitii jura violanti conspiratione, aut alio crimine, jus securitatis non præstetur, minime violabitur jus gentium: sed potius credendum est, eum poenam merito luere, quam jus dictavit, & accipere adeò suum jus violatorem. In nostrâ quæstione constare debet, num legatus ipse, cui Talio destinatur, consenserit in perniciem, aut injuriam læso illatam. Solent plerumque primarii viri, qui intimis consiliis præsumunt, legationibus destinari. Quod si contingat talem mitti, qui antea suavor & auctor, vel approbator tantum suo Principi exstitit, ut extraneus legatus pessimè exciperetur, vel occideretur etiam: hunc vel interfici posse nullus dubitaverim. Tunc enim causa perpetratæ cædis exstitit; & merito supplicio afficitur. Secus si ignoret, aut non approbet scelus: nulla justitia patitur plecti infontem, & poenam egredi caput noxæ. Hanc ob causam parcere debebat *Scipio* legatis Carthagi-

thaginienſium, qui auctores non fuerant plebi, ut Romani violarentur. Concunſus multitudinis erat adverſus Scipionis legatos inſurgentis, & magiſtratum auxilio prohibita viſ eſt. Nullum igitur tunc conſilium publicum. Et Aſdrubalem, quinquere mem Romanam, quę legatos vehebat, publicā fraude aggreſſum, non ſatis conſtabat. Romę agebant tunc temporis Carthaginienſes legati, ignari omnium ſclerum, quę populares eorum interim admiferant. Non igitur video, quid dignum fuiſſet pati homines, nihil mali meritos. nec ad generoſam magnanimitatem Scipionis, ſed ipſam juſtitiam diſmiſſionem illam exigendam arbitror. Quoad carcerem aliquid concedi poſſet: cū cuſtodix potius ſerviat, quam pœnæ; & ſecuritati noſtrorum conſulat, ut citius liberentur. Quod amplius permittendum videtur, ſi forſan levius aliquod contumelię genus fuerit, corpus legati non affligens. Iſta enim ignominia non legato, ſed Principi, qui ſimilia primus commiſit, aſperſa cenſebitur; & privatam legati famam neutiquā onerabit. Qua ratione quodammodo excuſari poſſet talionis juſ: niſi fides, quę publicè appropinquantibus ſolet dari, hæc impediatur. Fides, etiam violatoribus fidei data, ſanctiſſimè ſervanda eſt. Quoties denunciatur, ne veniat ejuſmodi legatus, aliàs hoſtium loco futurum: ſi poſthabito interdicto, tranſcendat fines, non tam jure talionis, quàm communi hoſtium cenſebitur. Hæc quamvis domeſticam ſedem in Jure Gentium habeant, obiter hic tamen erant aperienda.

C A-

C A P U T I X.
D E

MODIS ACQUIRENDI MAJESTATEM.

- I. *Modi acquirendi Majestatem.*
- II. *Occupatio.*
- III. *Occupatio injusta quid operetur.*
- IV. *De populo victo, non consentiente.*
- V. *Sors.*
- VI. *Electio.*
- VII. *Successio Primogenitorum,*
- VIII. *Quo jure nitatur, secundum Tiraquellū.*
- IX. *Num indivisibilitate regnorum?*
- X. *An Jure Natura?*
- XI. *Ius Gentium temerè allegatur.*
- XII. *Ius divinum hīc tacet.*
- XIII. *Ius hereditatis hīc nullum est:*
- XIV. *Similiter ac Ius Sanguinis.*
- XV. *Vera causa Primigeniorum.*
- XVI. *De natis ante regna: de Patre & Nepote.*
- XVII. *Nati ex concubina jure succedunt.*
- XVIII. *Aliæ species successionum.*
- XIX. *Subditus non usucapit imperium.*
- XX. *Argumenta, quæ Præscriptioni favent.*
- XXI. *Verior sententia.*



Implex imperiorum fons & una scaturigo est; sed formæ deductionum variant: dum plura quasi divortia, per distinctos canales ac tubos, Majestatem deferunt

ferunt atque derivant. Videas sæpenumero violento molimine, & bellico instrumento, quin parricidali manu, invadi sceptrum; eademque non rarò, imperscrutabili quadam fatorum Lege sic disponente, grassatorum, latronum, publicæque libertatis oppressorum, libidini permitti. Alii populi, quibus pacatiores tempestates propitium Numen adspirat, quasi arbitri summæ potestatis conferendæ, in consortium liberioris judicii vocantur: sumpturi in Regem, quemcunque vel unanimi suffragio, vel ex præscripto patriæ consuetudinis destinaverint. Non desunt vetustarum memoriarum documenta, quibus evincere licet, Deum præsentiori manu direxisse negotium, & ad instar ipsissimi Electoris, non aliorum ope aut interventu hominum usum, deduxisse in electum regale axioma. Nominando interdum sine ambagibus, & præficiendo insimul suo populo, quem elegerat: non infrequenter fortis indicio, cum aliquâ circuitione, conferendo Diadema. Usu venire solet pariter, ut in subjeção Majestatis designando, quasi sedeat, & cessans quiescat Deus; nec populo tamen statuendi Principis judicium largiatur: sed imperantibus eam facultatem tribuat, quâ & regnent ipsi, & filios posterosque ex se procreatos, successores regii solii relinquant. Hi sunt modorum potissimi, Occupatio, Electio, Successio. quibus Majestas, cujus una causa Deus est, & transfundi & acquiri consuevit. Quorum indolem atque naturam sequenti commentatione indagabimus.

II. OCCUPATIO est modus acquirendi imperii, qui victoriæ beneficio multitudinem profligatam, captam, aut quavis ratione superatam, victoris potestati subjicit. Communissimus transferendi imperia modus, quò pleraque in manum principum venerunt. Nam si in ipsa principia regnorum, quæ prima species fuit Rerum publ. & antiquissima, descendamus, simile vero est, tali occupatione cœpisse pleraq;. Nimrodo principem locum constanter asserunt: quem propterea *fortem coram domino venatorem* appellari censent, quod vi homines sub imperium coëgerit. Sic reliqui Assyriorum Monarchæ plurima regna sibi vindicarunt: non aliter Persæ ac Medi incrementa sua quæsierunt. Sic Alexander Magnus imperium mundi affectavit, & ex parte tenuit. Romani quoque innumeras provincias hoc bellico instrumento sibi subjecerunt. & Carolus ille Magnus Germanorum potentiam iisdem armis, in id fastigium evexit, ut esset omnibus gentibus formidandum. In his autem occupationibus exempla omnia eodem modo se non habent; dum aliqua legitimam ac justam causam bellorum allegare possunt; aliqua manifestam injuriam, vel primâ facie, ostendant. Diversitas hæc distincta judicia postulat. Laudamus & approbamus legitimum modum, & occupationem justo bello suffulram, concedimus palam. Quoties Respublica sedens, nemini molesta aut gravis, ab impio hoste laceffita, invasa ac læsa, arma capit, resistit, hostem profligat, subigit: justissimum imperium

imperium exercebit in debellatum. Similiter quoties injuriis aliis, contumeliis, latrociniis infestata & irritata, pœnas sumit à lædenti-
bus, eisdemque vincit : continuò in victos legitimam potestatem habet, nec expectat subjugatorum consensum. Nam si hic necessarius foret, nunquam legitimus victor consequeretur occupatione imperium : quod occupatio nullius efficaciam foret, si victus non consentiret. Et rarò invenietur, qui vinci malit potius, quam vincere : qui cum possit dissensu alterius dominatû infringere, intempestivo & sibi noxio consensu, victori jus in se permittat. Nescio quid in mentem venerit GUILLIELMO BARCLAJO, ut statuerit ; *eum quem Deus expressim destinat imperio, non ante Regem esse, quam populi consensus accesserit, qui eum super se regem constituat : Et corona sceptrique regalis traditione velut in regni possessionem introducat.* Paulo post dicit : *Ex eodem rationis fonte manat, ut quisquis Dei permissu viam sibi ad imperium vi Et armis munivit, quantumvis moderatè leniterque subactis à se populis dominetur, tyrannus Et sit Et habeatur, tantisper dum mitigatis Et flexis in favorem animis, Rex communi ordinum conspiratione atque consensu declaretur.* Quoties in sacris legimus, aliquem à Deo extra ordinem electum fuisse, nunquam sancitur, hanc electionem frustraneam fore, si populus eandem non comprobaverit. Quid si populus nolit expressim à Deo destinatum regem ; num invalida erit Divina voluntas ? Injuri sumus deinde erga legitimos victores, si

con-

concessâ victoriâ, & ejus fructibus uti prohibemus. Semper defectionibus patebit occasio, si prætextum hunc semel admiserimus, *non-dum consensisse in victoris imperiū victos*. Nunquam tutus erit victor, si tale quid suspicandum habeat à subjugatis: aut si jam timeat, suspectorum cædibus incolumitati suæ prospiciet. Excusarem quadantenus sententiam, si injustum occupatorem urgeret: nunc quia bonum quoque ac lenem dominum premit, prorsus reprobanda est.

III. Contra vero damnamus omnibus modis pessimos illos, & in perniciem humani generis natos consultores, qui Principibus auctores sunt bellorum, quorum injustitiam & ipsi norunt, & quilibet agnoscit. Publicè proscribenda est *Nicolai Machiavelli*, & sequacium doctrina, qui belli justitiam ex utilitate, quæ in victorem inde redundat, metiuntur. *Res sanè*, inquit, cap. III. de Principe, *è natura est maxime, maximeque pervulgata, velle acquirere: idque homines cum faciunt, modò possint, datur eis laudi, vel saltem vitio non veritur. At quum non possunt, & in id tamen incumbunt, error est, & meretur vituperium*. Contra tranquillitatem populorum, adeoque contra Jus Gentium fecisse dicendi sunt, quotquot talia scribunt, ac moliuntur: digni, in quos agmine facto universus orbis terrarum moveat & animadvertat. Verùm hoc argumentum de justitiâ, vel injustitia belli, hujus loci propriè haud est; sed sedem habet in explicatione Juris Gentium. Id saltem hîc ad-
ver-

vertendum est; quamvis injusti bellatoris invasio nemini; nisi honestatis ac pietatis hosti, probetur: negari tamen haud posse, plurimas gentes ex merâ dominandi libidine fuisse subjugatas. Quare in præsens ad nostram materiam oppidò pertinet, dispicere, quid injusta occupatio conferat. Notum est, quomodo *Alexander Magnus* latrocinii publici à prædone capto insimulatus sit; nec abnuunt illius bella & res gestæ. *Julius Cæsar* illegitimo itinere grassabatur in regale solium. Uterque tamen voti compos redditus, injustorum armorum ministerio, amplissimam potestatem sibi quæfiverunt. Nostrum non est, irrumpere in sacraria divinæ Providentiæ, & inquirere in causas, quibus moveatur ille regnorum Præses, ut ejusmodi latronibus successus largiatur, & victoriam indulgeat. Abdita hæc non scrutabimur: abundè erit, occupationi, & ejus effectibus inhæsisse. Quare, cum in vulgus notum sit, injustis armis subjectas fuisse provincias, dicendum planè est, *injustam quoque occupationem, modum esse acquirendi imperii Majestatici*. Quippe experientiæ nemo contradixerit facile, quæ testatur nimis manifestò, injustis possessoribus plura regna fuisse subdita. Contemplabimur breviter, quæ indicia observanda sint, ut cognoscamus, invasorem qui contra jus & fas, alienam Rempublicam occupavit, jam accepisse à Deo civilem potestatem in superatum populum. Quando invasor, maximam quidem Reipublicę partem tenet & occupavit; nec interim subjugati adeò sunt re-

reliqui, quin bellum illi inferre, & armatâ manu resistere valeant: si tamen vel incerta belli, vel alias difficultates metuant, quibus declinandis pares haud sint, & ideò consentiant omnes in potestatem invasoris; extemplo conciliatur eidem legitima auctoritas, & plenissima Majestas. Quin ipse violentus modus purgatur & desinit, dum honestiori titulo, & legitimo nomine auspicari regnum licet. Nec videò quid intersit in effectu Politico, inter spontaneam electionem, & consensum populi, qui sponte itidem hîc consentit, ne extrema forsan patiatur. Arctissimè obligatur populus ejusmodi consensu, ut Majestatis reus fiat, quisquis insurgere postmodum contra recentem dominum fuerit ausus. Et ita censendum est de omnibus invasoribus, quorum potestatem populus suo consensu roboravit. Subegerit forsan Nimrodus aliquos: dum tamen postea volentibus imperitabat, justum reddebatur imperii habendi genus, quod aliter infami violentiæ notâ laborasset. Aggressus fuerit injustè Rempublicam Cæsar Julius: postquam ipsi lege regia collata erat omnis potestas, non poterat citra parricidii & Majestatis crimen è medio tolli ac trucidari. Tali enim casu reverâ accepit Imperium, quod à parentibus violari nequit. Id obiter tamen circa hanc assertionem notandum est, ei locum esse maxime in Republica populari. Ubi enim potissima civitatis pars capta est, in arbitrio reliquorum est positum, utrum molliorem viam eligere, & prævenire victoris clementiam malint, ultro-

neâ

neâ submissione. Contra verò in Monarchia subditis licitum non fuerit, ad hostes transire, licet isti multa jam subegerint: nisi rex, & qui huic succedere debebant, extincti ab hoste sint. hâc enim conditione pristino soluti sunt obsequio. Id certò certius est; in Republica populari civem non obligari ad tanta, quibus obnoxius est subditus in Monarchiâ. Tali rerum facie, submittere se poterunt nondum victi, & summissione hâc stabilem acquirendi imperii modum transferunt in Electum principem, qui salvâ conscientia deinde præesse imperio queat. Non enim audio *Didacum Covarruviam*, Tom. I. Variar. Resolut. fol. 468. putantem, *modum hunc acquirendi Magistratum & subditos per arma, primitus & quoad primam originem regiminis, in foro conscientie nunquam posse legitimari, nisi vel extraordinario mandato Dei, quod est facti; vel Injustitia causse, orta ex ordinata vindictâ acceptæ injuriæ vel damni. Solâ præscriptione temporis non legitimari usucapionem; neque submissione partis spoliata, nec consensu populi, quin usurpator teneatur restituere per conscientiam, si aliis detinendi caussis destituatur.* Ego vero, quanquâ in præscriptione nihil præsidii posuerim: consensu tamen populi arbitrarer sufficientē esse; quod accedat proxime ad Electionē, quæ legitimo titulo acquirere finit imperia. Confundit *Covarruvias* præsentem quæstionē cum Restitutionis doctrina. Imperium, quod invasor accepit consensu populi, non eripuit populo; sed à Deo in populum accepit. Quod si resti-

restituendum foret, Deo, cujus indultu habet, redderet: in populum non transferret.

IV. Si populus in regnum invadentis non consentiat; victus autem sit, & in eas angustias reductus, ut resistere apertâ vi haud valeat Tyranno: utrum tum quoque eidem asserendum imperium, altioris indaginis videtur. CAJETANUS 2.2.q. 64. a. 3. non negat quidem imperium; *licere tamen cuilibet privato docet, ex insidiis adoriri & submovere publicum hostem. Quidam, inquit, tyrannus est in ipso jure Domini: quia scilicet usurpavit sibi dominium vi armorum, vel alias inique. Hunc talem expositum esse cujusque privati gladio, si non supersit superior, qui puniat invasorem, & coercet. Et quoties contingit eum occidi, censendum esse, non à personâ privatâ, sed publicâ auctoritate casum esse. Rationem hanc annectit, quod ejusmodi Tyrannus hostis populi sit, habens continuum bellum cum populo. Probat autem eum hostem esse, quod invasor sit, & oppressor libertatis, seu juris publici. Continuum bellum ostendit; quod inchoatum bellum, quo populum invadens, se ipsum nominavit Dominum, nulla est treuga interruptum, nulla pace terminatum: sed succumbens jacet populus. Pergit asserere, hoc bellum ex parte populi justum esse, ideoque quemlibet de populo justî belli auctoritatem habere, cujus tenore insurgere pro populo contra tyrannum possit, eundemque interficere. Extendit hanc conclusionem, etiam extra bellum, & subjacet privatorum ictibus quemcunque ex cive Principem: quod usurpa-*
verit

verit invitopopuloimperium & sic debellaverit:
implicito nimirum bello. Semper autem adesse
auctoritatem publicam privato, loco communi-
tatis tam utiliter gerenti negotium, ad ipsius
liberationem. Verum hæc omnia turpiter im-
 pingunt contra fundamenta Politica. Prima li-
 nea tollit sequentiū confusa asserta. Si imperiū
 habet ejusmodi invasor, expelli & interfici haud
 potest. Quia nihil attinet ad imperii naturam,
 quocunq; tandem modo fuerit quæsitum. Sem-
 per enim & ubique sibi respondens postulat
 obsequium; quod detrectare pro lubitu sub-
 dito minimè licet, multò minus imperantem,
 quamvis injustè, invadere & trucidare fas est.
 Nam quoad publicam auctoritatem, certum
 est, eam non habere locum, ubi superior nul-
 lus est, ad quem confugere possint subacti bel-
 lo. Conspiratio devictorum non efficiet au-
 ctoritatem publicam, vindicantem invasoris
 impetum. Ubi enim multitudo universa de-
 victa est, nihil publici remansit. Deinde Ty-
 rannus, quando, & quatenus populi hostis est,
 jure à quolibet cive interficitur: perpetuum
 autem bellum non temere fingendum est; sed
 compositum videtur potius, quàm primum
 id obtinuit invasor, ut oppressi ejus domini-
 um agnoscerent. Quo secutò, jam non tan-
 tum induciæ, sed ipsa pax tranquillavit tumult-
 um: postquam nimirum tyrannus se nomi-
 navit Dominum, & talein agnovit populus,
 licet coactus. Illud absurde falsum est; *victos*
justum bellum gerere. Ubi victoria bello finem
 dedit, ibi nequit idem superesse. Ubi victus
 suc-

succumbit victori, non est amplius rebellandi materia. Eo ipso dum victus est, dum oppressus est, & vitam retinuit à victore: cā conditione ac lege accepisse videtur, ne infidietur salutis victoris. Illud enim dubio caret, victoriam in caput victi potestatem conferre, ut in loco certaminis interfici queat: postquam autem victor pepercit subjugatis, omni modo prospexit suæ ipsius salutis, ne machinaretur aliquid in ejus fraudem captivus, incolumis dimissus. Infidiantem enim servatori suo, omnia jura damnabunt. Idem multò magis dicendum est, quoties sine bello ad dominatum aspiravit aliquis: modò agnoverint dominium, licet inviti, licet oppressi. postmodum non tollent è medio, semel legitime agnitum. Quamvis animo non assequar illum Reipublicæ statum, in quo sine bello, sine vi, populo interim invito, vel ambiat, vel consequatur tyrannus imperium. Incivili enim conatui restabit suo jure populus: nec opus habebit inermi civi, contra sua vota, aliquid indulgisse. Quod si obliquis artibus alicujus incolæ conniveat, ejusdem potentiam augeat, & eousque ascendere sinat, ut teneat summam rerum: negligentia suæ imputabit, quod non mature iverit obviam, & immodesta desideria inhibuerit. Nunc ubi tacendo adjuvit emergentem dominum, porro etiam acquiescat in ejusdem imperatis. Nam bellum fingere tali conditione rerum, imperitia est. Bellum enim implicitum hætenus Politica nondum est assecuta. Concludimus: Quoties
subditi

subditi adeò superati sunt, ut vires habeant nullas resistendi victori; invasor etiam injustus accepisse imperium, solâ victoriâ, sine consensu populi, intelligendus est; eò ipso, dum constrictam universæ multitudinis potentiam tenet. Eidemque vel hoc nomine incolumitas debetur, quod victis pepercit. Eo ipsò enim, quo subjugatis concedit vitam, hostis non est: & illo beneficio id sibi comparat, ne propriæ saluti struantur insidiæ.

V. *Electio* est modus acquirendi Majestatem, dum eligentium consensu certa persona nominatur, & digna censetur, cui imperium coelitus tradatur. Hanc dupliciter offendimus, quatenus solius Dei declaratione perficitur, aut quatenus hominum arbitrium intercedit. Illam vocamus SORTEM: hanc nomine generis appellamus ELECTIONEM. Sors olim usitata, hodiè extra ordinem, atque rarissimè adhibetur: itaque paucissimis erit nominanda. Satis enim habebimus, eam liberasse ab iniquitatis & incertitudinis suspicione. *Philo* putavit, sortem adeò improbam esse, ut nullò casu possit locum obtinere. Rejiciunt aliqui ideò hoc instrumentum Electionis, quod periculosum sit, negotium tantum committere cæco & erranti duci, deflectenti sæpe numero ad parum idoneos, nec discernenti dignum ab indigno. qui hoc cum fortunâ commune habeat, improvide ruere, quâ impetus tulerit, & patuerit spatium. Ego vero reverentius arbitrandum censeo de Sortibus: non *Platonis* saltem motus ratione, qui à Deo dirigi sortem, docet Lib. III. de

III. de Leg: sed quod etiam in sacris litteris dicitur, *hanc ipsam à Domino temperari. Sortes mittuntur in sinum, sed à Domino temperantur.* Prov. xvi. 33. Quin in populo Israëlitico Dei jussu, in majoris momenti negotiis, semper usurpatas novimus: veluti in judicio capitali Achani; & quod magis huc facit, in Electione Saulis; & in Novo Instrumento, in Electione Matthiæ. Ubi notandum, Electionē tunc Deo adscribi. *Videtis*, inquit Samuel, *quem elegit Deus.* 1 Sam. x. Cui exemplo aliorum populorum usus accessit. Absint igitur infames erroris & ignorantiae notæ, à divino negotio. Sæpe pessimus ab hominibus eligitur; sæpe indignissimus: propterea non damnant Electionem. Et fac, contingat fors ineptum & reprobum: quasi nesciamus, Tyrannos & sanguisugas à Deo immitti, qui populi transgressoris peccata coercerant & castigent.

VI. Frequentior Sorte, & Occupatione acceptior est *Electio*, quæ ex omnium aut plurimum voluntate imperium defert uni, qui publicè placuit. Secundum receptam distinctionem, *Electio* est *suffragii liberi*, vel *restricti*. *Electio libera* est, quæ nullis legibus arctatur, & caret vinculis, quibus alligata restringatur. Sumere ergo possunt in regem, quicumque placuerit, quotquot electione liberâ gaudent. *Electio restricti suffragii*, aliquando certum populum respicit: non infrequenter certam domum; sæpe etiam sexum. Quoad primam determinationem in promptu est Germanicum Imperium, ad neminem transferendum alium, quàm

quàm qui germano sanguine fuerit oriundus. Secundæ limitationis exempla suppeditat Respublica Lacedæmoniorum. consulendus CORNELIUS NEPOS in *Agefilao*. Sexum quoque fœmineum, pacta fundamentalia excludent. Documento sit Gallia, cujus regnum, vi legis Salicæ, nulla fœmina hereditarium habet: ad hujus instar Electio quoque poterit limitari. Ita enim tradunt auctores, *Saliorum lege cautum esse, ne terra Saliorum ab hoste, sive à Lancea, transiret ad fufum, sive colum*. Pro cujus confirmatione allegant, quod Servator dixit: *Considerate lilia, quomodo crescunt: non laborant, neque nent*. Quibus verbis Philippus Valesius regnum adeptus fertur. Memorant enim contra legis Salicæ oppugnatores tunc fuisse conclusum; Lilia Francorum non deberi nisi nobilibus, qui non laborant: nec debere, nisi masculis, qui non nent.

VII. Tertius modus quærendi imperii est Successio, quando citra designationem, à populo factam, ipse Princeps, aut recepta consuetudo, in certam personam regnaturi consentit. Successionum non unum genus est. Dum aliquando *conventionis pactum* devolvit regnum in alterum: sæpius *proximitas sanguinis* charissimo agnato eam prærogativam impertit. Ibi donatoris liberalitas, aut testatoris benevolentia, vel conjugum arctius fœdus imperia transfert. Sed de consanguineis successoribus primò agendum erit. Prostant hodieque exempla, & omnium temporum memoriis narrantur; quæ patrum scepra filiis
com-

commissa fuisse memorant, quasi hæredi-
 tariâ quadam traditione. Neque verò pertur-
 batâ confusione promiscue id agi cernimus, o-
 mni sublato ætatum discrimine: id obti-
 net potius, ut exclusis plerumque reliquis o-
 mnibus, unus primogenitus imperio admo-
 veatur. Cujus negotii causam, postquam ali-
 orum sententias examinaverimus, inquiren-
 dam nobis proponemus. Satis constat, digni-
 tatem quandam, & præminentiam primige-
 niis propriam fuisse: quam ex diversis indi-
 ciis colligunt passim auctores. Apud Judæos
 cum viguisse morem, ut primogenitus omnia
 duplicia in bonis paternis, & hereditatibus
 obtineret, ex Sacris patet. *Deut. xxi. 17.* Ho-
 noratiorem locum, & vestem peculiarem con-
 cessam, observat ANDREAS TIRAQUELLUS,
Prefat. de jure primigen. §. 17. 18. quam *spiritualem* interpretatur, ob sacrificiorum quæ o-
 bibant, singulare decus; eamque pretiosam
 fuisse putat. Sed id multo maximum privile-
 gium censendum est; quod regna primo-
 genitis fuerint, quasi ex debito, transmissa per
 successionem. Consuetudine enim plerarum-
 que Gentium, Primogenitum ad sceptrum, &
 paternum solium mitti, dubio caret. Tamque
 pertinax hujus, sive legis, sive moris obser-
 vantia, populorum animos invasit, ut rarissi-
 ma ex omni ævo depromi queant testimonia,
 quæ in contrarium vergant: eaque damnata
 interim auctorum judiciis cognoscimus. Nihil
 attinet nunc Ægyptiorum, Syrorum, Partho-
 rum, Persarum, Græcorum, Macedonum, ali-
 arumque

arumque Gentium instituta sollicitare : quæ ingenti conatu, prolixissimâ serie, communiter adducuntur ab iis, qui huic tractationi manum admoverunt. HERODOTUS certè in *Polymnia*, id apud universos homines sancitum esse affirmat, ut maximus natus liberorum obtineat Principatum. Et abuti otio videri possem, si satis in vulgus nota, & quæ præter omnium oculos eunt, operosâ narratione vellem persequi. Id sublimioris indaginis opus esse arbitror, penetrasse in rationes, quæ primogenito regale sceptrum asserunt. Aliquam causam subesse huic negotio, facile suspicabitur, qui perpendet secum, non posse fortuito illud, & sine rationis directricis dictamine fieri, quod in civilibus æquabilem actionem, & sibi similem semper apud plerasque gentes faciem ostentat.

VIII. Jus subesse, omnibus visum est : sed quæ indoles atque natura hujus juris sit, dubitanter admodum pronunciasse scriptores invenio. aliquibus *jus nature*, *sanguinis*, aut *hereditatis*; aliis *jus gentium*, aut *divinum* allegantibus, aliis alia laudantibus. TIRAQUELLUS generaliter complurium auctorum testimonio comprobatur, juris esse, ut præferatur aliis primogenitus : variis adjectis argumentis. *Non abs re, qui nomina rebus imposuerunt, Principis vocabulo, & eum qui regnum, imperium, potestatem, principatum obtinet; & Primum significare voluisse. Tanquam apud omnes gentes is, qui primus est liberorum, idem & principatum ante ceteros obtinere debeat.* Accedit te-

S

nerrimus

merimus ille parentum affectus, quo prosequun-
 tur primam illam sui propaginem; ceteris subse-
 quentibus non tam impense adamat. Cujus
 ratio in brutis sibi locum facit: amantibus in-
 signiter primum factum. Quod ex Homero,
 Pinio, Æliano Tzetze, comprobatur. Sive con-
 junctiores sibi invicem sint: (unde Syderalis
 scientia Scriptores parentum fata & eventus
 ex filiorum nativitate cognosci autumant: &
 Almanfor ad Sarracenorum Regem scribit; pri-
 mogenitum fortiolem esse significatorem vi-
 tæ parentum, quam alios) sive principium vir-
 tutis paternæ primus habeatur filius. Quare
 observatum antiquis illud dicitur, ut primoge-
 niti parentum nomine frequentissime vocaren-
 tur. In universum, meliores intelligi primige-
 nios, & virtute illustriori præditos: & primi-
 tias medicinalium herbarum, penetrandam effi-
 caciæ habere, fuse exponit. Pulchritudo &
 majus robur assidebat primigenitis: quin &
 Deo, ob integritatem erant immolanda. Adjicit
 plura de primitiis frugum, spoliis ex hostibus
 captorum, mundi muliebris. Quæ omnia infi-
 gnem eruditionem illustris TIRAQUELLI sa-
 tis produnt; & omnifariam politioris litte-
 raturæ apparatus arguunt: scatebram tamen
 illam non aperiunt, ex quâ jus primigeniorum
 promanat. Quanquam enim *Primus* Latinis
 voce *Principis* notatur: exinde tamen nullum
 regnum extruemus. Bellè procederet nego-
 tium, si linguarum omnium cum Romanâ ca-
 dem esset atque una conspiratio; & *primus* a-
 liis quoque *Regis* nomine diceretur. Eodem
 vero

vero labore rustici & olitoris filium primum, in solium collocaveris: quod & ille princeps dicatur. Imbecilles nimis, & exigui momenti collectiones à nominibus & vocabulis peti, annotarunt, qui vias rite & ex ordine arguendi tradunt. Ut taceam *Principem*, non demonstrare in nativâ significatione eum, quem nos hâc voce intelligimus. Regem hâc notatione capimus: ad molliorem terminum deflectendo rigorem nominis Monarchici. Nimirum Romani superbiâ, & malâ libidine Tarquinii irritati, infensissimi erant Regis titulo: & communibus suffragiis damnandum censebant, quicumque reducendi regni mentionem faceret. Sed, ex ingenio corruptæ Reipublicæ, cum supersedere non possent unius imperio: ad tempus legebant, quem *Dictatorem* vocabant, æqualis potestatis cum Rege. Post, cum moles Reipublicæ, in immensum auctæ, vitia publica circumferret plura; & divisa plebis optimatumque studiis, non satis præsidii haberet in legibus; mox discerpta miserè, ipsi fato relinqueretur sananda ordinandaque: unius arbitrio permittenda erat, qui *Principis* nomine universam sub imperium accepit. Ut mitigaretur nimirum civili nomine invisa potentia: & ne complexo rem, obesset titulus. Ex prima enim impositione *Princeps* est *primus*, sed sine imperio: modestia Augustorum ampliori significatui locum fecit & rationem, ut hodie Regem intelligamus. Non vi nominis; sed usus beneficio, & commodissima vocabuli in eminentiorem sensum exaltatione.

tione. Parentum amor non sufficit ad conferendum imperium: nam in subditis quoque observatur, qui nulla sceptrā transmittunt. Proprium aliquod argumentum, successioni regiae, primigeniis debitæ, militare conveniebat. Et quid si forteā novissime genitos charissimos habeant parentes, ut observat *Tiraquel-
lus*? Brutarum animantium proprietates, ut similitudini, longius petitæ, inserviant: moralium certè actionum, civiliumque, normæ haudquaquam sunt, & cognationem cum imperiis habent omninò nullam. Proximitas sanguinis, & prima patris virtus, jus succedendi in solium minimè conferunt. Prædictiones ex astris, ut incertæ maximam partem sunt, & incorruptæ ad nos non pervenerunt: ita ne quidem ab ipsis auctoribus suis, & admiratoribus, ejus efficaciæ perhibentur, ut imperii jus transfundant. Signa hæc cognationem patris & primogeniti, ex sensu *Tiraquel-
li*, notabunt: non ultra extendenda. Parentum nomine Primogenitos appellatos, rarissimè invenio: sive sacra, sive profana monumenta evolvam. Et quid nomen ad regnum? Cætera de virtute, pulchritudine, robore, nec perpetua sunt, nec speciale privilegium conferunt. Conjugantur omnia hæc argumenta, nihil efficiamus; quod civiliter concludat, imperium primigenitis deberi: quod ista non sapiant alicujus regalis privilegii naturam. Quorumlibet privatorum liberis observata illa imaginariæ dignitatis incidunt: quibus nec axiomata præminentiae publicæ descri-

deferimus, nec sceptrum destinamus. Ut ut prærogativam aliquam domesticam, ex legis civilis præscripto, concedamus: nullam facultatem, primogenitis propriam reperimus, cujus virtute regna sibi postulent.

I X. Utilitatem publicam allegant alii, & *indissolubilem regnorum compagem*, quæ primogeniti dignitatem & successionem flagitat. *Familiarum splendor*, & *potentia pariter conservatur*, quoties uni committitur rerum summa. *Ipsa respublica unione subsistit firmitus*. Divisa imperia ab interitu quam proximè absunt, exposita quippe divulsione illà potentiorum præda. *Dissidia plerumque divisis intercedunt*, quæ perniciem præsentem solent accelerare. *Debilitatur solâ distractione Respublica: nec tantæ virtutis & efficacis est, quanta conjuncta civitas*. His argumentis probant, regni corpus continuâ serie debere colligari, & cohærere, & nullo modo dissolvi: inde amplius inferunt, successionis prærogativam primogenito deberi, ob indivisibilem nexum provinciarum. Verùm his nondum acquiescit animus. Quid enim, si aliquis majora regna dividi posse adstruat? Si adducat nostrum ipsum Romanum imperium, quod Ludovicus in tres partes divisit, sufficientes sibi satis? Nam si prolixissimorum finium regnum sit, commodè partitionem pati, persuaderi forsitan possemus. Amplitudinem enim immensam territorii, non esse de naturâ imperiorum, facile docebunt reges, qui olim singulis urbibus imperitarunt. Habuerunt majestatem, quamvis in arctos fines.

Et ipsa Germania documento fuerit, tot diversis populis quondam habitata. Diffitebimur nunquam, plurimum decedere & auctoritati & potentiae, quando distrahitur regni corpus, & in plures, distinctis auspiciis, confertur: sed non concludendum statim; quod conservat dignitatem familiae & Reipublicae, id certo & immutabili jure niti. Factamen, dividi nequeant regiones, non propterea jus primogeniti confectum est: potuit alius fratrum ad gubernacula sedere. Quae interseruntur, *fratres iniquissimo animo fratris imperium toleraturos; id primogenito fas erit opponere.* In promptu quoque erit remedium, ad tollendam fratrum emulationem, si omnes simul regnent. Re-geris: *Multò gravioribus turbis implicari Rempublicam. Quia indivisa illa potestas ubicunque introducta unquam fuit, semper per contentionum precipitia delapsa est, aut ad anarchiam, aut ad unius dominatum.* Reponam socialem administrationem Imperii Romani, cum sedes in orientem translata esset: ubi inter duos, & plures saepe, divisum fastigium illud novimus. Et cogam deinceps eodem argumento damnare Optimatum Rempublicam, quam tot laudibus ornare solent Politici: eademque collectione conficiam, popularem extirpandum esse ordinem civitatis.

X. Concessâ interim regnorum perpetuâ cohaerentiâ, permissâ simul ex hac primogeniti excellentia: nondum tamen certi sumus, quale sit jus illud, quod indivulsum provinciarum contextum primo natorum confert.

In-

Intricatissimâ disputatione, modò Jus naturale, modò gentium laudatur. Ad legem naturæ confugiunt, qui instinctum naturæ comminiscuntur, & prærogativam ætatis, ac majorem adeo prudentiam allegant. Contemplanti Jus Naturale, apparebit, nihil quicquam ab illo disponi de regnis; nihil de successionem primogeniti. Nihil novit de successione in universum. Successio plerumque collationem dominii, aut dignitatis notat: neutrum verò naturali jure transfertur. Hic designatio imperii est, quod jure naturali non arcessi, supra vidimus. Actus morales jubendo prohibendoque jus naturale dirigit atque determinat: & hos ne producit quidem, sed mandat, vetat, judicat. multò minus imperium producet. Idque ideò evenire putem, quod Sanctitas & Potentia divina, distinctâ mentis apprehensione concipiantur. Ratio ferendo oneri impar est; quum probabilem suasionem contineat, nec perpetua sit; & nova ratione indigeat, ut confirmetur. redit iterum quæstio; unde prudentiori & robustiori, imperium debeatur? idem de prærogativâ ætatis arbitrandum. Ætas & tempus ex se nullum jus conferunt: alia igitur quærenda causa, quæ vim illis tribuat.

XI. Quæ de Jure Gentium proferunt, majorem speciem, quam vim stabiliendę sententiæ habent. Hinc derivant vulgo. *Successionem in regno hereditario, aut omnibus deberi ex æquo, aut si dividi non possunt provincia, uni primogenito, cui prærogativam hanc præ omnibus*

fratribus aperuerit jus divinum & gentium. Et contra hac jura fas non esse, quantumvis absoluto Principi, dispensare. Occasionem id afferendi dedere exempla plurium populorum, quorum moribus introducta ea succedendi ratio. Unde post enumeratas quam plurimas gentes, quibus primogenitus fuit in regem sumptus, concludunt. Ex tot Gentium unanimi consensu receptis moribus sine hesitatione licere progredi ad concludendum jus Gentium, quo primogenito successio deferatur in regnis, & magnis principatibus. Contraria quoque observatio, contra jus Gentium dicitur insurgere JUSTINO, Lib. xvi. de Ptolomeo hoc judicium ferenti: Finito bello Ptolomeus, cum magnâ rerum gestarum gloria moritur, Is contra Jus Gentium minimo natu ex filiis ante infirmitatem regnum tradiderat. In plurimis locis mentio fit Juris Gentium: ideò non perdemus operam, si semel compendiò dicamus, quid de ejusmodi negotio habendum. Hic primùm omnium satis firmandum judicium civile est, ne vacillet, aut nutet ad unius, alteriusve Scriptoris auctoritatem: quâ solâ non statim Jus Gentium conficitur. Usu venire non infrequenter solet, ut in rebus difficilioribus, quarum abscondita ratio post intimas penetrationes demum patet, investigandis, quasi redimendi temporis causâ, vel compendiò cêrto, ad jus gentium, aliquando jus naturale, recurratur. Sed hoc vulgari suffugio aut prætextu, in omnes casus comparato, plurima inexplorata relinqui, & non ignobilia argumenta ignorari, haud

haud difficulter persuaderi possem. Quoties cujuscunq; negotii civilis natura, ex suis principiis asserenda; quoties difficilioris alicujus juris veritas, & prima scatebra demonstranda est; jus gentium allegatur, cujus aspectu superstitiosâ credulitate percelluntur interdum animi, ut curiosiori perscrutatione supersedant, & visa interim pro compertis acceptent. Quod sicut prima facie pronam apertamque caussarum cognitionem præ se fert, & ambitiosè pollicetur: ita in progressu, ubi connexio & consonantia jurium, ut ultima primis respondeant, quæritur; inextricabiles difficultates, & conclusionum confusas, aut adversas invicem illationes, incondito partu solet producere. Nobis haud dum in præsentî, aut alibi, promtum aut integrum est, quidvis credere. Sive Justinus, sive alius, primigenia Juris Gentium pronunciaverit: non propterea ita se habebit res, aut nobis extorquebitur assensus. Quin potius in hoc examine descendendum in intimiorem naturam Juris Gentium; scrutandumque, quæ domestica indoles ejus, circa quæ occupetur negotia: ab altera parte vestigandum res, de quâ quæritur ingenium, & propriæ qualitates. ita facilè contendendo apparebit, an ex numero earum sit, quæ jus Gentium determinat. Prostant quidem quam plurima exempla populorum, qui primogenitū in paternum solium collocarunt: & exemplis jus Gentium probari, plerique statuunt; quod consensus Gentium iisdem indicetur. Unde HUGO GROTIUS, in Prolegom. de Jur. Bell. & Pac. *Historia*

duplicem habent usum, qui nostri sit argumenti: nam & exempla suppeditant, & judicia. Exempla, quo meliorum sunt temporum ac populorum, eo plus habent auctoritatis: ideo Græca & Romana vetera ceteris prætulimus. Nec spernenda judicia, præsertim consentientia: Ius enim natura, ut diximus, aliquomodo inde probatur; ius verò Gentium non est ut aliter probeatur. In præcedentibus liberam voluntatem populorum solam, causam posuerat; quòd ex certis principiis certâ argumentatione deduci nequeat. Quod minimè largiendum. Interim initio tollenda ambiguitas in voce juris Gentium. Dicitur aliquando, quod singulis gentibus placuit sine mutuâ obligatione: propriè, quod mutuam obligationem continet. Quod Lib. III. cap. I. n. VI. agnoscit GROTIUS, & impropriè ius Gentium vocari fatetur. Et sanè plura, quæ juri Gentium adscribuntur, moris & usurpatæ consuetudinis, quam juris nomine designari oportebat. Receptum erat in successoriis regnis, ut primogenitus patris expleret vices: hanc rationem, aliis observatam, & introductam passim, gentibus pluribus communem fecerat imitatio. Quo sensu plura dicuntur ad ius Gentium pertinere, quæ usurpantur à gentibus. Verùm hæc genuinum ius minimè constituunt, quod citra obligationem recipiantur, ex merâ libertate populorum cœuentium in civitatem. Juris autem omnis essentia & virtus in obligatione consistit. Quod si consensus ille imaginarius, solus ac nudus sit, nullâ obstringendi vi præditus; haud surgit

surgit aliquod jus. Ipsa obligatio in verò Jure Gentium, non ex consensu præsumpto; sed intimo contextu Rerumpublicarum, & sanctimoniâ societatis, quæ populis invicem intercedit, peti potest ac debet. Tunc obligantur Respubl. vel ad observationem, vel ad pœnam. Consensum igitur de primogenito successore, ad morem aliquem reduxerim, qui Jus Gentium, per abusum quendam vocabuli, ex viciniâ negotii natū, appellatur: qui magis consuetudo & observantia partialis est, per plures gentes dispersa; quàm lex, omnes populos devinciens suâ auctoritate. Id opido necessarium requisitum juris Gentium putaverim, ut *omnibus gentibus sit commune*; omnes ex æquo concernat: omnes pari vinculo alliget. Quare dubito, an sublimis *Grotii* sententiam approbem, quâ hoc Jus Gentium, omnium aut multarum voluntate, obligandi vim accepisse, ait. posita causa; *quòd vix ullum jus reperitur, extra jus naturale, quod omnibus commune sit.* Vereor omnino, ut assertum defendi possit. Si consensus jus hoc producit, mihi quidem indubitatum est, paucas admodum gentes jure hoc uti. Sed illud quoque satis certum est; verò Gentium jure teneri omnes populos, etiam barbaros: de quorum voluntate contraria testantur facta. Jura legationum inviolabilia habenda sunt, etiam feris nationibus. non quia consenserunt, sed quia Sanctimoniam Mistorum violare non debent. Fœdera sacrosancta habenda sunt, nec perjuriis, insidiis, aut quacunq; fallaciâ temeranda. Sic bella justè in-

choanda sunt. nisi transgressor Juris gentium haberi velit inuasor, & à Rep. læsâ operiri ultionem ac pœnâ. Hæc & alia ex certis principiis oriuntur, & ubique sunt observanda. Ad actualem observantiam hic respiciendum non est; quod consensus exemplis perpetuis probari nequeat: id quod *Grotium* movebat, ut statueret, non commune esse omnibus populis: sed attendenda est obligationis universalitas, quæ ex intimis visceribus Rerumpublicarû pendenda est. Nisi omnibus populis normam daret jus gentium, frustra essent, quotquot illud allegarent: quum vel naturale, vel civile sufficiat; vel aliquod singulare pactum paucarum civitatum. Cum interim certissimum sit, Jus naturale omnes hominès, jus civile omnes subditos; jus Gentium omnes populos inter se obligare. Ad nostram quæstionem si applicemus hætenus dicta; manifestum est, causæ hujus conditionem non admittere generalem regulam. Successio primigeniti formam civitatis tangit, quæ omnibus haud communis est. Regnum & Monarchicum statum afficit: & illum præcisè, in quo statuendi regis judicium penes populum, aut hujus vicarios, seu optimates, non rêsidet. Paucissimæ igitur Respublicæ hoc ordine utuntur. Aristocratia, & popularis civitas, ignorant talem legem. Ut taceam normam illam administrationis à civibus non permitti peregrinis; non pati populos sibi dici leges ordinandæ Reip. ex aliorum præscripto. Quid enim obsecro, hæc curæ ad alios? quid ad extraneam

am

am Rempublicam, si vel minor natus succederet? Inde nihil vel commodi, vel incommodi; multò minus aliquid juris ad peregrinos redundat. Adeo nihil commercii populis circa hanc dispositionem intervenit; ut nihil contra alterius jura peccetur, & ideo nec puniri queat pater primogenitum excludens. Si vero Jure Gentium deberetur successio primogenitis, injustissima essent electiva regna omnia, quæ alium, quam filium, ad regimen mittunt. Excludunt enim, quem jus gentium elegerat: & excludendo contra jus gentium peccarēt: contra quod fas non est alicui dispensare. Everterent igitur Jus gentium, quotquot prætereunt primogenitum: cui immutabili lege jus successionis quæsitum esset. Cæterum, cum omnes gentes & Respublicas hæc ordinaria successio non spectet; vix est, ut universale jus fatigemus, damnando illud ad aliquas paucarum civitatum constitutiones.

XII. Offendi passim opiniones auctorum, ad jus divinum referentiū originationem primigeniorum. *Licet consuetudine firmata sint, & diversimodè pro diversitate morum formata: originem tamen & fundamentum, unde deducta sunt, dependere ex auctoritate juris divini, imò etiam naturæ & Gentium.* Sed satis confuse id asseritur. Si auctoritati juris gentium aliquid debet primogenitura: non repetenda ejus origo ex naturali jure. Si ex hoc profluit, ad jus divinum ejus natales referendi non sunt. Distinctissima hæc sunt principia, & separatim tractanda in derivationum materiis.

riis. Non potest aliquid ex jure divino, naturali, gentium, simul originaliter deduci. Non enim hæc jura subordinatam invicem in suis objectis; sed separatam diversamque naturam habent. Jus divinum, communi decreto filium primogenitum constituens successorem, in omnibus hæreditariis regnis, nondum vidi adductum. Quid igitur proclamant ad jus divinum, quod allegare nequeunt? Erubescant sine lege citata loqui. Producant sanctionem sacram, laudent librum, designent capitulum & comma, quò primogenii illa prærogativa, universali sancito, amplissimè ordinatur: & applausu excipiemus sententiam. Unò alteròve exemplo jus divinum non firmatur. Occurrat primogeniti nomen, & dignitas in sacris: non statim lex erit, quod sub rei gestæ commemoratione introducit. Multum distat facti narratio, à Legislatoris serio decreto, & Juris præscripto. Non destituimur exemplis, quibus contraria Dei dispositio apparet, quâ primogeniti fuerunt posthabiti junioribus. Ex *Hieronymo* compendiose eadem sibi objicit *Tiraquellus*. *Dilexit Deus Abel magis quam Cain: Isaac, quam Ismaëlem. Dilexit Jacob, Esau odio habuit. Phares electus, reprobatus Zaran: electus Ephraim, reprobatus Manasse. Electus Iuda, in quem benedictio seminis Christi transferretur, reprobatus Ruben. David inter octo fratres minimus, electus præ ceteris. Moyses magis, quam Aaron dilectus.* Quamquam plura enumeratorum privatam prælationem inferunt: stabilitur tamen sententia;

tentia ; primogenitum jure divino non perpetuo frui privilegio prærogativæ, cæteris exclusis. *Tiraquellus*, quanquam satagit ad hæc respondere, non videtur tollere difficultates. *Sed tantum abest* inquit, *ut hoc primogenitis refragari possit*, *ut illis etiam contra suffragari non modicum videatur, modo non cecutiamus, sed paullo solertius rem introspeciamus.* Nam *Deus Opt. Max. novissimos primos fecit.* *Ut etiam ex his possis colligere, primogenitos esse naturaliter anteponendos ultimò genitis, quos proinde eligit Deus, ne primogeniti, naturâ superiores, in superbiam & elationem ob id veluti precipites trahantur, nisi frenum hoc illis dederit Deus, quo se summissiores agant.* Non video, quomodo jus primogenituræ, & naturalem prærogativam sustineat divina sanctio: discernens, *minores ætate præferendos.* Eo ipso enim dum prætereuntur primogeniti, dum excluduntur divinâ electione ; non potuit à natura esse illa dignitas. Deus contra naturam nihil agit, nihil constituit : quod sibi ipse haud contrarietur. Sed in eò forsan latet collectio, & argumenti vis ; *quod nominatim minor natu admoveatur prærogativa majori.* Sine speciali enim illâ designatione si fuisset, præferri debebat primogenitus. Respondemus : id non statim sequi, primogenito debitam fuisse eminentiam, qua coruscabat postea minor frater, si hic eandem non accepisset à cœlesti manu. Nunquam forsan primogenitus Isai rexisset populum Israeliticum, si vel maxime Davidem non vocasset ad sceptrum Deus. Quod si regnum

jure

jure divino debebatur Eliabo primogenito, non probabile videtur Deum evertere voluisse propria decreta, iisdemque derogare auctoritatem, præficiendo multitudinē Davidem; eligendo postero etiam tempore, Salomonem. Nunquam facultatem ullam habuit Senior ille filiorum postulandi tale jus. Rubenis primogenia amissa & erepta, morem populi, cujus terram Ebræi incolebant, designabant: non tamen, qui strictè obligaret Jacobum; aliàs mutari privatā auctoritate fas non fuisset. Multò minus jus divinum mutationi hominis unquam fuit subiectum. Non inficiabimur, posse tale quid à Deo Opt. Max. ordinari. Nam unus ille est, qui confert Majestatem, qui sortem & vota eligentium, arcano ductu, in eligendum dirigit. Poterat ergò sanctissimā Lege, ubique valiturā, decernere; ut nemo, præter Regis primogenitum, succederet. & hæc jussio omnes erat obligatura populos. Sed hæctenus talis juris tenorem non licuit reperire.

XIII. Impeditissimè ventilantur, quæ circa hanc materiam auctores disputant de *Jure Hereditatis & Sanguinis*. An regnum, ubi consuetudine per successionem primogenito defertur, jure hæreditario, an sanguinis eidem competat? JACOBUS à SAA, Eques Lusitanus Tract. de Primogeniturā, n. 37. statuit, *primogenitum possidere regnum jure hereditatis*. Postquam in præcedentibus ostenderat per occasionem, non esse conveniens, plures participare imperia, & unum omnino ac solum requiri

quiri, qui gubernacula rerum teneat; ac propterea in administratione regni, omnes filios regis succedere non posse, sed ad unum primogenitum deferendum esse honorem: deducit hunc successionum ordinem, quod filius primogenitus Patris hæres est. Aliàs filium privari non posse ea prærogativa, nec gravamen ei imponi. Cujus alterius tamen exemplum habeamus in sacris, ubi Ruben amittit primogenituræ dignitatem; alterius tenorem ex Canonistis allegat. Concludit tandem, *omnia bona Majoratus haberi & possideri jure hæreditario & successivo*. Possit equidem hujus Auctoris assertum restringi ad solum *Majoratum*, sive illam privatorum successionem, quæ Hispaniarum lege introducta est: nisi generaliter de regni indivisione tractasset in superioribus; & viderem aliorum quoque hanc esse opinionem. Sanè EMANUEL ACOSTA, ubi de Patruo & Nepote quærit, p. 3. ut ostenderet, repræsentationi, quam vocant, locum esse, & in successionem regnorum nepotem patruo præponendum; hac inducitur ratione: *quoniam regnum ad Regis liberos, aliosque regis successores devolvitur, quasi hereditas ipsiusmet Regis*. Distinxerat enim Regnum & Majoratum; illud jure hæreditario; hunc sanguinis deferri statuebat. Ut expressè habere dicit c. *licet. de Voto*. omnesque Dd. ibi affirmare, & alibi alios. Alii certis conditionibus hæreditario juri locum faciunt, pro diversitate modorum, quibus regna solent acquiri. *Quoties in novo regno pater eligitur, permissa designandi successoris*

cessoris facultate; quoties legitimo bello sibi asseruit principatum, alia veratione comparavit. tum jure fas esse, testandi libertate regnum filiis tradere. At quando jam distinctâ lege, & usitatâ consuetudine per successionis ordinem admittitur, jure sanguinis primogenito deberi regnum. Nos universali pronuntiatione dicemus; Primogenito successionem jure hereditatis minimè deferri. Nimirum Majestas extra commercium posita est. Hæreditate acquiruntur res, quæ in patrimonio sunt; quæ ultro citroque alienari, distrahi & acquiri possunt. Majestas supra nundinationes humanas posita, tales transferendi modos ignorat. Hæreditate dominia in res acquiruntur: sed in imperium, in Majestatem, nullum dominium penetrat. Superatur enim omne dominium divino illo axioma. Successionibus hæreditariis acquirimus res, quarum dominium testator obtinebat: exempta verò humanis dispositionibus & transactionibus Majestas est, quæ ad Deum redit, quam primum rex decesserit. Ne tunc quidem regnum hæreditas est, quando in recens constitutâ civitate aliquis electus fuit. Quasi verò legi, seu pacto fundamentalis locus tunc non sit. Fac tamen, absolutè concessam electo Principi esse designationem successoris: aliter erit id omne interpretandum, quàm de hæreditate hæctenus dictum est. Non statim testandi libertas est, quando Princeps pater alium primogenito, urgentem ob causam, præfert. Infra explicabimus hoc negotium: nunc id saltem observamus, jus Romanum privatum mul-

multis scandalum fuisse, ut confunderent has publicas successiones, cum privatorum hæreditatibus. Usurparetur quidem vocabulum hæreditatis non inconvenienter in hac materiâ, modò generalissimo sensu intelligeremus successionem: nec adstringeremus præsentem causam ad doctrinam Romanæ atque private hæreditatis, qua dominia rerum acquiruntur. Nam & alibi successorem principem, heredem regni, solii, sceptri vocare, haud verebimur; quia ejusmodi voce qualemqualem successionem in locum alterius intelligimus; non imperium, ab homine moriente in superstitem translatum. Quod dicebatur; *successorem destinatum, si repudiet hæreditatem regis antecessoris, eò ipso regnum quoque repudiare*: tum demum verum est, si conceptis verbis profiteatur, se nolle succedere. Longè diversa sunt hæreditas antecessoris, nempe bona omnia, quæ antecessor extra coronam regni habebat, in quibus filiis, ipsique successori regni, tanquam uni de numero eorum legitima debetur, & ipsum regnum, quod repudiata legitima, in aliis bonis sibi debita, totaque hæreditate, potest successor velle & obtinere, tanquam rem omninò diversam, minimeque in hæreditate antecessoris inclusam: non secus atque hæc ipsa similiter habent locum in aliis Majoratibus.

XIV. Nondum interim accedimus alteri opinioni, quæ primogenitum succedere *sanguinis jure* docet. Hoc quale, & quantum sit, nusquam ex Auctoribus illis addiscere licet. Alias jure sanguinis continentur Cognationes.

nes. Ita Pater & filius, fratres & sorores sanguine colligantur. Verum hoc jus non esse intelligendum, vel inde patet: quod omnes liberi eodem gradu, & equali proximitate sanguinis, attingunt parentem: deberent ergo omnes succedere. Et ita cadit jus primogenituræ, præcisè reliquos liberos excludens, & uni spem regni conferens, qui primus in lucem est editus. Quam ob causam anxie disputant, num consuetudo rationalis sit, quæ primogeniæ invexit. Adde, si hoc sensu, jure sanguinis succederet filius, immediatè haberet imperium à patre. Sicut in hereditate continuatur dominium in supervenientem hæredem: ita imperium transferri debebat. Sed hæc pugnantissimè contrariantur doctrinæ, de Causâ Majestatis. Si enim jure sanguinis in imperium penetraret primogenitus; utique hæres esset, nunquam excludendus, & immediatè acciperet hæreditariam potestatem à patre. Nam quæ jure sanguinis competunt; beneficio generationis à patre communicantur. Obstat itaque sanguinis immutabilitas. Quoties publicæ rei perniciēs timetur, ob tyrannicum animum; aut quia mente planè captus, & perpetuo furiosus est: excidere posse primogenitum dignitate illâ constanter asserunt. Quod neutiquam contingeret, si jus sanguinis inferret jus successionis. Illud enim nullo modo variationem admittit: nec à legislatoriâ potestate mutatur, nec ipse, cujus negotium hîc agitur, honori tali renunciaret. Nullo modo efficitur, ut filius non sit patris filius; aut sor-

ror:

ror non sit fratris soror : & vice versâ. Fundamentum enim præsupponunt generationem : factum scilicet aliquod, quod eo ipso dum est, aliter se habere, & infectum fieri haud potest. Et si quis scrutaretur attentius, quale jus importet sanguis : experiendo disceret, quam non facile sit explicare fictum jus sanguinis, si ex sanguine, remota alia causâ, id derivare conaretur. Et accuratiores quidem intelligunt hoc vocabulo, non naturalem cognationem; sed dispositionem Reip, qua cavetur, ut primus ille, qui sanguine attingit regem proximè, regnet : dum provisio civitatis respicit propinquum regis sanguinem. In hunc sensum usurpant dictam formulâ, qui jus sanguinis sumunt *propacto & providentiâ Reipublicæ, quæ regnum ipsum instituit, certisque legibus illud alligavit, ut illis succederetur*. Declinatur adeò usitata illa vocabuli significatio ad loquendi genus, commune pluribus, hanc materiam tractantibus; sed aliis ignoratum : quod ambiguitate suâ impedit rei explicationem, & errorem ingentem facile potest gignere. Et opidò debebant, in tam magni momenti re, clarius loqui auctores.

X V. Quamvis autem hæc jura, quæ in antecedentibus rejecimus, non sufficiant; temerario interim fortuitoque impetu primogenitus non admittitur. Nam illa æquabilis primogenituræ observantia dubitare nos de aliquo rationis vinculo non finit. quare aliæ dabuntur dispositiones, quæ propius effectum illum maturent. Id principiò tenendum est, *in*

omni

omni tali successione latere quandam Electionem; sive tacitam, sive expressam. Hoc saltem discriminis intercedit, quod in Electione communi & usitatâ, iudicium sumendi principis, à populo vel proceribus, huic operi destinatis, expressim declaretur in singulis eligendis: at in successione primogenitum populus semel nominavit, qui semper patris mortui suppleat locum; aut patri permisit successoris constitutionem. Ubique igitur succedit primogenitus, dispiciendum est, num pactum aliquod adsit de successione illius. Nam principio, ubi constituitur Respublica, si de successore nec dum aliquid decretum sit, Princeps suis pollicebitur subditis, & certâ sponsione sanciet, ut dictâ prærogativâ fruatur primogenitus. Sive id flagitent subditi, sive sponte, consentientibus iisdem, faciat Princeps. Valida erit & stabilis conventio, & primigenio in capeffendo regno nemo præferetur. Neque igitur dubito, quin tali pactitiâ conventionem inter electum primitus regem; & electorem populum, provideri queat firmiter, ac præcaveri, ne alius post patris excessum potiatur rerum. Hoc nexu Principis & populi voluntas ita colligabitur, ut se adstringant invicem, ad collocandam certam personam in solium: cuius pacti tenore tenebitur Princeps eum ordinem servare. Quâ conditione fixum & firmum perstabit Reipublicæ iudicium, usque dum mutata rerum ac temporum facie, aliud placeat universis. Quoties hunc in modum successio lege fundamentalis introducta est, & pacto

cto, ac principis promisso confirmata : non temerè unius Patris voluntate ac lubitu licebit intercipere dignitatem eam, Reipublicæ judicio & consensu collatam. Reverâ enim consequitur filius aliquod jus à civitate eligente, aut sanciente statutum : quod sine sententia priorum auctorum, hoc est, integræ Reipublicæ non amittet; nisi ingens delictum, aut alia prægnantissima causa intercedat. Verissimum enim est, quod habent Auctores : *Cum hoc jus lege statutaria sit firmatum, non eo potest pater privare filium sine causa.* Fatentur interim omnes, excidere posse hac dignitatis prærogativa primogenitum, ob atrociam delicta, contra patrem, aut Rempubl. commissa. Causam ingratitude allegant, *si primogenitus contra civitatem, & patrem regem insurgat. Si inidoneus sit moderando principatui : veluti si demens.* Anteponendus erit secundo genitus : quia hujusmodi consuetudo, præferens primogenitum, non est interpretanda contra commodum regni. Quippe respublica ita intelligitur sibi prospexisse, ne illo suo decreto aliquod detrimentum capiat; aut leges, publico egregio consecratæ, in perniciem expetant. Quin primogenito confert successionis spem, si prodesse publico studeat : sin desciscat à bonis, & periculum tyrannidis subfit; negligere putanda est civitas publicæ salutis everforem. Hujus voluntatis communis interpretres Princeps est, qui si talia veniant usu, primogenitum, vitiis obrutum, postpositum civitatis judicio declarabit, & proximis conferet successionis

cessionis beneficium. Nisi in hoc decreto iudicium sibi universus populus solemniter stipuletur. Tunc omnibus permittenda erit sententia decretoria circa exauctorandum primogenitum. Nam ubi populi voluntate, & definita Reipublicæ sanctione, id decus committitur, ab illa sola repetetur. Sive concurrentibus ad iudicium omnibus; sive Principe interpretante & exsequente: quæ salutis publicæ conveniunt. Certò tamen constare debet, animos excludendorum meram tyrannidem spirare; nec remedium prostare huic malo, & præsentissimo periculo, ruinam civitatis imminere, si illi admitterentur. Tunc ob prædictas causas, communio civium, & universitas, quæ sibi iudicium de successione retinuit, præterire familiam Regis, & sibi optimum quemque præficere, apta erit. In tali enim Republica, parum distat successio ab electione, communiter sic dicta. Quod expresse tamen restringimus ad casum, quando cognitionem & censuram in vitam regis solis reservavit sibi universa multitudo. In regnis absolutis, quoties mansura pactione de successoribus nihil cautum est, non puto primogenituræ eam efficaciam esse, ut filius jure aliquid postulare valeat: sed omne arbitrium Patris voluntati permittendum erit. Quemcunque hic dignum habuerit, qui succedat, legitimè censebitur electus; primogenito nequicquam jus aliquod allegante. Quanquam hic, nisi causæ prægnantes adsint, rarò soleat præteriri. Quemadmodum igitur populus, qui
liber-

liberrimo suffragio eligendi facultatem habet, sine alterius præscripto Regem statuit, ac declarat, qui publico bono promovendo plurima polliceri videtur: ita quoque in regno, cujus habendi modus nullis cancellis coarctatus est, Princeps, qui nullo pacto dispositionis libertatem labefactavit, dignissimum filiorum sceptro admovebit. Securus naturalis, divini, gentium, aut cujuscunque alius juris. Eximiè huc pertinere videntur, quæ apud Livium Perseus fratri, affectati imperii accusato, opponit. *Frater, inquit, non commessantium in vicem jam diu vivimus inter nos: regnare utique vis. Huic spei tua obstat ætas mea, obstat gentium jus, obstat vetustus Macedonia mos, obstat verò etiam patris judicium. Huc transcendere nisi per meum sanguinem non potes.* Planè politicum de hac re judicium, si cætera sana mens delatori fuisset. Et vide quæso, quàm per momenta civilia excrescat oratio. Magnum erat allegare *ætatis prærogativam*, cujus reverentia moveri debebat frater. Sed cùm parum præsidii in solis annis positum sciret, obtendit *gentium jus*, & pervulgatam consuetudinem, qua primogenitus regni successor declaratur. Verum cum & hîc exceptioni locus pateret; quod nimirum aliis gentibus, cum Macedonia regno nihil commercii intercedat: auspiciis propioribus gubernandum id esse, nec aliis de regiminis forma, servili somnolentia atque vecordia, permittendam sententiam: controversiam fortius stringit, & *MACEDONIÆ antiquissimum*

T

allegat

allegat *morem*. qui satis sufficiens erat decidendæ liti. Interim cum vetustissima quæque, quasi longi temporis vitio antiquata, vel maximè disputationibus fatigentur: præsentissimum argumentum opponit, PATRIS iudicium. Non poterat certiori fundamento inniti oratio, nec veriori sententiâ exprimi. Totum negotium à Patris Regis arbitrio tum dependet, cui acceptam fert primogenitus eam eminentiam. Non enim tenetur præcisè alligare se pater electioni primogeniti: sed aptissimum filiorum legit successorem, vel minimū natu. Quin intrepide asseram, vel negligi posse filios omnes, si Pater eos bonæ frugis non deprehenderit. Nihil debet filiis Rex pater, quoad regnum: sicut civi eligendo, aut præterito, nihil debuit populus, liberri-
mè eligens: nulla proinde injuria, vel omis-
sus civis, vel filius afficitur. Et eadem ratio, quæ in primogenito, in reliquis militabit. Id nisi concederemus Regi, nullis pactis alligato: plus posset populus sine imperio, quam Princeps Majestate præditus. Si objicias; *aliquando patre nihil constituyente succedere filium, sæpè postumum: vacillare ergo illud eligentis patris arbitrium*. Respondebo, id boni regis prudentiæ minimè congruere, ut in incerto sinat esse regni successorem: & adeò non inusitatas esse de postumis provisiones. Fac interim, nihil tale exstare. Jam constare debet, affectum parentis in filium tantę virtutis esse, ut potius filium, quam extraneum imperare velit. Non magis filium ex se genitum optat Prin-

Princeps ; quam post se regnantem. Ille tenerrimus amor plerisque inest, ut sibi proximis assertum velint regium axioma. ne ipsi in suis vel contemnantur, vel patiantur injuriam. Inde igitur fit, quod filio, præ extero, decernat successionis prærogativam : neque hic præsumitur contrarium, nisi expresse disponentis sanctio id manifestissimè constituat. Si vel maximè igitur pater rex decedat, nihil decernens de filio successore, præsumitur solita in suos benevolentia : quæ præsumptio, naturali amore fundata, stabilitur exinde ; quòd nihil adversus hanc decretum reperiatur. Quod verò primogenito imprimis faveat ille amor, inde proficisci quis putet : quòd hoc natò, si nemo alius filiorum nasceretur, unus erat, cui maximè collatum regnum optaret pater ; & eò ipsò, quo natus solus est, hunc statim videtur nominare heredem, & destinare successorem. ne, si aliquid humanitus accidat, ad extraneum devolvatur imperandi potestas.

XVII. De *filio nato ante regnum* pluribus disceptant ; si cum aliis, natis post acceptam patris regalem potestatem, concurrat ; *num ipsi illi primogenito, an posteriori regis filio ascendendus sit successionis honor.* Citra negotium posse decidi litem ex nostris principiis arbitror. Si Reipublicæ pactis aliquid fuerit conventum ; his stabitur. Sin minus, indeterminatæ patris libertati & hîc electionem permittemus : & justus erit successor, quemcunque ille constituerit. Hæc præsumptio nato ante regnum favet. Nimirum cum pater eve-

hitur in solium, filius adest. Certum est regem, si paullo post obire diem cogatur, unum illum ante regnum natum, relicturum esse heredem præ extraneo. Hæc destinatio parentis videtur durare, etiam supervenientibus liberis, donec de contrariâ mente satis constiterit. Nam si princeps decederet, relicto uno filio, qui natus esset ante partum principatum; neminem, illo neglecto, successorem relinqueret. quod civili ratiocinationi minus videtur convenire. His positis fundamentis, tranquille componentur, quæ *de Patris & Nepotis* successionem, acerrimo argumentorum conflictu, disputantur. Intricata quæstio est, quod omnes fatentur, qui eam attigerunt. Initio erratum esse ab auctoribus, puto, quod ad hæreditatem, & jus debitum primogenito, alligaverint hanc disceptationem: confuderintque successiones civiles, cum imperialibus. Hoc fundamentum erroneum impeditissimam effecit disputationem. Cui accedere privilegia legis civilis, aliquando feudalis consuetudinis, cum successionem regnorum nihil commune habentia. Loco fundamenti substernimus præcedentia, & dicimus; Patrem habere liberrimam potestatem relinquendi successionem, cuicunque voluerit: præsumitur interim favere primogenito, nisi contrarium probeatur. Quare communiter eundem intelligitur antepondere cæteris. Hic autem primogenitus, licet à patre nominatus expressè successor, potestatem non habet, si ipsi adire regnum, non contingat, substituere alium: ita enim
arbi-

arbitrium patri adimeretur, quod foret iniquum. Sed pater, mortuo primogenito, repetit pristinam electionis facultatem; cuius vigore fas est, siue filium, siue Nepotem ex primogenito, regali fastigio admovere. Quod si decedat rex, neutrum eligens, dicendum est, eligendi potestatem devolvi ad populum universum, vel eos, quibus à populo id commissum fuerit: hac restrictione, ut alterutrum sumant in principem. Presumitur enim pater filiis, vel tacite prospexisse, ne extraneo postponentur. Quod si consuetudo regni aliqua sit, quæ litem dirimat: alteri tali conditione rerum, assignans imperium, hac standum est. Quod si populus arbitrium electionis suscipere nolit, sorti poterit controversia permitti. Ita congrue explicabitur intricatissimum negotium.

XVII. Sed hætenus dicta intelliguntur de filiis, qui in legitimo & ordinario conjugio nati sunt: videamus de illis, quos naturales vulgò, & spurios, appellant; procreatos à principe extra matrimoniū solemne. Hos plures pronunciant indignos sceptris, quin, non posse succedere patri, *quem nullum habere, ex lege civili, intelligantur*, palam docent. Cumulant plures rationes, adductis passim exemplis: quæ exclusionem urgere videntur. *Non ferre æquo animo à subditis horum imperium. Infames passim haberi, ob vilitatem natalium: quod infimo loco natam oporteat, quæ corpus prostituit. Hinc mala præsumptione eos onerari, quasi participes gentiliū vitiorum. Hinc factum, uti di-*

*gnitates, etiam minores, hominibus ejusmodi
 praeclusa sint; Et ipsum jus successionis. Lege
 divinâ arceri à concione: Et Aristotelis scito,
 extorres agere, remotos à civitate. Postulari hanc
 severitatem à Reipublica incolumitate, qua
 matrimonia sanctè custodire jubeat: nec ali-
 ter refrenari libidinem principum, quam si ex ta-
 li concubitu nati, incapaces imperii judicentur.
 Nobis minimè videntur dictæ rationes suffi-
 cere tantæ rei emoliendæ. Si negotium di-
 sceptaretur de personis privatis, aliquid mo-
 menti forsan facerent adducta: nunc in Regis
 personam vix illa cadunt. Neutiquam sermo
 nobis est, de vulgò quæsitis, & incertò patre
 editis; sed naturalibus, ut vocant, ex minus
 solemnî matrimonio, seu concubinario con-
 gressu, genitis. Cadit igitur statim objectio,
 quod pater in incertò sit. Id enim de vulgò
 quæsitis, ex prostibulo natis, exaudiendum est.
 Nulla hîc est vilitas aut infamia natalium. Si
 quâ obscuritas matris adest, splendore patris
 corrigeretur: qui tantæ efficacîæ est, ut infi-
 mis maximam dignitatem possit conciliare:
 ut personæ servili, carceris situ squalenti, secun-
 dum à principe locum tribuat. Desinit vilis esse
 mater, quamprimum quocunque modo Regis
 uxor fuerit. Et isto argumento omnes tenui
 fortunâ natos, incapaces sceptri effeceris: &
 Davidem forsan perpetuò jusseris esse opilio-
 nem. Non semper ex vilioribus fœminis na-
 scuntur isti homines: frequentissimè nobilio-
 res matronæ, virginesque pulcherrimâ formâ
 præditæ, huic operæ destinantur. Suspicio,
 quæ*

quæ alium affligit, tertio jus aliquod non adimet. Mores, nec semper in optimorum parentum liberis, iidem cum majorum sunt: nec statim omnibus vitiis obrutus est Princeps, qui nuptias minus solemnes celebravit. Florebit aliis virtutibus politicis, licet hac maculâ laboret. Non defuit CAROLUS V. memoriæ laudatissimę Imperator haberi, quamvis *Joannem Austriacum, & Margaritam Parmensem*, ex matrimonio non solemni sustulerit. Nec eo minus *Henricus* IV. Galliarum rex, MAGNI cognomen retinuit: licet amoribus nimis quàm fuerit obnoxius. Et *Gramondus*, illustris Gallicarum rerum scriptor, principio historiæ suę, nævum illum *Henrici* excusabilem putat; *quod non se viat, qui amat*. Quamvis nos ex præscripto moralis virtutis damnemus hoc vitium in Principe: nihil deprehendimus tamen, quod ad sustinendum imperium inhabiles reddat eo modo procreatos. Infamia, & jus dignitatum, atque successionum negatum, in hominibus privatæ sortis concedam: qui lege civili, disponente de solemnitate nuptiarum, obligantur; & si contra fecerint, subjiciuntur pœnis, civili jure constitutis. De his quodammodo vera erit assertio, quod infames sint propter parentes; quod ad dignitates non admittantur, non plenè succedant. De Principis naturalibus, liceat ita vocare, aliter censendum. Infamia spurios premit privatorum: quia mater, publicè infamis sortis est. Quanquam de Nothis id controvertunt civilis juris interpretes. Quis vero citra crimen

Majestatis infamé velit appellare Principem? infamia poena civilis est: quâ non afficitur, nisi subjectus potestati civili. Sed Princeps superiorem civilem judicem ignorat. Quia igitur pater non est infamis, neque filius talis censendus. Cumque privatorum natales possint rescripto Principis legitimari: quidni vel edito partu, aut concepto homine, id voluerit Princeps, ne suus reliquis deterior esset? Quanquam legitimatione nullâ opus est, quia Princeps nuptiarum solemnitatibus haud subjacet: quare nec Naturalis est filius Principis; sed semper legitimus, cum Princeps lege civili, quæ ejusmodi natum aliis postponit, solutus agat. Et coercenda erant, quorundam plebejorum hominum, qui Majestati regum infensissimi sunt, impura ora, evomentia *Nothorum* & *spuriorum* infames voces, quoties ejusmodi filiorum mentionem faciunt. Magis clarescit eorum conditio ex dignitatibus, quas hi tales sustinent. Non impedimento fuit *Margarita*, Parmensium duci, aut *Ioanni Austriaco* ejusmodi ortus; quo minus regimen Belgii obtinerent, Regis nomine. Ita nihil obfuit *Iephthæ*, nativitas minus legitima, ne Judex Israëlitarum communi voto exoptaretur. Et videmus quotidie tales *Principum*, & *Comitum* axiomaticè honestari: ut reliquos magnos viros taceam, quos enarrat *TIRAQUELLIS*, de *Nobilitate*, cap. xv. *FREHERUS*, de *Existimatione* Lib. III. cap. xxiii. Successiones competere iidem, exempla documento sint Francorum, Hispanorum, Siculorum,

An-

Anglorum, Scotorum, passim nota. Omnes illegitimo modo regna occupasse, negat Historiæ. Lex divina, & Aristotelis consilium, arcet privatos, aut excludunt civitate, non regum filios. Quin propriè de *vulgi quasitis*, qui patrem ignorant, explicanda lex divina est. Sanctè haberi matrimonia, pietas omnibus suadet: sed propterea imperium nullum habemus, quo cogendus sit Princeps; cujus libido nostris argumentis non compescitur. Si infamiam irrogare velint subditi nato ex non solemni matrimonio: judicium sibi arrogarent in principem; quod citra absurditatem nunquam contingit. Nos concludimus: *Posse Principem, qui pactis fundamentalibus, prohibentibus successionem Naturalium liberorum, non alligatur, pro libertate denominationis, etsi adsint legitimi, primogenitum suum, extra solemnes nuptias natum, destinare scepro & propter dotes politicas, reliquis liberis preferre.*

XVIII. Deficientibus liberis *Agnati* succedunt, secundum graduum prærogativas, quo superstitem contingunt. Ex eo fundamento, quod remotiores potius, modo ipsi aliquo sanguinis nexu cohæreant, quam planè extraneos velit succedere: ut, si non in liberis, saltem in consanguineis regnet. Successio ex *conventionem* varia est. Constituetur aliquis succedendi modus per *Pacta Gentilitia*, eâ lege inita, ut alterius stirpe extincta, ad alterum principatus perveniat. Videntur exempla crebra esse in Imperio Germanorum. Confraternitates dicuntur. Imperatoris tamen appro-

batio accedat hic, necessum est; & aliquas pactio^{nes} ab illo infirmatas novimus: quòd Principes Imperii jure absoluto non imperent. Cùm autem hâc ratione territoria transferantur; non summum Imperium: dubitare quis poterat, quare hâc pacta inter modos consequendi Majestatem referantur. Interim ad similitudinem harum conventionum, etiam regnorum successiones posse attemperari, nihil absurdi habet. Ex titulo DONATIONIS quoque successio datur: & *testamento* acquiri regnum, dubio caret. Quamvis, ut rem novam in Unguino id notet CRANZIUS, respiciens nempe mores Norvagiorum. In his omnibus intelligenda est Electio, peracta à Rege, absolutissimè regnum habente. Eligit quippe Donatarium, aut hæredem, aut illum confratrem: hæc enim nomina Electionis species sunt. *Connubiorum* quoque Jure deferuntur sceptrâ: quorum plerumque hæc meta. *Quis sit connubiorum finis nemo nescit: verum homines potentia cupidi, ad alium ferè finem referunt; eoque utuntur tanquam instrumento firmanda sua potentia: sicut de Hierone observat Polybius; verba sunt ISAACI CASSAUBONI in Comment. ad Polyb.* Hoc modo iterum Electio subest, cum cessione; quando maritus eligitur à Reginâ, & illi conceditur majestas, qua se abdicat uxor. Quare interpretanda hæc sunt, ad normam eorum, quæ supra de abdicatione & cessione diximus; quæ similiter obtinent in Donatione, si à vivo Rege donatum sit regnum.

XIX. Absolvimus acquirendi Majestatem modos, poteramus ad alia rectè transire, nisi videremus dictis modis, consequendi Imperium, à plurimis annumerari Præscriptionem, quâ temporum decursu potestas quæri perhibetur. Paucis ergò videamus, quantum eadem conferat imperio. Præscriptio respicit Subditos, vel Extraneos acquirentes. De subditis planum est negotium, iis nullam præscriptionem competere, nec hæc imperium acquiri, tuto affirmabimus. Omnia desunt, quæ alias necessaria sunt in Præscriptionibus. Principiò *Subjectum præscribens*, quâ tale, non est capax rei præscriptæ. Præscribit subditus, qui capax non est imperii. quatenus subditus est, obsequium præstat, omni imperii possessione destitutus. Non unam inhabitant personam Majestas & obsequium: qui altero instruitur, altero caret. Qui obsequium debet, nec Majestatem habet, nec præscribit. Servus contra dominum hoc jure non utitur. *Objectum* quoque præscribendum, ob rei qualitatem, cessat. Excipitur solemniter, quicquid in commercio non est. Nam Præscriptio est adjectio domini: dominium, nisi in res, quarum commercium est, non conceditur. Majestas igitur, cum in commercio non sit, ut possit ultro citroque distrahi & acquiri; nulli subjacebit præscriptioni. Rectè dicunt Juristi: *Quæ non sunt concessibilia, non sunt præscriptibilia*. Obstat porrò *absentia formæ*, quæ in Possessione consistit. Quod in commercio non est, haud possidetur à privato. Quod separari à

Principe nequit, minimè occupabitur à subdito. Quare, cum cesset possessio, cessabit quoque præscriptio. Tantum enim dicitur præscriptum, quantum possessum. quâ de causâ *continuum possessionem* requirunt Doctores. Ipsa possessio legitimari debebat *Bona Fide*, & *Iusto titulo*. Exulat bona fides, quoties clam & furtivis artibus, aliena invadimus. Non ignorabant subditi suam fortem: quòd nimirum subditi sint, imperium nullum obtineant, sed obsequium debeant superiori. Hæc ubi dissimulant, malâ fide alterius bonis injiciunt manum. Unde verò titulum habent, verum, translativum dominii? Transferri debet res præscribenda: imperium in subditos eâ conditione nec transfertur, nec transferri potest. nullus præterea *titulus* allegatur; nec transferens ullus præstò est. *Tempus* etiam solet lege definiri, quò absolvatur præscriptio, collatura dominium. Sed qua lege regnis acquirendis præstitutum tempus est? Non civili jure: quia secundum hujus dictamen, Majestas in commercio non est. Non Jure Gentium: quia nulla extat constitutio, quâ tempus determinetur, aptum imperii præscriptioni. Jus naturale tacet. aliàs omnium pectoribus impressa foret certa & immutabilis usucapionis observantia. Et quid legem hanc in juri-
 bus quærimus? Jus non est causa imperiorum efficiens: nec potest eadem auferre, & aliis tradere. Juris divini dispositio valeret; si quam possent adducere formulam, definientem tempus tantæ efficaciam, ut non possidenti Majestatem

statem, eandem conferat. Solius causæ principalis est; conferre facultates & adimere. Princeps, quia dominus est civitatis, instituit dominia, & modos acquirendi eadem præscribit. Hic solus præscriptione potest adimere, quod alterius erat dominium. Ita Deus posset adimere Principi jus, & alii tradere: quamvis præscriptio ad translationem non sufficiat. *Effectus* pariter absurditatem prodit. Id operatur usucapio, ut præscribens, in rem præscriptam, verum & plenum dominium nanciscatur. Num verò in imperium datur dominium? Imperium in dominio esse, negabunt omnes, qui utriusque vocabuli vim satis capiunt: contra ea affirmabunt subtili argumentatione, sub imperio latere dominium. *Finis* privatæ præscriptionis, *ne dominia in incerto sint*; hinc non attenditur. Princeps habet Majestatem, certus ejusdem possessor est, & omnia jura indubitato exercet. Non igitur poterit incertum esse, cui jus regnandi integrum adhereat. Nulla causa hic subest controversiam excitandi: quod subdito non conveniat disputare de potestate Principis, ipsive causam status movere. Quæ omnia satis luculenter probant, ne immemoriali quidem tempore, præscribi à subditis Jura Majestatis.

XX. Sed hæc nostra forsitan, quoties cum subditis Principi negotium est, difficultate carebunt, & facili concessione dabuntur ab eruditis: qui negabunt interim hæc procedere, quoties extraneus territorium possidet, quocunque modo occupatum, & præ se fert
usucapio-

usucapionem, quâ tueatur imperium. *Extraneus subditus non est, capax igitur imperii censetur: quod actualis possessio magis roborat. Quanquam Majestas extra commercium sit, & subdito communicari haud possit: male interim negari, provinciam aliquam posse à reliquo corpore abstrahi, in quam imperium diutina possessione confirmabitur. Huc faciet finis, ut controversiarum sit aliquis terminus: ne perpetuis bellis vicina regna involvantur. Reliqua forsitan in privatorum præscriptionibus locum mereri, non in extranei acquerentis imperio. Concedamus, extraneum majori probabilitatis specie occupare regnum, quàm subditum: interim Descriptio Usucapionis alia danda est, quæ extraneo Majestatem asserat. Nam hætenus essentialia præscriptionis ne in extraneo quidem deprehenduntur. Possessio, inquiunt, adest, forma præscriptionis. Respondemus, possessio iusta, quæ bonam fidem, & sufficientem titulum allegat, præscriptionis formam dicant. rapta, vi possessa, excluduntur ab hoc beneficio. Quamprimum titulum translativum habebit, non indigebit præscriptione. Si iusto bello quæsitâ provincia est, imperium habebit victor: non usucapione demum acquireret. De quibus mox: nunc videamus saltem adversæ sententiæ fundamenta. GROTIUS, & qui defendunt præscriptionem publicæ rei, urgent maxime incommoda, prementia negativam nostram sententiam: nullo futuro termino civilis sanguinis. Atque id si admittimus, inquit Grotius Lib. II, c. iv. n. 1. sequi videtur*

videtur maximum incommodum, ut controversia de regnis regnorumque finibus nullo unquam tempore extinguantur : quod non tantum ad perturbandos multorum animos, & bella serenanda pertinet, sed & communi Gentium sensui repugnat. Et n. VIII. Tum verò imperia tandem aliquando incerto, & extra controversia aleam constitui, humana societatis interest; quam quæ adjuvant conjecturæ, favorabiles putanda sunt. Rationes, quibus præscriptionem tuetur, conjecturis absoluntur. Nimirum probabile est, scientem rem possideri ab alio, si taceat, consentire possessioni. unde derelictio præsumenda est : præsertim si tempus, memoriani excedens, silentium stabiliat. Adversus præsumptionem, quâ quisque sua servare velle creditur, inquit dict. n. VIII. validior est altera, quod credibile non est, quemquam ejus, quod vult, longo tempore nullam planè edere significationem idoneam. Sequenti numero ad Jus Gentium pergit. Ac forte non improbabiler dici potest, non esse hanc rem in solâ præsumptione positam, sed jure Gentium voluntario inductam hanc legem, ut possessio memoriam excedens, non interrupta, nec provocatione ad arbitrium interpellata, omnino dominium transferret. Manet interim verum auctorum, in adversam sententiam euntium, assertum; locum non habere præscriptionem imperiorum: quod tempus ex suapte naturâ vim nullam effectricem habeat. nihil fieri à tempore, quanquam nihil non fiat in tempore. Tempus non transfert jura; sed superior disponit dominiorum amissiones,

ones, cetero tempore valituras. Hic superior deest, ubi de imperio præscribendo sermo est. Id fortean operabitur diutina possessio, ut excludat non possidentem. Hoc enim facile largimur, neminem posse imperium petere, quod tempore immemoriali non habuit. absurdè simularet jus in rem nunquam possessam. Quod si hoc saltem volebant, nulla nobis est controversia. Non vero extendenda concessa conclusio est, ut dicamus, *repulsionem petentis esse collationem imperii*; aut, *præscriptione acquisivisse possidentem Majestatis jura*. Hoc enim impugnamus. Non sola & nuda possessio diuturna removet petito rem; sed imperium, jam dum ab alio occupatum, & tanto intervallo habitum. non demum acquiritur possessione: hâc solum arcetur agens, quem præsumptiones onerant, nulla fovet. Hoc efficit conjectura; Petenti nullum jus competere, qui nunquam possedit. interim hâc viâ non accipit possessor imperium. De Jure Gentium satis frigidè disputatur hoc loco. Si Jure Gentium præscriptio valet, verba illa dubitantia omittenda erant. Non, *credibile* est; sed certis & necessariis principiis constat, quicquid Jure Gentium sancitum est. *Fortè, non improbabiliter*, de rebus incertis disputamus; non de illis, quæ jure constant. Consensus Gentium facti est, non præsumptionis, constare ergo de eo debet, nec conjecturis ejus certitudo temeranda est. Multa gentium juri attribuantur, quæ longissimè ab hoc fonte absunt. Consensus solus haud sufficit rei alienæ

næ transferendæ: quem aliqua exempla vix probant. Et nimis confundit meus GROTIUS, *imperium* atque *dominium*. De dominio acquirendo aliquid usurpent populi consuetudinis; imperiorum præscriptiones sancire, gentium non est: quæ nec dare, nec adimere imperium possunt. Præscriptio, tradens dominium, vel imperium, ab eo trahat ortum, cui dominia, & imperia dare, atque repetere fas est. Fundatur Auctorum Præscriptio solâ præsumptione, pro derelicto haberi imperiū, quod longo tempore nemo repetiit: quæ conjectura rejicit quidem extraneum affectantem imperium; sed possidenti illud minimè confert. Non est periculum, ne perpetuis bellis involvatur, exerceaturque Respublica, si non concedatur Præscriptio. Nam ipsa diutina possessio satis valido oppositu invasorem repellit. Non asserimus, jus competere assiliendi civitatem neglectam, aut nunquam possessam: sed hoc tantum negamus, *Præscriptione acquiri imperium*.

XXI. De totâ re breviter ita arbitrandum. Quamprimum occupator & invasor Majestatem possidet, excluditur pristinus imperans. Duo in solidum Majestatem non participant. Quamdiu Princeps majestatem habet, alius nemo eandem ad se trahit: quando vero alius possidet, jam alter amisit. Dicunt; *Possessione diuturnâ præscribi imperium*. Dicimus, eo ipso, quo possidetur Majestas, supervacaneam esse præscriptionem; quia jam actu habetur imperium. Aliud in præscriptione domi-

nii

nii civili contingit ; licet aliquis possideat rem, non statim habet dominium ; quod amissare dominium alteri servetur integrum. Aliud in imperiis obtinet, quorum possessio totum negotium absolvit : nec expectatur legitimum tempus, quod superaddat dominium. Quocunque tandem modo quæsitum sit imperium, quia habenti adest, alteri non competit amplius. Occupatio bellica, si vel maximè sit injusta, id efficiet, ne requiratur usucapionis beneficium. Qui vi tenet regnum, etiam tenet. Qui actu possidet, non opus habet novâ acquisitione. nam illa, quæ habemus, non acquirimus. Sive igitur taceat pridem-possessor, videtur donasse imperandi facultatem ; sive bello petat invasorem : tam diu retinet ille imperium in subjugatos, donec pari vi, aut pactorum conditionibus, iterum amittat. Nec injustitia causæ imperium tollit ; quia hoc semper à Deo ; non à bello est, licet per bellum. Sæpe enim castigat Deus ambitiosorum tumultibus sceleratam multitudinem. Exemplo sit defectio decem tribuum Israëlitarum, constituentium Jerobeamum Regem, & rejectientium Rehabeamum, regni designatum hæredem. Malis artibus habebat, regnum Jerobeamus : sed quia habebat non opus erat præscriptione. Et hæc à Domino facta esse, Sacræ Litteræ testantur. Quod si tamen injustitia invasoris manifesta sit, vel perpetuum bellum geretur ad repetendos subditos ; nec illa continuata gestio, quicquam moraliter malum continebit : quod facile largientur contradi-

cen-

CAP. IX. DE MOD. ACQ. MAJESTATEM, 461
centes. Nam contra occupatorem justè bellum geritur : nisi expressa Dei interdicta id vetent. Sed hæc de primo possessore, qui exutus est possessione, intelligenda sunt. nam post natis fas minimè est, bella excitare, quum antecessores sederint, & silendo approbaverint invasionem; negligendoque vindictam subditos pro derelictis habuerint. Posteris nullæ vindiciæ competunt: quia nondum natis nullum jus adimitur. Quamvis hæc alia quæstio est, de justitia belli contra invasorem, perti- nens ad Jus Gentium: de quâ materiâ, Deo propitio, alibi erit agendum.

C A P U T. X.

D E

MODO HABENDI MAJESTATEM.

- I. *Modi habendi Majestatem.*
- II. *Dominatus, & Regnum absolutum.*
- III. *Dictatura Romanorum.*
- IV. *Monarchia limitata.*
- V. *Duogenera limitationis.*
- VI. *Leges fundamentales non sunt veræ leges.*
- VII. *Majestas in regno limitato summa est.*
- VIII. *Vinculum limitationis.*
- IX. *Effectus ejusmodi pacti.*
- X. *Rex fidem fallens, nequit deponi.*
- XI. *Duplex Majestas malè fingitur.*
- XII. *Majestas realis absurda est.*
- XIII. *Lex*

XIII. *Lex fundamentalis, non est Majestas realis.*

XIV. *Origo, Duratio, Fundamentū examinatur.*

XV. *Majestas Realis nec superat Personalem, nec punit.*



Erump. Monarchicum genus consortis impatiens est, & in civitate unā plures potestates regnatrices ignorat. Gaudet imperantis unitate: accedente socio imperio, vel mutatur, vel perimitur. Non uno interim equabili tenore procedit ubiq; nec sibi similem speciem semper servat, aut omnibus ostentat. Dantur regna, quæ omne arbitrium, quidlibet statuendi permiscere principi: qui vim dominandi, nullis legibus, conventive adstrictam, liberrimo nisu exserit: & quicquid è re publici egregii sperat fore, sine cujuscunque intercessione, aut consensu, determinat atque designat. Plurimæ quoque civitates moderata imperia sibi fecerunt; ausæ, quasi aggeribus positæ, regnantis potentatum coercere; ne in infinitam licentiam, & suis injuriosam, exundaret. Jamdudum est, quod Europæ potentissimi populi, deprecati sunt sceptræ, nullis vinculis alligata. Sive intractabilis bellicosæ gentis ferocia adstrictum gubernatoris repagulum pulsavit, & severę dominationis excussit jugum: sive generosa sublimioris spiritus libertas, servilem conditionem indignabunda detestata est: sive procerum ambitio, imperia regum, quibus excludebatur,

tur, imminuere satagens, Principis operationes in multis inhibuit ac sufflaminavit. Quaecunque causa subsit, non ignobile invenimus argumentum exercitationis, in Modo habendi Majestatem: cujus cognitio, Majestati sincerè apprehendendæ multum servit.

II. Duplici autem modo habetur Majestas; uno, *absolutè*; altero, *limitatè*. Gradus quidem hic intercedunt: sed absolutissimum habendi genus est, quod perpetuam & illimitatam potestatem indulget imperanti; tum liberrimam administrationem jurium Majestaticorum, & arbitrariam dispositionem de futuro successore, permittit. DOMINATUM vocamus hanc illibatam Monarchiæ virtutem, nec tempore determinatam, nec coarctatam conventionibus, quæ libero exercitio Majestatis detrahunt. Nimis frigidè hanc materiam tractant, qui *privati lucri cupiditate & studio*, absolvi credunt Dominatum. Hunc autem quomodo à Tyrannide, quam itidem privatâ utilitate definivit Philosophus, discernant, non habebunt. Solemnes sunt, & inevitabiles ejusmodi errores iis, qui quodlibet commune prædicatum, ab *Aristotele* positum, pro accurata definitione venerantur. Dicerem ergo, Dominatum esse Monarchiam perpetuam & absolutissimam, non saltem quoad denominationem successoris; sed maximè quoad potestatem, & continuum imperii in personam, quæ operas imponit, & præsertim dominiæ eminentis, exercitium. Non circumscribi temporis spatio, cum limitato quidem

dem regno commune est dominatui. nam hactenus quælibet Monarchia habet aliquid absoluti, saltem quoad durationem, aut propriam possessionem potestatis, si non quoad potestatis exercitium. Dispositio quoque de successore, quæ sub *alienandi* titulo aliis comprehenditur, quamvis & limitatæ potestati competere queat; conspicua tamen maximè est in *Dominatore*; qui de subditis, ad alium transferendis; aut Dominum, suis provinciis, omnibus, vel aliquibus, imponendi plenissimam facultatem habet. Princeps autem nota Dominatus est, liberius exercitium Majestatis in personam & bona subditorum: quorum corpora pluribus operis gravantur, & bona quotidianæ repetitioni patent. Notissimum est, quam addictè regnentur, à priscis inde temporibus, Orientis populi: quorum capita & fortunæ nimis durum patiuntur jugum. Vix est, ut privatis possessoribus aliud, quam detentorum & custodum nomen tribuas; cum quamlibet substantiam ad nutum domini dimittere teneantur. Atque adeò Dominatum frequenti usu Dominiæ eminentis, citra causam publicam & extraordinariam, delinearem. Nam quod *Grotius* III. XIX. VII. censet; *jus illud supereminens non promiscuè competere, sed quatenus communiter expedit, in regimine non dominico, sed civili, etiam regio*: admittendum nullo modo est. Si jus supereminens, Majestatis jus est, Dominatui competere debet: in quo imperatoriæ facultates, earundemque perpetua usurpatio, perquam insignes sunt & nota-

notabiles. Cognatæ habitudinis est *Regnum absolutum*, quò regimen indefinitum, & jus alienandi conceditur. Nihil quidem confert alienandi facultas vel juri, vel exercitio Majestatis; cum Electitia regna possint esse absolutissima: liberior interim habendi modus est, quoties Principi licet in alium prolubitu spem successionis conferre. Conjicienda in hunc locum est materia *Alienationum*, ut vulgò dicitur: cæterum quod GROTIUS habet de *pleno jure proprietatis*, & *patrimonio regnantis*; salvis principiis civilibus, admiserim nunquam: nisi hoc loquendi genus, leniori interpretatione, ad commodum sensum transferatur. Proprietatis nomen ad res, quæ in dominio sunt, pertinet: ad Majestatem non extenditur. In eo autem differt regnum absolutum à Dominatu, quod subditis non adeo gravis incumbat rex, & privatis mansura dominia conferat. Proximum his absolutissimis Monarchiis est Regnum Electitium, cujus potestas nullo vinculo pactorum sufflamina-
tur. Quamvis enim imperans de successore nihil possit statuere: regimini interim modus haud est positus.

III. Imo in hunc censum referam imperium tempori alligatum; ut præstituto & definito spatio quiescat. quale habuerunt *Dictatores Romanorum*, & Græcorum *Æsymneta*. Serio removenda est Politicorum opinio, arbitrantium; *perpetuitatem referendam esse ad naturam Majestatis*; & ideo temporario imperio *gaudentes*, *magistratus* & *administratores appellandas*

pellandos esse. Facile largimur, sublato interregno, vel dictaturâ deposita, Majestatem interregi, & pridem Dictatori, nullam constare. Idem judicamus de Græcorum Æsymnetis, & si qui alii hujusmodi occurrunt imperantes, quos summa potentia & auctoritate præditos, temporis præfixitum spatium ad privatæ sortis stationem reducebat. Deposito nimirum imperio, nihil restabat nuper regnantibus. Hos tamen, durante regimine, *administrasse saltem majestatem, suo quemque modo, non ut propriam possedisse, cum ipsius regni esset*; minime concedam. Ex Romanis monumentis certum est, unum dictatorem exercuisse omnia jura, sine cujusquam intercessione: permisso quidem, sed non collato à populo imperio; & jam usurpato propriis auspiciis, ad nullius arbitrium, aut ductum. Quante fuerit dignitatis olim Dictatura, vel unius *L. Papirii Cursoris*, cum universo populo contentio, documento sit apud *Livium* L. VIII. c. xxxi. conf. 111. Reus agebatur *Q. Fabius Maximus Rullianus*, Magister equitum, quod spreto imperio Dictatoris, cum Samnitibus congressus erat. Nihil patris senioris ætas; nihil frementis exercitus, & tantum non tumultuantis, clamor profecit, quo minus à lictoribus jam spoliaretur Magister equitum. Nihil auctoritas senatus movit irritatum Papirii animum. Frustra Tribuni plebis appellati: frustra provocatum ad populum est. prævalebat Dictatoris summum imperium. Donec *oranti universo populo, & Tribunis precarium, non justum auxilium*

auxilium ferentibus, reus donaretur. *Aristoteli* quoque *Æsymnetarum* Monarchia, quæ Romanorum respondet Dictaturæ, inter Tyrannides refertur. hoc est, inter absolutissima regna. nec aliâ differentia separatur à Barbaricâ tyrannide, seu Barbarorum illimitato regno, quam quod non sit patria, vel avita. Ita philosophatur L. III. Pol. c. xiv. *Est autem hoc Monarchia genus plane tyrannis optiva, seu suffragio & consensu populi delata: quæ à barbarica tyrannide differt, non eo, quod non sit legi consentanea: sed eo tantum, quod non sit avita, neque patria. Hoc autem imperium obtinebant alii per omnem vitam, alii usque ad præfinita tempora, & ad certas res gerendas. Concludit: Haec igitur Monarchia & sunt, & erant, propterea quia sunt tyrannica, heriles & dominorum propria: sed quia sunt optiva, populi que suffragio deferuntur, & quia involuntarios usurpantur, regales. Sanè tempus extrinsecum accidens, intimam constitutionem potestatis non penetrat. Non minus homo est, qui horam vixit, quàm qui seculum implevit. Operationibus quoque solis nolim credere: quod sciam, sæpe dissimilia principia cognatas actiones producere. Ipsa natura rei à priori scrutanda est, & quærenda essentia: quæ cum in Majestate sit summitas potestatis, nemini subjecta; & hanc inveniam in dictatore, Majestatem palam agnosco. In hoc enim latet indoles imperii summi, ne actus civiles alterius subsint arbitrio, quo damnari & irriti possint fieri. Non me latet, plures doctissimos viros*

V

contra

contrariam defendere sententiam: sed in eò videtur occasio lapsus fuisse, quod arbitrati sunt; *potestatem Dictatori à populo commissam esse ad certum tempus, & illum adeò curatorem & exsecutorem fuisse aliena Majestatis; quem- admodum vicariis integri regni à regibus solet credi administratio.* Verùm longe dissimilis est hæc postrema commissio electioni Dictatoris. Rex in vicarium, præter executionem, nihil confert: ipse retinet imperium, valiturum singulis momentis in vicarium. Dictatori autem à Deo immediate, nisi quatenus modus eligendi ab arbitrio multitudinis concurrat, potestatem Monarchicam summam collatam esse, mihi persuasissimum est. quod majus imperium acceperit, quàm universus populus unquam habuit. In hoc enim superat Dictatoris jus, quod populus *in universos* nulum imperium habet; quale Dictatori prorsus asserendum est. Tribunorum intercessionem, auctoritatem Senatûs & Consulum, qui præcipui Magistratus erant, & reliquos privatos omnes, sub Dictatore fuisse, Historia docet. Illud autem mihi indubitabile signum Majestatis est, si unus omnibus, ac universis imperet. Si supra dictas preces populi universi, ad consilium, & leniorem imperandi viam interpreteteris: minus cum *Livio* tibi conveniet. & multum potestatis suæ prodegerit populus, quod provocationem impediri passus est. Quod si rogantibus universis nihil indulgisset, & illi vi usi essent; præter vim nihil agnoscerem. Justo titulo acceperat imperium, quod,

nisi

nisi injustè, non oppugnabitur. Contradixerit aliquando factiosus Tribunus; sciverit aliquid de imminuendo Dictatoris imperio plebs: quasi non contigerint similia vel circa regum Majestatem, quæ interim vera Majestas manet. Quod si posteris temporibus infracta est Dictatura: nomen pristinum mansit; res abfuit. Et tunc *ducem* saltem habuerunt, & *primum magistratum*, cui ex pacto permiserunt moderatum regimen. Interim antiqua Dictatura revera exemplum est temporarii, sed summi & absoluti imperii. Nisi quod hæc temporaria duratio fuerit in manu & voluntate possidentis. Sola enim religione jurisjurandi tenebatur: quo vinculo neglecto si retinisset imperium, à nemine poterat exauctorari. Revera præditus erat imperio, & non iniquo modo instructus initio, licet sequuta retentio esset injusta. Itaque *Sulla*, nisi sponte cessisset tandem, deponi justè nunquam potuisset. Temporarium ergo imperium facit pacti vis, & promittentis fides; non populi potestas, imperantem elapso tempore destituendi. Dictatoribus verò nolim adjungere Tutores infantis regis. Hi enim sunt administri, non imperantes proprio nomine.

I V. Ad limitatum imperium referimus regnum, quod circumscriptam habet regiminis formam: quando certis conditionibus in solium admittitur regnaturus, & per determinata pacta atque juramenta civibus promittit, ad quæ ex officio, aut jure alio, non teneretur obstrictus. Hic principiò contemplabimur;

num tale quid in re civili occurrere soleat citra injuriam Majestatis. Vidi, qui inficiarentur, constare pacta, quibus deminuitur potestas Principum. quòd *hac cœlitus oriunda, incunabula sua Deo debeat; ideo absonum esse, divinum factum humana exponere libidini, quæ profanâ decerpit manu, quod attrectare nefas erat.* Pernegant ergo, posse constare pactum, quò circumscribitur imperii amplitudo, à Deo descendens, eidemque soli subdita. HOBBIJ verba sunt. *Monarcha si quid promiserit civi, vel pluribus simul civibus, propter quod summum imperium exerceri non potest, promissum illud sive pactum, juratò vel injuratò factum, irritum est. Pactum enim est juris translatio, quæ per ea, quæ capite secundo, ar. 4. dicta sunt, requirit signa idonea voluntatis in transferente. Qui verò sufficienter significat voluntatem retinendi finem, sufficienter declarat, se non decedere de jure ad media, ad eum finem necessaria. Iam verò qui promisit aliquid necessarium ad summum imperium, ipsum tamen Imperium retinet, satis idonea signa dat, se non aliter promisisse, nisi quatenus summum imperium sine eo retineri potest. Quandocunque igitur apparuerit id quod promissum est, præstari non posse, salvo summo imperio, promissum pro non promisso, id est, invalidum censeri debet. Sed usus observantia contrarium probavit, & quotidiana experientia dictis adversatur. Videmus enim in laudatissimis Rebus publicis pacta reperiri, quæ probabilem & speciosam causam secum habent. Concedendū igitur fuerit, conventio-*

ventio-

ventionem inter Principem & subditos posse celebrari. quippe quod jam reverâ est, id esse potuit. Prolixè aliqui Politicorum occupantur, ut ex historiarum serie demonstrent, omnia regna limitationes suas passa esse. Id licet minimè credamus: consignatas tamen litteris Germanorum, aliorumque pactiones inficiabimur nunquam. Interim adversè Scriptorum sententiæ sub distinctione respondendum est. Aut enim limitationem capiunt, de restrictione potestatis, quoad actum primum; quasi extinguatur in se summum imperium quoad aliquod jus: aut intelligunt exercitii suspensionem, & omissionem: qua competens potestas in actum secundum non deducitur. Priori sensu rectè negant, Majestatem ipsam constringi, aut ullam particulam potestatis pacto everti. Nunquam enim probaverim Magni GROTIJ sententiam; in ipsum jus, seu facultatem imperii, obligationem cadere. Fatendum est, inquit, id ubi fit, arctius quodammodo reddi imperium, sive obligatio duntaxat cadat in exercitium actus, sive etiam directè in ipsam facultatem. Priore specie actus contra promissum factus erit injustus, quia, ut alibi ostendimus, vera promissio jus dat ei, cui promittitur: altera autem specie erit etiam nullus defectu facultatis. Neque inde tamen sequitur, ita promittente superiorem dari aliquem; nullus enim actus non redditur hoc casu ex vi superiore, sed ipso jure. Obligationem hanc, quæ cadit in facultatem, non temerè concesserim. Sic enim non erit Majestas in suo exercitio limitata,

tata, sed quoad essentiam suam manca & destructa. Quod impedit facultatem, tollit aliquod jus Majestatis: quod citra totius interitum non accidit. Nam ut conjunctim habeatur Majestas, hoc est, ut omnia jura adsint, nec ullum desit; id verò esse de definitione tam simplicis, quàm mixtæ Reipublicæ, auctores communiter docent. Quò sensu dicitur in indivisibili consistere Majestas: quod non liceat decerpere aliquod jus, proprium, & essenziale, nisi corruptum velis integrum. In ipsam facultatem imperii non penetrat ulla externa vis: nec potest ullo pacto tolli, quod Majestati essenziale atque perpetuum est. Populus igitur nullâ ratione imminuit suis conventis Potestatem; neque ipse Princeps adeo contra eam moliri quid aptus est. Non secus ac homo alteri promittit, se non locuturum certo tempore: omittet vî pacti sermonem, non in se extinguet potentiam loquendi. Citra operam humanam Majestas Principi contingit: & ideò humane restrictioni haud subiacet. Sed quò minus actus secundus imperii, illa actualis exercitii usurpatio, semper se exerat, id usuvenire potest. Id forsân largiri possis, alicujus juris administrationem ad Proceres transferri, & de hâc translatione publicè solemniterque caveri: sed tum non tollitur jus aut extinguitur; sed sano sensu communicatur & servatur in Republicâ. Transferri poterit aliquod jus, non impediri, non annihilari. De quâ tamen communicatione non videtur loqui GROTIUS, cum illam in sequentibus tractet.

tractet. Quod si igitur de *Exercitio Majestatis restricto* loquantur Scriptores, neutiquam illis assurgam. Traditur sanè potestas divinitus, nec potestati derogare possunt humana pacta: interim ut suspendatur exercitium datæ cœlitus potestatis, non videtur esse absurdum. Ipsam Judaicorum Regum potestatem, in operationibus suis, aliquando cancellis circumscriptam fatebitur, qui contextum ejus civitatis fixis oculis spectare sustinebit. Ad hæc imperii modum, quando absolutè etiam regnatur, statuere, non boni tantum principis, sed prudentis simul est. Majestas quidem agit secunda, & detruncationem nullam metuit; quod in imperii sacra nulla humana vis pertingat. actualis interim jurium usurpatio sufflamminatur. Exercitium terminatur: non extinguitur aliquod Jus Majestatis. *Pactum omne translationem juris esse*, generali nimis, & ambigua pronuntiatione dicitur; quam sensu *Hobbianno* non semper concesserim. Quoties de non exercendo jure convenit inter Principem & populum: non statim id ipsum imperium, de quo intercedit pactum, transfertur in populum. Nec opus est, ut de toto summo imperio capiamus, quod secundum partem intelligendum erat. Sanè si daretur aliquod pactum, quod universum imperium sufflamminaret, quin irritum foret, nemo ambigit. Si enim tam fanatica multitudo fingi posset, quæ se non aliter electuram Principem profiteatur, quam si promittat prius designatus eligendus, se nullum jus Majestatis exercere vel-

le; stolidissima foret stipulatio, & promissum sine obligatione. Electus enim consequeretur Majestatem, quæ omnino iners & otiosa nunquam sedet. At verò de aliquò moderatò regimine concepta promissa; puta Principem ultra consueta onera non gravaturum subditos, non gesturum bella sine optimorum consensu, & similia, ne quidem Exercitium Majestatis impediunt, sed saltem limitant: ne dum ut ipsam facultatem imminuant. Quod si necessitas ingruat, quæ doceat pacti illius rationem haberi non posse, nisi cum detrimento Reipublicæ: non incongruum censebitur, transilire conventionis limites, & laboranti rerum summæ succurrere. ne salutariter excogitata, in perniciem publici boni expetant. Ex hoc verò singulari negotio non conficitur; irritum omne esse, quicquid pactorum cum Principe initur.

V. Majestas igitur, perpetuo integra & summa, quoad operationes suas restringitur: quæ contemplatio nobis sistit, restrictionis *Genera & Normam*, quæ regiminis modum designat; adjunctum *Vinculum & Effectum*. Genera limitationis duo sunt. Alterum liberius est, quod soli Principi omnem administrationem, quamvis circumscriptam, attribuit, sine consortio alterius, qui concurret cum Rege in civitate gubernanda. Fit hoc, quando nemo ex proceribus, aut reliquo populo, assumitur in consilium exercendæ Majestatis: sed ipse rex, observatis generalibus promissis, regimen procurat, & jura suæ potestatis exserit.

Alterum

Alterum adstrictius est, quando rex, non saltem aliquid civile promittit populo, sed quosdam ex subditis in societatem administrationis vocat, quorum consensum in negotiis designatis se expectaturum spondet. Eo ipso participes fiunt publici honoris, ut de summa Reipublicæ dispicere queant, & imperanti loco freni sint. non propriâ auctoritate, sed electi concessione. Quamvis enim talium status perpetuo privilegio gaudeat: id tamen ex pacto, & promisso Principis est; non proprio aliquo jure ordinum. Ad hunc modum explicari debent, quæ vulgo de Republicâ Mistâ scribuntur: quam non alio sensu, præterquam dicto, admiserim. Falsissimum est, jura Majestatis dividi, quod infra videbimus. Assumuntur ex populo, qui Consiliarii sint: sed quorum consiliis obstrepere nequeat Rex, nisi violatâ jurisjurandi sanctimonia. Quod non satis attendentes scriptores, nescio quid monstrosæ & confusissimæ rei, per fictam illam mistionem, in qua Majestas divisa sit, in Politicam intrôduxerunt. Si Rempublicam mistam nominant, in qua ex populo aliqui constituuntur, quorum consensum in expedienda Majestate auditurum se spondeat Princeps: non repugnabo. modo vulgarem definitionem mistæ Reip. omittant, & sincerè referant talem statum civitatis, ad modum limitatum habendi Majestatem.

VI. Norma continet *Leges fundamentales*, quas vocant, seu conventorum seriem, quibus vota eligentium & stipulantium comprehenduntur, implenda & conformanda im-

peraturi fide ac juramento. Nam desideria illa subjectæ multitudinis modum imperio conciliant, quoties eligendi placito & promisso roborantur. Hanc pactorum formulam, *leges fundamentales* vulgò appellant: quasi fundamentum sint futuri regiminis, & exemplar Reipublicæ gubernandæ. Leges tamen improprie dicuntur. Non sunt veræ leges, quæ à superiore non feruntur, quæ Majestatem non laudant causam. Populus stipulans, & mentionem faciens, superior non est Principe; nec imperio civili gaudet. Conditiones sunt illæ leges, quæ pacti & promissi ingenium præ se ferunt. Ideò in Capitulatione Cæsareâ, quam vocant hodiè, accuratè ponuntur illa; Regem Romanorum ante electionem consensisse in appositas conditiones, *ad modum Pacti*. Et in contractibus formulam illam observamus, ut dicatur, aliquid *hâc aut illâ lege fieri*, etiam tum, quando pares inter se paciscuntur. Ubi *legem*, interpretamur *conditionem*. Quando leges fundamentales introducendæ sunt, vel populi nomine optiones ejus, certa beneficia sibi cupiunt indulta: aut eligendum movent, jura ne tyrannica sævitiâ, aut severò dominatu in civitate usurpet; aut quodcunque tandem id sit, quod excipitur: eligendus pollicetur, se sanctè præstiturum promissa, & pactis implendis daturum operam. Hac promissione tenetur, non superioris præcepto. Nisi promississet, non teneretur: subditus, etiam non promittens, etiam invitatus obstringitur lege, quæ alii, quam subdito non datur. Con-

ditio-

ditiones illas, in stipulatione populi propolitas, postquam receptæ sunt à Principe, *valere in legem*, ego nunquam existimaverim. Quid enim est *valere in legem*? Legem esse, propriè dictam, negant adducta; quod superiorem non habeat Princeps. Hæc ratio tollenda erat antequam negaretur assertum. Non opus est, ut confundamus hanc doctrinam, & Legem fundamentalem appellemus, *quæ alios contra formam imperii nihil mutandam tacitè vel expresse obliget. Expresse in Statu Democratico. Tacitè in Statu Monarchico & Aristocratico.* Nam strictâ adeò significatione nunquam accipitur à Politicis: quod hâc ratione saltem obstringeretur subditus, aut singuli in multitudine populari, ad conservationem Status publici; non Princeps, cujus securitati jam tacitè in Monarchiâ cautum est. Quanquam nondum video, quid sit *lex tacita*; aut quod discrimen, inter *tacitam & expressam obligationem*. Obligatio, quâ tenetur Princeps, expressè & pacto producitur. Id verò multo intricatissimū est dictu, *in Regno legem fundamentalem esse Legem Regiam; in Aristocratiâ, libertatem Senatorum; in Democratiâ, populi libertatem.* Miscebitur universa doctrina, de modo habendi limitatè Majestatem, hâc explicatione. Lex enim Regia, non limitat Majestatem; sed absolutam declarat: modo Romano significatu accipias vocem. Libertas Senatorum, libertas populi, quia libertas est, non est adstricta perpetuo eidem administrandi generi: & excludit adeò legem fundamentalem, quam agnoscat. Fac

tamen Princeps, aliqua de gubernatione publici status promittat; aut multitudo formam suæ civitatis in futurum tempus ordinet: Princeps iterum propter pactum & promissum alligabitur; non propter legem superiorem. Subditus Principis non poterit statum immutare, aut peccare contra designatam formam: quia ratione obsequii prohibetur usurpare imperantis sui potestatem, cui innectitur facultas ordinandæ publicæ administrationis. In populari statu libera est multitudo, & omnibus momentis administrationis faciem immutabunt universi: singuli nihil movebunt itidem propter pactum, quo suo suffragio consenserunt in ordinem præsentem. Vidi non ignobiles Politicos, qui serio affirmarent; *Regi in regno limitato, perpetuam legem dictam esse, observandam quibuscunque successuris in omne ævum, quamdiu ipsum regnum mansurum est.* Idque universaliter verum pronunciant, *partes dicentis legem superiores hoc casu esse, præterquam sint illius, qui legem accepit: qui se legi, quam accepit, jam tum submitserit, & submittere teneatur. qui si abnuat, etiam adigi possit, constringi ac cogi.* Vide quam durissima effata colligantur, si vox *legum fundamentalium* non rite explicetur. Superiores partes dicenti legem fundamentalem aperte vendicant: at populus auctor laudatur, qui eligens Principem, legem fundamentalem condit. Populus igitur superior sit Principe, cui præscripta lex est, oportet. Hoc primum absurdum est, nemini admissum, nisi Monarchomachis, qui Principum &

& ipsius Dei Majestatem nefariè calcant. Præterea legis vis, & anima, in obligatione posita est, & nisi observetur, pœnâ vindice sui neglectum ulciscitur. Submitte principem legi, & si dictis audiens non fuerit, constringe ac coge, ut supplicio inobedientiam luat. Hæc indubitato sequentur, si priora asserta sint. Sed quale jus illud cogendi Principem? & unde subito concessum in summam potestatem? Vide quam exiguus principio error ingentem molem absurdorum post se trahat: quæ apta nata sunt Reipubl. ordinem feditio-nibus turbare, & ipsam civitatem horrendum in modum evertere. Omnes enim illæ inciviles conclusiones Legi fundamentali, si concipiatur ut propriè dicta lex, ortum debent.

VII. Id perpetuo inculcandum est imperi-tis; *Summitatem imperii non perire, nec superiore Principe dari; licet conditiones fundamentales aliquos ponant terminos operationi civili, & actui secundo.* Non jurat imperaturus, imperio superioris adactus: sed sua sponte, approbans consignatas conditiones. Consentunt eligentium & eligendi voluntates: non imperant invicem & parent. Integra Majestas manet in limitato regno, & rex verè imperans, ac summus est. Non sibi opponuntur, Imperium summum & limitatum. Nam circumscripta operatio procedit interim à summâ potestate: & quamdiu Majestatem habemus in principe, summus est, nemini subjectus. utut conventis suis mensuram imperandi fecerit. Sed *absolutum* hætenus *limitato* opponitur regno:

gno: ubi Princeps non tantum summus est, sed liberam directionem universæ civitatis pro lubitu solus habet. Frustra ergo sunt, qui putant, *regnantem in tali regno, non regnare ut regem, per se, suo jure, & quoniam rex sit; sed quia à regno in regem est subvectus. Legi à regno data, adductius simul, & remissius imperium debere. Non considerari ut Dominum absolute summum, sed ut regni administratorem, & dispensatorem, reliquis saltem sublimiorem, & verbotenus Dominum, ob locum honoratiorem.* At omnis Rex regnat, quatenus Rex est, per se, suoque jure, quod Deo soli acceptum fert; non electioni, quâ Majestatem non habet productam. Reverâ rex est, licet modò remissius, modò adstrictius regimen, vi pactorum habeat. Monarcha absolutus est, qui adstrictum imperium in suos exercet. (hoc enim opponimus remissiori in limitato statu) tantum abest, ut non sit verus Rex. Licet non sit absolutè summus Dominus: Dominus tamen est, & quidem summus in civitate. residet enim potestas summa penes hunc, quamvis se non ubique exferat æqualiter. Administrator aliquis magistratus est, qui id distat à limitatæ Majestatis Rege, quod servus à Domino. Separanda est ab hac doctrinâ popularis Respublica, quæ ad instar Monarchiæ administrationis modum format; & unum aliquem præcipuum Magistratum creat, qui sæpe nomen principis gerit, sed cætera nihil cum rege habet commune: cum subiaceat consiliis & decretis multitudinis, aut optimatum. Remo-
vemus

vemus hunc primum procerum, hunc magistratum plebejum, à Principe, cujus exercitium Majestaticum, suo ipsius promisso inhibetur. nihil his inter se convenit. Decepit interim auctores hæc Reipublicæ popularis facies; in quâ cum viderent constitui Magistratum à populo, accipere potestatem aliquam, removeri quoque, sæpe destinari noxium suppliciis: ad regium statum hæc applicarunt, & idem putarunt obtinere in Monarchiâ limitata, quod in Democratiâ usu venire noverant. Illabatur horum animis Principis persona sub fallaci conceptu Magistratus: quæ ignorantia, principio absurda, plures in judicio civili peperit difficultates. Unde fieri haud potuit aliter, quam ut in multiplices, & inextricabiles errores sese induerent, qui semel falsitatem admiserunt. Tantum abest, ut Monarchiam limitatam, inter officia magistratuum referamus; ut ne quidem partitionem *Grotii*, quâ modum habendi imperium dispescit, satis sinceram esse, judicemus. *Alterta cautio*, inquit lib. I. d. J. B. & P. c. III. n. XI. hæc esto. *Aliud esse de re quarere, aliud de modo habendi, quod non incorporalibus tantum, sed & incorporalibus procedit. Ut enim res est ager, ita & iter, actus, via. Sed hæc alii habent jure pleno proprietatis, alii jure usufructuario, alii jure temporario. ita summum imperium Dictator Romanus habebat jure temporario: reges denique tam qui primi eliguntur, quam qui electis legitimo ordine succedunt, jure usufructuario: at quidam reges pleno jure proprietatis, ut qui*
iusto

justo bello imperium quaesiverunt. Suspecta divisionis nomina sunt. Supra proprietatis jus fecimus suspectum : nunc mallem Grotius omisisset quoque *Ius* illud *usufructuarius* : quod indifferenter regibus , qui primi eliguntur , quam qui electis legitimo ordine succedunt , assignat. Difficilis , & periculosa applicationis sententia , nullo modò congruens huic materiæ : si quando eandem ad naturam usufructus , & regni electivi legitimi , contendamus. Ea perpetua nobis lex erit , doctrinam de Majestate & imperio civili , jure privatorum non commiscere : quod hæc principia non sint domestica summæ potestati declarandæ ; sed alienissima contineant. Diversissima sunt proprietas in dominio privato , & Majestas principis. Usufructuarius autem jus in hac materiâ concedere , est Principis Majestatem prodere. Ubique usufructus rei constitutus alicui est , ad alium proprietas pertinet. Habeat nunc Princeps usumfructum imperii , proprietas ad populum spectabit , qui de jure suo amplissime poterit disponere. Concedas hæc Majestatis hostibus , & vacillabit Principis solium. continuo enim extinguendi usufructuarius hoc jus , excogitabunt rationem , docebuntque intra modum non stetisse fructum ; causam igitur justam , & prægnantem adesse , cur Princeps beneficiò fructuum , quibus indignè abusus sit , pellatur. Nulla subest necessitas , ut limitatum imperium , incongruo illo termino , tantis procellis seditionum temerè exponamus.

VIII. *Vinculum* limitationis est *Juramentum*. Sat validum erat Eligendi promissum ad obligandam fidem: sed cum hominum animi varii plerumque & fluxi essent, repertum est religionis vinculum; quod contineret arctius pacta, & conditionibus placitis vim ac efficaciam conciliaret. Inde mos, juramentis urgere imperantis conscientiam, ut Princeps conceptis verbis juret, se sanctissimè promissorum fidem exsoluturum. Quanquam enim contingit interdum, ut honorifica subditorum de imperaturo opinio, & erectior spes, satis fiducia ponat in verbis promittentis, & optima quæque sibi polliceatur: nec tamen perpetuum illud est; sed dictorum pactorumque testis sæpius citatur Deus, & nisi his stetur, invocatur vindex. Hic obex positus est spondentibus regibus, qui stringit transgressuros, ne fixum limitem temerent; & repellit, ne honestatis & fidei clathros effringat aut removeant. Non verò omne juramentum limitati regni nota est. Dantur quædam quasi generalia, quibus rex juris ac justitiæ administrandæ, utilitatisque publicæ promovendæ curam in se recipit. De his talibus in præsentī nobis sermo non est. Nam absolutum imperium comitari possunt: quum de officio Principis communi & usitato concepta sint. Sed illa hic intelligimus, quibus ad aliquid civile obstringitur rex, ad quod aliàs non teneretur: quæ imperii rationem, & formam regiminis, seu cujuscunque gubernationis, determinant. Hæc sunt propriè imperii restricti juramenta:

hæc

hæc sunt illa vincula, quibus conditiones designatas approbat regnaturus.

IX. Nunc de Effectu limitationis. Omnis operatio promissorum, & jurisjurandi vis ac efficacia RELIGIONE absolvitur: qua imbutus jurans, nefas esse duxerit, transilire aut migrare limites conventorum. Tenetur igitur stare pactis, nisi omnem reverentiam Numinis excusserit: nisi perjuri infame nomen mereri, & vindictam divinam provocare atque laceffere velit. Nunquam sacra illa asseveratio tuto contemnitur: nunquam juratum Dei Nomen ac Numen, violatumque sublestâ fide, maleferiatos homines supplicii expertes dimisit. Exsecrandum nefas est, perjurio temerare sacrum negotium, cujus testis ac vindex Deus advocatur. Fidem servandam esse, æterno juris naturalis decreto, sancitur. quam veritatem, non nisi desperatissimæ pravitatis homo impugnabit, qui universi generis humani hostis judicandus est. Quare ab illis, quæ semel placuerunt, quæ jurejurando interposito stabilita sunt, Princeps recedere haud potest. Hoc fine, hoc effectu, intercedunt illa pacta, quibus concedendæ immunitates promittuntur: ut iram læsi perjurio Numinis exhorrescat promissor, & pietate motus intra limites fixos consistat. Aliam efficaciam, alias proprietates Legum fundamentalium ignoramus: fingi solitas ab auctoribus, qui veritati civili & acurationi officiunt. Nam si reverentiam juramenti exuat, & contra datam fidem imperet, atque imponat excepta subditis onera Rex; sub-

subjacebit quidem poenæ divinæ, & supplicio, à Deo, competente judice, irrogando: cæterum ad libertatem subditi recipendam, nihil inde redundabit; tanquam jure possit excutere jugum, quod pactorum æquitas videbatur imposuisse. Quod obsequium subditi non proveniat à pacto; sed Principis imperio, quod perjurio non extinguitur. quemadmodum hoc pluribus infra demonstrabimus, ubi Obsequium subditi contemplabimur.

X. Nunc obiter removendi sunt, qui peregrinum effectum Legibus fundamentalibus assignant; non id tantum agi putantes, ut Princeps jurans religiose fidem servet; ut sanctis effatis reverentia constet & integritas: aut secus si fiat, Deum vindicem habeat perjurus. id potius effici, ut *subditorum religio solvatur, nullis adstricta vinculis, postquam pejeratum est. Id exigi, ut præstitum juramentum excipiat realis præstatio, quæ ea omnia & singula examussum perficiat, quam fuerint promissa: secus si fiat, hoc agi, ut habeat perjurus vindicem Deum à sua parte: ab altera, id est, à parte regni, ut agat soluta, & sit per hoc perjurium nullis adstricta vinculis regni, & subditorum religio.* Citant illud: *Fidem domino non servanti, impune non servari.* De antiquâ Suecorum constitutione, tradit CHYTRÆUS, eos sub perjurii poenâ fuisse obligatos, ad non servandam fidem degeneri regi. Fœdus civile ita disponunt alii, ut subditi repromittant Magistratui omnia honesta, si scilicet juste, piè & non tyrannicè imperaturus sit. Hæc conditio si minus

nus impleatur, solutum esse populum, irritum contractum, obligationem ipso jure nullā. Et in genere duplex formant homagium, secundum obsequii & subjectionis formulam: aliud *limitatum*, *illimitatum* aliud volunt. Secundum hoc, sine conditione aliquā expressā, obedientia imperantibus juratur: at in priori, determinatur obsequium, ad conservationem privilegiorum, & fidem pactorum. Nos constantissimè negamus, obsequium negari ob defectum servatæ fidei. Examinanda hæc materia est, secundum ea, quæ de malo principe traduntur alibi. Bonitas & virtus imperii naturam non constituit; malitia & perversus animus non infringit. quare cum alia scelera Principem non exuant Majestate, nec perjurium id fecerit. Obligatur ad parendum subditus, non quia juravit Princeps, sed quia imperium habet. obligatur ob hoc imperium subditus, nō quia ita convenit, sed eo ipso, quod subditus est. Si obsequii causa esset pactum, hoc sublato forsitan tolleretur obsequium, nunc obligatio immediatè ab imperio descendit. hoc violatione pacti non evanescit. *At Princeps tamen hac conditione in solium evehitur, ut pacta præscripta servet.* Bene. Sed hæc electionem concernunt, quæ cum ipso imperio nunquam eadem est. Nisi jurasset in ea, quæ stipulabatur populus, non fuisset electus: at postquam electus est, postquam imperii potitus, non desinit manere rex, licet promissis non steterit. Negatio obsequii, solutum imperium præsupponit. Si igitur non adimpletā

con-

conditione, solutus est populus; si obligatio ipso jure nulla est: exspirasse imperium statuendum est. Sed haec tenus inter modos amittendi imperii, nondum firmiter fuit relata, pacti, cum populo initi, violatio. Faciant clarum evidentissimis documentis, perjurium esse perpetuam causam amittendi regni: & ita punitos in continenti perjuros, ut privarentur imperio. Ipso jure excidere Principem sua statione, nimis confidenter dicitur. Quod enim est ipsum illud jus, quo sancita est hæc presentissima exauctoratio? Humanæ leges non disponunt de Majestate. In sacris & divinis oraculis declaratio expressa debebat legi, de tali dejectione: alioquin subditus imperio solutus non exit, & obsequio debito non liberatur. Nec dum populus est constitutus judex, qui de tali crimine, & irrito contractu cognoscat, & sententiam definitivam, contra Principem transgressorem, ferat. Si vel maximè fides, minus sincerè servata, causa sufficiens ad amittendi imperii, concederetur: subditus tamen cogeretur adhuc præstare obedientiam. quod non datur in multitudine, qui imperium jure possit repetere. Id enim quia Deo acceptum fertur, alio iudice ac vindice, non eripitur. Superior judex, qualis populus non est, in adiundæ majestatis actu, suam auctoritatem interponit: id nisi fiat, præsens superest imperium, cui obsequium debetur. Quin illud asseverare non dubitem, si vel adjiciatur; *regem, fidem fallentem regno casurum*: ne tum quidem regno posse exui, aut temporarium effici

im-

imperium, nisi decedat sponte folio Rex. Non habeo, quo velamento tegam opinionem, *pactis fundamentalibus contineri contractum inter Regem & subditos, à quo si alterutra pars recesserit, nec alteram obligari: regem pactionatum, ubi pactum non servat, deponi posse.* Recensent aliqua, nimis abjecta juramenta, quorum clausulam sic explicant: *illud vero quod in fine additur, ab obedientia solutos fore subditos, si Rex in aliquibus saltem fidem violer, manifestissimum argumentum prabet, regi nullam competere potestatem, nisi ex pacto.* quod in electione Sigismundi III. aperte apparuit, cum regni Cancellarius Zamoscius ita eum alloqueretur: *Quandoquidem viderent ordines, Majestatem Regiam pactis conventis stare nolle, non debere ipsius Majestatem in malam partem interpretari, si ordines obedientiam ipsius Majestati renuncient.* Imperii causa non est Pactum: nec in subditi arbitrio positum est, ubi semel agnovit Majestatem, obsequium postea pro lubitu negare. Si verus Rex fuit Sigismundus, si vera Majestas regia adfuit, non poterat renunciari obedientia. Si velimus exemplis estimare principia civilia, & ad factorum normam exigere; nihil certi aut fixi; plerumque nihil justi habebimus. Benè Grotius annotat, manere hanc conditione summum imperium. quod si verum est, sicuti verissimum, nemo contra poterit insurgere, nisi reus velit reputari Majestatis. Vanum & irritum pronunciamus hoc pactum, quod verborum sonum exhibeat, rei sensum nullum. Quod nemo sit in civitate sub-

subditâ , qui imperium removere queat à Rege perjuro. Nam exempla de Sabæorum rege ; item illa, quæ ex *Cromero & Cranzio* , citat Grotius, n. xvi. contradictoriam seditiosorum hominum vanitatem arguunt. Si rex Sabæorum , liberrimâ potestate præditus fuit , quis à perduellione absolveret subditum , qui regiâ prodeuntem principem lapidare sustinuerit ? Fidei commissi similitudo & hîc decepit *Grotium*. Adjiciatur in contractibus lex commissoria : in regni delatione nunquam adjicietur. In contractibus enim de suo se mutuò obstringunt consentientes. In delatione regni , imperium , quod consequitur Princeps , à populo non habet : quare nec populus illud repetet. Non habetur amissibiliter , cum subditus citra impietatem non possit involare axioma , quod uncto Dei , solus Deus tradit & eripit. Istud temporarium imperium Dictatoris non poterat repeti à populo , nisi sponte cessisset ipse suâ potestate. Imperium enim , injustè etiam quæsitum , quia datur à Deo, subditi invasionem & rebellionem excludit. Atrocissima sunt , quæ de merito pœnæ habent. *Principis actum , à tenore juramenti abeuntis , nullum esse & irritum ipso jure : transgressoris conatus qualibet ratione suffragminandos , & coercendos : quod ipso jure , ipso facto exciderit statione*. Sed figmentum hoc est , non satis laudabile. In capitulationibus , nec adjicitur clausula illa pœnalis , nec ex natura rei surgit , aut surgere potest. Si ne obsequium quidem negat subditus : multò minus Principem

pcem

pem perjurum castigabit. Universaliter verissima sunt, quæ nobilissimus GRASWINKELIUS, dissert. de Jur. Maj. cap. xi. scribit. *Modò majestas adsit, ne quidem per somni umbram pœna ad eam se penetrabit. licet fiat, quod ab jurejurandi religione abeat diversum, tamen id valiturum, pronunciat. Neque esse censet, ut ex capite jurejurandi non servati, sic arguatur, ut omni effectu destitutum, summo velut de culmine cadat in ruinam imperium.* Et planè politicâ utitur illatione, ob præsentiam Majestatis: hanc quia in regno limitato deprehendimus, idem ubique erit judicium, nam & tum præsens imperium adest; non precarium, non fictum, non subjectum alicui. Quam civilem rationem etiam barbari populi assecuti, præstabant perjuri obsequium; sed mortuos, indignos regiâ sepulturâ judicabant. De quo videre juvat GROTIUM I. III. xvi. Quum vero adversæ partis argumenta à Majestate reali, quam vocant, originem ducant: operæ pretium facturi videmur, si monstrum illud sequenti tractatione removeamus.

XI. Divisionem Majestatis nativam ac genuinam nullam agnoscimus: dum vero politicorum aliqui eam foveant, & in regno limitato maxime duplicem Majestatem ponunt; videndum erit, quid solidi contineat. M. ZUERIUS BOXHORNIIUS duplicem fabricat Majestatem; ab imperantibus unam, à parentibus alteram deducit. Lib. i. Instit. Polit. cap. iv. §. ii. p. *Dupliciter venit consideranda Majestas, quia vel ex imperantibus, vel ex obsequen-*
ribus

tibus vim habet. Majestas quæ vim ex imperantibus habet, est insita quadam animi vis ac magnitudo, quâ, qui supra cæteros excellunt, cæteris debent imperare. Majestas, quæ vim ex obsequentibus habet, est nihil aliud, quam sanctum, constans & immotum judicium subditorum, quo sibi omnino persuadent, illos, qui præsunt Republica, jure ac merito præesse & posse, & debere. Neutra vera Majestas est: & videtur auctoritatem ac reverentiam, cum imperio & obsequio confundere. Non vis animi, aut magnitudo, Majestatis naturam absolvit: sed potestatis absolutum jus. nec magnanimus omnis imperat. Cadit illud mentis robur in plures illustres viros; qui nullo interim regni axioma fulgent. Aptitudo illis nullum jus confert, ut cæteris, supra quos excellunt, debeant imperare. Confusioni autem maturandæ congruit assertio, si optimus quisque sibi regnum destinet; aliis competitoribus, etiam vi excludendis. Ex alterâ parte, tam lubrico fundamento non superstruimus regale solium. Majestas ex obsequentium judicio, non habet majorem vim: equalem obtineret, si subditi secus censerent. Non extra se quærenda Majestas est; aut ejus vis ad opinionem alterius exigenda. Non præest Reipublicæ Rex, quia putatur justè præesse: sed quia præest, persuadere sibi omnino debent subditi; jure ac meritò præesse debere Principem. Duplicem iterum, sed diversam à prioribus Majestatem, eodem capite, n. XXI. seq. tradit; quæ videtur esse Realis. Est & alia quadam ipsius Reipublicæ

blica Majestas, qua non tam vim imperantium
 Et personam, quam vim, statum, sive formam,
 sive incolumitatem Reipub. concernit. Illa vel
 domi adversum Imperantes Et subditos, vel fo-
 ris adversum externos Principes, Et populos facit.
 Adversus domi imperantes Et subditos, defini-
 tur illa, immota observatione, forma, ordinisque
 imperii semel recepti, legum, quae pro ea reperta
 sunt, Et vulgo fundamentales appellantur. Ad-
 versum ceteros definitur sui penitus juris, ne-
 que alteri cuiquam, vel populo, vel principi ob-
 noxia imperio, tum respectu eorum qui imperant,
 quam qui obsequuntur. Et in explanatione ad
 hunc locum. Diximus quoque aliam Majesta-
 tem imperantium, aliam Reipublicae. quae di-
 stinctio notoria est, quia laedi Majestas imperan-
 tium potest, salva manente Reipublicae Majesta-
 te. Reipublicae Majestas est, quae sui juris est, nec
 cujusquam agnoscit imperium. Quam Maje-
 statem Tacitus, Annal. III. c. vj. absolute Rem-
 publicam appellavit in Oratione Tiberii, ubi
 ait: Principes mortales, Rempublicam eternam
 esse. Examinanti hanc Majestatem accuratius,
 vix aliquid supererit tandem solidae rei. Ubi
 enim, & penes quem residet haec Majestas, quae
 formam, sive incolumitatem Reipub. concer-
 nit? Princeps est, & hujus Majestas, quae ad-
 ministratio civitatis ordinatur. Si pactis
 mutuis designata est facies Reipublicae guber-
 nandae: his placitis & conventis originem de-
 bebent regiminis modus. Immota observatio
 formae, ordinisque, aut legum fundamentali-
 um, non est Majestas Reipub. nec ab eadem
 pro-

proficiscitur: sed ab obligatione, quæ naturaliter pacta insequitur. Difficilis fuerit conceptus, imaginari sibi, *quomodo adversum imperantes & subditos simul valeat domi*. Quid enim rerum tandem fuerit, quod hanc auctoritatem contra imperantem & parentes exerceat? Adversus externos nulla civilis potestas cum imperio usurpatur. *Sui juris* dicitur Respublica propter Principem, qui neminis imperium superius agnoscit. Lædi Principis Majestatem, salvâ manente Reipublicæ Majestate, ego non temerè credam. Tiberius, per æternam Rempublicam, nunquam stabiliet Majestatem Reipublicæ: cum scenæ serviat, & per Rempubl. Senatum Populumque Romanum, qui sine Majestate, Principum ævo esse poterant, denotet. Tandem, non satis definita est Reipublicæ Majestas, quando *sui juris* dicitur. Nam id attributum Majestatis in genere est. Dum species diversas fingunt Majestatis, per differentias específicas, & proprias notas, restringendum erat illud commune genus. Igitur aliquid amplius contineat oportet, præter illud sui juris imperium. Vulgo habent *Majestatem Realem*, quam personali contradistinguunt & opponunt. Dividunt quippe Majestatem in Realem & Personalem. Illam describunt, *quæ cum imperio nascitur, & imperio est coæva, ipsi perpetuò inhaeret, nec cum Monarchâ exspirat, sed quamdiu corpus regni durat, permanet*. Hanc vocant, *quæ personam Monarchæ respicit, in quam collata est, & cum eâdem exspirat*. Hac personalis, seu regnantis

Majestas, à *Majestate* regni, ut fundamentum à fundamento dependet, atq; adeo obstringitur, ut si contra eam insurgat, impune ladi possit. Regni quoque Cancellarium, ea qua contra *Majestatem* regni, & leges fundamentales esse videntur, Regi jubenti, & flagitanti denegare posse, probare intendunt. Subjectum hujus monstrosæ potestatis Leges fundamentales faciunt: cui determinationi parum respondent attributa, penitus inspecta. Mira hîc fabulantur; Originem divinam & naturalem. durationem Reipublicæ coævam; fundamentum & principium agendi, influens in Principis potestatem. Sed id omnium fidem superat, quod major rege & regno sit hæc *Majestas*; & ideo immutabilis, poenâ Principem afficiens, qui contra peccaverit.

XII. Antequam subjectum, Leges fundamentales, excutiamus, & ingentes illas affectiones; ostendemus prius, non dari hunc fabulosum foetum: cum plurima absurda eundem à qualibet Republicâ proscribant. Nimis confidentes sunt hujus figmenti patroni, & nimium sibi promittunt de incallida credulitate lectoris, cum nulla probabili conjectura ostendant præsentiam realem suæ realis *Majestatis*. Rationes sanè, quibus adstrueretur, nullas reperire licuit hætenus; quibus evinceretur, dari *Majestatem* realem. nostro quidem commodo: dum opus haud est, ut iisdem infringendis detineamur. Fuit tamen, qui hoc momentum apponeret: *Est suum regno corpus, sed mysticum nempe, ut civis universita-*

ti. Proinde non ambigendum, num sit in eo Majestas. Infirmum fulcrum, quo sustinenda erat tanta moles. Si cuique corpori mystico majestatem realem assignabimus, omnes vici eadem præditi sint oportet. Sed videtur hîc respexisse omnino ad Moralistarum quorundam somnia, putantium, cœtui civili naturaliter adhærere & adnasci imperium, eo ipso, quo cœtus aut multitudo est. Quam vanitatem supra rejecimus, ubi Causam Majestatis declaravimus. Id multo magis mirari licet, descriptionem certam & fixam non dari. Duratione, & superioritate, natura ejus dicitur absolvi: quod *coæva sit regno, cui congenita soli immoriatur; vim in personalem Majestatem ad dejectionem usque exferat.* Hæc non infrequenter magnificis verbis, & pluribus oratoriis pigmentis ambitiosissimè diducuntur, nulla probatione adjuncta. Quasi verò hominis naturam rectè descripserim, si dixerim, eum cœpisse hoc anno, hoc mense, hoc die; nec prius mortuum fuisse, quam collapsum sit hoc ædificium. Non habeo genus, non differentiam, non definitionem. Non nemini est, *Totius civitatis sponsio.* Sed viderit, ne subditorum obsequium in classem Majestatum reponat: quod communi sponsione ut plurimum confirmatur. Sponsio, conventio, contractus & pactum, alienissimam naturam habent ab imperio & Majestate. Damnamus ergo hoc dogma, cum sua reali Majestate. Nec movemur afferentium dictariis, quasi *Neoterici tantum Scriptores, ex merâ adulatione, illam impugnent: præstantissimè*

*tissimis Politicis admissam. eâ destinatione, ut Tyrannidi sternant viam. Et ad absolutum dominatum veluti manu ducant Principem: quem in bona corporaque subditorum grassari patitur sola Personalis Majestas. Dantur ex recentioribus multi, qui conscientiam nullius Principum imperio mancipatam, nec cujusquam gratia emptam, liberam gerunt, & studio nihil dant: ex vetustioribus nullum reperias, cui prodigiosus ille fœtus, vel fando innotuerit. Difficultates, quæ urgent novitiam hanc doctrinam, tot tantæque sunt, ut unius lineæ ductu non solvantur. Id saltem allegabimns; si esset Majestas realis, vel erit superior, vel inferior Principis Majestate; vel eidem æqualis. Ubique absurda civilia oriuntur. Si inferior est Realis, desinit esse Majestas. Si superior; tollitur Principis Majestas: quam generali pronuntiatione in summa potestate fundari, omnino putamus. Jam si Principis potestas superioris arbitrio est obnoxia, summa non est, Majestas non est. Quod incautè, & inciviliter nonnulli affirmant; Administratorem Reipublicæ constituentes omnem Principem: cui collata dicitur Majestas, non ratione possessionis: sed saltem usurpationis: ut eâ utatur ad Rempublicam benè administrandam. Aliam partem Majestatis communicari, aliam retineri. Summam potestatem administrandi conferri; summam potestatem constituendi & conservandi Rempublicam retineri. Hac etenim si conferretur, Principem habere potestatem sibi constituendi successorē, vel alium
 eli-*

*eligendi. Experientiam verotestari, eam non haberi: sed hanc solam penes procures, aut populum esse & manere. Imo etiam hoc absurdum inde sequitur; quod Princeps semetipsum de solio deicere posset: quod nemo sanus vel faciat, vel affimet. Procures & Populum eam potestatem semper retinuisse; præstantissimis quibusq; Policis statuensibus. Indigna talia sunt, quæ publicè tradantur. Administratoris nomen, & procuratorium titulum, Regibus assignatum, nunquā sine commotione animi lego. Suspecta Majestas est, cujus pars administrationē, altera constitutionem complectatur. Ignotā divisio, ignoti termini. Forsan ineptus terminus, *Juris & exercitii* nomen, debuit denotare. at nudum exercitium, Majestatis plenariæ notione venire haud potest. Si una jurium usurpatio Principi relicta est, nulla potestas; tollitur Monarchia, & omnes versamur in Republicâ populari. Princeps enim Magistratu fungeretur; nullâ esset instructus Majestate. Quod palam absolum est. Vellem doceri, quæ jura contineat potestas administrandi; quæ item potestas constituendi & conservandi. Mentiar, si se ipsi intelligant auctores, cum suis vanissimis distinctionibus. Principem sibi constituere successorem, documento sint hæreditaria, quæ vocamus, regna, Britanniarum, Norvagiæ, hodie Daniarum, ut alia taceam. Solio quidem se non deturbabit rex; quod nemini in se Jurisdictio competat. cæterum principem abstinere posse regno, & illud hæredi transmittere, saniora exempla nos docent: à*

populo posse dejici, non affirmabit, præterquam seditiosus. Subordinationem siingas: summum tollis. Quod enim subordinatur, primum non est. Si personalis Majestas subordinatur: non est summa; non est Majestas. cujus indoles in summâ potestate sita est. Superiorem autem haberet Realem, cui subordinatur: quâ ratione desinet esse & summa, & Majestas, & in subjectionem migrabit. Nihil simul summum est, & non est. Non eximetur hic scrupulus, quamvis dicas; *absolutè summam in suo genere, non habere superiorem*. Nam hæc ipsa nunc urgentur. Principem habere majestatis exercitium, in aliquibus casibus restrictum: non idem est, ac dependere à populo, ut privari possit regimine, si eodem abutatur. Omnia hæc evincunt, non satis cognitam fuisse naturam Majestatis: & abundè persuadent, ignorari ejus subjectum, causam & judicem. Si concedunt hi tales, Majestatem personalem esse plenariam, & eam subjiciunt nihilominus reali: manent superiora incommoda, & pugnantißima contradictio verbis subest: quam divisio in diversas partes Majestatis, Constitutionis & Administrationis, non satis tranquillat. Ignorant illas partes Politici: & cui facultas majestatica administrandi, hoc est, regendi & gubernandi, permittitur, Eisdem quoque conservatio assidet & constitutio. Nam Princeps, quem vera Majestas inhabitat, ille est, qui Rempublicam constituit. Æqualitatem si his duabus Majestatibus assignes, destrues alterutram, & confusissimè affliges

fliges civitatem. Est, qui utrique eandem originem affingit, naturalem, tum divinam: ratione ordinis ac finis, summi boni politici. Utriusque naturam in imperii absolutè summi jure; & debitâ obedientiâ collocat. Sed miror Clarissimum virum non attendisse conclusiones inde emergentes. Si enim utraque vera Majestas est, altera alteram evertet. Majestas parem in Republicâ non agnoscit. quod æqualitate summitas tollatur. Potestas summa dicitur, non tantum quòd superiorem in civitate non habeat; sed quòd omnia eidem obsequantur. Æqualis alterutra Majestas non obtemperabit. Dabitur ergo aliquid, quo superior non sit Majestas. Neutra summa dici potest, cum illud summum sit, quod supra omnia est; ubi verò potestates sunt æquales, neutra dici potest, esse supra omnia. & ipsa civilis ratio obstat, ne duo imperia summa ponamus: quam causam in ordinis divulsione statuunt saniores. quod verum est. Mihi tamen videtur momentum politicum in eo versari, quòd certissima confusio immineat civitati, si duo summa imperia in eadem reperirentur, propterea; quia alterum alterius actus irritos faceret, aut actus irritos haberet. Nam si personalis majestas aliquid præcipiat; Realis contrarium censeat: alterutrius decretum frustraneum erit. Subditi enim contraria simul facere nequeunt: quod duobus adversis dominis non serviant. Altera igitur everteretur Majestas, cujus sanctio contemneretur à subditis, exsequentibus alterius mandata.

XIII. Hæc obstant, ne recipiamus Realem in numerum Majestatis: nunc subjectum, & attributa examinabimus. Subjectum hujus realis Majestatis, vel potius ipsam realem Majestatem, statuunt Leges fundamentales: quasi hæc absolute summa potestas in fundamentalibus regni legibus, earumque conservatione, observantia & executione tota consistat. Quoties quæritur, unde Majestas imperii dignoscenda & dijudicanda sit; ad leges fundamentales confugiunt, quibus tanquam fundamento firmo, & immoto inniti quamque Rempubl. dicunt. Imperantis enim Majestas Reali, hoc est, legibus fundamentalibus, temperatur, quò minus sit absoluta, summa, atque infinita. Has nempe leges non modò instrumenta esse regni, cujus administratio secundum ipsas sit dirigenda; quemadmodum aliàs Leges instrumenta regnandi sunt: sed ita immediate ipsum spectare, ut ipsum in eis consistat & subsistat. His principio objecerim illa CL. GRASWINKELII, diff. de Jur. Maj. cap. X. Verius est Majestatem, sive regni ea sit, sive Regis, unam esse atque eandem planissime, & ipsos, qui sic eam dispeſcunt, (in realem & personalem) in eo labi, quod non discernant rem ipsam à modo rei habenda. Deinde antiquissima cura nobis fuerit, ad Majestatis naturam exigere leges fundamentales. & scrutari, num patiantur applicationem, quæ illi sunt domestica. Apparebit statim, Imperii indolem summâ potestate instrui, quæ per omnia civilia diffusa est. Id Legibus Fundamentalibus non congruit. nisi Legislatoriâ potestatem,

potestatem, principalem Jurisdictionem, Pacis & armorum arbitrium, vectigalium & tributorum exactiones, & quæ sunt reliqua imperiorum insignia, iisdem adscribamus. Transferamus singula Jura ad Leges fundamentales, comparemus invicem omnia, ne unum quadrabit. Habentne potestatem legem condendi, interpretandi, mutandi & antiquandi? Hærebimus hîc extemplo. Quomodo enim Leges, alias leges ferre possunt? quomodo de variis conditionibus eorû, quæ circumstant negotia, arbitrari, quæ ipsæ interpretatione opus habent? Applicantibus cætera jura, eadem absurda occurrunt, quæ circa legislationem: ut ita facile appareat, eas non continere Majestatem realem. Num exercent inter partes supremum judicium; & eâ auctoritate decidunt controversias, ut ad altius tribunal litigantibus aditus obstruatur? num instituunt Magistratus & officiales præficiunt sacris, profanis, civilibus, militaribus? Nemo hæc facile dixerit. De quo negantur omnes partes, & singulæ; de eo totum dici haud potest. cui definitio non competit, illi nec definitum. Suntne Leges fundamentales summa potestas in universam civitatem? Lex perpetuo instrumentum est administrationis. ipsa nec regit, nec judicat: sed normam suppeditat tantum, juxta quam, si fundamentale pactum sit, Princeps regat; aut officiales partes Reipublicæ administrent. Hæc regulam suppeditat, secundum quam commissum à Principe inferius regimen & judicium exerceant. Fatentur ipsi,

Realem impropiè esse Majestatem & *Meronymicè*; cum propriè & accuratè loquendo, *Majestas sit in re animata, seu vivente*. Quod satis est, destruendæ sententiæ. vel ingratiis enim concedunt, nullam dari Majestatem realem. Nam quæ impropiè dicuntur esse, talia non sunt, qualia dicuntur. Risus de prato dicitur; sed impropiè: & dum impropiè dicitur, prato non inest. Sic nives non sunt in capite cano, quia de eo dicuntur impropiè. Quare cum Leges fundamentales animalem naturam non habeant, impropiam Majestatem, hoc est, fictitiam & nullam, continebunt. Citanda hîc sunt quæ habet GRASWINKELIUS dicto loco: *Quod ne quemquam turbet, rei scilicet inanimatæ Majestatem; cavillari non decet, non ades, non vici, non civitates, regnum constituunt, sed homines*. Adjiciendæ & subintelligendæ sunt Leges fundamentales, quæ certè animal non sunt. Id obiter monendum est, malè præsupponi; *quasi omnes in universum Respublicæ habeant suas Leges fundamentales*. Ecquis enim vellet asserere, in omnibus ubique regnis dari ejusmodi constitutiones, dari talia pacta, quibus adstringatur imperaturi Majestas? Quid dicendum erit de Provinciis, bello devictis; quibus nihil pristinæ libertatis relictum, & ultima ferè servitutum imponenda fuissent, si victor belli jure uti sustinuisset? Neque enim putari potest, in tali constitutione Reipublicæ locum habere illa postulata subditorum, quum armorum violentia his nihil permittat. Præter regna,

gna, subjugata, plura invenientur, quæ leges fundamentales ignorent. Non Turcorum, aut Tartarorum respublicas adducam: cum barbaricæ tyrannides audiant passim. quam priscis temporibus, omnium orientalium ea fuit ratio, ut adstrictè regerentur subditi. Ad Romanos progrediamur, quorum *Cesar Iulius*, quum esset jam confirmatus in imperio, Majestatem habuit haud limitatam. Non arbitramur, populum sibi quicquam reservasse: quod ab eo omnem potestatem in Principem collatam, Scriptores passim, & Leges Imperatorum perhibeant. Idem statuendum est de imperio *Augusti*, & successorum: ex quo nihil relictum esse populo, manifeste patet. Si enim reservasset sibi vel populus, vel Senatus, aliqualem potestatem, Lege Regia eandem omnem non contulissent in Principem. Idem arbitrandum de prioribus Imperatoribus Germanorum, qui absolutissimo jure regnarunt: Reliquæ autem civitates, quæ limitato imperio reguntur, nondum agnoscunt realem Majestatem in Legibus fundamentalibus. quod ex dictis, & jam dicendis magis apparebit.

XIV. Originem naturalem & divinam affirmant: ut rem scilicet per causam cognoscant. Sed applicetur hæc origo Legibus fundamentalibus: & jure naturali atque divino erunt præscriptæ. Ubi nunc est sponsio civitatis? Si naturalis origo est, omnium cordibus erit inscriptum, quales leges esse debeant; quibus pactis absolvantur. Aut nos non sumus homines, & Juris naturalis capacia sub-
jecta,

jecta, qui præscriptum illud naturæ ignoramus; aut ficta erit naturalis origo. Id sequitur etiam, in omnibus Rebus publ. easdem debere esse leges fundamentales. Nam quæ à naturâ constituta sunt, ubique similiter se habent. Ut taceam, nullum imperium à naturâ dependere; quod supra vidimus. Si divini juris sunt Leges fundamentales; ostendant nobis in Sacris paginam, quâ id definiatur: aut quâ ipsæ leges sanciantur, concessâ eisdem Majestate reali. Non magis vera sunt, quæ de Duratione jactant. *Majestatem realem, regno congenitam & coævam, non desinere, nisi cum regno. Non delibari interregnis, non discordiis, non fatalibus imperii mutationibus; modò ne totum regnum subvertant. Hoc esse illud Palladium, hæc delapsa cælo Ancilla, hos denique æternos Vesta ignes, quorum pervigili custodiâ, tutelaque totum imperii corpus conservari veteres fabulantur.* Splendida nomina: sed illud dolendum, quod fabulosa. Cavillatio in verbo *Regnum* latet. Nos appellamus, à Rege, & vocamus Monarchiam, in quâ unus Rex imperat. Ubi rex, ibi regnum, ibi imperium. Sed præter Regis Majestatem, nullam deprehendimus. Quamprimum rex exstinguitur, non amplius regnum est, non imperium adest, non respublica: sed materialis civitas, seu multitudo. Pone leges fundamentales, quales in modo limitate habendi Majestatem imprimis spectamus, proculdubio non præsentem Rege, nullæ erunt in civitate. Nam limitatum Principem concernunt & obligant: sed
ubi

ubi nullum subjectum obligationis adest, cessat ipsum obligans. Legum fundamentalium essentia in obligatione ad præscriptam conditionem ponitur: simulatque persona, in quam conceptæ sunt, removetur, expirant ipsæ; quod absit, qui observet. reviviscunt demum, quando alium in decedentis locum adstringunt. Non aliter ac imperans definit imperare, quoties subjectum deficit, quod imperio sibi devincit, à quo obsequium postulat. Deficiente igitur Rege pacifcente, deficit lex fundamentalis. Ergo non diuturniorem perpetuitatem obtinet, quam personalis Majestas. quod vel una mutatio Reipublicæ satis comprobatur. Non opus est ut evertatur universa civitas: solus habendi modus variatus legem fundamentalem tollit; si limitatus in absolutum vertatur. Non subversum est Daniarum regnum: & nihilominus absoluta regendi ratio, nuper validas leges adstricti gubernaculi salutariter absorpsit. Nunc de fundamento, quod habere dicitur in reali Personalis. Non aliter putant distribui Majestatem, in realem & personalem, quam ut altera innuatur principium actionis & motus civilis. Summi nec aequale esse, nec aliud summum. Regni autem summam realem Majestatem causam existere & fundamentum personali: quæ illius causatum, & velut fundamento superinstructum sit. Sublata causa, reali Majestate, nec personalem, tanquam effectum subsistere. Contra tamen fundamentum superesse, cui aliud quid inadificetur, licet pristina structura diruta sit. Ex quibus illa sequela

quela producitur; *Deum respectu regis, ut ab ipso regno ad fastigium regale subvecti, causam causati esse, & mediam.* Respondemus; *fundamenti* nomen non esse Politicum. In attributis essentialibus & genuinis, propriis utendum est vocabulis. Nihil magis confusionem in disciplinas invehit, quam si in dogmaticis præceptionibus peregrina vocabula usurpentur. Interim sententia quoque falsa est. Inspiciamus ipsam rem. Potestne majestas dari sine Legibus fundamentalibus? Omnis evi monumenta id affirmabunt; & superius adducta satis convincunt negantes. His objecerim illa GRASWINKELII, cap. XI. Diss. de Jur. Maj. *Utrumque hoc ipsum ut per se stet, alterum alterius ope aut conspiratione non indigere.* Hic simul cadit & illud; *principium agendi à reali proficisci Majestate.* Quocunque sensu accipias verba, certum est, principium actionis hic veram causam esse, quæ facultatem agendi præsupponit. Nam omni causæ efficacia tribuenda est, quâ effectum producat, & secundum indolem suam operetur. Nunc inquirendum rursus erat, num Jura Majestatis omnia resideant penes leges fundamentales, & inde in imperantem transfundantur. Num Jurisdictio, num belligerandi facultas ibi delitescat, & post in principe Legum beneficio se exferat. Sonum sine mente reperiēs, & præter verba nullam potestatem. Ubi enim nulla efficax qualitas, ibi nullum datur actionum principium. quare nec principium actionum imperatoriarum ab inerti Majestate reali erit repetendum.

XV. Ex

XV. Excisso talem in modum fundamento, corrui major dignitas & excellentia, quæ legibus fundamentalibus præ Rege, & ipso regno tribuitur. In commune enim asseverant, *illas majores Rege & regno esse*. sine ratione ullâ civili. Supra enim ostendimus; manere supremam potestatem penes regem, quamvis dentur leges regni. Dum enim Princeps reverâ habet Majestatem, nemini alii sublimior facultas affingenda est. Et quomodo major Principis imperio sit lex, quæ imperium nullum continet. Regno quoque potiores esse Leges, aliqui statuunt: cō argumento, *quod ab universâ civitate nequeant immutari*. Quod si attenderent hi tales, quæ antea de utriusque Majestatis æquali origine, fine, imperio scripserant; item quòd ipsum regnum constituat hanc Majestatem: nunquam in hanc diversitatem graduum consensissent. Num enim regnum se ipso majus & inferius erit? Nusquam coheret hæc doctrina. Quid etiam per *regnum* intelligunt? Si civitatem & subditos: præcedentia attributa nunquam vera pronuntiaverim; & loquendi formula non congruet accusationi & subtilitati politicæ. Per regnum enim populum ac multitudinem, Majestati Principis contradistinctam, nullus verus Politicus intellexerit. Ego verò à me nunquam impetrare potui, ut credam, leges fundamentales immutabiles omnino esse, aut Principem transgressorem, violentâ manu, jure posse coërceri ac castigari. Dicunt; *hanc absolute summam potestatem, ipso regno majorem, in fundamentum*

*damentalibus legibus consistere. quæ adeò sacro-
 sanctæ sunt, ut ne quidem ab ipso regno in præ-
 judicium posterorum tolli possint. Pias posterorum
 vindicias esse contra omnes, qui vi, fraude, dolo,
 prædictas leges opprimere conantur. Parricidas
 enim regni esse, quotquot in illas involare atque
 committere ausifuerint. His initiò sunt oppo-
 nenda quæ habet GRASWINKEL, cap. X. diff.
 Proinde nihil intercedit, quò minus ipsum re-
 gni corpus & retinendi & amittendi juris sui
 sit dominum. Cui verò id juris est, quin id aut
 retinere, aut abdicare à se, sive in totum, sive
 pro parte possit, in controversiam vocet nemo. Er-
 go hominibus liberis tam fuit in proclivi, absolu-
 tè se alteri gubernandos regendosque permittere,
 quàm sub conditione: & vice versâ. Potest igitur
 regnum, seu Multitudo, potestatem si quam
 haberet à se abdicare, & vel in totum, vel in
 partem imminutam ad posteros transmittere.
 Aliarum civilium legum naturam non co-
 mitatur immutabilitas. Pro arbitrio impe-
 rantis sanciantur, ex ejusdem sententiâ abro-
 gantur: libertate & auctoritate perpetuâ pe-
 nes latorem manente. Idem de legibus fun-
 damentalibus dicendum est. Nihil absurdi ob-
 stat, quo minus civitas illas leges possit omit-
 tere, & si ita è re communi videatur, Princi-
 pem eligere, nullâ stipulatione adjunctâ. Præ-
 sentium res hîc agitur, non posterorum. Si ci-
 vibus expediat status purus & absolutus, non
 querentur posteri de mutatione. Horum nihil
 interest, olim mutatam esse Rempublicam:
 & bonus civis præsentis reipubl. statu placidus
 acquie-*

acquiescit. Exsecranda est illa violentia, & Deo atque hominibus exosa, quâ tranquillitas semel constitutæ Monarchiæ turbatur. Si quicquam seditiosum fuerit, hoc dogma eam notam merebitur. Tumultus, bella civilia, rerum omnium confusio sequetur, si ea potestas secuturis subditis relinquatur, ut receptam, & constitutam formam civitatis possint convellere. Nulla Respublica sibi quietem habebit polliceri. Et quo jure quæso id efficient posterî? Præsentes non coacti, sed liberrimè, exigunt sponsonem à Principe. Quod liberrimâ totius Reipublicæ voluntate introducitur; quidni possit eadem voluntate dissolvi? Illud intolerabile est, *Principem pœnam dare Majestati reali*. Duplex jus competere subiectis, *leges fundamentales sartas rectas conservandi, & ad implementum sancitorum annitendi*, per istiusmodi vias, quas naturalis sui defendendi ratio commendat. Tyrannum, ipso facto statione sua excidentem, improtectum agere, adversum omnes, regno libertatem vindicare & re asserere nitentes. Hoc est illud signum, quod ad seditiones & parricidia Regum, horrendo & exsecrando conatu, turbatores Rerumpublicarum toties sustulerunt. Recense mihi cædes Principum, & vix unam numerabis, cujus causa vel pretextus non fuerit, populi in Principem simulata potestas. Unde verò illud jus subditis quæritur, ut regni leges sartas rectas conservent, & ad complementum jure jurando sancitorum quacunque viâ, aut vi contendant? Duplex remedium prostat, quò immorigeros

in

in ordinem cogimus, judiciorum auctoritas, & belli imperiosum jus. neutrum subditis concessum est: sed Majestati utrumque proprium; quæ integra penes Regem, qui vel jramento aliquid promissit, dicta est residere. Naturalis sui defendendi licentia, contra Principem quadantenus videtur concedenda: sed cave, offendendi conatum eâ voce includas, & violentiam legitimam in Principem pessimè interpreteris. Nunquam innocens erit, qui sacram Potestatem sacrilegâ manu temeraverit, & contra Rempublicam fecisse dicendus est, qui tam seditioso telo subditum armat. Atrocitatem sceleris non molliunt ficta *tutorum regni, Libertatis nomina; cujus servitus ac ruina vel gravi bello posthaberi debeat.* Hæc ipsa sunt incentiva seditionum, mentita subditorum potestas, & speciosum vocabulum libertatis: quæ florentissimis regnis discordias, tumultus, bella civilia, vastitatem, ruinam accelerarunt. Liceat exprimere indignitatem tumultuantium conclusionum, & inquietas sequelas indignante animo averfari, & feralia scita omnibus calculis damnare. Hæc sunt illa, *quæ obedientiam revellunt, factiones suscitant, seditiones armant: in bella civilia, nec paranda, nec habenda per bonas artes protrudunt. Quæ exesse utique fas esset. at quid exesse dico? quin demergi in horrendas abyssi tenebras; Et cò ablegari, ubi neque nomina, neque facta maledicta Realis Majestatis audiantur.* Ista vix nominanda vocabula seditionum, originem suam non aliò referunt, quàm ad
vastas

vastas illas, & tantis animis agitatae disputationes, de jure summæ potestatis in populo: quæ orbem Christianum non modò exercuere; sed & horrendo parricidiorum, bellorumque civilium, & impiè fusi sanguinis profluvio, dolendum & execrandum in modum toties, totque hinc ab annis inundaverunt. Interest Principum ac Regum, ne sacra Imperii à quibusvis impuris manibus tractentur. Sæpè opinione, etiam impiâ, civilia evertuntur. Majestatis fuerit, coërcere tam absurdarum, & publicè noxiarum opinionum auctores: nec committere, ut profani illi homines divino imperio tam impune illudant. Reverâ enim stimulant plebem in seditionem & civile bellum; dum vanissimi subditorum voluntatem in suum Regem movent, & dextram armant. Has faces & tubas confusionum, si in suo regno deprehendat rex, non mitiori, quam perduellium poenâ afficiet; si in alienâ, & forsan plebejâ civitate delitescant, tanquam reos juris gentium, ad supplicium dedendos jure postulabit. Ut digna severitate obviam eatur machinamentis diaboli, qui talium operâ commodè usus, divinum ordinem, atrocissimâ doctrinâ satagit miscere & conturbare.

C A P U T X I.

D E

SUBJECTO MAJESTATIS.

- I. *Subjectum commune Majestatis negatur.*
- II. *Infantes reges Majestatem habent.*
- III. *Item furiosi.*
- IV. *Fœmina imperium, non est contra jus.*
- V. *De hæretico, & pagano.*



Ultimo loco pauca quædam contemplabimur, quæ Subjectum Majestatis concernunt. Duplex hic disputatio ventilatur: altera de actuali subjecto; altera de his, quibus aptitudo imperandi non videtur adesse, propter imbecillitatem ætatis, sexus, aut alias circumstantias. Quoad actuale subjectum, opus haud est, ut prolixè ostendamus, Imperantes actu, esse subjectum Majestatis. Nam summum, & nemini obnoxium, imperium civile, est ipsa Majestas. penes quos ergo illud deprehenditur, illi subjectum Majestatis dicendi sunt. De populo saltem id disquiremus, num in Monarchiâ etiam, præsentè Rege, aliquo modo subjectum Majestatis dici queat? Actuale Subjectum Majestatis dividit GROTIUS in *Commune & Proprium*. Lib. I. de J. B. & P. cap. III. n. VII. *Subjectum*, inquit, *aliud est commune, aliud proprium: ut visus sub-*

Subjectum commune est corpus, proprium oculus. Ita summa potestatis subjectum commune est civitas, quam perfectum cœtum esse, supra diximus. Hujus rei certum indicium esse potest, quod extincta domo regnatrice, imperium ad quemq; populum seorsim revertitur. Subjectum ergo commune esto civitas: Subjectum proprium, est persona una pluresve, pro cuiusque gentis legibus ac moribus. Repetit eadem Lib. II. c. IX. n. 8. Nam imperium quod in rege, est ut in capite, in populo manet ut in toto, cuius pars est caput: atque adeo rege, si electus est, aut regis familia extincta, jus imperandi ad populum redit, ut supra ostendimus. Quam sententiam redolere videntur illa apud Guntherum, in Oratione ad Proceres Germaniæ:

In manibus vestris regnum est: ea quippe potestas

Ad vos more suo semper viduata recurrit.

Et fundamentum forte habent in illo naturali imperio, quod multitudini, tanquam toti, in sua membra, natura datum esse, fingitur. Quod si Majestatis subjectum civitatem dicerent, ea interpretatione, quatenus Princeps imperium habet, & in civitate constituta reperitur: admitteremus assertionem. Sed quando ille sensus vincit; *Populum potestatem habere, electo regi conferre, hoc extincto eandem recipere, alterique tradere*: nullo planè modo enunciatum probamus. Argumenta quibus doceretur, hoc subjectum esse commune, erant adjicienda. Non supplet defectum illum simile, à naturali quadam potentiâ petitum. Exempla in Politicis

ticis politica , & probationes civiles , non naturales , aut aliæ diversæ similitudines sunt conquirendæ. Illud quoque visus subjectum , non satis accuratâ subtilitate fuit conceptum. Corpus non est Subjectum alicujus facultatis animalis , nisi mediante animâ , quæ habet potentias naturales , & cum his materiam inhabitat. Corpus destituitur qualitatibus , quæ à solâ formâ proveniunt ; & ideo nisi vulgari nimis loquendi formulâ , subjectum non appellabitur. Sicuti forsan eruditionis subjectum aliquis nominaret Musæum , in quo vir eruditus commoratur. Sit interim corpus subjectum visus ; non competet ipsi corpori , nisi intercedente animâ , cui principaliter , ut reliquæ potentiæ , adhæret. Recedente anima extinguatur visus , & neque oculus , neque corpus , subjectum amplius sunt. Jam si Majestatis subjectum simili modo se habet , concludendum est , mortuo Rege , qui erat proprium subjectum Majestatis , interire eandem , & populum privari summo imperio. Sicut cadaver omni qualitate animali destituitur , amissa anima. Non igitur extincta familia regnatrice ad populum revertitur imperium : sed jus eligendi aliquem , & sumendi in regem. Jus vero Electionis non statim arguit præsentiam Majestatis. Naturale illud imperium supra removimus. Inclinatorio ad societatem ineundam , nullam probat potestatem. Et hunc naturalem impetum , vel ordinem , insufficientem esse productioni Majestatis , alibi declaratum est.

II. Quando aptitudinis mentio fit, id disquiritur, *num certa persona ab imperiis excludantur, & quæ illa sint?* In dubium enim vocatur, num ætas infantum, sexus foemineus, item hæresis, aut paganismus, impediunt, vel admittant imperium? De infantibus negativè pronunciant GROTIUS, & HERMANNUS KIRCHNERUS. Ille Lib. I. d. J. B. c. III. n. XI. Tutoribus temporariam Majestatem assignat, dum regni hæres infans est. Hic apertius Lib. I. de Legat. cap. III. n. 48. 49. *Majestatis, & regni jura nondum nactos esse, qui per ætulam nondum intelligunt, quid agant, quidve videant ignorant, quique Reipublica attingere frenos, tanquam altioris Bucephali, nondum possunt, sed ad spem saltem imperii adolescent. Ratio effati illa est; quod summa prudentia requiratur ad exercenda Majestatis jura: quam non admittit tenella ætas, ob judicii defectum.* Verùm quotidiana non tantum experientia; sed prophana simul, & sacra monumenta, sufficienter probant, id fieri potuisse, quia factum novimus. in regnis præsertim successivis; aliquando etiam electivis. Infans, qui jam destinatus hæres est regii solii, non in spem imperii adolescit, sed imperium jam actu complectitur. Non cum ætate & annis accrescit Majestas: momento adest, quo pristinus rex fati concedit, & successor solito jure admittitur. Facultatem igitur, & jus imperandi habet infans; cujus executores & ministri sunt tutores: qui jussu auspicioque Domini, regimini moderantur, propriâ potestate desti-

destituti. Habet hos vicarios, qui necessariâ prudentiâ, & usu instructi, Reipublicę munia exercent. Incommoda per accidens adveniunt. Seditiones perduellium veteranum quoque Principem opprimere solent; nec ideo tamen hic imperium non habuit. Quoties pertractamus imperia, non præcisè utilitatē majorem respicimus. id inquirimus potius, utrum aliquod detur obstaculum morale, seu civile, quod facultatem iniquitatis postulet, aut evertat. Damna sola, & incommoda, jus minimè tollunt. De auspiciis regis infantis, quæ Majestatem præsupponunt, videndus Iustinus, Lib. VII. cap. II.

III. De furioso eadem dicenda sunt; licet enim imperans debeat esse subjectum intelligens; in furioso autem mens sedibus suis mota, nihil reliquum videatur facere rationis: manet tamen ratio quoad actum primum, quam retinet, dum homo fuerit. Quare dicendum est, si casu, aut morbo, in insaniam incidat Princeps, retineri posse antea imperium: nec privandum esse regno; sed adiutore sublevandum. Quod de *Cleomene*, Spartanorum rege, observat *Herodotus*, Lib. VI. De *Nabuchodonosare* Sacræ quidem litteræ testantur; furore correptum, in exilium esse missum. Sed hic speciale supplicium intelligendum est, quod Deus per Daniele, somnii interpretem, jam prædixerat. Ut superbus Rex fontem imperiorum scrutaretur: nec sibi ambitiosè vendicaret, quæ divinitus acceperat. Speciale igitur circa pœnas privilegi-

um,

CAP. XI. DE SUBJECTO MAJESTATIS. 517

um, extra personam non est porrigendum. In reliquis benignior interpretatio locum sibi faciet. Eadem enim causa subest, quæ in infante. Quare, ut huic tutor, seu administrator regni, designatur: ita furioso adjungendus est, qui negotia Reipublicæ procuret. Nisi furor ab incunte ætate affligens hominem, sine intervallo durans, nullam spem relinquat ægritudinis tollendæ. Hoc enim casu aliter pronunciandum est. quod constare haud possit, utrum imperium à Deo huic, perpetuo furioso datum sit: & maxime, num illud amens acceptaverit, an recusaverit. Tunc enim proximo cognato permitti poterit rerum summa; ea conditione ac Lege, ut jurato promittat, se restitutum successionis beneficium, simul ac vitium prolapsæ mentis cessaverit, & ille resipuerit.

IV. Sexui muliebri qui Majestatem dene-
gent, plures sunt. *Quod nullâ efficaciam, nulla
drudentia armata sint: potius in sevitiam, i-
ram, & qualibet vitia propendeant. Unde ju-
dicio divino maledictus dicitur populus, cui in-
fantes & fœmina imperant.* Sed hæc argumen-
ta tanti momenti non sunt, ut fœminam ne-
gent capacem imperii Majestatici. Rationes
istæ particularia exempla pro fundamento ha-
bent. Quibus si ab alterâ parte æquivalens ar-
gumentum opponendum est; plurima coa-
cervari possent earum, quæ dexteritate a-
gendi, & consiliorum solertia, rem strenuissi-
mè egerunt; cum vitia muliebria simul cum
privatâ sorte exuissent. Si viros considere-
mus;

mus, & hos sua exercent vitia: quos propterea non excludimus ab imperio. Scripturæ locum, alium habere sensum, historiæ contextus arguit; & convincit, per *timidos*, aut *imprudentes*, esse interpretandos, qui infantes ibi, & mulieres dicuntur. Imo si maledictus est populus, cui fœminæ imperant: actu imperium exercere possunt fœminæ. Debebant negare non tantum exercitium Majestatis in fœmina; sed ipsa etiam jura, quoad actum primum. & quidem illis exemplis & argumentis, quæ inhabilitatem sexus muliebris demonstrarent. Id majorem difficultatem habet, quomodo retineat Majestatem, si nubat: quod marito in conjugem, divino jure, & solemni formula, potestas permessa sit. Majestas autem superiorem non agnoscat. Habemus plurima exempla Reginarum, quæ matrimonium ineuntes, pactis sibi imperium reservarunt. Quod de Isabella, Ferdinando Arragonum Regi nubente, testatur *Bodinus*, Lib. VI. de Republ. c. V. De *Maria*, Ludovici filia, Sigismundo, Bohæmiæ Regi ac Imperatori, nubente, idem tradunt Scriptores. Hinc mone-tas percussit, hac inscriptione; MARIA REX UNGARIÆ. Indigna hæc & talia videntur, dum maritus uxoris subjicitur imperio. Adducunt alii exempla maritorum, qui ab uxoribus è medio sublati sunt. Hæc ad infamiam sexus virilis pertinere censentur: adeo ut muliebre imperium contra jus naturale, & divinum impingere videatur. Hoc inde probari video; *quod fœmina divino jussu subsit mariti volun-*
tati,

*tati, & divinâ sanctione prohibeatur quicquam
 in civilibus negotiis publicè attingere. Citant
 textum Genes. III. I. ad Cor. II. item I. Cor.
 XIV. ubi jubetur tacere mulier in Ecclesiâ : quia
 turpe sit, in medio conventu loqui, aut concio-
 nari fœminam. An non etiam turpe sit, mulie-
 rem dominari in medio foro, volare per rostra, per
 castra? Magnâ regii muneris partem in constitu-
 endis Episcopis consumi. quâ curâ abstinere
 debet secundum Apostolum. Adducunt locum
 I. Tim. II. 13. qui uxorem non patitur regna-
 re, cum Adam factus sit ante Evam, & Eva
 facilitate irrepserit peccatum. quo facit I. Cor.
 XI. Mulierem factam esse propter virum, non
 virum propter mulierem : & proinde velamen
 crinium ex justitiâ Natura decere mulierem, in
 signum subjectionis : viro autem casariam tur-
 pem esse, quod caput sit mulieris, liberum, nulli-
 us imperio subjectum. Iam non solum honestum
 esse, ut maritatus uxores alant crines, sed etiam
 ut virgines & viduæ. Ergo eas dominari non con-
 venire, sed esse subjectas, quoniam subjectionem
 inde evincat Apostolus, quod naturalis honestas
 prohibeat sexum femineum caput radere. Cui-
 cunq; autem nefas est caput tondere illi nefas esse
 dominari. At non solis uxoribus, sed & innuptis,
 & virginibus, nefas esse crines demetere. Pro-
 inde nulli sexus fœminei ordini in liberos vi-
 ros natura competere dominium. Ex his ta-
 men nondum convincitur, contra jus natu-
 rale fœminæ dominatum esse : licet largia-
 mur, eundem fœminæ natura in viros non
 competere. Nec fœminæ, nec viro à natura,
 aut*

aut jure naturali competit imperium: quod supra vidimus. Prioritas temporis nullam potestatem evincit: alias bruta, & inanima subiectum habuissent Adamum. Adami quoque facilitate peccatum admissum fuit, non minus ac Evæ. Pœna, tum dictata, non ex natura peccati; sed judicis arbitrio variabat. Et eadem opera potuisset Deus Adamum Evæ subicere, qua hanc illi subjecerat: nihil contra sanctitatem suam, & jus naturale, admissurus. Facta est mulier propter virum: sed huic in auxilium, non servitium. Ad jus naturale *Paulus* nos minimè deducit. Nam probabilibus argumentis utitur inibi Apostolus, non moralibus & necessariis. Et *Natura* vocabulum, optimi quique interpretum per Consuetudinem explicant: quasi Paulina ætate, moribus gentis Judaicæ introductum fuerit, ut viri comam raderent, non alerent: licet natura de re, minimè morali, nihil sanciat. Observat alibi *Grotius*, ab auctoribus utriusque linguæ, *naturam*, & *naturaliter*, pro solito accipi. Quo sensu explicat illud *Pomponii*, in pretio venditionis & emptionis *naturaliter* licere se mutuo circumvenire. *Naturaliter* autem eo in loco, ut & alibi interdum, positum est pro eo quod recepti passim moris est, quomodo apud Apostolum ipsa natura docere dicitur, viro turpe esse comam alere, cum tamen id neque repugnet naturæ, & multos apud populos usitatum sit, lib. II. de J. B. & P. cap. XII. n. xxvi. ubi pluribus exemplis id docet. Formulæ cadet, quicunque fortioribus probationum ponderibus non sustinuerit

nuerit sententiam. Id negant sacrae litterae, quod nefas sit illi dominari, cui nefas est tondere caput. Nam contrarium in Simsone licet observare, qui regimen Israëliticum tenuit; & huic nefas tamen erat, capillos recidere. Ex praescripto Angeli, praedicentis nativitatem Simsonis, & vitae degendae normam, monebantur parentes, ne capiti ejus admoveretur novacula, quod Neziræus Dei futurus esset, Cæsaries signum, non ingenuitatis modo, sed regni quoque, apud gentes alias observatur. Itaque solis regibus, aut regali sanguine oriundis, aliquando permissum fuit, gestare cæsariem. Quod de Francis memorat JOANNES TILIUS, de Rebus Gallicis. Et hodiè tantum abest, ut, qui habet cæsariem, eam raddat, ut potius qui alere nequit, fictitio capillamento æmuletur. Tunc forsan temporis apud Judæos indecorum fuit alere comam, nobis inhonestas nulla videtur subesse. Nulli foeminarum competere imperium, satis redarguitur, concessa servitute. Nam servus utique vir est, & huic posse praesidere foeminam, largiuntur omnes. Multò magis imperabit civiliter: quod genus regiminis mollius est herili. Si non potest imperare femina, nec servis imperabit: si servis imperat, imperii in virum capax est. Tacere jubet Apostolus foeminam in concione; pro captu temporis, & circumstantiis seculi. Jam constituti erant Episcopi, Diaconi, & Doctores verbi: ut opus non esset ministerio muliebri. Docuisse foeminas, satis ostendunt Prophetissæ:

& sola Hanna, quæ Christum in templo prædicabat. Ipsi imperantes rarò obeunt munia sacra, imò hodiè nunquam: regnant interim. Sequela igitur non satis firma videtur, à sacris ad imperium concludens. Vocabit Episcopos Princeps, & ordinabit omnia sacra, licet ipse clericus haud sit. Simili modo ut regat eadem fœmina, nihil obstat. Jus divinum itaque non læditur fœmineo imperio: cum huic maximè faveat. Nam à Deo Majestas quoque repetenda est in muliebri imperio. *Evertitur interim Maritalis Potestas.* Ita est. Sed hîc applicanda sunt, quæ alibi dicta fuerunt; Majestatem eminentissimo quodam modò continere omnes potestates inferiores. ea efficacia, ut easdem ad se trahat, & pristinis possessoribus subtrahat. Inde est, quod servitutum jura, olim in Republica Romana antiqua satis severa, sub Justiniano, & aliis imperatoribus, angustioribus carceribus fuere inclusa; hodieque penitus inter Christianos abrogata sunt. Maritale jus nunquam ferè in Rebus publicis integritatem suam retinuit: potestate in caput Majestati asserta. adeò ut maritus ne dominus quidem manserit perpetuò rerum dotalium apud Romanos, Germanosque. Quemadmodum Patria potestas à Principibus imminuta fuit. Tenue obsequium, & in filiis, & in uxore hodie superest, dum jussa mariti & parentis reverenter quidem suscipiunt; pristinae autem potestati amplius non subjacent. Absorbet enim potestates inferiores Majestas. Jam olim in Republica Rom. excogitati modi, quibus reliquæ

liquiæ patriæ potestatis penitus tollerentur : & non ignorata via fuit, quæ conjugem potestati viri non permetteret, nisi conveniret in manum. Nam quæ usu habebatur uxor, in patris manebat potestate, aut eò defuncto, liberi juris evadebat, & manebat : modò per trinoctium iret usurpatum, ne usucaperetur à marito, si absentia sua usucapionem non interrupisset. Et hæc tamen jus divinum non interrompebant: quòd Deus nemini Jus irrevocabile dederit ; & expirent ipso facto patriæ & maritales potestates, ubi universi unius imperio à Deo subjiciuntur. Nihil quicquam interest, cui subjecto adhæreat Majestas : cum potestas ubique eadem sit, æqualis facultatis & efficaciæ. Ut olim ergo, hodieque Imperatorum Majestas, maritalem facultatem extinguere potuit : ita eandem similiter ad se trahit muliebris Majestas, ex indole propriâ summi imperii. De indignitate ejusmodi matrimonii viderit ille, qui tales nuptias ambit. Quam tolerabile videtur jugum, auscultare dominam, cui omnes serviunt. Non obligatur ad indignius obsequium reginæ maritus, præ reliquis : cum omnes viri in hac Gynæcocratia fœminæ parere habeant necessum.

V. Secundum alias circumstantias negant, in Regem sumi posse hæreticum, aut infidelem. Ita vulgò ex jure divino, quò constitutum erat, ne alius in Regem Israëliticum legeretur, quàm qui de gente & sanguine esset ; concludunt : quod Jure divino & Naturali in Regem nequeat eligi, qui Christianus non est.

Sequi per multa absurda communiter, & ideo per Moſen dixiſſe Deum; Eum conſtitues (ſcilicet regem) quem dominus Deus tuus elegerit de numero fratrum tuorum. Non poteris alterius gentis hominem regem facere, qui non ſit frater tuus. Fratrem eo loco Deus appellare eum, qui ejuſdem eſt Religionis. Quod univerſaliter pronunciatum concedi haud poteſt: cum maximam orbis terrarum partem, non Chriſtianus aliquis Princeps, ſed vel hæreticus, vel paganus regat. Jure divino Gentilibus quoque conceditur Majeſtas: unde Pilato permiſſam poteſtatem Salvator ipſe aſſerit. In Moſaicæ Reipublicæ conſtitutione certum eſt excludi ſolio Ethnicos: ſed à ſolio Judaico. Speciale enim ſcitum erat hujus civitatis; ad univerſalem aſſertionem non extendendum. Sicut Germani extraneum non eligunt Imperatorem: nihil tamen obſtat, quò minus apud alios in Principem ſumatur peregrinus. Non regnat aliquis propter religionem; ſed propter imperium: quod cum illâ nihil habet commune, ſed cum, & ſine illâ, conſiſtit.

C A P U T . XII.

D E

S U B D I T I S.

- I. *Peregrini & Incola.*
 II. *Fidelitas ſubditi.*

III. Ob-

III. *Obsequium debetur Majestati in omnibus.*

IV. *Etiā Tyranno,*

V. *In præceptis dubiis.*

VI. *Sed ut in praxi deponatur dubium.*

VII. *Impiis mandatis non obtemperandum.*

VIII. *Subditus judicium non habet civile.*

IX. *Bene tamen in naturalia præcepta.*

X. *Contra tyrannum nequit insurgere.*

XI. *Defensio permittitur in ministros.*

XII. *Non obstante martyrum exemplo.*

XIII. *Causa Obsequii.*



Rimam partem Reipublicę Monarchicę contemplati sumus, Majestatem : ordine nunc considerabimus subditos, & quod hos decet, Obsequium. Hoc enim ex opposita parte respondet summo Imperio Majestatico. Non considerabimus hic varia subditorũ genera, quę auctoribus vulgo tractantur ; quatenus *Ecclesiastici alii*, alii *Seculares* : alii *Nobiles*, alii *Plebei* ; item quod hi *agricolę*, illi *mercatores*, isti *milites* sint : hæc enim discrimina non sunt præcipuum illud quod hic quærimus. Indagandum est, quantum sit obsequium, quod Majestati debet subditus. Hoc ipsum ut assequamur, separandi initio sunt temporarii subditi, à veris & perpetuis. Temporarii subditi, qui improprie, & secundum quid subditi vocantur, sunt *Peregrini* & *Incolę*. *Peregrini* hospites sunt, versantes in aliena republica, cujus nec pars sunt, & in qua domicilium stabile non habent. *In-*

colæ propius accedunt subditis, & domicilium habent, & utuntur plerisque commoditatibus Reipublicæ, & propterea quoque munia civilia subeunt, licet singulis oneribus non subjiciantur. Peregrinorum obedientiam non extendimus ad alia, quam consuetudinis observantiam, quæ hospites publicis conformat moribus & institutis regionis, ne his contraveniant; sed loci observent leges, si quid agere instituant. Iniquum enim foret, alienæ Reipublicæ sanctiones temerario ausu violare, & subditos alterius in patriâ sede offendere. Ad operas personales ordinario jure non tenentur, nec realia onera. Vectigalia non solvunt, quatenus peregrini sunt; nam & cives pendunt eadem: sed quod mercaturam exercent, merces inportant exportantque; iisdemque emendis ac vendendis rem faciunt. Quamquam vero Reipublicæ in reliquis non obstricti sunt peregrini, dantur casus tamen, quibus subjacent nihilominus Jurisdictioni, quoties vel ex ære alieno, vel crimine aliquo publico, hospitem sententiæ subjiuntur. Non est insolitum eos pignorationibus, quæ barbarè *Arresta* & *Repressalia* dicuntur, coercere, quoties tale quid securitatis causa postulat: quale remedium apud Romanos *Clavigatio*, apud alios aliter vocatum; dum jus eratprehendendi, & abducendi hominis, & in vinculis captum habendi, donec æs persolveretur. *Ius limitum* Gallis dici, quod in limitibus potissimum exerceatur, & eo utamur ad injurias vindicandas, ab alieni generis nobis illatas, alii tradunt. Solent
etiam

etiam pœnis capitalibus affici. Quod crimen delinquentem subjiciat tribunali imperantis, in cujus territorio contra societatem civilem aliquid admissum est. Quod antenus enim concedit transiens in potestatem hospitis: contra cujus instituta ubi aliquid designaverit, jam hostili suo facto se alteri tradidit. Ita observamus, necessitatis extremæ articulo, bona peregrina, sub titulo mutui, eripi possessoribus: quod hactenus subditi quodammodo sint, dum in territorio Principis reperiuntur. Incolæ vero quoad obsequia majori obligatione obtemperant; & exiguo discrimine à veris subditis separantur. Incolunt suum domicilium non secus ac alii cives, & ipsâ publicâ protectione ac securitate cum aliis fruuntur; reliquas tandem utilitates, vitæ degendæ commodas, percipiunt. Eadem ratione operas suas publico commodant, & munera civilia minimè possunt detrectare: sua quoque in publicum contribuunt. Et differunt aliquando à civibus, non tam quod majori onere, cui cives subducuntur, graventur; quam careant immunitatibus, quibus iidem gaudent, in primis in Repub. liberâ.

II. Sed mittamus in præsentia temporarios illos & partiales subditos; & consideremus potius, quid de veris & propriè dictis sentiendum: qui in verâ relatione ad Majestatem id nomen gerunt, & alteram partem Reipub. constitutivam absolvunt. Horum obsequium ex certioribus fundamentis, & indubitatis principiis deduci potest: nec opus habemus illud

illud ad particulares, voluntarias & mutabiles civitatum singularum consuetudines extendere. Ejusmodi verus subditus est, qui secundum omnes potestates summi imperii debet obsequium. quo nomine & obedientiam quoad imperata, & fidelitatem comprehendimus. Ex hujus præscripto utilitatem & incrementum Domini totiusque Reipublicæ, quantum quidem in manu suâ positum habet, promoverestudet: omnia incommoda, quæ in perniciem civitatis expetere possunt, pro virili declinat. Quod si enim contra datam imperanti fidem aliquid sustineat designare; damnosa consilia vel non detegat, vel ineat ipse: reus Majestatis est, & eo crimine damnandus. Quam infamem notam ut effugiat, tentanda omnia, toleranda omnia, & hostium ingruentium imperus constanti fortitudine depellendi sunt. In obsidionibus potissimum castrorum, ubi vel ultima audenda patiendaque sunt, ut fidem, Principi debitam, inviolatam præstemus. Postulatur illa fides non tantum ubi resistendum hosti est: sed illibata manere debet, quando jam occupati sunt ab injusto invasore subditi. Adversus hunc quomodo se gerere debeant, definitur, ubi de occupatione agitur. Domino suo id debebunt, ne eundem deserant, sed emigrent potius evocati, etiam cum jacturâ facultatum. ne manifestam violentiam sua ope instruant. Ut idem vero cum præsentissimo vitæ periculo tentent, non videtur temerè affirmandum: nisi expressissimè id à Principe legitimo præcipiatur, & hac via salutis ejus

COR-

consuli queat. Nam si frustranea foret illa audacia, & ad Dominum nullum rediret emolumentum; temerarius meritò judicaretur conatus, qui vitam periculo non necessario exponeret. Ad tam atrocia obsequia fidem subditorum non obligamus, ut arbitremur, mandari posse violentas manus, præcipationes, & ejusmodi horrendas mortes, ne in hostium potestatem veniant. Id præcipi subditis potuit ut fortiter pugnent pro communi salute, & malint occumbere, quàm turpi & noxia fuga tutelam Reipub. prodere: ut ipsi occisoris occupent munus, imperari haud decet. Exsecranda est eorum fidelitas, qui classibus aut castris præfecti, antequam in potestatem hostis se redigi patiantur; vel ex præscripto superioris, & iniquè ad hoc præstito juramento; vel ex nescio qua, temeritatis & vanæ gloriæ cupidine, tormentario pulveri lacerandos se permittunt. Ad id obligabitur miles, ut quamdiu aliquis spiritus membris ineret, adversario restet, & pro domini utilitate ponat pugnacem animam. Ut secum ipse componatur, & hostiles inferas proprio corpori manus; id nulla fides excusabit, & ab omni humanitate accusabitur monstrosum obsequium.

III. Sed properemus ad Obsequium, quod manifestis jussis debetur: & videamus quousque illud extendendum. Nos ad omnia mandata porrigimus. Sed ea *omnia*, secundum substratam relationis materiam veniunt interpretanda. Scilicet obsequium constituit naturam subditi, qui respicit imperantem, Majestate instru-

instructum. Huic omnia subjacere, quæ in civitate sunt, in præcedentibus expositum est: his omnibus obnoxii, vi consequentiæ, sunt subditi. Imperantibus non aliter adhæret Majestas, quàm ut in subditos se exferat illa vis, à parentibus reverenter suscipienda. Vanum esset omne imperii nomen, nisi ex sua indole importaret obsequium in adversâ parte. Jam ipsa Majestatis natura in eo dicitur consistere; ut summa sit in civitate, & ubique, hoc est, per omnia valeat. quare necessario concludimus, omnibus istis juribus, & ubique, obligari subditum. Ut cogi possit, imperio in personam, dominio in res, directioni universæ civitatis, secundum explicata jura, debet obtemperare. Atq; posita hac explicatione, ulterior nulla dubitandi vel causæ, vel ratio subest. Honestæ sunt, licita sunt ista omnia: nec periculum inde obedientibus timeri potest. Principi potestas in omnia jure vicario competit; exerceri solito Dei optimi maximi nomine: qui sicut nihil decernit, nisi quod justum ac bonum est; ita ejus officialis aliter hand poterit agere. Hinc auctores, qui in Principe potentiam, divinæ æqualem, cœlitus communicatam, agnoscunt; imaginem Dei simul deprehendunt, cujus vim in virtutibus positam esse affirmant. unde jussiones Majestatis, illuc respicientes, nullum præjudicium pietati, vel justitiæ facient. Quod ille divinitatis character, in Majestate deprehensus, ex potentia simul, & justitiâ componatur. Rectè igitur subditi atque ex ordine faciunt, quoties constitutum Principem,

ciuem, non aliter quam Dei Vicarium suspiciunt: rati, non homini præstari tum honorem & reverentiam, tum obsequii promptitudinem; sed ipsi, qui præfecit Regem, Deo. Necessitas enim parendi Deo, quum imposita cuilibet ex lege creationis sit; non detrectabit imperium divinum quisquam, ubi Creator præceperit in Principe sibi honorem exhibendū.

IV. Interim non optimus semper contingit populo rex, sed pessimi quique non rarò id fastigium tenent. Potissimum quando hæreditario jure conceditur successio: ubi accipiendus ac retinendus est, quem nascendi fors prætulit aliis. Et quamvis Electionis major sit libertas, quæ dispicere quaquaversum potest, ut sumatur optimus: fallitur nihilominus humana solertia, quæ fucata discernere à veris non semper novit. Adhæc varium ac mobile Principum non infrequenter ingenium est, ut non exsequantur strenuè, egregiè quæ cœperant. Immissi in hunc regnandi campum, initio ostentant, aut simulant virtutem: progressi aliquousque desciscunt ab eadem, & non gradu, sed præcipiti cursu, ad vitia quidam procurunt. Quod si hæc talia veniant usu, & antè habitam, vel fictam bonitatem exuat animo rex, sordidisque moribus inquinet divinum characterem: num subditi obsequium ipsi præstare tenebuntur, perinde ac bono Principi? Poterat dubium incidere de obligatione obedientiæ. Propterea scilicet subjiuntur homines potestatibus, quia divinum id officium est, & qui eo fungitur, Dei vices subit in regendâ civitate.

vitate. Sed cum pessimus præest, & vitiis inquinatissimus, tantum abest, ut gerat personam Dei Optimi Max. vicariam, ut Deo potius suis sceleribus infestus immineat. Quare soluti videbantur subditi obedientiâ, debitâ Deo & ejus ministris, non perjuris hostibus. Si consulamus Græcos, & Romæ liberæ Scriptores, reperiemus, non tantum negari obsequia, sed strui insidias, deturbari Reges, machinari cædes, decerni præmia Tyrannicidis. Tyrannum occidere, ex omnibus præclaris factis pulcherrimum existimat populus Romanus, si TULLIO credimus. III. off. Et sunt, qui virtutem Regis, inter condiciones ponunt, ut subditi pareant. Turpitudinis quidem notam non effugient reges, qui exemplorum vi & efficacia inculcare debent virtutes parentium animis; si primi deserant pietatem, & vitia in Rempub. introducant: cæterum non fas erit subditis, pristinam obedientiam negare. Quod ejusmodi impium Regem supremus Dominus ferat, & in veteri loco positum relinquat. Sive indulgentia solitâ & coniventiâ, ut redeat ad frugem; sive imperscrutabili quadam providentiæ lege, ut subjectum cœtum, qui proculdubio affinis culpæ erat, imperantis improbitate atque sævitiâ moneat atque castiger. Quamvis igitur Deo adversus sit tyrannus quoad vitia; refert tamen adhuc Eundem imperii potestate, cui obsequium juste negari haud poterit. Quamdiu regale fastigium tenet, venerabundâ subjectione dictis & imperatis ei audientes sunt cives. Propter

pter evidentissimam obligationis consequentiam. Nec mutanda obedientiae religio, quando iniquum aliquid postulaverit. Separanda tamen, ad evitandam confusionem, iniquitas actionis, ab injuriâ, qua patiens afficitur. Nimirum quoties requirimus obedientiam circa postulata iniqua, intelligimus iniquitatem imperantis, non malitiam subditi. Quando ex mala libidine, & nocendi animo, aliquid imponit subdito, quod ejus personam, aut fortunas aggravat, parendum tamen est jubenti. Non tam quod ingens imperium in personam, & maximum dominium in bona habeat imperans: multo minus quod subdito non possit injuriam facere Princeps; sed quod actionem palam tyrannicam, teneatur ille recipere, cum passionem saltem infligat parenti, nullum morale malum imprimat.

V. Haftenus igitur debet tyranno obsequium subditus, dum patientis rationem subit: ne detrectet, quicquid injungitur. At aliter se res habet, ubi agere malè jubetur, & præcipitur crimen perpetrandum. Distinguendum tamen hîc est, num apertum sit scelus & manifestum, quod perpetrandum est; an apparens, quod dubium vocamus, de quo prius. Nimirum occurrunt actiones, quarum bonitatem non semper ex communissimis principiis Juris Naturalis deprehendere potest subditus: sed educendæ sunt conclusiones ad definiendam qualitatem *actionum*; ea subtilitate, ut se expedire nesciat dubius animus. *Dubium* enim vocamus, quando intellectus subditi nihil de-

ter-

terminare audet, circa honestatem, vel malitiam actionis; sed heret: quia conjecturas æquales invenit, quæ ex una parte ostendunt bonitatem, ex altera turpitudinem actionis arguunt. Quomodo hîc se comparabit subditus. obsecundabit imperanti, propter argumenta, quæ permissum esse mandatum evincunt? an resistet non obtemperando, ob probabilem actus præcepti malitiam? Sunt qui ea conditione rerum, negari posse obsequium affirmant. Ita CICERO, l. off. *Bene præcipiunt, qui vetant quicquam agere, quod dubites æquum sit, an iniquum. Æquitas enim lucet ipsa per se: dubitatio autem cogitationem significat injuria.* Quando varietas opinionum est, immediate circa obligationem obediendi, certum est FRANCISCO de OVIEDO, posse subditum licite non obedire, ex probabili opinione, asserente, eum non adstringi obligatione obediendi, Tr. V. Cont. IIII. Punct. V. n. 54. Argumenti loco id ponitur, *quod inter duas opiniones probabiles, immediate tendentes circa praxin, quilibet potest gratiorem sibi eligere.* Alii subditum absolvunt obsequio, tali collectione: *Non teneri propterea, quia probabiliter opinatur, illicitum esse, quod præcipitur. Ad res autem illicitas non tenetur. Tandem, quia opinione probabili, dictante tributum esse injustum, subditus non tenetur illud solvere, etiamsi Princeps probabiliter judicet esse justum; universaliter concludunt, nec in reliquis obligari subditum.* GROTIUS in materia applicata, de bello dubio, auctor est subdito, ut quiescat.

Quod

Quod dubitans contemplative, debeat iudicio activo eligere partem tutiorem. Est autem pars tutior, abstinere bello. Neque obstat, quod ex altera parte periculum est inobedientia. Nam cum utrumque incertum sit (nam si injustum est bellum, jam in ejus vitiatione nihil est inobedientia) caret peccato, quod ex duobus minus est. Inobedientia autem in ejusmodi rebus suapte natura minus malum est, quam homicidium, praesertim multorum innocentum. Sed hae rationes non eximunt subditum ab imperio mandantis dubia. Quod in genere dicitur, omitendum esse actum, de cujus bonitate dubitamus, & gratiorem partem eligendam: id valebit, ubi proprio consilio, & libera electione suscipitur actio. In his enim probabilibus opinionibus, eam quisque proprio ductu eligeret, quae commodissima apparebit. Verum hic agimus de solitaria & libera hominis operatione, quam sponte vel suscipere, vel omittere potest agens. Superioris imperium nunc actionem determinat, ubi non licet partem, quae magis arripet, sumere. alias nunquam obedientiam praestaret subditus. quod acceptior possit esse inobedientia, & otium praeferrī molestae negotiorum gestionī. Quare in nostra materia non admittendum est illud axioma, nisi precarium velimus asserere omne imperium. Probabiliter illicitum, est etiam probabiliter licitum: ad quod perficiendum, cogi potest imperio mandantis. Tantum abest, ut subditus tributum possit negare Principi, ut nequidem eidem competat cognitio de tributi aequitate: cum
hac

hæc sit rei civilis judicium, quod in subditi personam non cadit. Quod illud Grotii concernit, *in iudicio practico tutiorem partem esse eligendam*; plures sunt, qui consilii, non præcepti dictamen agnoscunt. Et hi prolixè demonstrant, citra omnem peccati speciem; licitum esse, sequi partem minus tutam. Quod in moralibus sufficiat, sequi bonum ac tutum, quale est probabiliter licitum; non sit necesse, optimum semper eligere. Sed demus illud principium, sequendam esse partem tutissimam: dicemus, illum tutissimam partem eligere, qui obsequium præstat in re dubia. Si caret peccato, quod ex duobus minus est, cum utrumque sit incertum; multo magis rectè operabitur, qui certum incerto præfert. & contra, pessima erit electio, quæ certæ honestati incertum dubiumque peccatum anteponet. Certum est, debere subditum obsequium: rem illicitam esse, incertum est: tutissimam igitur partem observabit, certum observando & præstando obsequium. Secus propter suspicionem vanam, & incerti fugam, in præsentissimum crimen inobedientiæ incideret. Inobedientiam esse minus malum, quam homicidium multorum innocentium, certum est: & hoc posterius ne quidem in bello justissimo licet. Sed extrema hic non erant conjungenda. Propterea non scribitur miles, ut innocentum cædibus omnia foedet: sed ut reprimat hostem, qui nocens credi potest. Egreditur igitur exemplum controversiæ statum: de dubio nobis disquisitio; at homicidium innocentis homi-

nis manifestam detestationem postulat. In reliquis obedientia semper majus malum erit, executione præcepti, quod omni suspitione liberum non est. Ut illud obiter moneam, contra principia moralitatis dici; *carere peccato, quod ex duobus minus est.* minor aliquis gradus non tollit naturam peccati, quod nec perpetrandum est, licet sit minimum. Ubi duo mala sunt, utrumque vitandum, neutrum sub prætextu parvitatis eligendum est.

VI. Mihi difficultas maxima videtur in eo latere, *quod dubio ipsum illicitum includatur.* Ostendunt enim Moraliū interpretes, operationem malam esse, quæ non procedit à determinato judicio intellectus, & certa conscientia, licitum esse, quod hic & nunc agitur, vel omittitur. Omne dubium practicum comprehendit eam vacillationem judicii, non eligentis actionem ob certam bonitatem. Necessarium omnino est, ut actus humanus rectitudinem & honestatem à prudentia æstimatam, supponat: quæ consistit in firmo judicio, decidente, quid hic, & hoc tempore, his, aliisve circumstantiis rectè fiat, aut non fiat. Id ubi abest, actio recta dici haud potest. Et facile probatur, ejusmodi incertum actorem, jam parvi æstimare, licet contra justitiam aliquid designet. Quare Sacræ litteræ tanquam peccatum damnant, quicquid *non ex fide*, hoc est, certa scientia & fiducia, rectum esse quod agitur, procedit. Indubitarum est, ad bonam actionem requiri judicium, definiens rectitudinem operationis: quæ regula debet esse firma & con-

Sequi permulta absurda communiter, & ideo per Moſen dixiſſe Deum; Eum conſtitues (ſcilicet regem) quem dominus Deus tuus elegerit de numero fratrum tuorum. Non poteris alterius gentis hominem regem facere, qui non ſit frater tuus. Fratrem eo loco Deus appellare eum, qui ejuſdem eſt Religionis. Quod univerſaliter pronunciatum concedi haud poteſt: cum maximam orbis terrarum partem, non Chriſtianus aliquis Princeps, ſed vel hæreticus, vel paganus regat. Jure divino Gentilibus quoque conceditur Majeſtas: unde Pilato permiſſam poteſtatem Salvator ipſe aſſerit. In Moſaica Reipublicæ conſtitutione certum eſt excludi ſolio Ethnicos: ſed à ſolio Judaico. Speciale enim ſciturum erat hujus civitatis; ad univerſalem aſſertionem non extendendum. Sicut Germani extraneum non eligunt Imperatorem: nihil tamen obſtat, quo minus apud alios in Principem ſumatur peregrinus. Non regnat aliquis propter religionem; ſed propter imperium: quod cum illâ nihil habet commune, ſed cum, & ſine illâ, conſiſtit.

C A P U T . . . X I I .

D E

S U B D I T I S .

I. *Peregrini & Incola.*

II. *Fidelitas ſubditi.*

III. *Ob-*

III. *Obsequium debetur Majestati in omnibus.*

IV. *Etiā Tyranno,*

V. *In præceptis dubiis.*

VI. *Sed ut in praxi deponatur dubium.*

VII. *Impiis mandatis non obtemperandum.*

VIII. *Subditus judicium non habet civile.*

IX. *Bene tamen in naturalia præcepta.*

X. *Contra tyrannum nequit insurgere.*

XI. *Defensio permittitur in ministros.*

XII. *Non obstante martyrum exemplo.*

XIII. *Causa Obsequii.*



Rimam partem Reipublicę Monarchicę contemplati sumus. Majestatem : ordine nunc considerabimus subditos , & quod hos decet , Obsequium. Hoc enim ex opposita parte respondet summo Imperio Majestatico. Non considerabimus hic varia subditorū genera, quę auctoribus vulgo tractantur ; quatenus *Ecclesiastici alii*, alii *Seculares* : alii *Nobiles*, alii *Plebei* ; item quod hi *agricolę*, illi *mercatores*, isti *milites* sint : hæc enim discrimina non sunt præcipuum illud quod hic quærimus. Indagandum est, quantum sit obsequium, quod Majestati debet subditus. Hoc ipsum ut assequamur, separandi initio sunt temporarii subditi, a veris & perpetuis. Temporarii subditi, qui improprie, & secundum quid subditi vocantur, sunt *Peregrini* & *Incolę*. *Peregrini* hospites sunt, versantes in aliena republica, cujus nec pars sunt, & in qua domicilium stabile non habent. *In-*

colæ propius accedunt subditis, & domicilium habent, & utuntur plerisque commoditatibus Reipublicæ, & propterea quoque munia civilia subeunt, licet singulis oneribus non subjiciantur. Peregrinorum obedientiam non extendimus ad alia, quam consuetudinis observantiam, quæ hospites publicis conformat moribus & institutis regionis, ne his contraveniant; sed loci observent leges, si quid agere instituant. Iniquum enim foret, alienæ Reipublicæ sanctiones temerario ausu violare, & subditos alterius in patriâ sede offendere. Ad operas personales ordinario jure non tenentur, nec realia onera. Vectigalia non solvunt, quatenus peregrini sunt; nam & cives pendunt eadem: sed quod mercaturam exercent, merces important exportantque; iisdemque emendis ac vendendis rem faciunt. Quamquam vero Reipublicæ in reliquis non obstricti sunt peregrini, dantur casus tamen, quibus subjacent nihilominus Jurisdictioni, quoties vel ex ære alieno, vel crimine aliquo publico, hospitem sententiæ subjiuntur. Non est insolitum eos pignorationibus, quæ barbarè *Arresta* & *Repressalia* dicuntur, coercere, quoties tale quid securitatis causa postulat: quale remedium apud Romanos *Clavigatio*, apud alios aliter vocatum; dum jus eratprehendendi, & abducendi hominis, & in vinculis captum habendi, donec æs persolveretur. *Ius limitum* Gallis dici, quod in limitibus potissimum exerceatur, & eo utamur ad injurias vindicandas, ab alieni generis nobis illatas, alii tradunt. Solent etiam

etiam pœnis capitalibus affici. Quod crimen delinquentem subjiciat tribunali imperantis, in cujus territorio contra societatem civilem aliquid admissum est. Quoad tenus enim concedit transiens in potestatem hospitis: contra cujus instituta ubi aliquid designaverit, jam hostili suo facto se alteri tradidit. Ita observamus, necessitatis extremæ articulo, bona peregrina, sub titulo mutui, eripi possessori- bus: quod hætenus subditi quodammodo sint, dum in territorio Principis reperiuntur. Incolæ vero quoad obsequia majori obligatione obtemperant; & exiguo discrimine à veris subditis separantur. Incolunt suum domicilium non secus ac alii cives, & ipsâ publicâ protectione ac securitate cum aliis fruuntur; reliquas tandem utilitates, vitæ degendæ commodas, percipiunt. Eadem ratione operas suas publico commodant, & munera civilia minimè possunt detrectare: sua quoque in publicum contribuunt. Et differunt aliquando à civibus, non tam quod majori onere, cui cives subducuntur, graventur; quam careant immunitatibus, quibus iidem gaudent, in primis in Repub. liberâ.

II. Sed mittamus in præsentia temporarios illos & partiales subditos; & consideremus potius, quid de veris & propriè dictis sentiendum: qui in verâ relatione ad Majestatem id nomen gerunt, & alteram partem Reipub. constitutivam absolvunt. Horum obsequium ex certioribus fundamentis, & indubitatis principiis deduci potest: nec opus habemus illud

illud ad particulares, voluntarias & mutabiles civitatum singularum consuetudines extendere. Ejusmodi verus subditus est, qui secundum omnes potestates summi imperii debet obsequium. quo nomine & obedientiam quo ad imperata, & fidelitatem comprehendimus. Ex hujus præscripto utilitatem & incrementum Domini totiusque Reipublicæ, quantum quidem in manu suâ positum habet, promovere studet: omnia incommoda, quæ in perniciem civitatis expetere possunt, pro virili declinat. Quod si enim contra datam imperanti fidem aliquid sustineat designare; damnosa consilia vel non detegat, vel ineat ipse: reus Majestatis est, & co- crimine damnandus. Quam infamem notam ut effugiat, tentanda omnia, toleranda omnia, & hostium ingruentium impetus constanti fortitudine depellendi sunt. In obsidionibus potissimum castrorum, ubi vel ultima audenda patiendaque sunt, ut fidem, Principi debitam, inviolatam præstemus. Postulatur illa fides non tantum ubi resistendum hosti est: sed illibata manere debet, quando jam occupati sunt ab injusto invasore subditi. Adversus hunc quomodo se gerere debeant, definitur, ubi de occupatione agitur. Domino suo id debebunt, ne eundem deserant, sed emigrent potius evocati, etiam cum jacturâ facultatum. ne manifestam violentiam sua ope instruant. Ut idem vero cum præsentissimo vitæ periculo tentent, non videtur temerè affirmandum: nisi expressissimè id à Principe legitimo præcipiatur, & hac via salutis ejus

CON-

consuli queat. Nam si frustranea foret illa audacia, & ad Dominum nullum rediret emolumentum; temerarius meritò judicaretur conatus, qui vitam periculo non necessario exponeret. Ad tam atrocia obsequia fidem subditorum non obligamus, ut arbitremur, mandari posse violentas manus, præcipationes, & ejusmodi horrendas mortes, ne in hostium potestatem veniant. Id præcipi subditis potuit ut fortiter pugnent pro communi salute, & malint occumbere, quàm turpi & noxia fugatutelam Reipub. prodere: ut ipsi occisoris occupent munus, imperari haud decet. Exsecranda est eorum fidelitas, qui classibus aut castris præfecti, antequam in potestatem hostis se redigi patiantur; vel ex præscripto superioris, & iniquè ad hoc præstito juramento; vel ex nescio qua, temeritatis & vanæ gloriæ cupidine, tormentario pulveri lacerandos se permittunt. Ad id obligabitur miles, ut quamdiu aliquis spiritus membris ineret, adversario restet, & pro domini utilitate ponat pugnam animam. Ut secum ipse componatur, & hostiles inferas proprio corpori manus; id nulla fides excusabit, & ab omni humanitate accusabitur monstrosus obsequium.

III. Sed properemus ad Obsequium, quod manifestis jussis debetur: & videamus quousque illud extendendum. Nos ad omnia mandata porrigimus. Sed ea *omnia*, secundum substratam relationis materiam veniunt interpretanda. Scilicet obsequium constituit naturam subditi, qui respicit imperantem, Majestate instru-

instructum. Huic omnia subjacere, quæ in civitate sunt, in præcedentibus expositum est: his omnibus obnoxii, vi consequentiæ, sunt subditi. Imperantibus non aliter adhæret Majestas, quam ut in subditos se exferat illa vis, à parentibus reverenter suscipienda. Vanum esset omne imperii nomen, nisi ex sua indole importaret obsequium in adversâ parte. Jam ipsa Majestatis natura in eo dicitur consistere; ut summa sit in civitate, & ubique, hoc est, per omnia valeat. quare necessario concludimus, omnibus istis juribus, & ubique, obligari subditum. Ut cogi possit, imperio in personam, dominio in res, directioni universæ civitatis, secundum explicata jura, debet obtemperare. Atq; posita hac explicatione, ulterior nulla dubitandi vel causæ, vel ratio subest. Honestæ sunt, licita sunt ista omnia: nec periculum inde obedientibus timeri potest. Principi potestas in omnia jure vicario competit; exerceri solito Dei optimi maximi nomine: qui sicut nihil decernit, nisi quod justum ac bonum est; ita ejus officialis aliter haud poterit agere. Hinc auctores, qui in Principe potentiam, divinæ æqualem, cœlitus communicatam, agnoscunt; imaginem Dei simul deprehendunt, cujus vim in virtutibus positam esse affirmant. unde jussiones Majestatis, illuc respicientes, nullum præjudicium pietati, vel justitiæ facient. Quòd ille divinitatis character, in Majestate deprehensus, ex potentia simul, & justitiâ componatur. Rectè igitur subditi atque ex ordine faciunt, quoties constitutum Principem,

cipem, non aliter quam Dei Vicarium suscipiunt: rati, non homini præstari tum honorem & reverentiam, tum obsequii promptitudinem; sed ipsi, qui præfecit Regem, Deo. Necessitas enim parendi Deo, quum imposita cuilibet ex lege creationis sit; non detrectabit imperium divinum quisquam, ubi Creator præceperit in Principe sibi honorem exhibendū.

IV. Interim non optimus semper contingit populo rex, sed pessimi quique non rarò id fastigium tenent. Potissimum quando hæreditario jure conceditur successio: ubi accipendus ac retinendus est, quem nascendi sors prætulit aliis. Et quamvis Electionis major sit libertas, quæ dispicere quaquaversum potest, ut sumatur optimus: fallitur nihilominus humana solertia, quæ fucata discernere à veris non semper novit. Adhæc varium ac mobile Principum non infrequenter ingenium est, ut non exsequantur strenuè, egregiè quæ cœperant. Immissi in hunc regnandi campum, initio ostentant, aut simulant virtutem: progressi aliquousque desciscunt ab eadem, & non gradu, sed præcipiti cursu, ad vitia quidam procurunt. Quod si hæc talia veniant usu, & antè habitam, vel fictam bonitatem exuat animo rex, sordidisque moribus inquinet divinum characterem: num subditi obsequium ipsi præstare tenebuntur, perinde ac bono Principi? Poterat dubium incidere de obligatione obedientiæ. Propterea scilicet subjiciuntur homines potestatibus, quia divinum id officium est, & qui eo fungitur, Dei vices subit in regendâ civitate.

vitate. Sed cū pessimus præest, & vitiis inquinatissimus, tantum abest, ut gerat personam Dei Optimi Max. vicariam, ut Deo potius suis sceleribus infestus imminet. Quare soluti videbantur subditi obedientiâ; debitâ Deo & ejus ministris, non perjuris hostibus. Si consulamus Græcos, & Romæ liberæ Scriptores, reperiemus, non tantum negari obsequia, sed strui insidias, deturbari Reges, machinari cædes, decerni præmia Tyrannicidis. Tyrannum occidere, ex omnibus præclaris factis pulcherrimum existimat populus Romanus, si TULLIO credimus. III. off. Et sunt, qui virtutem Regis, inter conditiones ponunt, ut subditi pareant. Turpitudinis quidem notam non effugient reges, qui exemplorum vi & efficacia inculcare debent virtutes parentium animis; si primi deferant pietatem, & vitia in Rempub. introducant: cæterum non fas erit subditis, pristinam obedientiam negare. Quod ejusmodi impium Regem supremus Dominus ferat, & in veteri loco positum relinquat. Sive indulgentia solitâ & coniventiâ, ut redeat ad frugem; sive imperscrutabili quadam providentiâ lege, ut subjectum cœtum, qui proculdubio affinis culpæ erat, imperantis improbitate atque sævitiâ moneat atque castiget. Quamvis igitur Deo adversus sit tyrannus quoad vitia; refert tamen adhuc Eundem imperii potestate, cui obsequium juste negari haud poterit. Quamdiu regale fastigium tenet, venerabundâ subjectione dictis & imperatis ei audientes sunt cives. Propter

pter evidentissimam obligationis consequentiam. Nec mutanda obedientiae religio, quando iniquum aliquid postulaverit. Separanda tamen, ad evitandam confusionem, iniquitas actionis, ab injuriâ, qua patiens afficitur. Nimirum quoties requirimus obedientiam circa postulata iniqua, intelligimus iniquitatem imperantis, non malitiam subditi. Quando ex mala libidine, & nocendi animo, aliquid imponit subdito, quod ejus personam, aut fortunas aggravat, parendum tamen est jubenti. Non tam quod ingens imperium in personam, & maximum dominium in bona habeat imperans: multo minus quod subdito non possit injuriam facere Princeps; sed quod actionem palam tyrannicam, teneatur ille recipere, cum passionem saltem infligat parenti, nullum morale malum imprimat.

V. Haftenus igitur debet tyranno obsequium subditus, dum patientis rationem subit: ne detrectet, quicquid injungitur. At aliter se res habet, ubi agere malè jubetur, & præcipitur crimen perpetrandum. Distinguendum tamen hîc est, num apertum sit scelus & manifestum, quod perpetrandum est; an apparens, quod dubium vocamus, de quo prius. Nimirum occurrunt actiones, quarum bonitatem non semper ex communissimis principiis Juris Naturalis deprehendere potest subditus: sed educendæ sunt conclusiones ad definiendam qualitatem *actionum*; ea subtilitate, ut se expedire nesciat dubius animus. *Dubium* enim vocamus, quando intellectus subditi nihil de-

ter-

terminare audet, circa honestatem, vel malitiam actionis; sed heret: quia conjecturas æquales invenit, quæ ex una parte ostendunt bonitatem, ex altera turpitudinem actionis arguunt. Quomodo hîc se comparabit subditus. obsecundabit imperanti, propter argumenta, quæ permissum esse mandatum evincunt? an resistet non obtemperando, ob probabilem actus præcepti malitiam? Sunt qui ea conditione rerum, negari posse obsequium affirmant. Ita CICERO, l. off. *Bene præcipiunt, qui vetant quicquam agere, quod dubites æquum sit, an iniquum. Æquitas enim lucet ipsa per se: dubitatio autem cogitationem significat injuria.* Quando varietas opinionum est, immediate circa obligationem obediendi, certum est FRANCISCO de OVIEDO, posse subditum licite non obedire, ex probabili opinione, asserente, eum non adstringi obligatione obediendi, *Tr. V. Cont. III. Punct. V. n. 54.* Argumenti loco id ponitur, quod inter duas opiniones probabiles, immediate tendentes circa praxin, quilibet potest gratiorem sibi eligere. Alii subditum absolvunt obsequio, tali collectione: *Non teneri propterea, quia probabiliter opinatur, illicitum esse, quod præcipitur. Ad res autem illicitas non tenetur. Tandem, quia opinione probabili, dictante tributum esse injustum, subditus non tenetur illud solvere, etiamsi Princeps probabiliter judicet esse justum; universaliter concludunt, nec in reliquis obligari subditum.* GROTIUS in materia applicata, de bello dubio, auctor est subdito, ut quiescat.

Quod

Quod dubitans contemplative, debeat iudicio a-
ctivo eligere partem tutiorem. Est autem pars tu-
tior, abstinere bello. Neque obstat, quod ex altera
parte periculum est inobedientia. Nam cum u-
trumque incertum sit (nam si injustum est bel-
lum, jam in ejus vitiatione nihil est inobedien-
tia) caret peccato, quod ex duobus minus est. In-
obedientia autem in ejusmodi rebus suapte na-
tura minus malum est, quam homicidium,
praesertim multorum innocentum. Sed hae rati-
ones non eximunt subditum ab imperio man-
dantis dubia. Quod in genere dicitur, omit-
tendum esse actum, de cujus bonitate dubita-
mus, & gratiorem partem eligendam: id vale-
bit, ubi proprio consilio, & libera electione
suscipitur actio. In his enim probabilibus opi-
nionibus, eam quisq; proprio ductu eliget, quæ
commodissima apparebit. Verum hic agimus
de solitaria & libera hominis operatione, quam
sponde vel suscipere, vel omittere potest agens.
Superioris imperium nunc actionem deter-
minat, ubi non licet partem, quæ magis arri-
det, sumere. alias nunquam obedientiam præ-
staret subditus. quod acceptior possit esse in-
obedientia, & otium præferri molestæ negoti-
orum gestioni. Quare in nostra materiâ non
admittendum est illud axioma, nisi precarium
velimus asserere omne imperium. Probabili-
ter illicitum, est etiam probabiliter licitum: ad
quod perficiendum, cogi potest imperio man-
dantis. Tantum abest, ut subditus tributum
possit negare Principi, ut nequidem eidem
competat cognitio de tributi æquitate: cum
hæc

nis manifestam detestationem postulat. In reliquis obedientia semper majus malum erit, executione præcepti, quod omni suspicione liberum non est. Ut illud obiter moneam, contra principia moralitatis dici; *carere peccato, quod ex duobus minus est.* minor aliquis gradus non tollit naturam peccati, quod nec perpetrandum est, licet sit minimum. Ubi duo mala sunt, utrumque vitandum, neutrum sub prætextu parvitatis eligendum est.

VI. Mihi difficultas maxima videtur in eo latere, *quod dubio ipsum illicitum includatur.* Ostendunt enim Moraliū interpretes, operationem malam esse, quæ non procedit à determinato judicio intellectus, & certa conscientia, licitum esse, quod hic & nunc agitur, vel omittitur. Omne dubium practicum comprehendit eam vacillationem judicii, non eligentis actionem ob certam bonitatem. Necessarium omnino est, ut actus humanus rectitudinem & honestatem à prudentia æstimatam, supponat: quæ consistit in firmo judicio, decidente, quid hic, & hoc tempore, his, aliisve circumstantiis rectè fiat, aut non fiat. Id ubi abest, actio recta dici haud potest. Et facile probatur, ejusmodi incertum actorem, jam parvi æstimare, licet contra justitiam aliquid designet. Quare Sacræ litteræ tanquam peccatum damnant, quicquid *non ex fide*, hoc est, certa scientia & fiducia, rectum esse quod agitur, procedit. Indubitatum est, ad bonam actionem requiri judicium, definiens rectitudinem operationis: quæ regula debet esse firma & con-

& constans. Nec opus habemus eo refugere, ut negemus, *ad rectè & honestè operandum requiri iudicium practicum, moraliter certum; quo excludatur omnis formido oppositi: sed sufficere assensum probabiliter dictantem, quamvis non sine suspitione peccati, hoc vel illud honestè agi.* Requiramus in obsequio, circa dubium præceptum, illud determinatum iudicium; continuò id inveniemus. Dubium quidem practicum includit imbecillitatem iudicii; sed tum, quando adhuc dubium est. Quam primum se accingit homo ad agendum; tollitur dubium, & eligendo alteram partem, firmatur intellectus. Scilicet quando in re dubia obsequitur subditus, operatur secundum partem, quâ honestas apparet; non qua suspicio iniquitatis subest. Nec enim fingere licet, hominem virtutis amantem, qualem volumus, declinare in partem deteriore, quæ vitiosam reddit actionem: quum locus detur actioni, secundum præscriptum honestatis instituentæ. Dum sequitur opinionem, quæ rem probat, & adeo non aliena est, à recta ratione, imo huic innititur; & honestè, & prudenter operabitur. Non agit, quatenus res illicita est; & damnatur; sed quatenus honesta videtur. Sic nullum amplius restat periculum perversæ operationis: neque *læditur amicitia Dei, aut spernitur voluntas.* quia in dubio nihil constat de voluntate Dei contraria, & ipsa probabilitas suæ rationi insistit. Deponitur ergo dubium practicum eo ipso, quo agere instituit aliquis, & ipse actus satis declarat, alteram rationem

nem

nem prævaluisse. Huc facit, quod dubium necessario ponendum sit, propter accedentem auctoritatem superioris: per quam gignitur certissima scientia, rem præceptam esse licitam. Nam cum rationibus, declarantibus rem esse licitam, jungitur mandatum imperantis, teneretur subditus credere, ipsam mandatum licitum esse. Imo propter solam hanc auctoritatem, dubium amplius non est dubium. Nam in dubio utraque contradictionis pars æqualibus rationibus instruitur: sed illa deinceps præponderat, cui jussu Principis momentum addit. Prævalens igitur assensum & obsequium postulat: cum absurdum sit, eam actionem negligere, quæ fundamentis ornata est; & contrariam assumere, quæ imbellibus fulcris sustinetur. Obligatus ergo subditus evidentiori conclusioni accedit. Non opus est, ut hoc assertum adstringamus ad casum, *quando imperans est vir doctus & prudens, qui non nisi ex maturo consilio soleat precipere.* Nam id semper debet præsumere subditus. Sicuti de justitia Principis optima quæque sperat, nec aliter sentire potest, nisi contrarium evidentissimis rationibus constet. Id enim est de officio subditi, optimam & honorificam opinionem de principe suo fovere. Ut *dubitans viros doctos consulat, & prudenti quadam diligentia in præceptis talis justitiam inquirat:* id ad confirmationem judicii moralis pertineat; ad suadendam inobedientiam, nunquam efficax erit. Nisi forsan jussu adeo impingat contra naturales leges, ut ejus bonitas nulla ratione possit colli-

Z

ligi:

ligi: tunc non amplius dubium est; sed injustum; illicitum suâ naturâ, & nemo ad ejus effectum jure obstrictus tenetur. Sunt qui communem hanc sententiam esse, & in praxi semper consulendam censent; & nihilominus putant, *valde probabile esse, subditum non esse obligatum.* Quod licitum subdito sit, *non parere superiori præcipienti, quando est opinio probabilis, non esse obligatum ad parendum.* Bellè procederet negotium, si obligatio parendi, fundaretur in opinione subditi. Nam id gratis dicitur, *liberationem ab obsequio in opinione probabilis consistere.* Nunquam præstaretur obedientia, nisi ex gratuita voluntate subditorum: quod semper possit probabilis causâ fingi negandæ obedientiæ. Illud quoque falsum annectunt; *superiorem habere jus præcipiendi, quod est licitum, certo & indubitabiliter: quod vero sub opinione tantum licitum est, ad id jus habere sub opinione.* Nam in omnia jus habet, nisi certo & indubitabiliter sint illicita. Quod si nostra sententia in praxi semper consulenda est; veram esse oportet: quod falsa non possint regulæ locum subire in practicis. Excipiunt quoque subditi obsequium, *quando dubium est, num superior sit legitimus.* Male. nam obligatio nec ab opinione subditi, nec justo titulo imperantis descendit: sed solo imperio & potestate præcipiendi. quæ citra subditi examen, & titulum imperantis constare potest.

VII. Quoties evidens peccatum præcipitur, restabit subditus: non quidem oppugnando,

do, & deturbando tyrannum; sed eidem non obtemperando. Rectè negatur obsequium, ubi præstitisse crimen est. Invenies aliquando Principes, qui non tantum ipsi vitiis sunt obruti; sed ejurata quasi humanitate, in idem lutum detrudere alios conantur; & præcipiunt ejusmodi, quæ approbatæ non solum consuetudini, sed honestati, & legi, mentibus hominum inscriptæ, & salutari adeo Dei verbo sunt opposita. Nunc si talis, vel gentilis, vel impius contingat populo rector, & eas ponat leges, quæ jubeant prohibita divinis, vel prohibeant ibi mandata: citra omnem dubitationem sistet debitum aliàs obsequium, & pluris faciet divina monita, quam tyranni deliramenta. sciens, Deo magis esse, quam hominibus obediendum. Tenetur quidem populus obedire Principi; sed & Deo: atque huic quidem, tanquam supremo Regi. Duplicem rationem eximiè notavit THOMAS, 2. 2. q. 104. a. 5. ob quam non teneatur subditus in omnibus obedire suo superiori. Prima est, *si contrarium præceptum majoris potestatis adsit*: altera, *si superior egrediatur terminos sui imperii*. Utraque hic concurrit. Scilicet Deo magis obediendum esse, quam hominibus, ratio sana concludit, ducto argumento à potestatibus civilibus inferioribus, obnoxiiis Majestati. Mandat aliquid præfectus, contrarium Rex præcipit; hunc omnes subditi auscultant, spreto inferioris decreto. Simili ratione jubeat impium quid Rex: contrarium faciendum erit, quod Deus sanxit. Concredidit equidem Prin-

cipi summam potestatem Deus: ea tamen lege, ut retineret eandem ipse; & ille ne quid contra auctorem suum auderet. Ubi concurrunt igitur duo, se invicem extinguentia iussa, quorum alterum obligaturum est; id prævalet, quod a superiori irritum fieri non potest. quare necessarium est, Deo, præ impio homine, qui sub illius tamen potestate est, obsecundare. Altera ratio in objecto potestatis fundatur. Ipsa eminentia Principis ad impia & inhonesta jure suo non progreditur. quare ut obligetur iisdem obsequium subditi, fieri haud potest. Nimirum alias in genere, tantum posse Principem in civilibus & moralibus, quatenus horum exercitium ad civitatem ordinatur, quantum ipse Deus valet; citra operosam disputationem constat. Ideò enim Vicarius Dei constituitur. Quia vero Deus Opt. Max. nulla lege potest efficere, ut impia, & inhonesta admittantur ab hominibus; relinquitur illud, egredi tyrannum imperii commissi limites, & agere præter ac contra formulam constitutionis. Satis certum est, vicarium non habere potestatem majorem principali, aut eidem adversam. Unde ex altera parte firmiter concluditur; observanda minimè esse, quæ contra expressum Dei mandatum ab impio rege constituuntur. Superioris iussa ad facultatem legislatoriam referunt Politici; quia vim legis habent. Quod non inconcinne dicitur: & in præsentī argumento eximium usum habet. Examinantibus enim materiam, circa quam Legislatoꝝ occupatur condendo legem, apparet

paret eam merè civilem esse : unde resultant ejusmodi leges, quæ ex voluntario jure, seu civili nascuntur. Jus naturale huc non pertinere, cum à Deo impressum sit humano generi, supra ostendimus. Nulla proinde, vel sanctio, vel determinatio legum naturalium competit Majestati: quam ob causam, nec mutare, nec abrogare easdem potest. Ad quod negotium Legislatoris auctoritas, conditura jus, non pertingit; id nec subjacebit mutationi. quia mutatio & abrogatio præsupponit jubendi facultatem. Hinc patet juris naturalis edictis, qualia sunt omnia, quæ turpitudinem vetant, nullo modo derogari posse. Quoties igitur inhonestum mandatur, contra naturalem legem insurgit Princeps. illud vero jure non potest. quod autem jure non potest, id planè non posse, aut sine effectu præstandi obsequium, intelligitur. Ubi enim desinit potestas superioris, ibi cessat quoque inferioris obsequium. Ubi imperium malè extenditur ad iniqua & inhonesta: inhonestum est obsequium, & obligatio contradictoria.

VIII. Clarissimus HOBBS in hac doctrina plane diversus abit, & nostram sententiam, inter seditionum principia reponit: *quod Regum sit, discernere inter bonum & malum.* Quum igitur totum fundamentum in eo positum sit; *quod subditus non possit judicare de rei bonitate aut malitia:* videamus de cognitione rei licitæ, illicitæve; & utrum omnino habeat subditus aliquando judicandi facultatem. TERTULLIANUS certè videtur omnem

legem subdito dijudicandam relinquere: *Neque civis fideliter legi obsequitur, ignorans quale sit, quod ulciscitur lex. Nulla lex sibi soli conscientiam iustitiæ suæ debet, sed eis à quibus obsequium expectat. Ceterum suspecta lex est, quæ probari se non vult: improba autem si non probata dominatur.* Distinctè hic versandum est, ne vel omne, vel nullum arbitrium parenti cœtui permittamus. Discernenda præcepta sunt, & merè civilia separanda à moralibus, quæ ex jure naturali proveniunt. In civilibus actionibus jure absoluto imperat Princeps, & pro ratione sufficit ejus voluntas: quia in his necessario parent subditi. quod una illa præcipientis voluntas regula sit actionis. Idque necessarium est, nisi omne imperium frustraneum velis efficere. Placet mihi illorum sententia, qui inter conditiones obedientiæ *Cæcitatem* numerant: quod perfecta obedientia duplici modo debeat esse cæca: primò ad imperfectiones & vitia superioris; & oculata maxime considerando, cujus locum teneat. altero modo, ad præcepti rationes scrutandas; ne cupiat scire causas. GREGORII illud est; *nescit judicare, quisquis perfectè didicit obedire.* Ratio autem prohibiti judicii ea est, quod in civilibus negotiis passive se habeat populus, etiam tum quando in agendo concurrat. instrumentum quippe est, quod in his talibus non debet rimari causæ principalis finem. quare nec cognoscere potest de ipsa naturâ præcepti, cum intentionem primarii agentis ignoret. Et è re publicæ quàm maxime est, non omnium præcepto-

præceptorum evulgare rationes. Sæpe negotium celeritate summa perficiendum est, quod omnem efficaciam amitteret cum amissa occasione: quæ sæpissime ante avolaret, quam edocta esset multitudo de ratione mandati, & congruentia cum sana mente. Id affirmare habemus, turbulentissimas confusiones afflictu-
ras esse Rempublicam, in quâ omnium præceptorum, aut legum ratio exponenda sit plebi, & committendum judicium, utrum legitimæ sint. Id si nullibi accideret, eveniret tamen in pendendis tributis, ubi nulla justifica causa probari posset rustico, contra disputanti. Ne igitur populus honestissima quælibet ad turpitudinem interpreteretur, & deneget debitam reverentiam, & boni principis tandem imperium precarium sit: non tantum judicium de æquitate & proportionem tributi, item versione ejusdem in usum Reipublicæ; sed de omnibus merè civilibus, quiescat. In ejusmodi enim actu procedit *Hobbii* judicium, & seditioni apta loquitur, qui contra sentit. Nisi per judicium intelligat nudam apprehensionem præcepti, & provisionem instrumentorum conformium executioni: aut generale & summarium examen, per quod cognoscit, mandatum Principis non impingere contra aliquam legem naturalem.

IX. Has autem naturales sanctiones, quæ justitiam suam non aliunde à voluntate hominum mutuantur, sed perpetuam secum circumferunt, non censuerim eodem modo cum præceptis civilibus: quod judicare possit sub-

ditus istarum conditionem, dum honestas evidenter se ingerit oculis, cujus beneficio ab illicitis separat concessa, ab justis iniqua. illa facit, & adimplet obsequii promptitudinem: hæc omittit. Id ideò accidit, quod judicandi principia connata habet. Scilicet discrimen honestorum ac turpium non frustra in sevit natura. *Aristoteles* sanè inde colligit, hominem à natura esse animal sociabile. Quia justitia virtus est, quæ tota ferè ad alios porrigitur: nec colligitur potest nisi in societate. dum verò homo differentiam justii & iniqui connatam habet, prima justitiæ semina; hoc ipso à natura instructus videtur ad societatem. natura nimirum nihil frustra moliente. Eadem, & vix tam remota collectione inferemus, judicium de rebus merè moralibus, honestis aut turpibus, cuilibet homini vindicandum esse, & in civitate, & extra civitatem degenti. Nisi enim subsequatur actuale judicium de objectis necessariis, frustranea fuerit omnis illa potentia. Nam naturalis aliqua facultas, quæ in toto genere nunquam in actum deducitur, nullius usus est, & gratis fingitur. Ne igitur utilitatem nullam præstet, & frustra omnino sit, illa norma directrix humanarum actionum: concedendum utique judicium homini est, ut in actum aliquando deducat potentiam cognoscendi, ac dijudicandi rerum moralium qualitatem. Quod facili negotio peragitur, dum prolixa deliberatio, aut subtilis, & anceps disputatio haud requiritur; & sponte sua honestas apparet, & omittendorum turpitudine agnoscitur.

tur. Injuncta est homini harum sanctionum custodia, ne dictamen illud naturale patiatur à quoquam, sub quocunque prætextu, oppugnari. Commendavit cuilibet conscientiam suam Deus, quam intemeratam servare debet: quod neutiquam præstabitur, si actionem quamlibet adiaphoram, præcepta quælibet de non lædendo, non occidendo proximo, de non vitiandâ uxore alterius, Juris civilis esse statuamus: si Principi soli definitionem honesti & inhonesti asseramus. Nihil ingenii habet hæc sententia, & à suis auctoribus evertitur non uno adverso effato. Honor parentibus exhibendus est, licet lege civili nihil dum sit constitutum. Determinabit fortean Legislatores quædam objecta, observanda liberis obedientibus: sed in ipsum præceptum nulla vis Nomothetica extenditur: quod haud liceat Majestati sancire; reverentiam parentibus debitam negandam esse. Ita homicidium absque Principis decreto prohibitum est, sicut & adulterium: quæ definitionem ab arbitrio Principis non habent. Cognoscuntur hæc ex Jure naturali, quo prohibentur. Prohibitio naturalis legis, declarationem quoque rei prohibitiæ includit: unde fit, ut inter attributa ejusdem ponatur *Evidentia*, ut perceptis terminis statim assensum præbeat intellectus. Frustra esset legis ingeniæ interdictum, nisi cognosceretur simul objectum prohibitum: nec ulla foret obligatio ejusdem, si cognitio ab imperante penderet. Ignota, quæ talia, non obligant. Præterquam quod legis authentica

interpretatio ad latorem pertinet; exinde satis refutatur ista sententia; quod nihil sua natura honestum aut turpe relinqueretur. Quid si aliter determinet negotium lex civilis, quam ejus indoles requirit? si Nero aliquis, aut Caligula, hominis innoxii cædem neget esse homicidium? aut concubitum cum alterius uxore adulterium esse inficietur? Licitum erit, quod ex suâ indole homicidium, aut adulterium est. Sic omnia scelera permitti possent à Republicâ, modò aliis nominibus insignirentur. Nam Justum & Injustum ante imperia non exstitisse, contradictoriè statuit *Hobbes*; qui ante imperium, in statu naturæ, quem fingit, leges naturales ponit, & immutabiles atque æternas pronunciat. ut nunquam licitum esse possit, quod vetant; nunquam illicitum, quod jubent. In statu igitur naturali, ubi omnes æquales sunt, cognitio de bono & malo ad singulos pertinet: qui ordo non invertetur in Republica. Si datur lex cujus æterna veritas est; si datur dictamen rectæ rationis, extra constitutionem imperii civilis: justum fuerit necesse est. Lege enim determinatur justitiæ modus. Si æterna quoque auctoritas legis naturalis est, erronea sunt omnia effata, quæ imperanti permittunt facultatem judicandi de honesto & turpi. Si mutari nequeunt legis ingenitæ scita, non dependebit dijudicatio à mera voluntate Principis. Temerè quoque fingeretur lex divina; *in quam nimia obedientia erga civitatem peccari posset*. Ipse fatetur auctor; *tale posse mandatum esse, ut interfici ma-*
lit,

lit, quam facere. Ad deprehendendam turpitudinem ejusmodi mandati, opus est judicium subditi.

X. Judicat itaque subditus, quid cum jure naturali congruat, quid eidem adversetur; & si tale quid præcipiatur, non obtemperat. Quid vero si planè in tyrannum abeat malus Princeps? & in eversionem non obtemperantium impiis jussis, se convertat, & ultimo supplicio coërceat eorum pertinaciam? Id enim propriè est tyrannum esse, evertere suos. nam studium privatæ utilitatis non absolvit ingenium tyrannicum. Ad cædem ejusmodi civis, nullum imperium instruit tyrannum: ideo resistere subditum posse, & vi repellere vim, dicendum videbatur. præsertim si eximiam aliquam multitudinem insontium perimat. Et sunt plures eruditissimi viri, qui universo populo necessitatem imponunt, non tantum resistendi, sed deturbandi quoque publicum hostem, qui contra leges divinas, aut patrias peccaverit, & sanguinem temerè fuderit. Sed hi Majestatem, etiam Tyranno superstitem, non attendunt: nec cogitant, Deum esse solum, qui instruat potestate; solum, qui exuat, & ad pœnam rapiat transgressorem. Verissimum illud ANTONINI PHILOSOPHI: *Nemo nisi solus Deus judex Principis esse potest.* Qui summus est in civitate, neminem natum hominem agnoscit judicem. quod universi subditi inferiores sint, nulla potestate, in Principem valente, præditi. Duplex nimirum initur via, quâ in ordinem cogimus delinquentes; quando legitimo judi-

caturō severissimè , quicquid in populum suum fuerit admissum. Et hoc est, quod expressè sibi reservavit Deus luculentissimis verbis: non in veteri saltem Instrumento ; sed recentiori quoque Fœdere. Ita *Doctor Gentium* ad suos Romanos, XIV. 2. *Quisquis obstitit potestati, Dei ordinationi obstitit: qui autem obstitunt, ipsi sibi condemnationem asserunt.* Certum quidem est, sermonem esse, de legitimâ potestate: verum ab hac, re ipsa, non possumus separare tyrannidem. non enim removebitur aut extirpabitur tyrannus, absque lēione potestatis, & ordinationis divinæ contemptu, qui impunis nunquam est. Iniquis etiam dominis parendum esse, exhibendumque honorem, *Petrus* docuit. *Hoc cedit gratia, si quis propter conscientiam Dei, suffert molestias injustè afflictus. Quæ enim est gloria, si peccantes & colaphis cæsi subsistatis? sed si benè agentes, & tamen afflictis subsistatis, hoc cedit vobis gratia apud Deum.* Priori II. 18. Non est quod dicas; *Tyrannum qui vita subditi insidiatur, eamque invadit, desinere esse Principē, & in hostem vertere, atque adeo subdito remittere obsequium; & subministrare omnem resistendi facultatem.* Nam solâ fictione tertii non extinguitur imperium in subditum. Exploranda voluntas tyranni, num velit solitū remittere subdito obsequium. Sanè non eo animo adoritur civem, ut eidem tradat plenissimam facultatem, tanquam hosti resistendi. Si regeris; ipso facta hostili remissum esse subdito vinculum pristinae obligationis: probanda erit talis facti efficacia.

ria. nego enim subditum solvi posse imperio Principis, citra hujus expressam voluntatem. quæ contraria propriæ tyranni saluti fingi haud debet. Versus erat Davidi in hostem Saul : sed nihil tanquam in hostem licere sibi, credidit David. Qui non amplius privatæ fortis haberi poterat, cum & rebus felicissimè gestis nobilis, & jam in regni spem unctus esset à Propheta. Nihilominus Saulis vitæ, aut sceptro nullam vim intulit; quamvis quæreretur ubique ad mortem, & crudelis focer bis in manum fugientis incidisset. Suadentibus etiam, ut perderet tyrannum, cum tremore objecit inviolabile nomen, *unctum Domini*.

XI. Durum videtur ita patientiæ lege subigere ac indurare animum, ut supplicium immeritum subeat : quum si non singuli, vel multitudo movere nos debeat, ut defensio permittatur. Accidat enim, ut Tyrannus non uni atque alteri inhonesta præcipiat; sed egregiam multitudinis partem velit evertere, omnesque ad gladium vocet, qui dicto non fuerint audientes; & in hoc cœtu sint, qui de Christianâ re meriti optime, egregium publicum promovere latissime valeant. Anne hos omnes trucidari miserrime patiemur, quos exitio ferali immanitas jubentis destinavit, solâ repugnantiam subtrahendos. GUILLIELMUS BARCLAJUS, acerrimus imperii Monarchici vindex, contra Principem licitè arma sumi à subditis arbitratur, *quando insontes ille hostili animo delere cupit*. Quod GROTIUS etiam admittit; sed conatum illum, in sanæ mentis regem haud

haud cadere, putat. Subest asserto aliqua æquitas: sed ritè explicanda est. Si forsan urbis aut regionis incolæ, ob religionis diversitatem, quod idololatræ sacra noluerint sequi, excidio destinantur, usus esset necessariæ tutelæ. Sed cautissimè hîc versari oportet. Non cæco impetu arma involabimus: cautiones prius adhibebimus, quam hæc violentiæ permittamus. Præsupponimus extrema servitutum ferè imposita, subditorum preces nullum habuisse pondus, ut sublevarentur onere: nunc eo devenisse rem, ut mactandi, ovium instar, sub carnificis versentur manu, & præsentissimum immineat exitium, quo non tantum societas illa civium dirimatur fœdè; sed Ecclesiæ quoque detrimentum capiat. Rebus ita comparatis, ex hoc tyrannidis carcere educimus ad tempus omnes pressos & afflictos: quin militarem induimus cultum, quo se tueri possint contra adversariorum rabiem. Hoc modo. Si tyrannus propriâ manu, civem nihil delinquentem, interficere satagat, ex malâ libidine atque crudelitate: huic subdito nunquam auctores erimus, ut personam Principis lædat. sed mitendus erit spiritus impiæ sævitæ. Cum verò tyrannus solus integram urbem haud possit invadere, quod verendum habeat, ne forsan incidat in æquè impium hominem, ac ipse est, qui nec Dei, nec majestatis, in tyranno existentis, reverens, pari maleficio tollat invadentem, quo infestabatur: ministros plerumque habet, tam horrendi mandati executores, qui innocentes excarnificant. Hostiles

les malitia sua non præstabit sacrosanctos; & ab imperio tyranni nullam facultatem injustè agendi consequuntur: ubi igitur ex mandato crudelitatem volunt exercere, tam improtecti agunt, ut à læsis omnes trucidari possint. Absistere debebant ab executione præcepti: imperaus non poterat eosdem ad peccata obligare. quæ ubi sponte perpetranda recipiunt, à quovis, quem contra jus & fas hi latrones aggrediuntur, jure cædi possunt. Tyrannum, occidentem cives, majestas tuetur, quæ eandem personam inhabitat. apparitores autem communicatum nullum imperium defendere potest. Ita miseri subditi stringent gladium, non tam vindicem, quam tutelarem. Neque ulterius privilegium resistendi valet, quam ad tutelam. Bello non laceissent tyrannum, nec infestabunt reliquos innocentes subditos; multo minus, licet prævaleant ac superent multitudine, invadent regnum, aut dignitate regiâ dominum crudelem spoliabunt: potius ubi ad meliorem redierit mentem, & securitatem subditis impofterum pollicitus fuerit liberaliter, pristina obsequia exhibebunt. ostensuri, non à Principe se descivisse; sed obviam saltem ivisse crudelitatis instrumentis. Si cui præceps ac lubricum hoc iter videbitur, Davidem recogitet, qui eadem via incessit. Hic cum aperto jam Marte peteretur à Saule, postquam furtivæ artes processerant minus, & militari manu quæreretur: non se mactandum offert impio socero, sed fugam arripit, quâ sibi consulat. Mox comparat manum, ex iis potissimum,

munum, qui ab simili clade domo profugi: non alio fine, quam ut innocentiam suam suorumque tegerent. Enimvero haud aliâ mente recipiebat hos socios, quam ut effugeret regis tyrannidem; & esset tamen, in quò poneretur aliqua spes infringendi subitaneos improborum insultus, si ad arma veniretur. interim ita se comparat, ut Majestatis reverentiam nunquam deposuisse credatur. Nam David, cum exilii sociis, neutiquam divexat adversarii regiones, cohortibus suis in alicujus agrum impetum faciendo: quin tueretur magis easdem, cum infesto exercitu eò pergerent hostes. Sectatur insuper devia, & querit latebras potius, quam ut formet aciem, & apertâ vi insequentem lacestat. cumque posset eum aliquoties opprimere: abstinuit tamen à parricidio invictissimam dextram, & turbulenta suorum consilia deflexit in melius. pugnaturus nihilominus, si omnis elabendi spes præscinderetur, si ignominiosæ mortis immineret periculum; & ne inultus periret, editurus stragem. Non eo quidem animo, ut Principi suo violentas inferret manus, eundemve perimeret: sed ut castigaret eorum levissimam impietatem, qui obtemperando regi, impia jubenti, sævitiam ejus foverant, coërceret adeò intempestivum obsequium.

XII. Non me præterit, esse qui hanc resistendi facultatem haud permittant populo, præsertim religionis causa: & *jus majestatis* ab altera parte urgent quum maximè, quod non obsistendum esse imperanti hostili manu, manifestè docet, & haud nocendum supe-

superioribus expresse dictitat. ab altera parte obijciunt *tot martyrum cades*, quorum innocentis sanguine foedati gladii, patientiam flagitant potius, quam vim qualemqualem. *Tot millia confessorum letho dati*, qui noluerunt contravenire divinis praeceptis, nec obtemperare impiis mandantibus. Non vi propagandam censebant veritatem caelestem, aut armorum strepitum; sed hilari ejusdem confessione, & obfignatione pretiosa. His tamen iniquitatis nondum convicta est nostra sententia. quæ Majestatis, si quæ alia, studiosissima, fatis eidem, in truculentissimo etiam tyranno, cavit. in cujus personam nemini læso aliquid permittit. In mancipia illa malitiæ pugnat, quibus nulla à Majestate tutela. Aliud igitur est, in personam tyranni aliquid permittere, ut capiatur, trucidetur, aut solio pellatur; quam facultatem multi largiuntur, contra fundamenta civilia, ut modò declaravimus: aliud, privatum latronem, nullo privilegio Majestatis fretum, exponere iræ, & justæ defensionis bonorum. Quod martyres concernit, qui potius habuerunt vitam ponere, quàm vel gerere morem dominis impiis, vel iisdem resistere: id eò haud pertinet, quasi ex lege Christianæ professionis ad hoc fuerint obstricti; quum nullibi præceptum à Deo inveniamus, ut sine omni circumspectione tradamus spiritum, quoties libuerit tyranno. Dicendum igitur potius, quod nec fugere, nec ob paucitatem se tueri potuerint. Dispersa hinc inde erat primitiva Ecclesia, ut facile in unum haud possent congregari omnia ejus membra.

poten-

potentes insuper tyranni conjunctionem dissipare & opprimere valebant. Necessitatis igitur inevitabilis erat, quod deprehensi, volentes ponerent vitam: non mandati, ut se sponte offerrent jugulandos. Etenim hos, postea interfectos, sibi fugâ consuluisse novimus; & ut evitarent immanem sævitiam, in petris ac subterraneis locis delituisse. quod fecissent minime, si jure fuissent cædendi. Fuerunt equidem non pauci, qui se ultrò stiterunt persecutoribus, abjectisque armis, quibus defendere se, & hostem arcere poterant, cædi maluerunt. De *Thebaealegione* præprimis narratur, eam à *Maximiano Casare*, ut idolis sacra faceret, compulsam, non gessisse morem; & cum decimus quisque per apparitores esset interfectus, inermem se universam tradidisse occidendam. Verumenimvero multa perpetrantur à piis, & Deo dilectis hominibus, quæ laudanda interdum potius & admiranda, quàm imitanda, & ideo ad communem regulam trahenda non sunt. Non infrequenter singularis naturæ temporis loci, & rerum ipsarum diversitas, actori suppeditat consilium, quod haud æquè in alio requireretur. Asserenda tum temporis à confessoribus rei Christianæ certitudo & veritas erat, & approbanda veniebat adeo in conspectu orbis universi: ut nondum confirmati satis, haberent exemplar, quod respicerent. Id melius autem fieri haud poterat, quam si magnanimi prodirent heroes, qui ingenti animo mortem obirent propter fidem, quam iam publicè docebant, vel sequebantur. Non enim

enim sine insigni utilitate communis rei, & incremento nascentis Ecclesiæ, audiebantur cædes constantissimorum hominum. qui non tantum perseverantiam majorem popularibus doctrinæ salvificæ aspirabant; sed tacitos sæpè relinquebant stimulos in animis persecutorum: adeo ut hi inquirerent altius, inque ipsas descenderent causas hujus, quam vocare solebant, pervicaciæ; mox deprehensâ cœlesti veritate, & profiterentur eam, & propugnarent, & quâ affecerant ejus cultores, morte pro eadem obire diem, nihil quicquam recusarent. Martyrum igitur exempla singularem æquitatis laudem habent: quod, cum potuerint fugere, vel repugnare, ad confirmandos socios, & contestandam doctrinæ veritatem, se interficiendos tradiderint. Interpretanda verò neutiquam sunt, quasi perpeffi talia sint propter negatam jure resistendi facultatem. Ad demonstrandam certitudinem fidei tantam patientiam adhibebant: rati potius, exquisitissima supplicia sufferre, quam semel agnitum Deum negare. Iste finis, cum non attendatur ubique, diversitatem maximam deprehendimus. Neque disputamus enim in præsentī, utrum ob gloriam Dei, confessionem fidei, & ostendendam ejus firmitatem, mors oppetenda: sed utrū simpliciter non liceat resistere impotentia tyrannorum. Aliud est, pati mortem, ut religionis certitudo appareat; aliud quod resistere non liceat.

XIII. Causam obsequii ordinarii, & obligationis fundamentum, verbo repetendum ex
su-

superioribus assertis. Manifestissimum illud nimirum est, Deum Optimum Maximum, propter omnipotentiam creationis, absolutum & plenissimum imperium habere in creaturam rationalem: illius vigore quidlibet injungere potest homini, sancte observandum. Homo enim tenetur omnibus jussis sui creatoris humilimam veneratione obtemperare. propter naturam divini imperii, quod sine obligatione ad parendum, intelligi nequit. Quoties autem contingit, ut Rex constituatur, communicat ei Deus, & transcribit jus regendi hominem, quale ipse habebat, & isti juri inclusum obsequium. Simulac participem facit regem imperii, subditorum obedientiam obstringit. Tradit enim illam facultatem, quæ producebat in homine constans aliquod obsequium. Illa in Principe valida est, ut cives universos sibi subjiciat, non secus ac si Deus ipse præsens immediate regeret multitudinem. Confert enim supremum Numen auctoritatis particulam in Vicarium suum, cui obtemperatum vult à subiectis. Quemadmodum autem in omnibus Deo obedientiam debet homo: ita tum etiam, ubi divinas partes imponit Principi, & his annexum obsequium. Surgit hoc immediate ex præsenti imperio Majestatis; & porro ex imperio divino, Principi communicato, quod propter creationem primum creatori domesticum est. Ita Causa Majestatis simul causa est obsequii, quod illi debetur.

LIBER TERTIUS,

D E

REPUBLICA LIBERA.

CAPUT UNICUM.

- I. *Respub. libera imitatur Monarchiam.*
- II. *Majestas non est penes plures conjunctim.*
- III. *Nec divisim. unde tollitur Resp. mista.*
- IV. *Quomodo constituatur Respub. libera.*
- V. *Differentia Oligarchiae & Politiae.*



Gressi sumus itaque summi imperii Majestatici ditionem, & connexum eidem adstrictissimum obsequium subditorum: nunc pleno passu tendimus in libertatem. contemplaturi paucissimis lineis conditionem Reipublicæ Liberae. Datur civitatis genus, quod confusionem promiscuæ multitudinis declinat, & ordinem aliquem concinnum assequitur, pactis atque conventionibus prospiciens communi omnium saluti, citra subjectionem & dispendium ejus libertatis, quam Monarchia extinguit. Similimum vero est, homines suarum rerum, prudentes, & amantes simul communis aliorum commodi, extra subjectionem deprehensos, vicinorum regum violentum, & in parentes plerumque in-

injuriosum imperium horruisse ; admiratos interim fuisse ordinem & compagem civitatis universæ , observasse actiones & instrumenta , quibus salutariter provisa in omnes diffundebantur ; tandem solertis ingenii opera adinvenisse rationem , quâ extra imperium Monarchiæ , complurium civium tutela , salus , felicitas , salyâ libertate singulorum , procederet. Nam & temporum series consentit , quæ regna primam speciem rerumpublicarum proclamat : nec abnuat occasio liberarum civitatum , quæ post expulsos tyrannos cœperunt , aliisque exemplum suppeditarunt talē in modum , emortuis familiis regiis , aut sponte , sese concinnandi. Ut mihi Respublica libera , quoad legitimi regiminis actus , prorsus videatur imitamen Monarchiæ. Quanquam autem humani ingenii exsit solertia , ut artificii conatu æmuletur naturam : ea interim successuum felicitas haud est , quæ ipsam naturam , & ejus operationes æquet. Ita hæc repræsentatio Politicæ aliquo modo complectitur indolem regnorum , quoad efficaciam communis utilitatis : ipsam vim imperii , quod instruit Monarchiam , tanquam opus Dei omnipotentis , producere apta non fuit.

II. Communis error est , quem nimix & servili credulitati ac obedientiæ , Aristoteli exhibitæ , acceptum ferimus ; Aristocratiam esse , quoties penes pauciores Majestas residet ; Politiam , quando universus populus illam participat. Verum istud ingenium est Majestatis , ut , nisi contradictorie , in plures ejusdem

dem Reipublicæ personas, haud reponatur. Mirari subit, adeò securè id creditum esse, ut nemo fuerit Politicorum, qui hoc animadvertit. Erat autem facilis & prona cognitio, si naturam Majestatis attentius considerassent: neque ut lacera & dispersa membra, concepissent ejus jura. Cognovimus supra, Majestatem formali conceptu notare Imperium in caput civium. Dominium in res publicas & singulorum; item Regimen universæ civitatis, consequentia sunt, quæ vim imperii comitantur. Quaslibet etiam particulas, separatim propositas, ejus naturæ esse, quæ summitatem inferat, sponte notum est. Ita quidem, ut Legislatio sit summa potestas ferendi leges; Jurisdictio, sit summa potestas judicandi cives; Bellorum jus, sit summa potestas belligerandi. & sic in reliquis. Quærendum igitur erat, num ista consequentia adeò possint realiter separari, ut in diversis pluribus subjectis, propria auctoritate, sine concursu constituentis sui imperii, validè subsistant. An summitas quarumcunque partium, seu jurium, sine contradictione, pluribus simul communicari possit, & salva manere, concessa procerum æqualitate, cōjunctim participantium summum imperium. Mihi adeò indivisibilis habetur in suis facultatibus Majestas, ut nec divisim, nec indivisim pluribus queat adhærere. Perpetuò suspecta fuit Majestas Democratica: quod nullo cogitatu subjectum imperans discernere potuerim à parentibus. Nam quod universos à singulis disjungunt; difficultates omnes haud tollunt.

Pu-

Putant universos imperare, singulos parere. Sed vertant se in omnes formas, non evitabunt confusionem regnantis & subditi. Nunquam intelligo universos, nisi conjunctis singulis: & quicquid pronuncio de multitudine, id vel secundum aliquam partem, vel totum, eidem debet competere. Ubi imperium universis assignatur, cum aliquid vagi non sit, dispiciendum est, ubi hæreat; num omnibus, an aliquibus adsistat. Si omnibus adscribunt, neminem habebunt subditum: quod imperium & obsequium non inhabitent eandem personam. Si singulos faciunt subditos, non habebunt deinceps universos imperantes. quod ex his singulis parentibus, non possit multitudo confici, nisi obtemperans. Nihil enim aliud, quam obtemperantia, confertur à singulis Universitati. Quid vero illud quoque est, quod non universi, sed major pars prævalet in comitiis popularibus? num parti prævalenti soli adjudicabimus imperium? an suffragiis victos assumemus in consortium majestatis. Utrobique scopuli. Si partem majorem axiomate potestatis honores solam, quid est, quod universos diximus subjectum esse Majestatis, cum pars populi nunc deprehendatur confecisse negotium? Si pauciores istos æquali imperio instrues, cur vana fuit horum sententia? cur sine his reliqui potuerunt? Quo respectu considerabis præpotentes illos? universos haud nominabis; cum eximia pars populi contradicens restet. singulos non dices, quod hi discernendi facultatem habeant nullam. Nunquam

quam constanter asseverabis, quod nam sit sub-
 jectum Majestatis in Democratia. Ex opera-
 tionibus necessario hoc judicandum foret, ut
 illis adsignemus Majestatem, qui actus Maje-
 staticos creduntur producere. Ubi plurium
 sententia prævaluit, his permittes imperium:
 quod præsens effectus majestaticus adæqua-
 ram causam præsupponat. & mox ubi alteri
 minori concioni aliqui ex antea prævalenti-
 bus associabuntur, numero vincent modò su-
 periores, & iterum dicendi erunt subjectum
 imperii: ita ex utraque parte poterunt æquali
 numero conjungi, qui reliquos pauciores fre-
 quenti sententia premant: mox dicendi erunt
 possessores Majestatis. Singulis ergo comi-
 tiis, aut singulis sententiis diversum habebis
 subjectum Majestatis. Quod si tamen aliquid
 miraculosum contingeret, ut unanimi con-
 sensu decretum quoddam sanciat ab omni-
 bus, non poterimus tamen imperium, verum,
 majestaticum, attribueret multitudini, pro-
 pter defectum necessarii obsequii. Nam uni-
 versi illi non tenerentur sententiam paullo an-
 te dictam perpetuo servare: & auctorum testi-
 monio, non obligatur multitudo universa.
 Istud autem perpetuum signum est Majestatis,
 ut in universam valeat civitatem. quare pere-
 unte obsequio, etiam imperium intercidit.
 Magis patefcerent dubia, si singula jura Maje-
 statis pervaderemus, & applicarem pluribus
 possessoribus. qua operâ & democratia, & O-
 ligarchia, destitutæ majestatico imperio appa-
 rerent. Quamvis enim in republica Aristo-

cra-

cratica distincti sint, qui parent, & regunt: nihilominus, quia plures æquali auctoritate gubernaculo præfident, communem habere Majestatem nequeunt. Deceptores fuerint, quotquot his politiis libertatem verbotenus adscripserunt: cum tot dominos, instructos Majestate, cui ubique idem obsequium debetur, cervicibus miseri populi superinducant. Reclamat Majestatis natura, quæ participantium numerum detestatur. Examinemus imperium in caput, & reliqua jura separatim: uni saltem adhærebunt. quod secus excludantur aliqui, imperio non subditi, contra naturam Majestatis, quæ universis imperat: & sint, qui mutuo dissensu, actus alterius oligarchi irritos facere norint. Sunto decem optimates: nemini horum imperium in caput civium datum erit. quod nemo sine consensu collegæ efficaciter quid censeat, aut præcipiat inferioribus. à sociorum quippe dissensu, qui imperio non subditi sunt, invalidum fiet decretum. Si quinque diversum à reliquis sentirent, penes quem erit imperium? aut neutra classis valebit, aut utraq; contrarium sanciet, contra ingenium ordinis, & veri imperii. Turbulentior confusio affliget publicam rem, quo in plura divortia scindentur vota procerum. Accidat nempe ut decuplex varietas sententiarum appareat: quænam frequentabitur? Superiora dubia revertuntur, quæ universam multitudinem democraticam confundebant. Si vel duos saltem ponas, alter destitutus erit vero imperio, quod impediri possit à collega. Nam qui Ro-

manos allegant, & apud hos socialia imperia, duorum, aut trium Cæsarum: non observant divisam civitatem: aut decipiuntur, collegæ assumpti, & in spem futuri imperii recepti, nudo nomine. Iterum urgebunt, *universos à singulis esse discernendos*. Sed iterum respondebo, universos sine singulis non intelligi. Et singulos utique optimates in classe imperantium collocant. Si indivisim penes plures residet Majestas, per aliquam veram communicationem residebit, & necessario singuli aliquid poterunt. Debet singulis tribui aliqua particula cujuslibet juris Majestatici: quemadmodum in dominio communi, certam partem singulis dominis adscribunt. Sed illa particula summa est. unde plura summa in una republica, confusionem festinata, si per rerum naturam ejusmodi participatio contingeret. Nempe si speciales potestates adaptemus, Legislatoriam, exempli causa, penes universos indivisim creditur manere. quæram, num hæc singuli fruantur? si negant; nihil relinquunt universis. quod nunquam excogitatum fuerit commune & indivisum jus, de quo singuli quodammodo non participarint. Si asserunt; singuli aliquid summi in Legislatoria habebunt. quod sine summitate nulla, vel minutissima portio Majestatis intelligatur. quo admissio, nulla distinctione impediunt turbas emergentes; diversis diversa, & contraria validè decernentibus. Immobile fundamentum est. duo summa imperia in civitate una, absurdè fingi. sive plenariam, seu integram capias Majestatem, si-

ve operatione mentis divisa Majestatis jura. nec integra penes plures, nec secundum discerp-
tas partes, collocabitur. quod ubique summi-
tas penes plures, evertat naturam Majestati-
cam. Si singulis nomotheticæ potestatis ple-
nariam possessionem non concedunt, propter
jam commemorata obstacula, evertunt, quod
verbo concesserunt. qualecunque jus Majesta-
tis aliter, quam integrum, non habetur: quod
pereat natura summitatis ob divisionem in
plura ejusdem generis. Consciscat in illo pro-
cerum senatu quandam legem Titius; validum-
ne erit decretum, propter aliquam particulam
Nomothesiæ? non credo; & ipsi negant. quia
solus non habet plenam & omnimodam legis-
lationem. Censeat Mævius, Sempronius,
Cajus aliquid: itidem imperfectæ erunt horum
singulæ sententiæ. Itaque singuli inefficax
suffragium conferent suo ordini, ex quo nun-
quam oriatur aliquid perfecti, universis tri-
buendum. dum enim singulorum rejicula sen-
tentia est, & infringenda multitudine refra-
gantium, haud surget Nomothesiæ summitas,
quæ numero nec valet, nec deprimitur. Doceri
etiam concuperem; num adeo laxa & lata, sui-
que multiplicativa sint jura Majestatis, ut nu-
merosissimæ multitudini in infinitum possint
assignari. Illud quoque non est de nihilo, non
esse personam in universo illo consensu proce-
rum, quæ delinquens contra rempublicam,
non possit a collegis ad supplicium rapi. atque
adeo si omnes hostilia, & libertati populi ad-
versa molirentur: à civibus pœna sumeretur.

Ubi autem singulis punitis & remotis, universi persistant cum suo imperio, agentes respondeant. Non est Majestatis, judicari, aut condemnari.

III. Hinc sponte sequitur, cum Majestas nequeat pluribus simul in una civitate competere; nec dividi eandem posse. Nimis creduli sunt, qui sibi persuaderi patiuntur, fuisse Resp. quæ diversa jura Majestatis habuerunt. Concipimus quidem separatim jura, & mentali divisione separamus legislatariam potestatem à jure armorum, & aliis: sed non magis hæc realiter dividi possunt & removeri à Majestate, quam intellectus aut voluntas Petri cani communicari. Ex uno enim principio ac fundamento omnia singulaq; jura dependent, imperio nimirum in caput. essentialia consequentia sunt, dominium rerum, & universi regimen. Essentia Majestatis intimè impressum est, ut sit summa potestas ubique. Hoc *ubique* generalem provisionem ipso nomine, ipsaque re infert, prospicientem publico, quæ tali. & descendente ex potestate in caput omnium civium. Per rerum naturam ergo fieri nequit, ut Majestas reali divisione discerpatur in suis juribus, quæ arctissimo nexu sibi colligantur, ut nullum sine fundamento subsistat. Quodcunque jus à Principe communicari dicetur subditis, amittet nativam indolem Majestatis, cujus quælibet particula est summa aliquis potestas. qualis non est facultas illa concessa, cum sine fundamento, quod in principe manet, transferatur. Quod si fundamentum, imperium

rium in personam, Princeps dimittat; jam Majestatem amisit: & de missione securi sumus, ubi alter nihil habet, quod communicet. Certa deinde confusio sequetur, si jura divisa concedemus. Plura summa dabuntur in Republ. quæ id tandem efficient, ut alterum alterius operationes elidat. Præcipua jura sunt, Consiliorum universalis provisio, Legumlatio, bellorum gestio, Judiciorum executio. Sume quodcunque voles, & à Principe remove, aut inter alios distribue, irritos actus habebis, nisi integra Majestas concurrat. Ad directionem bellorum necessaria universalis illa dispositio de utilitate publica: quæ sine præsentī Majestatis virtute, nunquam explicabitur. Finge tamen adhæreat alicui Statuum, num sine potestate in caput, aut in bona efficax deprehendetur. Id maximum momentum facit in potestate belligerandi, quod subditus jure cogitur, ut tendat in hostem: quæ coactio ex potestate in caput profuit. Ipse nervus rerum gerendarum pecunia est, quæ sine facultate in territorium, aut subditi personam non imperatur. Similiter habendum de judiciis. nunquam puniet capitali supplicio, aut multam indicet propriâ auctoritate, qui dicta jura fundamentalia non possederit. Quæ omnia satis valida sunt ad excludendam divisionem Majestatis, & per hanc introductam Remp. mistam. Divide jura minoris momenti, vectigalia, tributa, similia. Nunquam hæc plenè valebunt sine dominio in publica, aut privata. dominium autem illud sine imperio in

caput nec est, nec subsistit. Adhæc nimis crassus videtur error, quod mistionem condiderunt ex divisa Majestate; cum potius communicationem debuissent propugnare. Sola divisio, si contingere posset, nunquam mistionem absolveret; quod poëtico exemplo reipublicæ, ex tribus Monarchiis natæ, & procerum, separatim habentium jura quædam, cognoscere debebant. Talis enim fictitius status divisam haberet majestatem, nec tamen esset mixtus, quod unius saltem speciei individua concurrant. Tres illi monarchæ, non quidem monarchiam formant, cujus naturâ unitate subiecti monarchici absolvitur; sed oligarchiam constituerent. Optimates, divisim potentes, procerum regimen tenerent. Dicendum igitur fuisset; rempublicam mistam, non divisim habitis majestatis juribus æstimari, sed concurrentibus ordinibus, & participantibus majestatem: qui alias discrimen specierum Reipublicæ introducunt. Vulgo quippe increbuit, mistam rempublicam ex diversis speciebus coalescere: id si verum est, conjungi debebant, quæ separatim rerump. essentiam constituere creduntur, ordines nimirum monarchicus, oligarchicus, aut democraticus. Certum enim est, omne mistum & compositum ex diversis coalescere. Et ita promptius respondissent scriptores de natura civitatis, in qua rex sine proceribus, & proceres sine rege possunt nihil. qualis status fuit Scoticus, & hodieque Polonicus. Nulla hic divisio majestatis, nullum jus habet populus seorsim validum, quod

quod regi non tribuendum sit. Unde vacillat descriptio mistæ reip. quæ divisionem postulat. Quamvis nec communicatio majestatis procedat ob dictas rationes: sed modus habendi sit limitatus, cum assumptione procerum in consultationem publicam. Ne quid sine his peragat rex, pactum obstat: ne procures sine rege valeant, defectus Majestatis. Quod genus si mistum vocabis, non repugnabimus magno: nobis tamen aliter haud admittitur, quam si regnum limitatum, in cujus administrationis consortium recipiuntur subditi, eo nomine intelligas, sine divulsione summi imperii. Exempla mistarum civitatum penitus inspecta, vel simplicem Monarchiam, vel Politiam aliquam liberam exhibebunt. Solemne est, misionem probare, tantum non omnium rerum publicarum historiâ. præcipuè verò adfertur regnum Laconicum, aliquibus Atheniensium respublica; item Romana, Regum ac Consulum ætate: nec non Israëlita, ante & post regium imperium. Quod si tamen speciosiora non habebunt argumenta, istis non vincent. Rempublicam Israëliticam, simulac hoc nomen adepta est, Monarchicâ censeo. Democratiam enim hîc nemo suspicatus est: quod populus merè passivè se habuerit. nec Aristocratia commodè appellabitur, cum magni illius concilii auctoritas superiorem agnoverit præsidem, nec omnibus causis decidendis par fuerit. Vocanda ergo Monarchia: sed vocabulo eximiè intellecto: quod alii per *Theocratiam*, augustè satis, eloquuntur. Mosen nun-

quam dixerō Monarcham: Deus optimus maximus hunc populum sibi hæreditarium quasi destinaverat, & præsentissimo numine exsequebatur omnia jura, tractari aliis regibus solita. Quotiescunque cum hoste confligendum erat, divino monebantur oraculo. Sacratissimas leges Deus, in flammâ præsens, cum terrore promulgabat. Jus sacrorum exquisitissima dispositione solus firmabat. Magistratum aliquem universalem Mosen, Josuam, alios creabat, & singulari spiritu instruebat: judicium ipsum per duos & septuaginta seniores disceptabat. Si qua causa legibus determinata non esset, capitalis præsertim, ad Dominum referebatur: quod in judicio Achani, violatoris Sabbathi, & aliis observamus. Tributi & collectarum speciem præbebant, imperatum aurum, argentum, gemmæ, purpura, in Tabernaculi usum comportanda. Item natis filiis imposita capitatio, ut redimerentur certæ pecuniæ summa. quo censu habendæ primitiæ, & decimæ frugum. Monetæ argumentum exhibebit, quod passim in sacris mentio fiat scli Sacraril, vel Tabernaculi. In his, & reliquis juribus, si quæ Mosis ac Iudicum opera fuit, ministerium magistratuum, non imperium regnantium censeatur. Hinc postulante Israël regem, Samueli dicebat Dominus: *Non te rejecerunt, sed me.* Nulla igitur ex hac civitate probatio mistionis. Lacones & Athenienses, verissimo regno sublato, rempublicam liberam habuerunt, ignaram imperiosæ Majestatis, quæ ideò nec dividi potuit. Ista fuit Aristocratia

cratia, in modum regni temperata ; sed ne regi, præter nomen, aliquid regium superaret ; subiecto procerum iudicio, ut à bellicis expeditionibus, quarum summam directionem aliis dicitur habuisse, ab Ephoris sit revocatus, licet felicissimè rem gereret. Imo judicari, & capitis damnari, potuisse, monumenta ejus populi docent. Athenienses puram putam habuerunt Democratiam : quæ impellebatur tamen, ut fieri solet, à magnis viris, & negotiorum atque regiminis capacibus. Deerat interim constans temperamentum aristocraticum, ut viri, innocentissimis virtutibus, qualis justitia Aristidis, populari multitudini unicè exoptanda, præcellentes, exilio stolidissimè multarentur. Romanorum civitatem pro mixta non habebit, quicumque ejus instituta plenius cognoverit. Hic quicquid præ iudicio Polybii sequar. Regum ætate simplicissima Monarchia fuit. Romuli institutum, Patres, instrumenta erant regis. nec inde magis confeceris missionem, quam si Divanum Turci in argumentum trahas divisi imperii, & temperatæ civitatis. Passus est Tullus Hostilius Horatium sororicidam provocare ad populum : non quod veram permetteret multitudini provocationem, sed ut potius reum, quem liberatum cupiebat, civium suffragio, sub aliqua specie juris condonaret ; cum non auderet ipse periculoso exemplo tantum scelus remittere. Qua prudentia verò id concessum subditis, dispiciant, qui auctoritati & dignitati Principis sui cavent. Majori circumspeditione postea Dictator, provocationem

nē ad populum in preces convertit. Quicquid vero jam hujus sit, exploravit saltem voluntatem suorum Romanus Rex; quemadmodum & Romulus istum morem servavit, ut per centurias audiret civium consilia: quem Tacitus interim, prout libitum fuerit, imperitasse, scribit. Sic Alexander Magnus judicia capitalia permittebat, vetusto Macedonum consuetudine, exercitui: sed ut nunquam obscurum esset, quam sententiam vellet prolatam. Si quas leges invenit Servius, quibus Reges tenerentur: explicandæ sunt illæ de pactis, quæ sub modo habendi Majestatem supra vidimus: aut ejusmodi promissis, quæ spem faciunt subditis, regem non neglecturum proprias leges, sed secururum earum tenorem, ut exemplo suo validius firmet suam rempublicā. Cujusmodi quid in ipsis legibus posteriorum Cæsarum apparet, qui dignam vocem majestate regnantis censebant, alligatum se legibus profiteri. quod majus imperio sit, submittere legibus principatum. Nemo tamen tum temporis Rempublicam mistam fabricavit. Ejecto Tarquinio, res publica libera introducta est, quam nec Aristocratiam dixeris, nec meram democratiam: sed cinnum, ex utraque temperatum. Cum verò per modò tradita in hoc genere civitatis non agnoscamus imperium Majestaticum: ut de divisione Majestatis inter procures & populum, quæ nulla est, solliciti simus, ratio vetat.

IV. Nunc sine ambagibus aperienda est natura Liberæ civitatis. Credibile est, imitatos
ordi-

ordinem multitudinis, à Regibus introdu-
ctum, vicinos homines, qui imperium nul-
lum patiebantur, nec regimen publicum ha-
bebant, consultasse in medium de simili vi-
vendi ratione ineundâ, ac convenisse tandem,
de præstandis illis opêris & tributis, quæ à re-
gibus imperabantur subditis, vi promissi sui
exsolvendis, quantum communi rei sufficeret.
Habuerint homines, destituti rege, aliquam
majorem societatem, quam materiales civi-
tatem supra vocavimus; aut segreges familiæ
invicem se consociaverint demum: aliqua con-
ventionem stabiliri debebat futura cōhabitatio,
quoties ab una stirpe non descendebant vici-
ni. Ut vero consequerentur publicum ordi-
nem suæ multitudinis, qualem obtinere in
principatu videbant, opus erat omnium ani-
ma conspiratione, ne gravarentur pro virili
contribuere, quantum ordinationi huic com-
muni, consilio, viribus, sumptibus inpenden-
dum erat. Ergo, quod bene verteret omnium
saluti, se quisque ac fortunas suas stabili pacto
obstringere publico egregio, & promittere
contentissimam operam, tranquillitati & uti-
litati communi conservandæ. Ubi talem in
modum mutuis pactionibus se obligassent,
dispiciebant instrumenta, quibus expedienda
erant publicæ rei incrementa. Definiebatur
singulorum consensu forma futuri operis, &
publicarum operationum facies. Mox suc-
cedebant nova particularia pacta, quæ Comi-
tiorum figuram, & suffragiorum ordinem ac
vim describerent. Hic leges, secundum quas
&

& publica & privata tractarent, rogatae ac promulgatae: obligantes, propter consensum singulorum paciscentium. Unde recte vocantur in republica populari, Sponsio universae civitatis. His porro depingebatur Sacrorum conditio, & quicquid servando tuendoque populo inserviret. Instituti redditus publici, tributa, & vectigalia, ac si qua major vis ingrueret, decreta privatarum rerum occupatio. Pollicebantur cives, se armata manu ituros obviam hostibus, & quaecunque pericula averfuros à civitate. Offerebant itidem operas suas in obeundis quibusvis muneribus, consensu civium delatis. Convenit igitur est, de norma magistratus, ut essent homines idonei, sublevantes sollicitudine sua universos, ne integra comitia expedire omnia negotia haberent necessum. Prospectum infimul est privatis, determinando familiae regimen, quousque potestas in uxorem, liberos, servos, retinenda; quæ rei familiaris, & dominii quærendi modi: nec minus quæ patrum familiarum inter se contrahendi, & commercia exercendi rationes. Utque omnia tranquille agerentur, nec diffidiis locus superesset, si quæ orirentur controversiæ de bonis, aut conventionibus singulorum, inventi sunt iudices, quorum sententiâ se secuturos litigantes spondebant. modò pro tribunali sedens, leges civitatis intueretur. secus appellaturos ad arbitriû universi cætus. Postquâ ita disposita fuit multitudo, integro Concilio incubuit cura cum exteris paces stabiliri, fœdera pangi. Fefellit itaque actuum similitudo plu-

plurium facilitatem, ut crederent, jura Majestatis adesse, quoties viderent similes operationes in Politia, quales in Monarchiâ noverant à Majestate processisse. Sed in his rebus publ. ingēs discrimen est, & caussarum ejusmodi actuum civilium, & obligationis, quæ cives tenentur. Monarchiam Majestas adornat; Majestatem solus Deus indulget Principi. Politia, & regiminis civilis una caussa est pactum commune. cujus vigor obligationem producit & metitur. In regno imperium obligationis fons est, quo subditi tenentur obsequi in omnibus, quæ contra pietatem non impingunt. In libera civitate socius tantum devincitur, in quantum pactus est. extra & supra consensum suum, non obstringitur. Ideo ad plura obligatur subditus, quam civis. nam citra conventionem in singulos minimum potest multitudo: nec in personam, nec in bona valens. Nisi pollicitus esset operas suas contra hostem, nunquam prætextu alicujus imperii educeretur. quod omnes æquales sint, & ideò nec imperent, nec subjiciantur. Similiter vectigal, & tributum ex primo consensu petitur ac confertur, contra voluntatem civium, nemo erit qui justè quicquam imperet. Quod si necessitas communis urgeat, & aliquam invasionem privatae possessionis flagitet: occupabitur res. non vi dominii eminentis, quod in republica populari nullum est; cum essenziale consequens sit imperii Majestatici in personam subditi, qualis hic non reperitur: cum inter æquales nemo subditus sit, nemo imperium in caput, aut domini-

minium in alterius bona habeat : sed beneficio pacti , quo societatem quasi omnium bonorum iniit civis. Inde fas est reliquis sociis , sumere de bonis aliorum , quantum publica salus desiderat : sed sub lege societatis, ut compensatio fiat ei, qui detrimentum passus est, ne minimum desit. Quemadmodum ergo supra in Dominii eminentis occupatione, æquitatis saltem esse compensationem dixi : ita nunc strictissimæ justitiæ est. quod hic socius aliena usurpet : ibi dominus sua repetat. Unicum subest dubiū , quī possit civitas capitali iudicio damnare civem, destituta imperio majestatico in caput. de qua re ita habendum. Rara sunt in populari civitate iudicia criminalia, & atrocissimis saltem criminibus destinata. Ubi autem exercentur , tanquam in hostem creditur animadvertere universitas. Scilicet ubi sanciuntur ultima supplicia latjs legibus , nemo creditur adeo promissi negligens, ut velit contra universum cœtum peccare , nisi hostiliter animatus : quod legem communem scelesto facinore oppugnans , hostis habeatur. Nam offenderit privatum , vel civitatem. Privatus non nisi ab hoste læditur , quem pro atrocitate sceleris interficere potest. ut autem affectibus nihil detur, & quies publica sibi constet, ab ordinario exsecutore sumitur pœna , quæ debatur læso. Ipsa verò communitas læsa , multò magis insurgere contra inimicum suum perduellem potest, & eundem tanquam hostem publicum remove.

V. Superest ut verbo indicemus differenti-
am

am Aristocratiae & Politiae. Mirum discrimen posuit Philosophus. III. Polit. VIII. divitias & paupertatem. Quibus populares potestas & paucorum imperium inter se differunt, sunt paupertas & divitia. Ac necesse quidem est, ubi magistratus gerunt propter divitias, sive sint pauciores sive plures, hoc esse Oligarchiam: ubi vero egentes, populi potestas seu democratiam. Sed evenit interdum, quemadmodum diximus, ut illi quidem sint pauci, hi vero multi. Abundant enim rei familiaris copiis & facultatibus pauci, libertatis autem sunt participes omnes: propter quas causas litigant utrique de rep. administranda. Verum haec, sicut reliqua accidentia, reip. naturae nihil conferunt, & omnes tandem species rerum confundunt. Si democratiam facit paupertas, etiam tum popularis status erit, ubi unus rex pauper imperat. Nimirum respublica libera se distribuit in duplicem speciem: dum paucioribus interdum, quos *Aristos*, *Oligarchos*, *Optimates*, aut *proceres* vocant; permittit regiminis curam; aliquando integra communio sollicitudinem universae civitatis in se recipit; quod genus regendi medio vocabulo *Democratia*, invito *Ochlocratia*, honesto *Politia* Græcis, Latinis popolare regimen vocatur. Quoties enim dicto modo universa multitudo, in comitiis publicis, quaecunque negotia, publica, privata, domestica, peregrina expedit & absolvit; officiales jurisdictioni, & reliquis muneribus publicis, pacem, bellumve concernentibus praeficit ad tempus, quos elapso definito spatio, ad privatam sortem mittit, & alios

alios in horum locum ambulatorio magistratu sufficit, Politia est. Omnis quippe populus decernit, & producit operationes, quæ gubernaculum commune publicâ auctoritate omnium moderantur. In quam classem reposuerim civitatem Atheniensium, quæ purè democratica, & nimis ochlocratica fuit; pluresque alias Græcarum rerum publicarum. Aristocratiam puram paucissimæ gentes habent. Ea est, quando multitudo prudentia, atque virtute aliquorum civium, qui vel divitiis, vel doctrina & rerum gerendarum peritia antecellunt, præclarè confidens, permittit iisdem universale regimen, ita ut hi pauciores omnia consilia publica in manu sua habeant, & plena auctoritate tractent, quæ alias integra civitas solebat perficere: exclusis arbitriis reliquorum civium, qui vota sua paucorum sapientiæ creduntur permisisse, adeo ut ipsa electio in locum decedentium, relinquatur ordini Procerum. Verum cum hanc puram Aristocratiam, libertas suffragiorum tollatur, & æqualitas, liberæ civitatis anima, infringatur, ipsique oligarchumeni cives parum distent à subditis; vulgo autem invisum sit, omne magnum atque excellens, & quod inæqualitatem sapiat; paucissima exempla meræ Oligarchiæ mihi nota sunt. Plura sunt, quæ inter vulgi licentiam & confusionem, ipsumque paucorum dominatum, temperamentum repereunt, & perpetuam quandam classem Senatorum ex nobilioribus ordinarunt, cui interim non permiserunt jus, aliquid proprio arbitrio con-

constituendi: sed exequendi saltem in publicis comitiis decreta. In hunc censum referam plerasque modernas respublicas. ex antiquis imprimis Romanam, post expulsos reges. Permiserat aliquid Patribus; seu Senatoribus populus; sed non absolutam administrationem: & ipse omnes leges, omnia graviora & majoris momenti negotia, in comitiis explicabat. Ubi plerumque consilium suppeditabant Patres, consensum universus populus. Inde formulæ: *Senatus auctor fuit, populus jussit*. Moderatissimum hoc Reipublicæ genus est, quoties sine ambitione & partium studio, communem utilitatem procurat.

Quod restat, Deum optimum maximum, Regem regum, & Dominum dominantium, Majestatum auctorem, & omnis civilis ordinis firmatorem ac vindicem, supplices veneramur; instruat regiis spiritibus, quos summo imperio decoravit; immittat cœleste lumen principum animis, ut agnoscentes datorem omnis potestatis, perpetuò respiciant, colant, & tanquam postulaturum rationes regiminis, metuant; subjectamque multitudinem paternâ indulgentia regant; pietatis & omnium virtutum exemplis moveant. Adspiret omnibus rerum publicarum præsidibus, sapientiam ac fortitudinem, ut suorum commoda providè, justè, strenuè urgeant. Subditorum quoque ac civium mentes moneat, ut superioribus reverentiam, fidem, obsequium exhibeant. Omnes denique Respublicas, quæ nomen ejus adorant, vinculo pacis, concordiae, atque
amoris

amoris invicem vinciat, ut florentem tranquillitatem amplectantur, fruanturque bonis, quas civitas polliceri habet, si rectis artibus ubique regnaretur. Donec soluta orbis structura, & imperiorum compage, benedictus Deus cœlestem auspicabitur civitatem, regnaturus in secula, in æternum & ultra: & humiles reges, promiscuæ multitudini electorum immisti, submisso cultu ingeminabunt; Sanctus, sanctus, sanctus est Deus, Dominus exercituum. Ipsi sit laus, honor, & perennis gloria.

F I N I S.

SERIES CAPITUM,

Prooemii

Cap.	pag:
I. D E Vocabulo Politica & Politici.	1
II. De Genere Politica.	8
III. De Objecto Politica.	15
IV. De Divisione Politica.	23
V. Confectaria de Ethica, vero Politico &c.	35
VI. De Methodo tradendi Politicam.	49

Libri Primi.

I. D E Societate nuptiali.	55
II. De Societate paternis.	72
III. De Societate herili.	86
IV. De Societatibus compositis.	96

Libri Secundi.

I. D E Causa Majestatis.	111.
II. De Imperio in personam.	187.
III. De Dominio in bona publica.	246.
IV. De Dominio eminente.	269.
V. De Regimine Universalis.	325.
VI. De Communicatione Dominiis & Nummi.	343.
VII. De Communicatione Dignitatis & Potestatis.	364.
VIII. De Legatione.	375.
IX. De Modis acquirendi Majestatem.	404.
X. De Modo habendi Majestatem.	461.
XI. De Subjecto Majestatis.	512.
XII. De Subditis.	524.

Libri tertii.

Caput unicum, de Republica Libera.	560.
------------------------------------	------

Politica Tractatio est

Proemialis explicans

Essentialis tradens

Defini-
tionis { verbalia, c. I. } Genus c. II.
 { realia quoad } differentiam
 { ab Object. III.

Divisi-
onis { Partes } Conditione E-
 { c. 4. } thica, vero Po-
 { } litico.
 { Conse- } dignita-
 { claria } re, praece-
 { de } { ptis, au-
 { ditore }
 { }
 { Methodo. c. VI.

Object.
Civita-
tem cu-
jus { Mate- } Simpli { Nuptialis c. I.
 { ria So- } ces { Paterna c. II.
 { cieta- } { Herilis c. III.
 { tes }
 { Lib. I. } Compo- { Familia
 { sita } vicus,
 { cap. IV. } pagus
 { } civitas
 { }
 { Monar- } { Rex, habens
 { chica } Majestatem
 { in qua } Tab. II.
 { lib. II. } { Subditi, qui
 { } debent obse-
 { ma } { quum. C. XII.
 { Respu }
 { blica } Libe-
 { ra lib. } { Aristocratia
 { III. } Democratia


Civitatis Re- { Iusti, Jurisprudencia.
gimen, secun-
dum normam { Utilis, Consultatoria.




Errata hunc in modum corrigenda.

Pagina 9. linea 4. lege activus. p. 47. l. 13. Nam frustra est, quod dicit. p. 77. l. 3. familiâ paternâ p. 94. l. 23. viderint. P. 96. l. 33. patres. P. 150. l. 21. satiant. P. 231. l. 12. ille. P. 263. l. 8. quot. P. 266. l. 29. littora maris. P. 340. l. 20. qui eximium emolumentum, vel damnum inferre possunt. Eidem ergo. P. 354. l. 1. judicant. P. 397. l. 33. consequeretur. P. 417. l. 16. fertur. P. 511. l. 5. dolendum. P. 524. l. 6. Deum. P. 537. l. 2. inobedientia. 555. l. 31. quàm:

Apl 1455014





12

